


Examiné  
Guillaume  
le Roy



1711



X BIBLIOTHECA  
MARIAE DE SCALA

L. 15.2











FRANCISCI LE ROY  
INSVLANI

E SOCIETATE JESU  
DOCTORIS THEOLOGI

EXERCITATIONVM THEOLOGICARVM  
ADVERSVS, HÆRESIS ÆVI PRESENTIS.

SECTARVM, QVÆ RELIGIONIS  
*Reformationem prætendunt,*

LABYRINTHV INEXTRICABILIS.

IN QVO DEMONSTRATVR: NOVATORVM  
fidem, atque Doctrinam universam versari in cir-  
culo, nec ipsos proinde habere in rebus fidei Con-  
troverfis ubi pedem figant, nisi ad Ecclesiæ Catho-  
licæ sensum, traditionemve recurrant.

*Vt prophetis insipientibus, qui sequuntur spiritum suum, &  
nihil vident. Ezech. 13.*

Vt iam non simus parvuli fluctuantes & circumferamur omni  
vento Doctrinæ, Ephes. 4.

*Se Mess de Cala*  
AVENIONE, apud P. OFFRAY. ET VENEVNT.

LVGDVN I,

Apud IOANNEM CERTE sub signo  
Trinitatis.



M. DC. LXXVII. 1-2  
VM PERMISSIONE.

Handwritten signature or text, possibly "John D."

Handwritten signature or text, possibly "J. D."

Small handwritten mark or signature.





AVTORIS AD CANDIDVM  
LECTOREM.

DE HVIVS OPERIS OCCASIONE,  
SCOPO, INSCRIPTIONE.

*P R Æ F A T I O.*



Non exiguum fluxit temporis  
spatium, Lector candide, &  
in Christo dilecte; ex quo da-  
tis in lucem; quæ fidelium  
pietatis, solidæque virtuti, inter Catho-  
licos exaugendæ servirent, nonnullis  
meis lucubrationibus; incessit animum  
tupiditas, & isti alteri, Catholici docto-  
ris officio; quantum finerent occupatio-  
nes aliæ, operæ quidpiam laborisque  
commodandi: ut nempe tot ex ordine  
nostro præclaris scriptoribus, qui ex spe-  
ciali instituti nostri ratione de Errantium  
salute, ac reductione solliciti, iam olim  
susceptum, adversus novellas hæreses;  
acre, nec improsperum; certamen, ho-  
dieque indefessi continuant; succenturia-

Virg. 2.  
Æneid.

## T R A C T A T I O.

tus quodammodo, iisque permixtus, & ipse senili dexterâ, non *imbelle* fortassis, nec *sine ictu*, in communem hostem *telum* jacerem; cuiusque muneris partem aliquam in me derivarem, quod in Ecclesiæ Catholicæ filiis commendat S. Doctor Augustinus, libr. *de Agone Christiano* c. 12. *Ecclesia Catholica*, inquit, *impetus eorum* (hæreticorum scilicet, & aliorum infidelium) *prioribus temporibus frangens, magis roborata est, non resistendo, sed perferendo. Nunc verò insidiosas eorum quæstiones, fide irridet, diligentia discutit, intelligentia dissolvit.* Sic ille.

Verumtamen cum duplex occurrat in re præsentī, adversus hostes Ecclesiæ bellandi ratio: specialis una; quâ sigillatim de hoc, illove controverso Religionis dogmate, disputatio instituitur, eorumque circa illud error, inscitiaque convincitur. Generalis altera; quâ eorundem insulsus ac temerarius in negotio fidei procedendi modus, doctrinæ vanitas & inconstantia, dogmatum improbitas; per-versitasque demonstratur, nullum ex professo impugnando, nisi causâ exempli, & quantum opus est ad eum effectum, qui  
**inten**



## *P R Æ F A T I O.*

intenditur. Priorem quidem rationem; principio sectandam susceperam, & iam nominatim, de corporis Christi in Sacramento veritate, quod eius mysterij difficultas plerisque Novatorum, ab Ecclesiâ Romano-Catholica dissidendi, occasio seu prætextus existat, non pauca chartis mandaveram: cum animadverso, quod ea bellandi ratio, propter materiæ amplitudinem, longioris esset operæ; idque non aliud esse videretur, quàm malæ arboris sigillatim ramos præcidere, qui radice salvâ facile repullulent: visum est potius, & ante omnia, quod contendit posterior ratio, securim ad radicem ponere; illud in univèrsum ostendendo, nihil solidum esse aut subsistens in Religione, quæ prætenditur Reformata, sed sub specioso Reformationis prætextu, nihil nisi dogmata, partim Deo indigna, partim in Christum, eiusque legem contumeliosa, partim ad omnem vitæ licentiam, morumque corruptionem spectantia, in eâ latere.

Cui rei, quemadmodum animo & spe confido, non parum conducet, primæ hæc pars, nostrarum adversus hæreses Exercitationum.

2 4 *Quam*

## P R Æ F A T I O.

Quam , non abhorrente à scopo meo appellatione , Labyrinthum sectarum, quæ Religionis reformationem prætendunt, (eo nomine , non solum Calvinianam , sed & Lutheranam, Zuinglianamque complexus ) inscribo.

Nam tametsi extare non nesciam , eo nomine tractatus varios , ab utraque parte contrariarum factionum, editos : attamen nisi me meus vehementer fallit animus, speciali jure in eum, quem propono, tractatum ea cadere , atque quadrare , deprehendetur appellatio. In quo videlicet, istud speciatim & multifariam ostensurus sum : desertâ Ecclesiæ Catholicæ disciplinâ , apud sectarios nullam superesse fidei normam aut regulam, in qua acquiescat hominis prudentis animus, sed quamcunque in partem se versent , ipsos inextricabilibus conflictari erroribus ; neque ullum usquam patere, litium exitum ; cum tota eorum disciplina, versetur in circulo, & assiduè recurrat ad ipsum difficultatum principium.

Quod sanè vel ipsa demonstrat, eorum in doctrinâ fidei instabilitas , & inconstantia : quando neque ipsi sectarum condito

## P R Æ F A T I O.

ditores , in iis quæ semel excogitarant & adamaverant , dogmatis, perſistere conſtantes , eorumque doctrina conſeſtim in ſectas varias ſibiſque adverſas, concifa ſit; & quotidiana ſit aſſiduaque eorum hominum, de ſecta in ſectam tranſgreſſio, rurſumque ad eam, quam deſeruerant, regreſſio.

Quò apprimè facit , illa B. Hieronymi, in caput 16. Ezechielis , verſu 44. animadverſio. *Semper enim , inquit , errantium fluctuant pedes , nec ſunt ſolida veſtigia , quæ contra veritatem ſunt : ſed huc illucque diſcurrunt , & circumferuntur omni vento doctrina , dum de falſitate tranſeunt ad aliam falſitatem , & cùm in primis fruſtra ſe ſudaffe cognoscunt , ad ſecunda , tertiaque tranſcendunt.* Aut, ut ante illum, L. 7. Strom. uno verbo expreſſit , Clemens Alexan- c. 9. drinus : *Necesse eſt illos per diverſa devios errare , cùm verum iter amiſerint.*

Verùm ad hanc meam cogitationem, opportuniſſima ſunt Ambroſij verba , in Pſalmum 118. enarratione 8. ubi, ad illum verſum : *Cogitavi vias meas , & converti pedes meos in teſtimonia tua; ne ſcilicet ( inquit ) veſtigium in invia & tortuoſa deſle-*  
*ctam*

## P R Æ F A T I O.

*Etiam. Frequenter enim subdit) ignorantes iter, si strata viarum sequuntur, perveniunt quò desiderant pervenire, & carent erroris anfractu. Sin autem usurpent scire quod nesciunt, sed putent aliquà sequenda compendia, à publici actus itinere recedentes, erroris Labyrinthos frequenter incurrunt, ut eos de itinere deflexisse pœniteat; & ideo post multa laborum dispendia, ad iter quod reliquerunt, redire contendunt.*

Etenim, si rectè attendimus, hæc ipsa apprimè proprièque in Novatores nostros conveniunt; qui, obtentu sectandæ viæ compendia, libertatem, inquam, Evangelicam, & iustitiam solius fidei; strata viarum, id est, communem ac publicam Ecclesiæ Catholicæ doctrinam; viam utique salutis, per tot anteriora sæcula, tot sanctorum Patrum, doctorum; Martyrum, certissimis vestigiis, usurpata, tritamque deferentes, & in deviam ac tortuosam declinantes, in variorum errorum anfractus, & Labyrinthos (quæ ipsa vox nostra est) incurrunt irremeabiles. Seu, ut simili sensu, & voce itidem nobis usurpatâ, scripsisse video Tertullianum: *de unâ viâ, obliquos multos trames, & Inextricabiles seminant.*

Quali

## P R Æ F A T I O .

Quali in Labyrintho quandoque sese deprehensum , ingenuè fatetur Theodorus Beza epistola i. ad Andream Duditium , in qua ita loquitur. *Exercuerunt me diu & multum illa ipsa , quas describis cogitationes. Scilicet : nostros palantes omni doctrina vento , & in altum sublato , modò ad hanc , modò ad illam partem deferri. Horum , quæ sit hodie de Religione sententia , scire fortasse possis ; sed quæ cras de eadem futura sit opinio , neque tu certò affirmare queas. A capite ad calcem si percurras , nihil propemodum reperias ab uno affirmari , quod alter statim nen impium esse clamatet. In quo tandem Religionis capite , congruunt inter se Ecclesia , quæ Romano Pontifici , bellum indixerunt ? Sic ibi.*

Quibus utique cogitationibus diu multumque se exercitum testatur Beza : donec nimirum , illos quasi scrupulos , adulta oppressit pertinacia , aut erroris sensum , ipsa errandi assiduitas obduxit.

Quanquam has ipsas , iisque affines , à nobis adducendas , cogitationes , ubi de æternâ animæ salute agitur , seriâ esse , atque attentâ animi reflexione dignas , præsens demonstrabit exercitatio.

In

## P R Æ F A T I O.

*Conc. 2. in  
ps. 38.*

In quâ ; si quandoque fortassis , paulò  
prolixius,fortius , exaggeratiùs , videbor  
agere , excusabit me\* , seu ardor prælij;  
seu studium fraternæ salutis : hortante  
nos itidem his verbis S. Augustino:  
*Tanto magis debemus commemorare va-  
nitatem hæreticorum , quanto magis quæri-  
mus salutem eorum.*

*L. contra  
Donat. post.  
collat. c. 24.*

Illud insuper non vanè monebitur le-  
ctor meus : id inter cætera in hoc tracta-  
tu studuisse me;ut crebris ipsorum adver-  
sariorum testimoniis in rem meam ute-  
rer, & , quod dici solet , tanquam de ipso  
bove lora sumerem : quòd hac ratione  
magis elucescat efficacitas, aut ( ut potius  
istius magni Doctoris voces rursus usura-  
pem ) *violentia veritatis ; quolibet aculeo;  
quibuslibet unguis fortior , ad exprimendam  
confessionem.*

Ac quando intantâ , sive locorum ci-  
tandorum, sive etiam autorum varietate;  
fieri nequit,ut vel locos singulos,ex ipsis  
qui citantur autoribus,haurirem , vel ab  
aliis relatos,cum eorundem textu confer-  
rem:quod proximum fuit, id à me sedulò  
curatum est;ut eos non nisi ab iis scripto-  
ribus,quos eo in genere versatissimos esse  
**constaret;**



## P R Æ F A T I O.

constaret, veluti mutuarer, & quorum fidem, ne ipsis quidem adversariis suspectam fuisse, compertum haberem.

Quos si qua in parte sua scellerit diligentia: non tamen idcirco suspectandus erit noster hic labor, aut conatus etiam ea in parte effectu frustrandus: quando alioqui tot indubitatis testimoniis referta est ista tractatio, ut vel eorum pars dimidia, Novatorum erroribus obruendis, opprimendisque, sufficere possit. Quemadmodum neque duello victor fuisse negandus est, qui non uno letali ictu adversarium conficiat, tametsi hic nonnullas istius petitiones eluserit.

Ad extremum; Deum, Patrem luminum, omnibus precibus obsecro; ut per huius operis occasionem, suâ gratiâ illorum oculos aperiat, quorum utilitati ac saluti præsertim elaboratum est. Quod si hunc exoptatum fructum, vel scriptoris præpedierit indignitas, vel lectorum eluserit pertinacia: illa altera spes supererit, eritque solatio; me ad nonnullos fortasse vacillantes, in Catholicâ fide formandos, aut saltem probos Catholicos, in eadem tenaciùs retinendos, extremâ hæc ætate meâ, nonnihil operæ contulisse.

His

## *P R Æ F A T I O.*

His salve, mi Lector, & cum his monitis, subi, si lubet, Labyrinthum hunc: & si non propensis, aut faventibus, oculis, propterea forsitan, quòd animo, & mente dissimiliter affectus es: at humanis saltem & æquis, illum vel obiter lustrare, quæso, ne dedignare.

IOANNES





JOANNES PAVLVS OLIVA  
PRÆPOSITVS GENERALIS  
SOCIETATIS JESU.



UM partem primam Exercitationum  
Theologicarum adversus hæreses aui  
præsentis à P. FRANCISCO LE  
ROY, nostræ Societatis Sacerdote,  
conscriptam, aliquot Theologi eiusdem Socie-  
tatis recognoverint, & in lucem edi posse pro-  
baverint, potestatem facimus, ut typis mandetur,  
si iis ad quos pertinet, ita videbitur. Datum  
Romæ die trigesima Decembris 1675.

IOANNES PAVLVS OLIVA.

---

IMPRIMATUR,  
SI VIDEBITVR REVERENDISSIMO PATRI,  
MAGISTRO SAC. PAL. APOST.  
I. de Angelis Archiep. vrbis vices-gerens.  
*Imprimatur.*  
F. RAIMVNDVS CAPISVCCVS, Ord.  
Præd. Sacri Palat. Apost. Magister.

ERRATA.

# ERRATA

Paginâ 3. lineâ 4. reuincunur, lege reuincuntur. p. 6.  
l. 14. defenderent, l. defenderet. p. 10. l. 24. pante. l. par-  
te. p. 13. l. antep. Sanctis, l. Sancti. p. 14. l. 31. fatur, l. fa-  
retur. p. 16. l. 2. accipisse. l. accepisse. p. 27. l. 15. ipsa,  
l. ipso. p. 41. l. 25. non igitur singulis priuatis, sed Ec-  
clesiæ. l. non igitur singuli priuati, sed Ecclesia.

Ibid. l. 29. repræsentata, l. repræsentata. p. 48. l. 14. five,  
l. sine. ibid. l. 31. quæ, l. quæ. p. 49. l. 8. seu, l. sed.

Ibid. l. 9. quid, l. quod. p. 50. l. 33. nulla, l. nullo. p. 54.  
l. vlt. neme l. nemo. p. 59. l. 9. alipundo l. aliquando. p. 98.  
l. 3. religionos. l. religiones. p. 116. l. 10. pro l. præ. p. 117.  
l. 10. reformata l. reformatas. p. 143. l. 1. Puitanis. l. Puri-  
tanis. p. 154. l. 28. excæcæcauit l. excœcauit. p. 156. l. 16.  
caliciem, l. calicem.

Ibid. l. vlt. quod l. quod. p. 167. l. 22. possunt l. possum.  
p. 173. l. 23. cum re l. cum rei. p. 192. l. 5. Azio l. Ario. p.  
218. l. 2. idem. Calvino l. idem cum Calvino. p. 223. l. 24.  
criptisse l. scriptisse. ibid. l. 32. tuam l. suam. p. 234. l. vlt.  
æque l. atque. p. 235. l. 1. Theandrita l. Theandrica. p. 255.  
l. 18. Et componendæ l. Ei componendæ. p. 256. l. 1. ciui-  
libet l. cuilibet. p. 290. l. 14. messii l. Lessii.

Ibid. lissus l. missus. p. 304. l. 22. Carlstadium l. Carolsta-  
dium. p. 306. l. 21. princees l. princeps. p. 309. l. 2. cæui, l.  
næui.

Ibid. l. 3. na l. eâ. p. 317. l. 15. Synodo. l. Synodo.  
p. 320. l. 26. sibi l. sint. p. 355. l. 1. fires igitur nouit l.  
fides igitur non sit. p. 370. l. 18. ud l. ad. p. 378. l. 10. elus  
l. velut. Ibid. l. 16. quias l. quasi. p. 382. l. 25. pessundantis.  
l. pessundatis. p. 396. l. 2. expresseum l. expressum. p. 405.  
l. 12. sed l. se. p. 406. l. 7. consilii l. concilii. p. 411. l. 16.  
approbavimus l. probavimus.

## SYLLABVS



# SYLLABVS

## CAPITVM HVIVS OPERIS.

### CAPVT PRIMVM.



*B*omni aeo consueſſe Hereticos ; verbum  
Dei ſcriptum, velut unicam, atque per-  
fectam fidei regulam\*, prætere.  
pag. 1

### CAPVT II.

*Q*ui libri ſcriptura ſint canonici, non poſſe præci-  
ſè ex ipſâ ſcriptura, ſed ex ſolâ Eccleſia tradi-  
tione haberi.  
pag. 7

### CAPVT III.

*I*n propoſita difficultate ; ineptè à Calvino, ad  
ſpiritum cuiusque privatum recurrri. pag. 12

### CAPVT IV.

*M*agis univerſè ostenditur, ſcripturam divinam  
per ſe præciſè ſumptam, ad fidei dogmata ſan-  
cienda, non uſquequaque ſufficientem eſſe.  
pag. 19

### CAPVT V.

*N*onnulla alia rationes ad idem propoſitum ad-  
ductæ.  
P. 25

### CAPVT VI.

*P*roprium eſſe hæreſis genium, in rebus fidei con-  
troverſis, adverſus publicum Eccleſia ſenſum,  
privatas quaſdam inſpirationes, revelationesve  
prætere. pag. 20

È CAP.

# SYLLABVS

## CAPVT VII.

*Perfatuum videri, in sacra doctrina controversiis, non ad publicum Ecclesia sensum, sed ad privatam cuiusque fidelis persuasionem recurrere. p.37*

## CAPVT VIII.

*Prorsus absurdum esse; & vel ipso Calvino iudice, erroribus & scandalis obnoxium: privatam quemlibet divini verbi intelligentiam, & dogmatum fidei discretionem sibi arrogare. pag.46*

## CAPVT IX.

*Nullum Calvinistam certum esse de suo spiritu; ac proinde, neque de legitimo scripturarum intellectu, securum esse. pag.57*

## CAPVT X.

*Insistitur eidem argumento; & exinde spiritus privati ad fines suos inutilitas ostenditur. pa.61*

## CAPVT XI.

*Quantâ arrogantia Reformatores nostri, sibi suisque spiritum veritatis adesse iactent; quem SS. Patribus, immo & Apostolis Christi post Pentecosten, similiter adfuisse negent. pag.67*

## CAPVT XII.

*Reprimitur insolens arrogansque, Lutheri iactantia [ Certum esse, doctrinam suam habere se de cælo ] affirmatissime dei uniantis. p.75*

## CAPVT XIII.

*Speciali ratione conficitur: Doctrinam Lutheri, non de cælo, nec à Deo haustam, sed ex Orco, & à Diabolo profectam esse. pag.81*

## CAPVT XIV.

*Calvinum, aut Calvinistas; quod eis propriè spiritus privatus competat, nullâ satis firmâ ratione probare posse. pag.89*

CAP.

C A P I T V M.  
CAPVT XV.

*Novitias sectas à Deo non esse, ex ipsarum fructibus aperitè colligi. A que in-primis, ex inductâ per illas in orbem Christianum, magnâ vitæ licentiâ, ac supremâ mōrum improbitate. p.99*

CAPVT XVI.

*Extenditur ad Calvinistas, eorumve mores, à nobis susceptâ demonstratio. p.106*

CAPVT XVII.

*Pari ratione, consimilibusque testimoniis ostenditur easdem sectas, ac nominatim Calvinianam, viam pronam ac latam ad Atheismum patefacere. pag.112*

CAPVT XVIII.

*Confirmantur jam dicta, ex eo quòd spiritus Aca-  
tholicus, sit mendax & fallax spiritus. Quod  
primum de Lutherano ostensum. p.126*

CAPVT XIX.

*Idipsum traditur de Calvinistarum spiritu.  
pag. 138*

CAPVT XX.

*Et olim, & modò, usitatum esse Hereticis ipsum  
scripturae divinae textum, ad usus suos variè cor-  
rumpere atque adulterare. pag. 144*

CAPVT XXI.

*Quàm non bonâ fide tractent Calvinista scriptu-  
ras divinas, in eorum facile principe, Theodoro  
Beza, speciatim ostenditur. pag.153*

CAPVT XXII.

*Quàm ininslè sese pro Evangelicis haberi velint,  
qui, non modò corrumpunt Evangelium, sed  
ipsum autorem Evangelij, Christum Dominum,  
omni studio deprimere conantur. p.160*

SYLLABVS  
CAPVT XXIII.

*Per absurdè scripturam sacram, ut legitimam credendorum regulam prætendi ab iis, qui eam fatentur non usquequaque, nec per omnia, infallibilem esse.* pag. 169

CAPVT XXIV.

*Quàm impiè Lutherus cum asseclis, legem veterem; eiusque latorem Moysen, accuset, damnet; ipsumque adeo decalogum prorsus elidere atque abolere satagat.* P. 174.

CAPVT XXV.

*Ostenditur, quemadmodum Lutherus, & quidam alij, polygamiam, & libellum repudiij, inter Christianos licita esse adversus Evangelium, docuerunt.* pag. 178

CAPVT XXVI.

*De attentatâ à nostris Evangelicis, supremâ atque omnimodâ, legis Evangelica abrogatione.* pag. 186

CAPVT XXVII.

*Refelluntur Zuinglij & Calvinii ad argumentum, iam propositum, responsiones.* pag. 197

CAPVT XXVIII.

*De eo, quod ex suâ doctrinâ infert Lutherus: solam infidelitatem esse peccatum.* pag. 209

CAPVT XXIX.

*De opposito sectariorum pronuntiato: omnia, etiam fidelium, opera esse peccata, eaque per se mortifera.* pag. 217

CAPVT XXX.

*De altero Lutheri corollario: Timorem divinorum iudiciorum, fidelium cordibus; non à Deo, sed à Diabolo immitti.* pag. 229

CAP.

# C A P I T U M.

## CAPVT XXXI.

*Appendix, & conclusio ante dictorum.* pag. 232

## CAPVT XXXII.

*Quibus aliis modis, Reformati nostri, novi Testamenti auctoritatem concutiant atque convellant.* pag. 241

## CAPVT XXXIII.

*Calvinum, impiâ temeritate, Evangelicorum Christi sermonum, censorem & correctorem agere.* pag. 249

## CAPVT XXXIV.

*Confessionem fidei Reformatâ Gallicanam, ne ab ipsis quidem Calvinistis, pro verâ & indubitatâ fidei regulâ habendam esse.* pag. 252

## CAPVT XXXV.

*Variis exemplis ostenditur, ipsos Reformatos, Confessionem fidei suâ, pro indubitatâ credendorum regulâ non habere.* pag. 263

## CAPVT XXXVI.

*Assertionis supra posita aliunde petita confirmatio.* pag. 269.

## CAPVT XXXVII.

*Eundem in finem, aliud Bezanum pronuntiatum, expenditur.* pag. 277

## CAPVT XXXVIII.

*Quàm non fraternè se tractent fratres Evangelici, quos Beza contendit, ad unam eandemque Christi Ecclesiam pertinere.* pag. 284

## CAPVT XXXIX.

*Confessionem Augustanam, multiplicem, variam, sibi que contrariam existere; ut proinde nemini Lutherano satis constare possit, quid secundum illam, sibi sit certâ fide tenendum.* pag. 294

C A P.

# SYLLABVS

## CAPVT XL.

*Lutherum & assecclas, in tradendâ fidei doctrinâ,  
non veritati aut conscientia, sed tempori, usui-  
que seruissse.* pag. 298

## CAPVT XLI.

*Idem de Calvino & Sacramentariis ostenditur.*  
pag. 306

## CAPVT XLII.

*Calvini sectarios in constituendâ fidei regulâ, va-  
rios, instabiles, & inconstantes esse* p. 314

## CAPVT XLIII.

*Declaratur altera doctrina proposita ratio* p. 321

## CAPVT XLIV.

*Quàm absurdas in sensus inducat Calvini sequa-  
ces, temerè usurpata in fidei rebus analogia  
ratio.* pag. 331

## CAPVT XLV.

*Proprium atque perpetuum, & olim fuisse, & modò  
existere, sectariorum cacò: hez, non sensum suum  
ad scripturas divinas, sed ipsas scripturas ad  
sensus suos anticipatos, accommodare, Eamque  
primitivam omniū haresum originem esse.* p. 340

## CAPVT XLVI.

*Ex dictis nominatim deducitur, quàm falsò Calvi-  
nus, eiusque pulli, de accurato, pra Catholicis,  
puri verbi Dei studio, usque gloriantur.* p. 351

## CAPVT XLVII.

*Idem Calvinistarum specialem scripturâ divinâ,  
ut propriâ regulâ non niti.* pag. 355

## CAPVT XLVIII.

*Deducitur ex Calviniani dictis, prædictam fidem  
specialem, unicum & adequatum fidei Calvi-  
niana actum esse; & quod hinc sequitur, nullum  
fidei*



## C A P I T V M.

*fidei Calviniana assensum, verbum Dei scriptum, pro regulâ propriâ habere.* P. 360

### C A P V T X L I X.

*De eo, quod Calvinii sequaces, in fidei inter se controversiis, ad Principes, aut Magistratus seculares, tanquam ad ultimos atque supremos, in Religionis materia, Indices recurrunt atque confugiunt.* pag. 366

### C A P V T L.

*Adduntur nonnulla ad maiorem dictorum explanationem.* pag. 375

### C A P V T L I.

*In Synodi Calviniana processu, Drodraci pronuper habitæ, velut in illustri speculo, quàm nusquam consistat eius sectæ disciplina, manifestè conspici posse.* pag. 380

### C A P V T L I I.

*In quo, quid tandem emolumenti, detrimentive, ex eâ Synodo captum fuerit, expenditur.* P. 383

### C A P V T L I I I.

*Ex decursu operis infertur: sectis reformatis nihil solidi aut certi inesse: sed eas, sub speciosis pretextibus, inanem duntaxat ideam, & fallax simulacrum Evangelicæ veritatis exhibere.* pag. 392

### C A P V T L I V.

*In quo expenditur Tertulliani locus egregius, ex quo ad extremum elucescat simplex ac prudens Ecclesiæ Catholica, præ tortuosâ ac fallaci adversariorum, in fidei causâ procedendi ratio.* pag. 400.

C A P.




# LABYRINTHVS

## INEXTRICABILIS

### SECTARVM , QUÆ

#### RELIGIONIS REFORMATIONEM

#### PRÆTENDVNT.



## CAPUT PRIMUM.

*Ab omni aeo consueſſe hæreticos, verbum Dei ſcriptum, velut unicam atque perfectam fidei regulam, prætendere.*



UIT is iam inde ab ipsis Ecclesiæ Christianæ exordiis, eorum qui adversus illam, novis excogitatis hæresum formis, insurrexere, proprius genius, vsusque constans: vt se, pro unicâ, eâque integrâ atque perfectâ, fidei, seu regula, seu normâ, scripturas sacras agnoscere prætenderent. Sive, vt specioso puri verbi Dei prætextu, simplicioribus, incautioribusve imponderent: sive, vt eâ ratione, obiectum si-

A bi



## L A B Y R I N T H V S

bi antiquitatis sensum, conciliorum decreta, patrum traditionem, vno quasi flatu, si fieri posset, disjicerent ac dissiparent.

Enim-vero de vetustis illis suæ ætatis hæreticis, ita loquitur Tertullian. libro de Præscriptionibus c. 15, *Sed ipsi & de scripturis agunt, & de scripturis suadent. Aliunde scilicet loqui libris possent, de rebus dei; nisi ex scripturis fidei: Quos equidem (scripturas, velut figmentis suis vnicè faventes iactare solitos) tradit, observatione inveteratâ, & ab ipsa Apostolorum ætate, deductâ præscriptione, retundendos.*

Subsecuti dein Ariani negabant vocem *homonion*, quod in scripturâ non extaret, esse admittendam. Et apud S. Hilarium libro contra constantium, Arianus sic loquens auditur: *Nolo verba, qua non Scripta sunt legi.* Itemque Maximinus apud Augustinum libro 1. contra eundem: *Hæ verò voces (aiebat) qua extra scripturam sunt, in nullo casu à nobis recipiuntur.*

Pelagiani autem apud eundem lib. de natura & gratia, cap. 39. *Credamus (aiunt) quod legimus, & quod non legimus, nefas credamus astruere.*

Eutyches denique in Concilio Chalcedonensi, actione 1. interrogabat Patres; *in qua scriptura iacent due natura?* omitto alios, qui legi possunt apud Coccium in Thesauro Catholico.

Horum igitur aliorumque maiorum suorum, æmuli Novatores nostri, (vt omnes in Ecclesiæ Catholicæ odio congruunt) & ipsi scripturam, pro vnica fidei regulâ, se habere iactant,  
exclu

exclusâ omni traditione non scriptâ, Patrum cōsensu, autoritate Conciliorum &c. quia nempe (vt rectè libro citato Tertullianus) *necessariò nolunt agnoscere ea per qua revincuntur.* Cap. 17.

Ita enim expressè Calvinus epistolâ contra Præcentorem Lugdunensem: *Nihil credendum est quod non expressum sit.* Cui consentiunt ipsius in Gallia discipuli consentaneè ad articulum 5. Confessionis suæ, quâ profitentur scripturam sacram, esse omnis veritatis regulam: Et ad id quod rursus Calvinus l. 4. *Instit. c. 8. §. 8.* vbi: *Est, inquit, hoc firmum axicma: non aliud habendum esse Dei verbum, cui detur in Ecclesia locus, quàm quod lege primum & Prophetis, deinde scriptis Apostolicis continetur.*

Consentit Zuinglius in explanatione articuli 64. vbi sibi bellus venustulusque visus est, ita proloquens: *Mox incipis, clamare: Patres, nempe Patres sic tradiderunt. Sed ego non Patres tibi refero, non Matres! sed verbum Dei requiro.*

Tandem Reformatorum Protopatriarcha Lutherus, cum in caput 1. Epistolæ ad Galatas, sub modesto calamo ista scripsisset: *Neque aliam doctrinam in Ecclesia tradi & audiri debere, quàm verbum Dei, hoc est sacram scripturam;* in libro, quem scripsit adversus Regem Angliæ, insolentiùs effervescens, voce tumidâ ac tumultuâ: *Ego, inquit, adversus dicta Patrum, hominum Angelorum, demonum. pono, non antiquum consensum, non multitudinem hominum, sed unius maiestatis æterna verbum.*

Rursusque alibi, etiam magis intolerando fastu, & eâ vocum arrogantia, quæ facilè prodar-

discipulum eius, de quo scriptum est: *Ipse est rex super universos filios superbia*; in libro nimirum de servo arbitrio contra Erasmus, editione primâ, sic exandescit: *Deponite quidquid armatura suppeditabunt veteres Orthodoxi, Theologorum Schola, auctoritas Conciliorum & Pontificum, consensus tot seculorum, ac totius populi Christiani, nihil recipimus, nisi scripturas; sed sic, ut penes nos solos sit certa auctoritas interpretandi. Quod nos interpretamur, hoc sensit spiritus sanctus: quod adferunt alij, quamvis magni, quamvis multi, à spiritu satana, & alienata mente profectum est.*

Quibus adde, quod ait libro contra statuta Ecclesiæ, & alibi non semel: *Iudex esse volo, non modò hominum, verùm & cunctorum Angelorum.* Sic ille, equidem novi typi Apostolus & exotici moris Evangelista.

Quibus animus non est, quicquam in præsentia opponere nisi pauculas illas, humillimi, sed summi, Doctoris, Augustini voces; supparem huic Fausti Manichæi insaniam libro contra ipsum II. cap. 2. sic retundentis: *Tu ergo es regula veritatis quidquid contra te fuerit, non est verum?*

Interea contra hanc communem, vti vidimus, perpetuamque hæresum, adversus Ecclesiam Catholicam, per temporum intervalla insurgentium professionem; firma stat atque inconcussa ipsius Ecclesiæ sententia; scripturam sacram esse quidem primam atque supremam fidei divinæ, sive credendorum, regulam; non tamen adeò per se vnicè sufficientem, quin variis casibus, ad fidei dogmata, sive pernoscentia, sive tuenda, illi  
adjun

## IN EXTRICABILIS.

adiungenda sit ipsius Ecclesiæ, iam ab initio ad ea tempora, continuata atque deducta traditio.

Quæ sanè veritas, tum ipsius scripturæ autoritate comprobari, tum perpetuo atque constanti Patrum consensu, efficaciter confirmari potest; & variis modis in ipso decursu fundabitur. Verum quia hoc ipsum, quod efficere contendimus, nervoso quodam compendio traditum expositumque videre est in prisca scriptoris S. Vincentij Lirinensis aureo libello, quem ipse inscripsit: *commonitorium adversus profanas vocum novitates*; placuit ex illo (omissis nunc aliis) quasi in antecessum, quædam, quæ præsertim ad rem faciant, delibare, ijsque aditum ad subsequenter dissertationem præmunire.

Is igitur, principio operis, ipsam in primis adstruit Catholicam veritatem: edicens, ex communi nimirum sanctorum Patrum Doctorumque iudicio; quod, *quicumque velit, exurgentium hæresum fraudes deprehendere, laqueosque vitare, & in fide sanâ sanus atque integer permanere, duplici modo munire fidem, Domino adiuvante deberet; primo scilicet divina legis autoritate, tum deinde Ecclesia Catholica traditione*, subditque hunc semper viguisse morem in Ecclesia Dei. Cap. 1.

Et aliis exemplis prætermisiss, vnicum profert ab Apostolicâ sede petatum, ex facto scilicet Stephani Papæ: Agrippini Carthaginensis Episcopi errori, (qui baptizatos ab hæreticis rebaptizabat) resistentis, & contrariam traditionem opponentis; atque adeò in Epistolâ, quæ tunc in Africam Cap. 2.

missa est, his verbis sancientis : *Nihil novandum, nisi quod traditum est.*

Ait autem se, istud exemplum, potissimum ab Apostolicâ sede petere: *ut omnes luce Clarius vivant* ( ad quam Lucem utinam oculos aperiant Novatores nostri ) *Beatorum Apostolorum beata successio quantâ vi semper , quanto studio , quantâ contentione defenderit suscepta semel religionis integritatem.*

Porro , quod ad Vincentij ætatem religiosè custodivit sedes Apostolica ( erat autem ille Augustini ævo suppar; quippe Cassiano æqualis ) ut nempe receptas traditiones , adversus hæreses emergentes studiosissimè defenderent ; hoc quoque Stephani successoribus, ad hæc usque tempora curæ fuisse , vel ipsi sentiunt adversarij.

Intelligebant enim & ipsi quoque, ut præclaras eiusdem Vincentij voces adjiciam: *nihil aliud rationem pietatis admittere ; nisi ut omnia, quâ fide à patribus suscepta firent , eâdem fide filiis consignarentur ; nosque religionem, non quâ vellemus, ducere ; sed potius, quâ illa duceret, sequi oportere: idque esse proprium Christianæ modestiæ & gravitatis, non sua posteris tradere, sed à maioribus accepta servare.*

Quod profectò salutare monitum intelligere, ac sequi nolunt , qui scripturæ prætextu, ad novitium sensum suum intellectæ , instituta maiorum, & priscae fidei sinceritatem, temere insolenterque corrumpunt.

Quibus utinam vel illa prosit quam extremam appono, ad eam ipsam rem peropportuna eiusdem auctoris observatio, Etenim cum animadverteret

## INEXTRICABILIS.

7

verteret suæ doctrinæ objici posse, quod etiam nū nobis obiectant sectarij : *Cū perfectus sit scripturarum Canon, sibi que ad omnia satis superque sufficiat; quid opus est ut ei Ecclesiastica intelligentia iungatur autoritas?* Cap. 1.

Ad id respondet : eā gratiā id opus esse : quia videlicet scripturam sacram , pro ipsa suā altitudine , non uno eodemque sensu universi accipiunt; sed eiusdem eloquia aliter, atq; aliter alius atque alius, interpretatur: ut pæne quot homines sunt, tot illinc sententia erui posse videantur. Aliter namq; illam Novatianus, aliter Photinus, aliter Sabellius, &c. ( dicamus nos: aliter Lutherus , aliter Calvinus, aliter Zuinglius ) exponit. Atque idcirco multum necesse est, propter tantos tam varij erroris anfractus ut Prophetica & Apostolica interpretationis linea, secundum Ecclesiastici, & Catholici sensus normam dirigatur. Hæc ille per omnia appositissimè , & quoad hoc caput, attinet , præ cæteris scriptoribus, exquisitè.

Sed nunc adversus hunc pervetustum & rancidum Novatorum errorem , specialius agere insistamus.



## C A P V T II.

*Qui libri scriptura sint Canonici non posse præcisè ex ipsa scripturâ , sed ex solâ Ecclesiæ traditione haberi.*

**P**riusquam quodcunque dogma; veluti à Deo in scripturis revelatum credamus; nobis certò

A 4

constare



### 3 L A B Y R I N T H V S

constare debet , hos vel illos scripturæ libros, ex quibus dogmatis veritas probatur,esse canonicos,sive reipsa esse scripturam divinam,& continere in se verbum Dei.

Alioqui enim cur potius , exempli gratiâ ea credimus,quæ traduntur in S.Marci Evangelio, quam in eo,quod præfert nomen S.Thomæ; nisi quia persuasi sumus,illud reipsa Canonicum,hoc autem apocryphum esse?

Atqui de hoc nobis certò constare nequit præcisè ex ipsa scripturâ ; sed , quantum quidem fert hic rerum status , ex solâ innotescit Ecclesiæ Catholicæ traditione. Ergo , saltem ex ea parte , falsus est ille fidei Reformatæ articulus, quo asseritur scriptura sacra esse regula omnis veritatis.

Propositio subsumpta , in quâ solâ est difficultas , traditur imprimis à Patribus Tertuliano lib. de Præscriptionibus capit. 21. Irenæo lib.3. c.4. &c.

Facitque præsertim celebre dictum Augustini, lib. contra Epistolam fundamenti capit. 5. *Ego Evangelio non crederem, nisi me Ecclesia commoveret autoritas.*

Quod magni Doctoris verbum,præter morem commendans ipse Lutherus nobisque eâ ex parte favens,lib. de captivit. Babylonica, ita loquitur : *Hoc sanè habet Ecclesia quod potest discernere verbum Dei à verbis hominum: sicut Augustinus confitetur , se Evangelio credidisse , motum auctoritate Ecclesiæ , quæ hoc esse Evangelium prædicabat.*

Atque ad hoc ipsum Scripturam per se non  
suffice

## INEXTRICABILIS.

sufficere ; ipso experimento evidens est, & quasi manu palpari potest. In quâ enim , quæso scripturæ parte, aut quibus in locis, expressum habetur eos omnes libros determinatè , quos seu Lutherani, seu Calvinistæ pro Canonicis , habent, reipsa esse verbum Dei: cum de eorum plerisque nulla scriptura reflexè loquatur : nec verò sufficere possit, quòd ij de quorum autoritate quæritur, sese testentur esse divinos.

Alioqui omnes qui pro divinis vèditantur, pro talibus agnoscendi essent: cum è diverso ex Ezechiele v. g. manifestum sit , non defuisse falsos Cap. 13. Prophetas, qui dicerent, *ait Dominus , ait Dominus; cum Dominus non esset locutus.*

Et quamvis fortassis aliquis liber Canonicus, alium librum reflexè commendet, prout epistolas Pauli, commendat Petrus epistolæ 2. cap. 3. attamen & hoc ipsum rarum & singulare est, & hoc dato , erit aliunde ipsius libri A, commendantis librum B, autoritas comprobanda : quod fieri non poterit , absque processu in infinitum, aut vitiosa & inutili petitione principij. Et semper restaret quæstio ; utrùm videlicet hic codex epistolarum Pauli, sit ille reipsa, quem commendat Petrus in Epistola : pro quo etiam denique recurrendum esset ad Ecclesiæ autoritatem.

Cuius rationis evidentiâ convicti plures Protestantes Angli , apud Ioannem Breverleum aliàs Breverleum in opere inscripto : *Apologia Protestantium pro Romana Ecclesia* , ( cuius nos auctoris in referendis sectariorum locis diligentia, in his Tractatibus libenter nec parcè utemur ) tanquam eum casum à suâ generali regulâ exciperent,

rent, censuerunt id quod hîc tradimus, extra controversiam esse debere. Ita enim videas istic, inter alios, loquentem Hokerum l. 2. *De Ecclesiasticâ politiâ* : *Ante omnia, inquit, scire interest, quidam libri pro Canonicis habendi sint. Quod quidem è scripturis ipsis haberi non posse, omnes consentiunt. Non enim est, vt subinde addit; verbum Dei quod efficit, aut unquam efficere potest, vt securi simus illud esse verbum Dei, sed sola Ecclesia id præstat. Et rursus ipsum Ecclesia autoritate, tanquam motivo externo, scripturas sacras dignosci, nemo est qui nesciat.*

*Tract. I. c. 3.  
sect. II. §. I.*

Adjicio eidem consentientem Covellum: qui, *Proculdubio, inquit, probabilis est illa opinio Romanensium, si ultra non procedant, quâ dicunt scripturas in se quidem sanctas & divinas esse; ut tales autem à nobis agnosci per Ecclesiæ autoritatem.*

Denique, vt testatur suprâ laudatus autor, plures alij è Protestantibus, nobiscum planè consentientes, concedunt Ecclesiæ potestatem, veras scripturas à falsis discernendi, & verbum Dei ab inventis hominum; adeoque hoc illi privilegium à spiritu sancto esse concessum.

Neque eâ in parte dispar est Lutheranorum Germanorum conditio.

*Disp. I. de fide q. 5. n. 130.* Quippe qui in Colloquio Ratisponensi anni 1601. (cuius pars erat, qui de his testatur Adamus Tannerus,) eodem argumento compulsi sunt denique fateri; quinam libri sint, vel non sint Canonici, haberi ex traditione & testificatione Ecclesiæ: sed hanc traditionem negarunt pertinere ad dogmata aut articulos fidei, de quibus esset controversia: sed tantum ad historiam à spiritu sancto traditam.

Quali

Quasi verò per hoc salvaretur ipsorum professio; quâ generaliter adstruebatur, nihil esse certâ fide credendum, quod non vel expressè contineatur in scripturâ, vel ex eâ deducatur per evidentem consequentiam. Aut perinde quasi, eo, de quo sermo est, admissio (sive illud dogma, aut articulus fidei appelletur, sive non) non sit facilis ad alias quoque traditiones stabiliendas progressio. Et nominatim, ut ad hoc ipsi vel inviti compellantur: omnes libros, quos Ecclesia Catholica pro Canonicis habet, pro Canonicis agnoscere; quandoquidem de illis omnibus, eius Ecclesiæ, cuius auctoritate ducti, scripturas ipsas recipiebant, par esset traditio & testificatio.

Propter quæ, & alia eiusmodi in eadem Germaniâ David Paræus Calvinista, ab affinibus suis Lutheranis, eo in colloquio rem malè gestam, & causam communem proditam esse, conquestus est. Etenim, ut ait apud Tannerum nu. 143. *Si tamen, vel precipuè, ex traditione seu testificatione Ecclesiæ, id crederemus*, (nimirum hos vel illos libros esse Canonicos, quod prius, quàm ea quæ in eâ scriptura continentur; nobis credendum est) *utique principium fidei, immò tota fides nostra niteretur testimonio Ecclesiæ: scriptura verò non esset unica norma fidei & dogmatum*; quod tamen volebant adversarij, seu Lutherani.

Addit igitur: eo in colloquio, ad argumentum Catholicorum negari non debuisse; quin illa de libris Canonicis assertio, sit dogma Catholicâ fide credendum, & articulus fidei: sed negandum fuisse, illud non contineri in scripturâ.

Quod

## 12 L A B Y R I N T H V S

Quod tamen posterius, cum, ut ostensum est, & rectè viderunt Protestantes citati, sit prorsus absurdum & improbabile : hinc iam subducere & apparere incipit lectori meo, quas in angustias & Labyrinthos redigat eiusmodi homines, pruritibus quidam, sive libido novitatis, & procax studium sese Ecclesiæ Romano-Catholicæ opponendi. Quod non vnâ deinceps occasione inculcabitur.



### C A P V T III.

*In propofita difficultate, ineptè à Calvino ad Spiritum cuiusque privatam recurri.*

**I**Oannes Calvinus obiectionis à nobis factæ difficultatem sentiens, cum neque ex ipsa scripturâ, quinam eius libri habendi essent Canonici, satis probari posse perspiceret; neque eâ gratiâ ad Ecclesiæ Catholicæ autoritatem recurrere, reliquæ suæ doctrinæ satis consentaneum esse sentiret: eam Philosophandi rationem excogitavit, ut diceret; de ipsâ librorum Canonice veritate, neutro horum modo satis constare; sed id per privatam spiritus sancti testificationem, & persuasionem interiorem, unicuique credentium compertum esse.

Ita enim expressum habetur in supradictâ confessione fidei, conceptâ nomine Gallorum, qui vivere cupiant secundum puritatem Evangelij Domini nostri IESU CHRISTI, & Regi Franciæ  
corum

eorum nomine oblatâ : cuius articulus IV. est huiusmodi. *Agnosceimus hos libros* ( quos nempe articulo 3. enumeraverant ) *Canonicos esse , & certissimam fidei nostræ regulam ; non tam ex communi Ecclesiæ consensu , quàm per testimonium & interiorē persuasionem Spiritus Sancti , qui nos facit illos discernere ab aliis libris. Ecclesiasticis ; &c.* Sic illi ; quod tamen assertum priusquam directè refello ; placet duo quædam circa illud animadvertere.

Primum ; verba illa , *non tam ex communi Ecclesiæ consensu* , eo in articulo perplexè & malignè esse posita perinde atque si in eo librorum sanctorum Canone constituendo, communis Ecclesiæ consensûs rationem aliquam habuerint; cùm tamen diversum , & multis partibus deficientem Canonem, adstruant.

Alterum : neque Calvinistas ipsos, hoc modo tueri Doctrinæ Confessionis suæ consequentiam. Nam cùm manifestum sit in hoc rerum statu necessariam esse ad salutem, veritatem illam, quod exempli gratia hi vel illi libri sint Canonici & scriptura sacra; eaque veritas, uti fatentur , non contineatur , nec exprimatur in ipsâ scripturâ: quomodo absolutè & univèrsè verum erit, quod articulo V. subiungitur ; *Verbum Dei contentum in scripturis sanctis esse regulam omnis veritatis* , &c. quandoquidem eius veritatis, de qua agitur , regula aut norma non sit ipsa scriptura divina, sed secundum nos quidem traditio Ecclesiæ Catholicæ; secundum Calvinum atque sequaces, testificatio & persuasio interior spiritus sanctis: verum his omissis, adversus hanc ipsam testificationem interiorem directè facit.

Primum;

Primum ; quod ex ipsâ rei naturâ perabsurdum videatur, & ordinatissimæ Dei providentiæ in Ecclesia suâ constituendâ & gubernandâ, nullo modò conveniens; vt prima & generalis credendorum regula ( qualis est scriptura divina, seu libri Canonici ) eaque totam communitatem per sese obligans ; per se directè non promulgetur ipsi communitati credentium ; sed occultâ quadam, atque arcanâ testificatione sigillatim insinuetur credentibus ; ex quo consequenter, & velut per accidens , innotescat vniversis.

Contrarium enim dictat communis sensus & recta ratio ; secundùm quam , tum legislatores, tum morales Philosophi , vt axioma habent, quod l.9.Cod.de legibus, in hæc verba constitutū est : *leges sacratissima , que constringunt hominum vitas, intelligi ab omnibus debent*: idque (ex eorundem sensu vsuque) cum sint communis & publica vivendi regula, per communem & publicam promulgationem.

Atque ita videmus legem decalogi v.g. non sigillatim à Deo impressam cordibus fidelium, sed publicè per Moysen in monte Sina promulgatam, legem item novam à S. Petro in die Pentecostes promulgatam populo ; atque inde per Apostolos, eorumve in Ecclesiâ gubernandâ successores , inter credentes divulgatam ; non autem singulorum animis per se ab ipso Deo insinuatam. Quâ ratione convictus à Calvinistis VVittakerus adversus stapletonum scribens; fatetur *traditionem Ecclesiasticam esse argumētum, quo argui & convinci possit , qui libri Canonici sunt, qui non sunt: nam spiritus sancti testimonium cum prius*

*privatum & arcanum sit, ad alios docendos & refellendos accommodatum non est.*

Deinde probatur in re propositâ recurrendum esse, non ad spiritum cuiusque, sed ad sensum atque traditionem Ecclesiæ; quòd divinæ veritatis, atque adeò verbi Dei, custodia, non singulis hominibus à Christo, sed ipsi Ecclesiæ eiusve Rectoribus, commissâ sit. Quæ idcirco 1. Tim. 3. dicitur *columna & firmamentum veritatis: quibus verbis*, ipsomet Calvino interprete lib. 4. inst. c. 1. §. 9. *Significat Paulus: ne intercida veritas Dei in mundo, Ecclesiam esse fidam eius custodem, quia eius ministerio & operâ, voluit Deus puram verbi sui prædicationem conservari.* Ab eâ igitur, & non à singulis (qui utique non sunt columna & firmamentum veritatis,) accipiendum est, quodnam sit legitimum verbum Dei; sive, qui libri re ipsa sint scriptura divina, & hoc sensu, Canonici.

Atque ex his ipsis Calvini verbis ulterius inferas, quod non parum facit, ad controversiarum, quas hic tractamus, declarationem: ne intercederet veritas Dei in mundo, oportuisse, ut usque ad Lutheri & Calvini tempora, superfuisset in mundo vera aliqua Ecclesia, in qua pura verbi Dei prædicatione, & consequenter ipsum verum ac purum Dei verbum, sive ipsa divinæ scripturæ veritas, à maioribus accepta conservaretur, & traderetur ad posteros. Quæ quidem alia esse non potuit, quàm Ecclesia Catholica: præter quam (ut ipsi agnoscunt) nulla alia fuit vera Dei Ecclesia, saltem visibilis.

Neque enim, opinor, nisi ridiculè quis dixerit, legitimum scripturæ canonem, usque ad id temporis



poris conservatum fuisse, ab Ecclesia aliquamvisibili, eumque ab ea, visibiliter accipisse Calvinum, &c.

Quò spectat, quòd ipse Calvinus cap. citato §. 4. expresse dicat, pernecessariam esse visibilis Ecclesie cognitionem: *quando non est. alius in vitam ingressus, nisi nos ipsa concipiat in utero, nisi pariat, nisi nos alat suis uberibus*; verà scilicet & purà verbi Dei prædicatione. Ergo & verbi Dei puram prædicationem, & veram scripturam accepit Calvinus ab Ecclesia visibili, eà videlicet in cuius utero conceptus fuit, in quâ per baptismum renatus est, quæ non alia fuit quam Catholica Ecclesia, ut est manifestum.

Ipso denique ingenuè, nec vno loco, agnoscente Luthero, & nominatim in Epistola ad Anabaptistas: *in Papatu esse veram Scripturam, verum baptismum, verum Sacramentum altaris, veram remissionem peccatorum* &c. atque hæc exinde ad reformatos pervenisse. *Alioqui* ut addit, *quid de istis omnibus sciremus?*

Neque hic fortasse dixerit Calvinista quispiam devenisse quidem à Papatu ad Reformatos librorum canonicorum notitiam: sed cum inter eos, qui verè essent Canonici, plures admiscerentur, qui reipsa tales non essent, oportuisse verè Canonicos discerni à non canonicis: quod iam non potuit absolute haberi ex consensu Ecclesie, sed solum per testimonium & persuasionem interiorum Spiritus Sancti.

Contrà enim facit; quod, etiam istâ ratione, contrà quàm contendit ipse Calvinus, intercidisset veritas Dei in mundo: neque enim in Ecclesia Catholi

Catholicâ , apud quam fuerunt conservatæ divi-  
næ Scripturæ , inventa fuisset , pura prædicatio  
verbi Dei ; quia ibi non est pura verb. Dei præ-  
dicatio, vbi pro legitimo Dei verbo aliquod adul-  
terinum vendicatur.

Postremò : recursus ille ad spiritum cuiusque  
privatum , non tantum ex rei naturâ minùs ido-  
neus , aut sufficiens est in re præsentî ; sed , vt ipsa  
demonstrat experientia, ambiguus, perplexus, &  
fallax est. Etenim cum inter ipsos Reformatos  
non conveniat quinam reipsa sint Libri cano-  
nici ; Calvino v. g. nonnullos admittente , quos  
rejecit Lutherus, & contra, utrisque interim spiri-  
tum internum , quo id discernant , allegantibus  
& sibi asserentibus , iam hoc ipso incertum ac  
perplexum remanet , penes quos reipsa reperia-  
tur verus spiritus. Non enim utrisque competere  
potest; futurus alioqui sibi contrarius : neque po-  
test pars una efficaciter probare , sibi illum po-  
tius , quàm alteri parti , convenire. Nam illæ  
Scripturæ , quæ allegantur : *Unctio docet vos de  
omnibus. Ipse spiritus testimonium reddit , &c.*  
quidquid sit de earum sensu , indifferentes sunt,  
nec magis loquuntur de Calvinistis, quàm de Lu-  
theranis. Præterquam quòd in hoc iam involua-  
tur inutilis petitio principij ; dum ex Scripturâ  
probatur spiritus privatus ; & ex spiritu privato  
adstruitur veritas ipsius scripturæ, sed hæc & si-  
milia magis declarabimus, infra ; vbi, aliâ occa-  
sione, eundem Calvinî spiritum privatum, magis  
ex professò exagitabimus.

Addo hîc duntaxat, etiam intra Calvinî scho-  
lam, similem aliquam dissensionem, & vt ita lo-

quar, saporis interni differentiam, inveniri : si-  
quidem Sebastianus Castellio , ( seu vt alij scri-  
bunt, Castalio, vivente Calvino Genevensis Lu-  
dimagister, teste ipso Beza in vita Calvinii, sen-  
tiebat Canticum Canticorum , non esse librum  
Canonicum , sed colloquium profanè amato-  
rium ipsius Salomonis cum amica quadam sua;  
ut proinde illud abradi iusserit ex Canone , cùm  
magnâ reliquorum eiusdem sectæ offensione.

Atqui ille quidem, cùm Calvinismum profi-  
teretur, perinde poterat, ad interiorē Spiritus  
sancti persuasione recurere ; vi cuius diceret;  
se se quodam velut spiritali sapore, sentire in  
eo Salomonis Cantico, nihil sanè divini spiritus,  
sed multum profani ac lascivi amoris , inesse.

Ipse etiam Beza, docuit , historiam Adulteræ  
Ioan. 8. v. 3. meritò esse suspectam , propterea  
quòd varij interpretes Græci ejus non memine-  
rint : cùm interim è diverso Calvinus , quia ea-  
dem semper à latinis recepta fuit, dicat; non esse,  
cur eam in usum nostrum accommodare ( & sci-  
licet, eam pro canonica habere) recusemus. Cùm  
& alioqui in Bibliis Polyglottis , Londini anno  
1657. editis eadem historia habeatur , non tan-  
tùm in textu Græco, sed etiam in versionibus Sy-  
riacâ, Persicâ, Arabicâ, Æthiopicâ.

Ut jam nihil dicam , de magna inter Calvi-  
nistas, versionum scripturæ diversitate , & con-  
trarietate. Ipso Castellione v.g. versionem Be-  
zæ, ut innumeris erroribus refertam improban-  
te ; Beza autem Castellionis versionem , etiam  
ut impiam , rejiciente : de quo nos plura in-  
feriùs.

Quæ

Quæ satis ostendunt, manifestè falli, aut fallere velle, Calvinum; dùm gregalibus suis infallibilem attribuit interiorem Spiritus sancti persuasionem, quâ veritatem sacrorum librorum, & consequenter versionum ejus, certò discernant ac dijudicent. Sed mox plura, ut dixi. Ecce interim, ut undique malè fultus labat, ô Reformati, ille vestræ fidei, seu confessionis, articulus: à quo tamen unicè pendet fidei vestræ regula, quam vos profitemini esse solum verbum Dei scriptum.



## CAPUT IV.

*Magis universè ostenditur, scripturam divinam per se præcisè sumptam, ad fidei dogmata sancienda, non usquequaque sufficientem esse.*

**P**ROPOSITIO hæc multis rationibus probari ac declarari potest: nos eas, quæ generales sunt complectemur in præsentia: specialius postea, eas, quæ adversus sectas singulas propriè faciunt, provt feret, pertractaturi.

Prima igitur, eaque communis, propositionis nostræ probatio, ex eo fundamento petitur, quòd Scriptura Sacra secundum se sumpta, adhibita etiam locorum inter se collatione, adhuc multis in locis, etiam in quibus de fidei nostræ primariis mysteriis agitur, non ita clara sit, atque aperta, quin sensus varios admittere possit; præ-

sertim apud difficilia & morosa quorundam ingenia. Proindeque non sit per se usquequaque sufficiens, ad exortas de ipsius sensû controversias dirimendas.

Atque varia esse in libris sacris per se perplexa & intellectu difficilia vel ex ipsâ in primis scripturâ constat : nominatim ex Apostoli Petri epist. 2. cap. 3. vbi de Pauli epistolis agens, dicit in eis contineri *quadam difficilia intellectu, quæ indocti & instabiles depravant* ( sive, ut est in Græco, detorquent ) *ad suam ipsorum perditionem.*

Deinde idipsum apertè demonstrat, communis virorum, summo ingenio, doctrina, virtute præditorum ; puta Augustini, Hieronymi, Chrysostomi, & tot aliorum, experientia : qui cum omnem vitam in ipsius scripturæ flagrantissimo studio posuissent, eius multis in locis obscuritatem difficultatémve experti & testificati sunt. Augustinus certè epistola 111. *Obscura est scriptura*, inquit, *& remota à sensibus hominum.* Et lib. 18. de Civitate Dei, cap. 32. agnoscit in scripturâ multa esse umbrosa, quæ mentem quærentis exerceant. Tandemque epist. 119. cap. 1. modestissimè fatetur in ipsis sanctis Scripturis, se multò plura nescire, quàm scire.

Similiterque S. Hieronymus in caput 7. Eccl., ait : *Vir qui eruditus fuerit in scriptura, quanto plura scire caperit, tanto ei in his quotidie oritur maior obscuritas.* Ut supremâ quadam sive arrogantia, sive cæcitate, aut falsi loquentiâ laborasse oporteat, illos Novatorum coryphæos, Calvinum scilicet atque Lutherum, Dum hic in  
Præfa

Præfatione articulorum à Leone X. damnatorum, disertè pronuntiat: *Scripturam esse, ipsam per se facillimam, apertissimam sui ipsius interpretationem; tandemque clariorem omnium Patrum commentariis.* Et libro de seruo arbitrio, de se audacissimè gloriatur: *Difficultatis nihil esse in sacris litteris, nullumque sibi afferri posse locum, quem ipse non facillè interpretetur.*

Ille autem suæ Institutionis libro 1. cap. 7. §. 2. confidenter fortiterque pronuntiat; velut illum observo tunc maximè facere, quando ratione, destituitur: *Non obscuriorem veritatis suæ sensum ulro scripturam præ se ferre; quàm coloris sui res albas ac nigras; saporis, suaves atque amaras.* Sic ille.

Quorum utrivis non immetitò occinas, verbum illud divini spiritus ad superbissimum Regem Tyri: *Ecce sapientior es tu Daniele: omne secretum non est absconditum à te.* Ezech. 8.

Sapientior, inquam, tot illis præclaris veteris Ecclesiæ luminibus; qui, modestè de se sentientes, neque tam acuto ad illum scripturæ quasi colorem discernendum percipiendumque visu, neque ad saporem tam perfecto gustatu sese præditos esse fenserunt.

Quid, quod ipse Calvinus, velut ejus quod priùs in eadem suâ Institutione scripserat immemor, 1. 3. c. 2. §. 4. de sui ipsius experimento fidem faciens, ita è diverso loquitur: *Quotidie legendo in multos locos (scripturæ scilicet) incidimus, qui nos ignorantia coarguunt. At hoc frano in modestia nos Deus retinet, ut optimus etiam quisque doctor, ad discendum paratus sit.*

B 3

Lutherus



Lutherus pariter in suâ præfatione in Psalmos, quasi jam seipso sapientior ista pulchrè scribit, ut Augustinum jam loqui putes: *Multa, ait, sibi (circa Psalterij intelligentiam videlicet) reservavit spiritus, quo nos semper discipulos habeat; multa solum ostendit, ut alliciat; multa tradit, ut afficiat.* Et ista Lutherus.

Veruntamen, quid his hominibus facias; qui, ut est in proverbio, eodem ore calidum & frigidum efflantes, satis ostendunt, se in eorum esse numero, quos & instabiles suprâ appellat Petrus Apostolus, Scripturas sacras, aut in iis tradita mysteria, ad suam ipsorum perditionem, depravantes.

Neque hætenus dictis, saltem universè opponi potest, (quod primum est adversariorum effugium) ea, quæ in scripturâ etiam viris doctis minùs pervia sunt, duntaxat esse res minutiores, neque ad præcipua fidei nostræ mysteria, aut scitu necessaria dogmata, pertinentes.

Contrà enim facit: quod & Arianis v.g. obscuræ visæ sunt illæ scripturæ, quæ mysterij SS. Trinitatis veritatem, & Nestorianis quæ divinæ Incarnationis substantiam, adstruunt. Et Iudæis, illæ, quæ in veteri testamento veri Messiae adventum præmonstrant ac præstruunt.

Unde est illud Augustini vulgatum pronuntiatum. *Iudei legunt, & non intelligunt, habentes velamen positum super cor suum. Quod à suis spiritualibus oculis auferri, rogabat Propheta, cum diceret: Revela oculos meos, & considerabo mirabilia de lege inâ. Item: Da mihi intellectum, & scrutabor legem tuam,*

Sed

Sed neque ab illis , contra quos agimus , negâri potest ; in epistola Pauli ad Romanos , tradi præcipua quædam fidei dogmata,putà de prædestinatione, justificatione, fide & operibus : & tamen , teste Hieronymo, viro ( siquis alius ) in sacris Scripturis exercitatissimo , epistolâ ad Algasiam quæst.8. ipsaque adeò, etiam sectariorum experientiâ:*Omnis epistola ad Romanos nimis obscuritatibus involuta est.*

Denique si scriptura divina,quoad ipsa saltem præcipua fidei mysteria , adeò ac ipsi dicunt peripicua atque clara est ; cur igitur etiam in præcipuis illis mysteriis , de legitimo scripturæ sensu, ipsi inter sese , puta Lutherani à Calvinistis, immò ipsi inter se eiusdem sectæ professores atque Doctores, tam pertinaciter dissentiunt ? Cur verba illa : *Hoc est corpus meum* ; quæ Catholicis , in sensu obvio atque proprio, clarissima apparent ; Sacramentariis adeò videntur obscura, ideòque ea ad sensus improprios , eosque inter se diversissimos , detorquent ; & ipse Calvinus eam omnem rem modo novo, & sive in Ecclesia Catholica , sive in aliorum Hæreticorum Synagoga, antea inaudito, interpretatur,

Cur denique ubi inter ipsos de aliquo dogmate , ipsoque adeò scripturæ sensu , gravior aliqua controversia suboritur , ei sopiendæ colloquia instituunt, Synodos congregant, scripturas excutunt , tandemque de ipso verbi Dei legitimo sensu decernunt ? Hæc omnia supervacua, & frustra sint , si ipsa scriptura , uti dictitant , per seipsam clarissima , apertissima , facillima est ?



Sed neque hic valet generatim, illud alterum illorum effugium: scripturam nimirum dici per se ipsam claram esse; in quantum, ut ajunt, sui ipsius interpret est; ita ut, si quispiam obscurior locus occurrat, possit per ipsam scripturam, hoc est, per alios scripturæ locos, collatione factâ, clarus evadere examinanti.

Etenim in primis contrarium apparet, in controversiis, inter sectarum coryphæos atque Doctores; qui utique Biblia Sacra, diurnâ nocturnaque manu assidue versarunt, & quâ valuerunt diligentia, scripturæ locos conferentes, quis eorum esset sensus legitimus, quantum profitentur, optimâ fide indagaverunt. Nam cum, hoc non obstante, inter ipsos minùs conveniat; necesse est adhuc, scripturæ sensum, atque adeò dogmatis veritatem, obscuram restare; aut alteros saltem putà Lutheranos, aut Calvinistas, in re manifestâ cæcutire.

Et verò, ut demus certis casibus (qui rariores sunt) plures inveniri scripturæ locos ad idem dogma pertinentes, & quorum inter se institui possit collatio, ad rei veritatem deprehendendam: tamen quia non est per se evidens, uter ex altero tanquam clariori explicandus sit; cum qui uni clarior apparet, alteri videatur obscurior; & qui priùs erat clarissimus, ipsâ collatione subinde reddatur obscurissimus: hinc etiam universè verum non est; quod ad controversias ex ipsâ scripturâ dirimendas, sufficiat ista variorum locorum collatio.

Quod quidem apertè declaratur, in exemplo supra posito, de verbis Christi: *Hoc est corpus meum;*

*meum*: qui locus per se & in sensu obvio, clarissim<sup>us</sup> videtur Catholicis & Lutheranis, Zuinglianis autem & Calvinistis, ex collatione cum aliis locis, videtur obscurissimus. Ut qui v.g. existiment, verba illa Ioannis 6. *Spiritus est qui vivificat: caro non prodest quicquam: verba quæ ego locutus sum vobis, spiritus & vita sunt*; quæ complures sensus patiuntur, priorum veritati non repugnantes; clariora esse, & efficaciora, ad veram & realem corporis Christi in Sacramento præsentiam negandam, quàm priora illa ad adstruendam. Atque hæc de primâ ac primariâ propositionis nostræ probatione.



## CAPUT V.

*Nonnulla alia rationes ad idem propositum adductæ.*

**V**Lterius autem exinde probatur confirmaturve suprâ posita à nobis propositio: Quòd omnes hæreses, ex perverso sensu Sacræ Scripturæ, coortæ sint: omnes adeò hæresum autores (velut SS. Patres de suo quisque sæculo testantur) divinas litteras pro se facere protervè jactarint, idque subinde cùm ea verisimilitudine, ut nisi ascito traditionis præsidio, non possent, facilè ex scripturis convinci; aut per eas solitarie & per se sumptas, finis controversiis in Ecclesia exortis imponi.

Tertullianum suprâ vidimus, testantem sui  
xvi

ævi hæreticos , hæreses suas , de scripturis suadere solitos.

Hilarius lib.2. ad Constantium Augustum : *Memento (inquit) neminem hæreticorum esse, qui se nunc, non secundum scripturas predicare ea, quibus blasphematur, mentiatur.* Augustinus Epist.222. *Omnes hæretici, inquit, qui scripturas in autoritate recipiunt, ipsas sibi videntur sectari ; cum suos potius sectentur errores ; ac per hoc, non quod eas contemnant , sed quod non intelligunt , hæretici sunt.*

Non intelligunt autem ; quia spiritu suo in iis examinandis ducuntur , neque recutunt ad sensum Ecclesiæ ; quæ, uti dictum, est, eo sensu est columna veritatis , quod sacrorum librorum, non tantum custos , sed legitima quoque interpretes est.

Et libro de Genesi imperfecto cap.1. *Multi hæretici ( inquit S. Doctor ) ad suam sententiam, quæ præter fidem est Catholica Ecclesiæ expositionem scripturarum divinarum habere consueverunt. Quas utique (ut addit libro 3.contra Donatistas cap.19.) tenent ad speciem, non ad salutem.*

Cap. 35.

Tandemque, ut vel in hoc etiam , consuetum hodièque nostris Novatoribus morem, possis agnoscere : ita generatim de Hæreticis scribit, Traët. aliàs citato Vincentius Lirinensis : *Sive apud suos , sive apud alienos , sive publicè, sive in sermonibus , sive in libris , sive in convivis , sive in plateis, nihil unquam penè de suo proferunt, quod non etiam scriptura verbis adumbrare conentur.* Sic ille.

Sed placet hæc ipsa & Lutheri testimonio confirmare : quippe qui scribens in caput 14. Geneseos

neseos : dicit , *omnibus saculis , nomine Dei & Scripturâ , satanam ad blasphemias abusum esse , & expressius in rem nostram , in præfatione cuiusdam historiæ apud Gaulterium ; hac ipsa de causa non dubitavit , Sacram scripturam appellare Librum hæreticorum.*

Postrema denique propositionis nostræ ratio ex eo peratur , quòd celeberrima quæque Ecclesiæ sanctæ Concilia ( quorum prima quatuor libenter admittit ipse Calvinus ) in fidei Catholica definitione , seu declaratione , non tam scripturas per se spectatas , quàm , prout habebat recepta Ecclesiæ traditio , intellectas , pro fundamento suorum decretorum habuerint.

Sic enim expressè de ipsa Concilio Nicæno primo , in quo Arii error damnatus est , testatur qui ei Concilio interfuit S. Athanasius , libro de decretis Nicænæ Synodi , contra Eusebium ; vbi : *Ecce nos quidem , inquit , à patribus ad patres per manus traditam fuisse hanc sententiam demonstravimus.* Et Theodoretus lib. 1. Historiæ cap. 8. disertissimè ait : *Arium damnatum traditione non scripta.* Idemque de aliis Synodis ; & nominatim de 2. Nicæna ( quæ est septima Generalis ) videre est in Actione 2. vbi Patres decreto de sacris imaginibus habendis & venerandis , subscribentes , id maximâ ex parte protestantur , se juxta veterem traditionem , decretum illud recipere. Universe autem suprâ laudatus Lirinensis , capite 32. *Hoc , inquit , semper , neque quicquam præterea , hæreticorum novitatibus excitata , Conciliorum suorum decretis Catholica perfecit Ecclesia ; nisi , ut quod prius à majoribus solâ traditione susceperat ,*

*ceperat, hoc deinde posteris etiam per scripturæ chirographum consignaret. Sic ille.*

At si obiter hæreas, quo pede hîc possit stare Calvinus, qui non recipit traditiones, nec Nicænam primam v.g. audet rejicere. Ille quidem sibi hac in parte, bellè cavere visus est, dum libro 4. Instit. cap.9. §. 8. ita præclare loquitur : *Priscas illas Synodos, ut Nicænâ &c. libenter amplectimur, reveremurque ut sacrosanctas, quantum attinet ad fidei dogmata. Nichil enim continent, quàm puram & nativam scripturæ interpretationem, quam SS. Patres, spirituali prudentia, ad frangendos Religionis hostes, accommodarunt, Sic ille.*

Atenim, præterquam quod in Admónitione ad fratres Polonos, illas improbet Nicæni Symboli voces, quibus Dei filius, dicitur *Deus de Deo* : quod tamen symbolum, verbo Dei consentaneum, articulo 5. suæ confessionis admiserat : præterea, inquam, meminisse debuerat, sese alibi eas scripturas, quibus Patres adversus Arianos usi sunt, in sensum alium, detorquere : nominatim autem de palmari illo loco ex Ioannis 10. capite : *Ego & Pater unum sumus* : reformatâ scilicet modestiâ sic pronuntiare : *Abusi sunt hoc loco veteres, ut probarent Christum Patri òmnia-riov. Neque enim Christus de unitate substantiæ disputat, sed de consensu, quem cum Patre habet. Quæ nempe est ipsa Arianorum ad eum locum responsio.*

Vbi ergo nunc illa, puta & nativa scripturæ interpretatio ; quam ipsomet Calvino teste SS. Patres spirituali prudentiâ ad frangendos Religionis

gionis hostes , accommodarunt , sive adhibuerunt ?

Quibus adde , eundem Calvinum , opusculo *de verâ Ecclesiâ*, in eodem Concilio aliud nihil, præter fœnum , stramen , ligna , stipulas agnoscere.

Verùm eâ ipsa in materiâ , eodem cum Magistro suo vertiginis spiritu agitatum Bezam, etiam obiter, Lector, attende.

Quippe qui in primis unâ ex parte, prædictam Synodum, uti & Ephesinam &c. non tantum recipit , & libenter amplectitur cum Calvino , sed eandem adeò extollit, epistolâ 81. ut dicat : *Confessu Synodi Nicana , nihil unquam sanctius , nihil augustius ab Apostolorum tempore sol unquam aspexit.* Additque : *constare uno Dei verbo Patres nixos fuisse.*

Ex alterâ autem ; in Præfatione novi Testamenti, ait ; quod in Concilio Nicæno Satan jaciebat fundamenta primatus Romani Pontificis, invocationis Divorum , adorationis imaginum, liberi arbitrij, meriti , indulgentiarum , & eiusmodi spurcit as.

Quæ quidem inter se quis conciliet ? Nam quomodo verum est ; nihil sanctius fuisse illo confesso, in quo, id ita agente Satana, tot spurcitarum fundamenta jaciebantur ; & nominatim Anti-christiani primatûs Romani Pontificis ? Cujus tamen primatus , non fundamenta duntaxat illic jacta sunt, sed è contrâ, declarata antiquitas, & ab ipsâ synodo roborata : uti demonstrant scriptores Catholici ; ex ipsius synodi decretis , partim ex Concilio Chalcedonensi, partim,

tim, & præcipuè, ex Arabicâ & Chaldaicâ Nicenorum canonum translatione ( quando illa alioqui interciderunt ) petitis.

Sed, ut ad extremum, rei seriæ jocularium quidam aspergam; quando, juxta Calvinum, Romana sedes, nonnisi post magnum Gregorium, præsumpto manifestè primatu, Anti-christiana facta est: magnam oportet, & operosam, extitisse eam molem, cujus fundamenta in Concilio Nicæno jacta, nonnisi post annos trecentos, in spectabilem aliquam formam assurrexerint.



## CAPUT VI.

*Proprium esse hæresis genium, in rebus fidei controversis, adversus publicum Ecclesiæ sensum, privatas quasdam inspirationes, revelationesque, prætere.*

**N**Ovatorum plerique, cum pro discernendo, in re controversâ, vero alicujus Scripturæ sensu, Ecclesiæ Catholicæ definitione, seu traditione rejectâ, non haberent aliud *κρίσιον* seu judicativum discerniculûmve, quo recurrerent; dixerunt; sese, veluti veras scripturas à falsis, ita legitimum earum sensum ab apparenti tantum, privatâ quadam inspiratione Dei, & intimo quasi sapore spirituali, discernere; neque alium ulterius controversiarum, in fidei negotio, judicem sive arbitrum, requirendum aut agnoscendum esse.

Ad

Ad quod equidem omnis libertatis & licentiae in Religionis rebus, asylum, recurrisse denique Libertinos nescio quos, aut fanaticos Anabaptistas, nihil adeò mirum est.

Sed quod etiam Iohannes Calvinus, vir neque hebes, neque incallidus, privatum fidelis cuiusque spiritum; de quo interim sitne ater, an albus, aliunde disquirendum esset; velut ultimum rerum credendarum fundamentum, seu legitimi scripturae sensus criterium constituerit, idque vel ipse seriò persuasum habuerit, vel cordatis suae sectae hominibus persuasurum se crediderit, equidem satis mirari non possum.

Cæterum id minùs mirabitur, qui attenderit, quod præfert lemma præsentis capituli: Perpetuum itidem fuisse Hæreticorum genus; ut, ab Ecclesiâ Catholicâ secessionem facientes, & à receptâ ejus doctrinâ, ad profanas vocum novitates, transilientes, quò facti sui invidiam, hoc tanquam obtentu protegerent; sese doctrinam suam per arcanam spiritus persuasionem, aut Deo aliter illos privatim illuminante; accepisse prætenderent. Quod sanè & experimento, crebrisque exemplis compertum: & Patres varij speciatim observavere.

Et quidem S. Augustinus, quosdam, etiam ex *Tract. 45.* iis qui Christi nomine gloriantur, memorans, qui in Ioan. se videntes, non solum jactant, sed etiam à Christo illuminatos videri volunt. Sunt autem, subdit, hæretici. Illos videlicet eo ipso veluti charactere designans.

Expressiùs autem Magnus Gregorius, ad illa *L. 5. Moral. cap. 18.* Iobi cap. 4. Porro ad me dictum est verbum absconditum,



*conditum, & quasi furtivè suscepit auris mea venas susurri ejus. Quæ verba, non sancti Iob, sed unius sunt ex amicis ejus; per quos eo loco censet S. Pontifex, hæreticos adumbrari: de quibus sic loquitur. Verbum absconditum hæretici audire se simulant, ut auditorum mentibus, quandam prædicationis suæ reverentiam obducant. Communem scientiam habere refusiunt, ne cæteris æquales æstimentur. Occulta vel nova semper exquirunt, quæ dum alij nesciunt, apud imperitorum mentes, ipsi de scientiæ singularitate gloriantur. Quam occultant, ut diximus, insinuant; quia scilicet, ut admirationem ostendere valeant, hæc se latenter accepisse confirmant.*

Et capite sequenti. Sape hæretici, Deum sibi imaginabiliter fingunt, quem intueri spiritualiter nequeunt, ejusque vocem, quasi aura lenis, audire se perhibent; quia ad secreta illius cognoscenda quasi se esse cæteris familiariores gaudent. Non enim ea docent, quæ Deus publicè loquitur (per Ecclesiæ suam videlicet, veluti publicam atque communem divinæ locutionis interpretem) sed quæ eorum auri. (ut quidem dictitant) quasi latenter inspirantur.

Quæ postremæ Pontificis sapientissimi voces, in huius ævi sectarios, & nominatim Calvinistas, apprimè conveniunt. Quippè qui, eo ipso quod pro ultimâ fidei normâ, sive ultimâ regulæ credendi applicatione, ad spiritum privatum, unicuique fideli, legitimum scripturæ sensum, & cæteris occultas, arcanasque veritates, latenter inspirantem, recurrunt; jam non ea quæ Deus publicè loquitur, docent; sed ea quæ suus cuique spiritus

Spiritus privatim insinuat, populis credenda proponunt. Nam tamen si omnes, verbum Dei, quod in scripturis sacris publicè loquitur, sese velut unicam fidei, regulam sequi perhibeant: tamen & apertum ac manifestum scripturæ sensum, ubi is privato ipsorum spiritui minùs arri- det, ad improprias interpretationes, atque ab hætenus receptâ Ecclesiæ sententiâ alienas, pro animi sui libidine desectunt. Aut si quando de ipso scripturæ sensu legitima aliqua suboritur dubitatio: quo proinde casu nondum Deus pa- lam, aut prorsus apertè loquitur: non ad publi- cum Ecclesiæ iudicium determinationemve ( cui utique, uti mox expressiùs dicam, à Christo, non tantùm divinarum scripturarum fidelis custo- dia, verùm etiam de sensu legitimo certa deter- minatio commissâ est ) se referunt; sed rursùm ad verbum absconditum, & sibi latenter factas inspirationes refugiunt: neque interim quod Christus suis promisit Apostolis, ullis signis, aut virtutibus, veluti publicâ Dei tacitè loquen- tis voce, latenter accepta dogmata confirmant.

Atque hæc ex Beato Gregorio. Sed enim huic magno Pontifici præiverat verbis eundem in sen- sum præclaris, etiam sesquisæculo anterior ( ut & hinc colligas, eandem perpetuò extitisse hæresum indolem ) in Commonitorio suo Vin- centius Lirinensis; ubi commemorato, quemad- modum hæretici omnes, scripturas jactent innu- meras, verùm non in sensu Ecclesiæ Catholicæ intellectas, id confirmans subdit: *Audent polli- ceri & docere, quod in Ecclesiâ suâ, id est, in com-* Cap. 37.  
*munionis suæ conventiculo, magna & specialis, &*  
C prosequ.

*prorsus personalis* ( notentur hæ voces ) *quedam* *sui Dei gratia* ; adeò ut *sine labore, sine ullo studio, sine ullâ industriâ, etiamsi, nec quarant, nec pe-* *tant, nec pulsent, quicumque illi ad numerum suum* *pertinent, tamen ita divinitus dispensentur, ut* *angelicis euecti manibus* ( quod ait respiciens ad *verba tentatoris, Matth. 4. quæ ibidem protulerat* ) *id est, angelicâ protectione servati nunquam* *possint offendere pedem suum, id est, nunquam* *scandalizari. Sic ibi. Quorum quidem extre-* *ma manifestè in Calvinistas congruunt, fidem* *semel ab ipsis susceptam amitti non posse prædi-* *cantes, sed illæ voces : specialis & prorsus perso-* *nalis Dei gratia ; non obscurè innuunt, assertam* *ab illis, unicuique privatim inditam, divini spi-* *ritus de legitimo scripturæ sensu clarè discer-* *nendo, illustrationem ; aut etiam illam, quam* *jactant, fidem specialem ; sive indubitatam, quam* *apud illos unusquisque fidelis habeat, de sua* *perseverantia atque salute, persuasionem.*

*Lib. I. dial.*  
*c. I.*

His adde, quod suprà laudatus B. Papa Grego-  
rius, alio Tractatu sapienter admonet : *Esse qui-* *dem nonnullos, qui ita per magisterium spiritus in-* *trinssecus docentur, ut etsi eis exterius humani ma-* *gisterij disciplina desit, magistri intimi censura* *non desit. Eorum tamē libertas ab infirmis in exem-* *plum non est habenda : ne dum se quisque similiter* *sancto spiritu impletum presumit, discipulus homi-* *nis esse despiciat, & magister erroris fiat.*

Et verò Annales Ecclesiasticos, aut Tractatus  
eorum, qui de hæresibus scripserunt, attendenti,  
manifestè apparebit, plerosque earum condito-  
res, quò personæ suæ, sive doctrinæ, auctoritatem  
conci

conciliarent; quemadmodum olim Numa Pompilius, ex nocturno suo cum Ægeria congressu, & Q. Sertorius ex Dianæ per cervam candidam admonitu, arcana rerum variarum peritiæ famam apud populum captavere: ita illos, sive ex occultâ cum Dei spiritu, aut Angelis ejus, in vulgus jactatâ familiaritate, sive etiam sese pro Christi Apostolis, aut pro Paracleta, & Christo ipso venditando, doctrinam suam vulgo effecisse plausibilem; eoque commento complures in fraudem induxisse. Ita enim in primis Simon Magus, hæresiarcharum in novâ lege dux & exemplar, uti legimus Actorum 8. cap. *Seducebat gentem Samariæ, dicens se esse aliquem magnum*: favente ei populo universo, atque dicente: *Hic est virtus Dei, qua vocatur magna.*

Et veluti de eo, in caput 24. Matthæi, testatur B. Hieronymus, scripta sua his titulis consignabat: *Ego sum sermo Dei, ego speciosus, ego Paracletus, ego omnipotens, ego omnia Dei.* Et sic ille quidem, apud eos qui Deum verum agnoscerent: nam apud Romanos v. g. eorum se phrasi accommodans, sese Iovem dicebat, meretricem autem suam, Minervam; teste Augustino, de Hæresibus capite 1.

Montanus itidem Cataphrygum autor, sese Paracletum esse jactabat, & sibi adhærentes Priscam & Maximillam, tanquam Prophetissas haberi volebat.

Manichæus porro, juxta nomen suum, stultissimæ sectæ repertor, sese Iesu Christi inscribebat Apostolum. Sic enim incipit apud Augustinum, ejus epistola, quam vocant, *fundamenti*:

*Manichæus Apostolus Iesu Christi, providentia Dei Patris: Hac sunt salutaria verba, de perenni ac vivo fonte &c.* Aut illa alia, apud Epiphanium, hæresi 66. *Manichæus Apostolus Iesu Christi: cum ad corrigendum genus humanum missus fu-erim &c.* Quam quidem formulam ab infano illo mutuare poterat, sibi que usurpare Calvinus; ut qui & Deū per os suum loqui testificatus sit, idcirco à Beza *os Domini*, & Galliæ dictus Apostolus; & sese venisse ad reformandum orbem Christianum, tum ipso assumpto Religionis reformatæ nomine, tum confessionis suæ articulo 31. haud obscurè professus.

Sed & ipsum Faustum Manichæum, spiritum sanctum plenariâ autoritate corporaliter esse in se, persuadere, conatum, testis est etiam Augustinus *libro 6. confess. cap. 5.*

Porro ut ad recentiores descendam: quemadmodum olim Mahometes per Angelum Gabrielem; ita per Razielem, Guilielmus Postelluos, varia se mysteria accepisse profitebatur. At Michaël Servetus, se unicum jactabat universi orbis terrarum Prophetam. Ioannes Loydensis, se esse Christum. David Georgius, apud Canisium, etiam se Christo majorem: tandemque Guilielmus Hacquetus, apud Fitzsimon in Britannomachia, sese Christo parem, orbisque totius principem ac Regem faciebat.

Neque verò leyem hoc in genere fastum, præsumptionemve divini spiritus, spirant illa Lutheri, Tractatu adversus falsò nominatum statum Ecclesiasticum. Vbi: *En appello me* (inquit) *Ecclesiasten Dei gratiâ; & eo titulo insigniri me ipsam.*

*Præmon. ad  
l. de cor. ap-  
pels &c.*

sum, eumque titulum mihi summo magnifico ve-  
 stri & satanae contemptu. Et, si Evangelistam, me  
 etiam, Dei gratiâ, nominarem &c. Certus enim  
 sum, sic Christum me nominare, & pro Ecclesiaste  
 me habere, qui mea doctrina Magister est; eumque  
 testem non dubito esse futurum in die illo magni  
 iudicii, hanc doctrinam non esse meam, sed spiritus  
 Domini, purique & sinceri Evangelij. Et rur-  
 sum postea: Dei enim doctrina est, Dei, inquam  
 & non mea.

De quibus, & his affinibus, ejusdem quinti  
 Evangelistae verbis, aliâ occasione nobis magis  
 ex professo dicendum.



## CAPUT VII.

*Perfatuum videri, in sacra doctrina controver-*  
*siis, non ad publicum Ecclesiae sensum, sed*  
*ad privatam cujusque fidelis*  
*persuasionem, recurrere.*

**A**Rgumentum hoc delibavimus supra, cum  
 de principio, quo libri canonici à non ca-  
 nonicis discerni possint esset nobis cum Cal-  
 vinistis suscepta disceptatio: ubi ostendimus,  
 neque opportuno rerum ordini, neque consue-  
 tae Dei providentiae congruere; ut quarum re-  
 rum declaratio ac notitia directe & per se  
 universam respicit Ecclesiam, ex non publica  
 atque solenni voce ei denuntientur; ex quo-  
 rum notitia, exinde dimanet ad singulos;

sed privatim atque seorsum intimentur singulis, & sic, ex consequenti, ipsi innotescant Ecclesiæ universitati.

Sed quoniam idem principium ab illis latius generaliusque extenditur, ad omnes videlicet casus, in quibus de dogmatibus fidei, aut ipso scripturæ legitimo sensu, contingit inter nos, atque illos, esse controversiam; erit nobis hoc loco, ejus commentu insulitas, & ( ut loqui cœpimus ) fatuitas, specialiùs demonstranda.

Principiò autem illud ponimus : Ecclesiam Dei vivi, non hoc sensu tantùm dici columnam & firmamentum veritatis, quòd sacrorum librorum, fida sit custos & quasi depositaria; verùm etiam, quòd legitima sit & publica verbi Dei interpret, atque, ut ita loquar, fidelis condita & proma veritatum, quas nobis Dei sapientia, velut ad salutem nostram conducibiles, quomodocumque revelaverit.

Alioqui enim quomodo dicitur firmamentum veritatis, si circa prædictas veritates aut falli possit, aut fallere? Quemadmodum scilicet, etiam in adversariorum sententiâ, spiritus privatus; si per illum possent Calvinistæ, scripturas quidem veras à falsis, non autem scripturæ sensum legitimum, seu verum à falso, dignoscere.

Et sanè, cùm scriptura divina, si per se nudè spectetur, instar sit gladij ancipitis, quo quis & benè, & malè uti possit: quod manifestum sit, ex eo, quòd nulla hæresis tam absurda sit, quæ pro se scripturam non aileget, aut ( vt Tertullianus )

non



non cantet aliquid de scriptura: dicente etiam ex A catholicis nonneminem, *scriptura litteram, esse gladium Antichristi*: consequens est per Christum, non satis fore provisum suæ Ecclesiæ, si ei duntaxat commisisset scripturarum sacrarum custodiam & non ei simul tradidisset spiritum veritatis, quo (veluti clavi) earum sensum aperiret.

Quemadmodum non satis providisset familiæ suæ si quis peregrè proficiscens vxori thesaurum suum relinqueret, non traditâ clavi, quâ ex eo, quæ opus essent, educere posset.

Atque huc bellè facit Irenæi locus libro 3. c. 4. vbi sic loquitur: *Veritatem facile est ab Ecclesia sumere; cum Apostoli, quasi in depositarium dives, plenissimè ea contulerunt omnia, quæ sunt veritatis.*

Et illa Augustini concione 3. in Psalmum 30. *contradidunt linguis multis diversa hæreses, diversa schismata personant, lingua multa contradidunt veritati doctrina. Tu curre ad tabernaculum Dei, Ecclesiam Catholicam tene, à regula veritatis noli discedere, & protegèris à contradictione linguarum.*

Nec verò necesse est, plures autoritates eum in finem congerere; cum ipsum Calvinum habeamus (quidquid alibi, inconstanter, more suo, in contrarium tradiderit) ei veritati apertè faventem, l. 4. instit. c. 1. §. 5. ubi: *Videmus, inquit, ut Deus, qui possit momento subs perficere (eos nimirum per spiritum privatum erudiendo de omnibus) nolit eos adolescere in virilem aetatem, nisi advocacy Ecclesiæ.* Subjicit autem: *Ac si*



cut olim non fuit contentus solâ lege, sed Sacerdotes addidit interpretes, ex quorum labiis populus inquireret verum illius sensum : ita hodie, &c.

Quibus quidem verbis manifestè respicit, ad id quod scriptum est, Malachiæ c.2. *Labia enim Sacerdotis custodient scientiam, & legem requirunt ex ore ejus : quia Angelus Domini exercituum est.* Vbi, cùm circa legem dubitatio inciderit, non jubentur singuli, interiorem spiritus persuasionem, velut oraculum familiare consulere, sed ad Ecclesiæ Sacerdotes recurrere : ita & hodie, inquit Calvinus.

Quo item modo, pro lege novâ edicit Paulus ad Ephesios 4. cap. constitutos à Christo in Ecclesiâ suâ Pastores & Doctores, in *edificationem corporis Christi ; & , ut occurramus omnes in unitatem fidei, nec simus parvuli fluctuantes ;* ut alibi monuimus.

Eodemque facit, quod illas ejusdem Apostoli voces : *ô Timothee, depositum custodi ;* ita exponit Vincentius Lirinensis : *Quid est depositum ? Id est, quod tibi traditum, non à te inventum est : quod accepisti, non quod excogitasti.* Denique, quod huc præsertim facit ; *non usurpationis privata, sed publicæ traditionis.*

Addere liceat, quod nobis consentiens, sapienter tradit, è Calvinì scholâ eruditus vir, Joannes Sarranus, in libro quem scripsit, de Religioni concordia. Vbi, cùm quæsiisset : *fasne erit cuilibet de tantis mysteriis dicere sententiam pro arbitrio ?* Respondet, ad Malachiæ locum, à Calvino suprâ insinuatam, aspiciens : *Iubet diseriè Deus, ut Sacerdotis labiū velut labium suum, interrogemus.*

Et

Et post multa : allegatâ in idipsum Petri Apostoli autoritate , pro parte nostrâ , ita concludit : *Petrus negat , scripturam esse idiam inordinatam , id est , Epist. 2. c. 2. privata explanationis : quem nos locum , inquit , salu. v. 20. pe laudamus , quia saepe nobis utilis est.*

Atque ex his istud in primis sumimus , in rem præsentem. Quod , cum ex ipsa scripturâ constet ; non singulos fideles , sed Ecclesiam Dei vivi , esse columnam & firmamentum veritatis ; idque stare non possit , nisi eadem Ecclesia , non solum custos sit ac depositaria sacrorum librorum , sed etiam eorum , quæ continent , legitima certa , & omnibus exposita , interpret. Hoc , inquam , posito , perfatum sit , ubi de controversiis fidei , & legitimo super iis scripturæ sensu discernendo , agitur ; illâ neglectâ publicâ , & universali , & semper constante & fixâ credendorum normâ , ad spiritum cuiusque privatum , cæcum , latebrosus , & neque iis , qui illo polle re feruntur satis perspectum , attendere : atque hoc inducto , omnis hæresis , & pertinaciæ asylo , Ecclesiæ Dei ( ut infra ostendam ) nullum certum dogma , nullum dissensionum terminum , aut finem relinquere.

Non igitur singulis privatim , sed Ecclesiæ , putâ in suo Capite , Romano Pontifice , aut per Rectores suos , in œcumenico & legitimo Concilio , & perpetuo illius sensu , & usu , quoad fieri potest , repræsentatæ ( stultum quippe esset , & humanitus impossibile , singulorum fidelium sensum , de articulo controverso , exquiri ) legitima est fidei , & veritatis sibi commissæ , interpret ; eidemque propriè , non singulis privatim , appromissus.

appromissus est à Christo Spiritus sanctus , qui doceat eam omnem veritatem.

Qua in re perabsurdum sese ostendit Calvinus; dum illum spiritum veritatis , non minùs singulis (immò etiam magis ) quàm ipsi Ecclesiæ , appromissum esse , commentus est.

Sic etenim illum animadvertas , Institutionis suæ lib.4. cap.8. §.11. cùm illas Salvatoris promissiones commemorasset : *Ecce ego vobiscum sum omnibus diebus , usque ad consummationem sæculi*. Item : *Ego rogabo Patrem , & alium Paracletum dabit vobis , &c.* expressè docere , eas , non minùs fidelibus singulis , deinceps futuris , quàm universæ Ecclesiæ datas esse.

At ibidem tamen §.10. quò Conciliorum Ecclesiæ autoritatem elevet , atque declinet ; eam ipsam spiritus veritatis directiõnem , quam singulis concedit fidelibus , Ecclesiæ Christi in Concilio universali congregatæ denegans ; irridet Doctores Catholicos , qui pro confesso sumentes , *universale Concilium esse veram Ecclesiæ imaginem , hoc principio sumpto , simul absque dubio statuunt , regi immediatè à Spiritu sancto ejusmodi Concilia , adeoque errare non posse*. Quod , cùm levi brachio , & quasi contemptim rejecisset : *Eant nunc , inquit , Romanenses , & affixum alligatumque suis Conciliis Spiritum sanctum pro more jacenti*.

Ad extremum autem , negotium omne , velut decretorio stylo concludens : *Hoc perpetuum esse nego , inquit , ut vera sit ac certa scriptura*

*ptura interpretatio, quæ Concilij: (scilicet etiam generalis, & legitimè congregati, atque approbati, de quo ibidem erat sermo) suffragiis fuerit recepta. Ista Calvinus.*

Sed, præterquam, quòd ea non facilè concilies, cum his, quæ ex eo suprà retulimus, aut quæ etiam tradit in Epistolam ad Ephesios cap.4. ubi, *Fanaticos vocat eos, qui arcanas spiritus revelationes sibi fingunt; & superbos, qui privatam lectionem sufficere sibi putant, ut nihil indigeant communi Ecclesie ministerio;* quibus alia postea addemus. His, inquam, prætermis- sis: id tantùm quæso te, Lector; quàm abso- num censeas atque abhorrens, quod ex ejus dictis deducebamus: certiores esse cujusque fidelis, illo utique privato spiritu, & tan- quam entheo motu, instincti, in fidei rebus dijudicandis auctoritatem, quàm veri & legi- timi Concilii, ex fidelium conventu coacti, eorumque communi sensu ac definitione con- clusi.

Primùm enim intelligi nequit; quod si sin- gulis congregatorum assistit spiritus Dei, ita ut illis manifestum sit, quid, juxta verbum Dei, de hoc vel illo articulo tenendum sit; iisdem jam congregatis in Christi nomine, non æquè, aut potius, adsit is ipse Dei spi- ritus, ita ut eorum consensu & conspiratione, clariùs certiusque appareat, quid de articulis controversis definiendum, tenendum, & toti populo, velut fidei dogma proponendum sit.

Nemo enim, nisi delirus, somniet, eo ipso  
quod

quod congregentur in Christi nomine , destitui illos privatim divino spiritu : cū ē diverso ipse Salvator testetur , sese specialiter assistere pluribus in nomine suo congregatis. Sicut scriptum est Matth. 18. *Ubi sunt duo vel tres congregati in nomine , meo , ibi sum in medio eorum.*

*Lib. 7. epist. cap. 110.*

*rum.* Ex quibus infert Magnus Gregorius : *Si adesse dignatur , ubi duo vel tres fuerint : quanto magis non deerit , ubi plures convenierint Sacerdotes ?* Et ante illum Doctor Ambrosius : *Quanto magis ubi plena est in nomine Domini congregatio ?*

*Lib. 3. ep. 25.*

Et simile quiddam nobis suggerit ipse Calvinus ; dum libro 3. cap. 11. §. 2. & alibi , docet : non esse contemnendum Ecclesiæ iudicium &c. quia , ut subdit , *testatur Dominus , tale fidelium iudicium , non esse aliud , quàm sententia sua promulgationem. Eos autem errare non posse , nec à Dei iudicio dissentire ; qui non nisi ex lege Dei iudicant , quæ non incerta est aut terrena opinio , sed sancta Dei voluntas ; & cœlestis oraculum.* Sic ille.

Denique Calvinianus iste ad spiritum cuiusque privatum recursus , repugnat sensui & praxi universalis Ecclesiæ , ab ejus prima fundatione , ad hæc usque tempora , deductæ. Semper enim usus obtinuit , ut cū de aliquo fidei articulo , aut scripturarum ad ullum spectantium intelligentia , gravior controversia esset , oborta , non quisque privato suo sensui permetteretur ( quod fuisset , rem omnem in sua perplexitate relinquere , vel divisiones & schismata in fidei negotio perpetuò alere ) sed ut super

câ re exquireretur sensus Ecclesiæ Catholicæ ; & vel consuleretur Romanus Pontifex , velut ejus Caput , & ipsius Christi in terris Vicarius , vel , ( ubi opponentium se multitudo & pertinacia efficacius remedium exigeret ) cogerentur Concilia generalia : quorum legitimè congregatorum , à Sede Apostolicâ confirmatæ definitioni , parère cogerentur fideles omnes ; & qui non parerent , haberentur hæretici , & anathemate ab ipsa Ecclesiâ divisi.

Sic enim cùm in Ecclesia , orta esset Ariana hæresis , & , verbi gratiâ , de illorum verborum ( *Ego & Pater unum sumus* ) legitimo sensu , quæstio non levis mota fuisset ; autoritate legitimâ , coactum est Concilium Nicænum primum , in quo damnatus est Arius , & ejus sequaces ab Ecclesiâ ejecti. Similiter contra Nestorium , coactum est Ephesinum Concilium ; & in eo scripturæ de verbi divini Incarnatione , explicatæ. Tandem , aliis omissis , etiam contra Berengarium , qui realem Christi præsentiam in Eucharistia negabat , variis Synodis coactis , ipse sæpiùs damnatus est , & verborum Christi sensus legitimus comprobatus , & traditio Catholica defensa.

Quid , quod & ipsi Apostoli , tamen Dei spiritu præditi , attamen exortam Antiochiæ de legalium observatione controversiam composituri , convenerint Ierosolymam , cum senioribus , & nonnisi multa conquisitione factâ , rem definierint , his verbis usi : *Visum est Spiritui sancto , & nobis*. Quò scilicet , posteris exemplo præirent , & legitimi Concilii formam,

formam , necessitatem , utilitatem demonstrarent.

Sed neque ipsi Reformati nostri, à Synodis subinde congregandis abstinere. Quâ formâ autem, quo fructu, quâ Doctrinæ suæ consequentiâ , id præstent, in loco videbimus.

Interim Calvino in re præsentī placuit adversus Ecclesiam Catholicam, utroque pede, ut ita loquar , calcitrare : quando & Concilijs legitimis , quam illa concedit , auctoritatem proteruè abnegat ; & fidelibus singulis, quam illa nunquam agnoverit , rerum fidei ex spiritu privato distributionem, temerè & inconsultè attribuit.

Non attendens, aut sanè dissimulans, quod uti mox videbimus, alibi scripsit; ex eo capite necessario subnasci errores , dissensiones , scandala; vnoquoque nimirum , eo prætextu ; fidem propriam sibi modulante , neque appàrente apud ipsos Reformatos , ullo alio iudice , qui litem determinet , & finem controversijs imponat. Quod modò expressiùs demonstrandum est.



## CAPUT VIII.

*Prorsus absurdum esse ; & , vel ipso Calvino indice erroribus & scandalis obnoxium : privatam quemlibet divini verbi intelligentiam , & dogmatum fidei discretionem , sibi arrogare.*

**C**ommunissima est, præsertim inter Calvinistas, Novatorum persuasio : fas esse eorum cuilibet,

cuiilibet, quantumvis rudi & inexperto, ex ipso verbo Dei, de Doctrina fidei ferre sententiam: testaturque Gualterius noster, tritum esse in Gallia Calvinistarum dogma, quod etiam Ioannes Fagius, Albenacensis Ministet, non semel pro concione protulerit: *Nullum esse opificem, qui, modò legere norit, Evangelium non intelligat.* Et quamvis Calvinus, in eius dogmatis exercitio non levem difficultatem inveniatur; tamen eo ipso, quòd, uti vidimus, spiritum veritatis dicat, non minùs (immò magis) singulis fidelibus, quàm toti Ecclesiæ esse promissum; compellitur consequenter loquendo, eam facultatem cuiilibet fidei concedere.

Quemadmodum eam disertissimè concedit Lubbertus, rigidus Calvinista, libro 6. de principiis Christianorum dogmatum cap. 13. ita proloquens. *Omnes publicos iudices, et interpretando, errare posse ostendimus; ita in iudicando errare posse asserimus. Privati iudices, sunt singuli fideles. Hi etiam potestatem habent, iudicandi de Doctrinis & interpretationibus.* Et rursus: *Deus dedit cuiilibet fidei non tantum spiritum intelligendi, sed etiam spiritum discernendi falsam doctrinam à vera.*

Addit huic Brerleius Billsonum nescio quem; libro cui titulus: *Discrimen obedientia Christiana* &c. Simili modo philosophantem, *Populus discernere debet, quis recta docet, priusquam credat.* Et iterum: *Populus estimator & iudex est, & hanc iudicandi potestatem ad unumquemque privatum hominem pertinere, asserit Brentius.* Cuius voces etiam magis insulas atque absurdas



das , non ita post exactè referemus.

Et faver denique ibidem relatus Antonius Voltonus , in responsione ad articulos Papisticos dicens : *Protestans indoctus testimonio divini Spiritus innititur, quo de veritate scripturarum in genere sit certior.* Sic illi.

At audieruntne fortassis vnquam, illam magni Doctoris Augustini , libro de vtilitate credendi cap.7. sapientissimam obiurgationem ? *Nul-  
lâ imbutus poëtica disciplinâ, Terentianum Mau-  
rum , sine Magistro attingere non auderes. Tu in  
eos libros , qui quoquo modo se habeant , Sancti  
tamen divinarumque rerum plenis, sine duce irrum-  
pis; & de his sive praeceptore audes ferre senten-  
tiam.*

Hiero. Epist.  
ad Paulu-  
num.

Neque terret illos , Bethlehemitici Leonis ,  
toto orbe auditus ille rugitus ; cum nempè simi-  
lis licentia , in Ecclesiam Dei capisset inveni-  
ri, epistolâ quadam , similiter inculcantis ; quod ne  
viles quidem artifices , absque doctore possint  
esse quod cupiunt : *sola*, inquit , *scripturarum ars  
est , quam sibi passim omnes vendicant.* Hanc gar-  
rula anus , hanc senex delirus , hanc sophistâ verbo-  
sus , praesumunt , lacerant , docent , antequam dis-  
cant. Et vt hodiernos mores magis expressos  
agnoscas : *Alij prob pudor*, inquit , *discunt à  
feminis , quod viros doceant &c.*

Quod si hos contemnent , & audient sanè  
Magistrum & Prophetam suum , ipsum Calvi-  
num , qui locis pluribus , ita seridè in ipsos in-  
surgit : *Refellitur eorum improbitas , qua fidem  
plenis buccis iactantes , Ecclesia ministerium , im-  
piè non minùs , quàm superbe contemnunt.* Hi lu-  
dibrio

L.4. Inst. c.1.  
n.5. & c.15  
Act. & Isa.  
59.

*dirio Deum planè habent, qui præteritis Ministris per quos loquitur Deus, Deum se Magistrum recipere simulant.*

Qui tamen si Doctore suo, modèstè tranquilleque respondeant ; se , per Dei gratiam , quòd fideles sint persuasum habere ; neque Magistrum habere Deum ( ut quidem , arbitrentur ) simulare se ; seu ex ipsiusmet Doctoris sui asserto dogmate , quòd omnibus suis fidelibus , adesse spiritum veritatis pronuntiaverit ; sese interiori Dei Spiritu agitari , quo sufficienter , de omni fidei Christianæ articulo , informantur : juxta quòd scriptum est , & ab ipso sæpiùs inculcatum : *Pon. 1. a. 54. ter. 3. nam universos filios tuos, doctos à Domino. Et non docebit ultra vir proximum suum, dicens : Cognosce Dominum omnes enim cognoscent me , à minimo usque ad maximum, ait Dominus.*

Quibus verbis apparet , eos, qui à Deo docti dicuntur, ulteriori magisterio non indigere.

Quid autem ad ista responsurus sit , servatâ prioris doctrinæ suæ consequentiâ , Calvinus , agrè profectò dispicio.

Quid quòd rursum alibi , etiam acerbius eo nomine invehitur in suos ; & eam , quam dixi persuasionem, veluti multorum schismatum, errorum, scandalorum labem , & originem traducit. Ita enim illum loquentem audias, Præfatione in suam Psychopamychian : *Nos, nescio q. à desidia, vel potiùs contemptu, verbum Dei recipimus ; ut cum tres syllabas didicerimus, statim opinione sapientia surgeamus, & tantum non crepemus, nobis divites ac reges. Hinc tam multos videas, qui in omnium saculorum ignorantiam tragicè vecerantur,*

ferantur, non minus ipsi indocti. Sed quid facias? Christiani videri volunt, & dicuntur; quia aliqua capita locorum communium deliberant; & cum nescire aliquid pudeat, de omnibus quasi ex tripode, respondent. Hinc rursus tot schismata, tot errores, tot fidei nostra scandala. Qua occasione nomen Dei blasphematur inter impios. Et ista Calvinus: Quæ tametsi præsertim eò referre videatur, quò excessum eo in genere cohibeat; attamen obliquè ipsam mali quoque occasionem tangere videtur atque notare. Quam ipse alibi minus dissimulanter aperuit.

Ut cum ( ut suprà monebamus ) in caput 4. Epistolæ ad Ephesios scribens; fanaticos appellat, qui arcanas revelationes sibi fingunt; & superbos qui privatam scriptura lectionem sufficere sibi putant, ut nihil indigeant communi Ecclesiæ magisterio. Expressiùs autem, cum damna perpendens in Ecclesiâ exorta, ex permissa plebi lectione vulgari scripturarum & ( quod annexum est ) promissâ illi earundem intelligentiâ; in Præfatione novi Testamenti, Gallici, anni 1567. ingenuè agnoscit: Satanam multò plus esse lucratum, vulgatâ hoc tempore scripturarum lectione, quàm priùs, cum fas plebi non esset, eas lectitare.

Atque, ut in ore duorum testium stet verbum istud; paria videas, etiam de suis queri Lutherum, Tomo 1. Germanico VVittemb. ubi: Evangelici nostri ( inquit ) nobiles, cives, atque adeò ipsi rustici, qui aliàs simplices & sinceri solebant esse, trahsonicè jactitare audent, sibi jam nulla prædicatore opus esse. Et præfatione in Catechismum

## INEXTRICABILIS.

reclisimum majorem ; *Delicatulī istī ( ait ) vel unicā tantū lectione assequuntur , ut repentē omnes ubique Doctores post se relinquant , sciantque omnia, nec ullius doctrinā aut institutione opus amplius habeant.* Hæc ille.

Verumtamen neque istis deerit, quod Doctōris sui , seu increpationi , seu admirationi repōnant. Allegabant enim & isti pro se , sese præditos spiritu Dei , & juxta scripturam , esse omnes doctos à Domino ; neque aliorum indigere doctrinā ; ipso etiam Luthero docente , fideles omnes posse privatim de quacumque fidei veritate judicare.

Quod quidem desumi apertè potest , ex hoc quod Lutherus, in Assertionibus, art. 115. & sequentibus , Conciliorum etiam œcumenicorum auctoritatem, cum Calvino, ita deprimat , ut dicat : *quidquid illa definierint , id omne cujusvis privati hominis judicio subiectum esse ; atque adeò quid credendum sit , quid non credendum , relinquendum judicio cujusvis viri spiritualis ;* cujusvis utique ( ut ante dixit ) privati fidelis ; supponens omninò , quemque fidelem spiritualem, sive Dei spiritu, ad id judicandum, præditum esse.

Quā in re consonat Magistro suo Ioannes Brentius; cujus ista fertur mirabilis sanè oratio, in Prolegomenis contra Petrum à Soto , & in confessione VVittembergensi. *Rectores Ecclesiarum & Pastores ovium Christi, potestatem quidem habent docendi, sed oves debent ferre judicium, utrū illi vocem Christi , vel aliorum proponant.* Et postea : *Quapropter decernant, constituent, ordinent Papa, Episcopi, Concilia &c. quidquid ve-*

*lint, non impediemus; sed penes nos, qui oves Christi sumus, & vocem ejus audimus, erit judicium; virum vera, & consentanea voci Pastoris nostri proponant, vel non; ac ipsi nobis credere, nostra censura, ac sententia subsistere, & obtemperare debent. Ita Brentius autor & parens ubiquistarum.*

Sed quantum hic chaos, & confusio rerum; quanta ordinis à Christo in Ecclesia constituti; & quàm horrenda, perturbatio;

Nam illud imprimis, quàm inscitè prolatū: posse oves Christi, ex hoc quòd vocem ejus audiant Pastoris sibi à Christo traditi vocem contemnere; quasi ipsa Pastorum vox non sit vox Christi ipso de illis expressè pronuntiante, Lucæ 10. *Qui vos audit; & qui vos spernit, me spernit.* Immo è contrà, per hoc ipsum dignoscuntur esse legitimæ oves Christi, quod Pastorum ab ipso constitutorum, ipsiusque Ecclesiæ, voci obtemperent. Sancto itidem Augustino Ep. 120. c. 6, confirmante, quod, *una vox est Christi & Ecclesia.*

Quanta rursus istic, & quàm inconsiderata apparet dictorum inconsequentia! Cùm videlicet Brentius asserat, potestatem illam de dogmatis fidei iudicandi ad vnumquemque privatum fidelem utique & spirituales, pertinere; eum interim spiritum, iis, quibus à Christo commissæ est docendi potestas, non concedere; perinde atque si; & ipsi non sint oves Christi, neque vocem ejus audiant. Aut, si consequenter eundem spiritum ipsdem concedendum putet: quàm ex ipsis terminis absurdum & paradoxum erit, cùm, in eo quod dixi pares sint, oportere Pastores

Pastores, subditorum sensui spiritum suum accommodare, & ipsos Doctores auditorum suorum sententiæ subscribere. Qua in parte sese sapientiores ostendit Calvinus, dum ait, ludibrio ab ijs haberi Deum, qui præteritis Ministris, *per quos*, ut ait, *loquitur Deus*, arcanum Dei magisterium prætendentes, suo sensui privato ac persuasioni confidunt.

Ex quo tamen, quæ est præsentis capitis intentio, ad extremum possumus, adversus ipsum Calvinum eiusque sectarios, concludere: consequenter dicendum videri, non omnibus eius fidelibus spiritum veritatis competere; non enim ijs imperitioribus, quos inde redarguit, quod Deum Magistrum se recipere simulent; quod dicere non posset, si illos crederet esse spiritu veritatis præditos, ac proinde reipsa Deum Magistrum in semetipsis habere.

Sed neque in sectarijs eius, per hanc occasionem oriantur dissensiones & scandala, si omnes reipsa agitentur eodem spiritu: cum unus idemque Dei spiritus; non possit dogmata pugnantia, sed puram duntaxat, simplicemque veritatem, suggerere.

Quod si, non omnium fidelium Calvini, reipsa sit spiritus privatus: iam eâ ex parte, in eius Ecclesia, perplexitas oritur & confusio. Cum discerni non possit, quinam præ alijs eo spiritu præditi sint; atque ad eodè penes quos vera scripturarum interpretatio, & dogmatum fidei sinceritas, inveniatur. Non enim quantum existimo, ad alium spiritum recurrent; quo deprehen-

D 3

datur;

datur, penes quos sit ille prior spiritus, de quo hætenus locuti sumus.

Accedit ad horum confirmationem ; præfatam Calvinisticam assertionem omnino convincendam videri , ipsâ , si tentetur , experientiâ.

Nam si, exempli causâ , constituamus in præsentia nostrâ quempiam simplicem novitiumque Calvinistam, & nulladum de spiritu privato univique fidei indito , informatione præoccupatum, eique à nobis offeratur locus scripturæ perdifficilis, atque ex eo quærat nostrum quispiam, quod olim ex Eunuchò Philippus, Act. 8. *Putasne intelligis, quæ legis?* Quis, inquam, hoc casu, eum existimet; extemporali spiritus privati suggestionem, difficilis loci sensum genuinum expolitum ; & non potius, si cordatus sit, dicturum cum Eunuchò : *Et quomodo possum, si non aliquis ostenderit mihi.* Aut , si eum locum forte præsumat, aut tentet , exponere ; in sensum aliquem prorsus abhorrentem, aut sectæ suæ etiam contrarium, declinaturum esse?

Atque , vt exemplo prorsus obvio rem hanc declarem : si eodem ex homine, nullâ, vt dicebâ, in contrarium anticipationem prævento exquiratur sensus verborum Christi Matth. 19. *Si vis ad vitam ingredi, serva mandata* ; quis dubitet, quin continuo responsurus sit : sensum esse obvium & simplicem ; nempe ad salutem necessariam esse mandatorum Dei observationem? non autem dicturum ex proprio sectæ spiritu hæc verba à Christo prolata esse ironicè; ad quam utique violentam & fatuam expositionem , neme sapiens credet



credet devenisse Calvinum ex interiori divini spiritus instinctu, sed solâ compulsum difficilem nodum aliter solvendi, desperatione.

Sed & quâdo ipsi Reformatores nostri, nō tantum legitimum scripturæ sensum, sed ab ipsâ radice, qui libri sint Canonici, ex articulo 4. Confessionis suæ, per interius spiritus sancti testimonium, se discernere profitentur: placet ex inde petitâ instantiâ; argumentum nostrum etiam vltariùs promovere. Quæro enim ex illis; an quicumque olim ab initio Calvini sectæ aggregabantur, vel eam hodieque sectantur, potuerint olim possintque modò, nullâ eam in partem à Ministris acceptâ disciplinâ, ex ipsâ duntaxat eorū librorū lectione, vi privati spiritus, & intimo quodâ quasi sapore, discernere, qui secundum Calvinum, pro canonicis habèdi sint, quinon habendi?

Si affirmant: pro parte adversâ, provocabo ad experientiam. Et alicui de Calvini grege canonis suæ Confessionis ignaro, exhibitis, exempli gratiâ, Tobiae & Iobi libris, quorum itum rejicit, & hunc admittit Calvini confessio; instabo, ut suo spiritu discernat, an & quem illorum, pro canonico, aut non canonico habendum putet: certo certius misero hærebit aqua; nec inveniet unde librum, Iob à Tobia discernat. Cur enim potius, quàm Lutheranus aliquis: qui & ipse in eâ facti specie hærebit incertus; vel si quid ex sectæ suæ spiritu pronuntiet, dissimilem saporem inventurus est in libro Iob: quippe quem non recipit Canon Lutheranus.

Tum verò si negent, privilegium hoc, libros sacros à non sacris discernendi, singulis suis fi-



delibus, aut nunc aut olim indifferenter esse concessum. In primis in eo requiram doctrinæ consequentiam : quòd nempe , cum singulis concedant spiritum libros divinos à non divinis discernendi ; cum hoc ante illud , prænotandum ac supponendum sit, instabo deinde : in quorum persona loquatur prædictus articulus 4. dum ita ait : *Agnoscamus hos libros esse canonicos , & per testimonium & persuasionem interiorum Spiritus sancti.* Nisi enim totius & universi Calviniani cœtus, uno quasi spiritu in eam veritatem conspirantis, is articulus conflatus sit, juxta ipsum Calvinum non erit certa & indubitata definitio. Multò autem minùs ; si, velut de totà ipsa confessione præsumi potest ex unius Calvini aut Bezae privato spiritu ( quem instabilem fuisse, mendacem , blasphemum satis constat ) principio concepta, à cæteris deinde eorum autoritate ductis , non autem ex propria cujusque spiritus persuasione, probata & confirmata sit.

Sed quidquid de istis speciatim quis senserit, aut dixerit : negari non potest quod prædiximus , incertum manere in secta Calvini ; an penes omnes ac singulos , aut penes aliquos duntaxat , & quos , resideat ille , de quo loquimur, spiritus ; & hinc incertum esse , penes quos resideat ipsa dogmatum fidei veritas. Quia cum hic spiritus , apud illos sit regula fidei , aut saltem propria atque proxima regulæ fidei , sive verbi Dei, ad res credendas applicatio ; quâ parte vacillat aut incertus est ille spiritus ; eadem necesse est, ipsam quoque dogmatum veritatem ac fidem, vacillare atque incertam esse.

CAPUT



## CAPUT IX.

*Nullum Calvinistam certum esse de suo spiritu, ac  
proinde neque de legitimo scripturarum  
intellectu securum esse.*

**V**Eruntamen quidquid de Calvinii mente, ejusve doctrinæ in re præsentî, cohærentiâ, pronuntiandum quis existimet; volo nunc cum ejus sectariis quasi pede collato, strictius agere; & ex ipsis Calvinii principiis apertè, nisi valdè fallor, evincere; non omnes illius fideles privato spiritu esse donatos; & si qui eo donati sint, tum ipsis, tum aliis, occultum id & incompertum esse: proindeque eundem spiritum, ad fidei veritates internoscendas, aut determinandas, nulâ ex parte conducere.

Igitur priusquam; eâ super re, vos, fratres, conveniam, velim vos habere præ oculis duo quædam Magistri vestri dogmata, & tanquam articulos fidei vestræ. Quorum primum est: *Veram fidem infundi solis electis & predestinatis.*

Sic enim expressè docet Propheta vester, lib. 3. Inst. c. 11. §. 11. *In fidem* (inquiens) *non illuminantur, nec Evangelii efficaciam, verè sentiunt, nisi qui præordinati sunt ad salutem.* Et adjungens paulò post: *Reprobos non recipere certum fidei lumen.*

Alterum: *Veram fidem semel susceptam nunquam*

quam amitti. Ita enim ille, Harmoniâ in Matthæi cap. 13. v. 20. *Cordibus fidelium semel infixa Dei veritas, nunquam effluit, sed usque in finem viget.* Et mox: *Porro, ut nunquam exinguitur spiritus ille; ita & fidem, quam semel insculpsit piorum cordibus, evanescere & perire, impossibile est.* Ex quibus & illud etiam habetur: Spiritum illum ac veram fidem ab invicem separari non posse. His positis, ex vobis libens intelligam, qui Religionis Reformatæ nomine gloriamini; utrùm, qui post annos complures vobiscum exactos, atque in doctrinâ Calvinî pertinaciter tuendâ, absque ullâ hæsitacione positos, ad extremum (Deo illuminante) in sinum sese Romano-Catholicæ Ecclesiæ receperunt: aut etiam à vobis (velut Petrus Martyr.) ad Zuinglium defecerunt: Hi, inquam, illum Dei spiritum, quo scripturas veras à falsis, articulos fidei legitimos à spuriiis, interiori quodam sapore discernere, reipsâ possederint: an non?

Si affirmatis: ergo verè fideles fuerunt; cùm spiritus ille nonnisi verè fidelium sit, uti dicitis. Et hinc ulteriùs: ergo jam illi fidem semel susceptam, amisere: quod tamen vos ipsi, cum Magistro vestro, jam dicebatis esse impossibile.

Si autem negatis: quæram ulteriùs, an signo aliquo seu critirio discerni possent; si non ab ipsis, qui velut dicitis, illo spiritu destituti erant (quantumvis interim, perinde atque vos illo se præditos firmiter crederent, aut perinde atque hi nunc existimant, qui quomodo cumque à vobis denique defecturi sunt) sed saltem à vobis, qui

qui vos de eo spiritu jactatis, certâ notione discerni possent, illi non verè fideles à verè fidelibus.

Non eò, opinor, devenietis audaciæ, ut affirmetis. Et alioqui etiamnum possētis, quinam è caru vestro, à vobis deinceps defecturi sint, velut prophetico spiritu designare atque prædicere: quod ipsi repugnat experientiæ.

Dicere autem; ex hoc quòd à vobis alipquando defecerint aperte colligi; illos verà fide ac spiritu Dei caruisse: aut saltem, quòd denique, parum constanter confugit Calvinus apud Gausterium, quòd dicta sua inter se, aut cùm Christi & Apostoli verbis ( quibus ipsi testantur, nonnullos per inconstantiam, avaritiam &c. à verà fide excidere) conciliare videretur; eorum fidem fuisse admodum imbecillam. Hoc, inquam; præterquam, quòd gratis & absque verisimilitudine dicitur; cùm negandum non sit, fieri posse, & reipsa fieri; ut qui v. g. de vestris erroribus, non minùs quàm Paulus de Iudaismo persuasus sit, Deo duritiem cordis ejus frangente, respiscat, & veræ, sive Romanæ adjungatur Ecclesiæ. Adhuc nihil facit ad rem præsentem.

Siquidem quæretur ulteriùs: utrùm illa fides, quæ imbecilla appellatur, fuerit vera & certa fides ex sua specie; & secundum suam substantiam. An tantum quædam adumbratio, seu inchoatio fidei, quæ propriè & verè istud nominis non mereatur. Quemadmodum invenio, lib. 3. Inst. c. 2. §. 9. & 10. Calvinum sese quodammodo explicantem, dum ait: *In reprobis sanè dici inesse fidē sed per catachresin. Verùm hac fidei, seu umbra,*  
*seu*

*seu imago, indigna est fidei appellatione.* Si prius quis dicat: rursus efficitur quod negabatis, veram scilicet fidem, semel susceptum, amitti posse.

Si posterius: redit difficultas huic loco propria. Nempe non posse à vobis discerni, quoniam inter vos, Dei spiritu interiore donati sint; & hinc ulterius: incertum esse, quidquid à vobis, in controversiis occurrentibus, definitur aut traditur, ut dogma fidei: Ipsumque adeò spiritum vestrum privatum, esse, fallacem controversiarum dirimendarum normam, & aliam vobis eum ad finem esse querendam.

Et verò etiam unicuique vestrum, suspectum esse debere spiritum suum, aut etiam fidem suam; facile patebit, attendenti ea quæ loco citato in hæc verba subjungit Calvinus: *Tot vanitatis recessus habet, tot mendacii latebris scatet cor humanum; tam fraudulenta hypochrissi tectum, ut seipsum sapere fallat.* Et rursus: *Experientia ostendit, reprobos interdum, simili ferè sensu atque electos affici, ut ne suo quidem iudicio, quicquam ab electis differant.*

Sed attendi postremo loco velim illas ejusdem voces, in epistolâ suâ 68. *Assidue, inquit, in mentem veniat illud Pauli: quosdam à fide excidisse, quod alienati fuissent à bona conscientia: ne ipsi quoque tam horrendi naufragij simus exempla aliis.* Ex quo loco clarum est ex Calvini sensu, eos etiam qui se vera fide, ac Dei spiritu præditos certò existiment, à fide tamen posse excidere, & hinc ulterius de suæ fidei sinceritate, ac spiritus sui veritate non immeritò dubitare posse.

Quæ

Quæ tamen quàm parùm convenient, cum aliis ipsis Calvinì dictis, & nominatim cum eo quod libro 3. cap. 2. §. 16. tam operosè tradit : *In summâ* (inquiens) *verè fidelis non est, nisi qui solida persuasione Deum sibi proprium benevolumque patrem esse persuasus, de ejus benignitate omnia sibi pollicetur; nisi qui, divinæ erga se benevolentia promissionibus fretus, indubitatam salutis expectationem præsumit.* Id, inquam, & per se liquere credo consideranti; neque otium est, hoc loco pluribus ostendere.



## CAPUT X.

*Insistitur eidem argumento; & exinde spiritus privati ad fines suos inutilitas concluditur.*

**V**ERùm ut hujus argumenti vis paulò amplius appareat, placet id quod hîc intendimus, in hac specie facti, ob lectoris oculos proponere.

Exorta est pronuper in Batavis, inter Gommaristas & Arminianos, de grege Calvinì, acerrima super divinâ prædestinatione controversia. Quæ ut sopiretur, quemadmodum postea luculentius exponam, indicta est, & coacta Dordraci, ex Germania, Gallia, Anglia &c. Calvinì symmystarum Synodus, appellata Nationalis; in qua, còmmuni Patrum decreto ac definitione, Arminius cum suis damnatus est, & diro confellus anathemate. At quamobrem istud, ô belli

belli Patres ? quando & ille ex vobis erat , & sedis Romanæ inimicissimus, confessioni Calvinianæ subscribat ; & interiori Spiritus sancti persuasione , perinde atque vos , sese præditum existimabat ?

At illum dicetis ( quæ est argumenti à nobis propositi ratio ) miserè delusum ; & quidquid credere videretur, neque fidem veram, neque legitimum Spiritus sancti testimonium , aut persuasionem interiorem de dogmatis controversis, habuisse. Quippini, obsecro ?

Quia ejus doctrina , legitimo sensui verborum Pauli ( ut quidem creditis ) manifestè repugnans inventa est. Audio. Verùm ego credebam, juxta professionem vestram ; quis legitimus sit, in re controversa scripturæ sensus , à vobis discerni ex interiore Spiritus sancti persuasione : & jam video vos , vice versâ, ex legitimo scripturæ sensu, colligere atque discernere, quisnam legitimus sit interior spiritus, aut ( quod còdem redit ) quisnam legitimo spiritu interiore præditus sit.

Quod est in re ipsa dicere atque probare , habere vos , aut quemlibet vestrùm , verum ac genuinum spiritum interiorem , ex eo quod iste spiritus , vero ac genuino scripturæ sensui consentaneus sit ; & rursus, huic esse verum ac genuinum scripturæ sensum, ex hoc quod interior Dei spiritus, vobis ita dicet ac suadeat.

In quo uti Logici loquuntur, manifesta inest petitio principii , sive vitiosa ejusdem per idem probatio. Perinde atque si præcisè probares, Ioannem esse revera filium Petri , quia Petrus  
reverà

revera est Pater Ioannis ; & rursum Petrum esse Ioannis patrem , ex hoc quod Ioannes sit filius ejus.

Quod quidem non esset ratiocinari , sed nugas agere, & inepto circulo, id ipsum quod probandum erat, ad sui probationem asserere.

Nec est quod quis , arreptâ occasione, nobis objectet ; similem nos circulum , aut ejusdem per idem probationem committere : quando videlicet & Ecclesiæ autoritatem probamus ex scripturâ divinâ ; putâ ex verbis Pauli 1. Tim. c.3. ubi Ecclesia Dei vivi *dicitur columna & firmamentum veritatis* ; & vicissim hanc esse scripturam divinam, probamus , sive colligimus , ex ipsa Ecclesiæ Dei autoritate.

Observandum quippe est ; nunquam nos in eodem processu , sive cum v. g. horum alterum determinatè probandum est , alterum vicissim, ex eo quod probandum est , confirmare : quod jam equidem esset , in illud vitium, quod in adversariis reprehendimus , incidere. Sed , si quis fortassè de Ecclesiæ Catholicæ autoritate rectè sentiens , libri alicujus canonici , exempli causâ Apocalypseos, autoritatem suspectam habeat, aut de loci cujusdam aliquantum perplexi sensu, minùs rectè sentire videatur : ei convincendo, recurram ad autoritatem Ecclesiæ, ostendens librum, de quo quæritur, ab eâ pro canonico agnosci ; aut eum locum, ab eadem , in alium sensum, quàm ipse intendat, intelligi. Et ibi sistam, quia jam quæstio & controversia finita est.

Quod si quis è contra, librorum scripturæ canonicorum autoritatem perspectam habens, agnoscere



scere nolit Ecclesiæ Catholicæ , in rebus fidei definiendis , aut certò proponendis, auctoritatem: adversus hunc utar, tum ipsâ scripturâ , demonstrans legitimam Christi Ecclesiam, quæ à nobis habenda est , vt columna & firmamentum veritatis , non aliam esse , nisi eam, quæ supra Petrum ab ipso Christo immobiliter fundata est ; tum cæteris, quas appellamus , veræ Ecclesiæ Notis; dicens cum eminentissimo Doctore Augustino: *In Ecclesia Catholica multa sunt, quæ in eius gremio me iustissimè teneant. Tenet consensus populorum, tenet auctoritas, miraculis inchoata, spe nutrita, charitate aucta, vetustate firmata. Tenet ab ipsa Petri sede, usque ad præsentem Episcopatum successio sacerdotum. Tenet postremò ipsum Catholica nomen, quod non sine causa, inter tam multas hæreses, ista sola Ecclesia obtinuit.*

*Contra ep.  
Manichæ. 4.*

Ita neque ad spiritum privatum , omnis fallaciæ fontem , & licentiæ quidlibet pro arbitrio credendi velamentum , in meo processu recurro; neque , vitioso circulo , idem per idem probō; sed viâ planâ, rectâ ac regiâ, & cum eâ , quæ spectatâ negotij conditione meritò potest, prudentiâ & maturitate, procedo.

Ad extremum, vt ad vos revertar , quos principio convenire me memini ; ex traditis præsentis ac superiori capite, & tum ratione , ex principijs scholæ vestræ deducta , tum ipsius etiam Calvinii (quidquid aliàs dixerit) auctoritate, validè firmatis ; apertè , ni fallor efficitur : nominem vestrûm , ô Reformati , absolutè certum esse posse, quòd veræ fidei dono præditus sit ; cùm ex una parte , ( quod tam multis contigit:) possit quisque

quisque vestrum à susceptâ sectâ differre, & ex altero vestro principio, vera fides semel suscepta nequeat amitti. Ex quo clarè habetur, unicuique vestrum consimiliter incertum esse; sitne privatim à Deo donatus spiritu illo veritatis; quem nempe dicitis non concedi, nisi verè fidelibus. Ergo ulterius, nemo vestrum absolute certus est, quod in se habeat veram fidei normam, sive amissim, quâ (ubi res est controversa) possit legitimum scripturæ sensum à falso discernere: atque hinc denique, nemo est absolute certus, quod in tali casu habeat veram & certam rerum fidei intelligentiam; & ita vacillat in vobis fides; sive, incertum remanet unicuique vestrum quid in tali casu sit reipsa sibi credendum. Ergo vester ille spiritus privatus, ad eum finem, propter quem à vobis est excogitatus, ineptus & inutilis est.

Quod si fortè quis instat: neque nobis singulis absolute certum esse, quod actu fidei divinæ, eoque (ex ipso modo tendendi) prorsus certo & infallibili reipsa credamus ea, quæ nobis credenda proponuntur.

Respondemus in primis: ex principiis doctrinæ nostræ, non cogi nos in ipso fidei exercitio, ejusmodi actus nostri absolutam certitudinem, velut experimento compertam habere: prout de fide sua, admittunt, & admittere debent adversarij.

Nam cum nos Spiritum veritatis, quo in credendo dirigimur, non nobis privatim arrogemus; sed ex Salvatoris promisso, agnoscamus per se atque directè Catholicæ concessum Ecclesiæ;

E

neque

neque enim singuli ( quod sæpè inculcandum est ) sed ipsa per se Ecclesia , est columna & firmamentum veritatis, eo ipso quod Ecclesia Catholica , dogma aliquod nobis proponit , tanquam ad fidem pertinens , nobis certum est , id verum esse , tanquam à Deo revelatum. Eique proinde propositioni simpliciter acquiescentes, proposito dogmati subijcimus intelligentiam nostram , & fidem nostram seridò ad illud extendimus : quantumvis fortassis aliquando dicamus contingere , ut ex parte nostrâ reipsa desit aliquid ad actus nostri puritatem , certitudinem, firmitatem. Quod equidem non impedit , quò minus reflexè , ut ita loquar , agnoscamus dogma propositum ex parte objecti certissimum esse.

In quem sensum intelligi potest, quod Tractatu 81. in Ioannem scripsit Beatus Augustinus : *Quantum quisque amat Ecclesiam Christi , tantum habet Spiritum sanctum.* Quia nempe quò quis arctius adhæret Ecclesiæ corpori , hoc ipso ampliùs de Spiritu illam animante ac dirigente participatur.



## CAPUT XI.

*Quantâ arrogantia Reformatores nostri, sibi suisque spiritum veritatis adesse jactent; quem SS. Patribus, immò & Apostolis Christi post Pentecosten, similiter adfuisse negent.*

**I**N rebus fidei controversis, recursum ad spiritum privatum, veluti fatuum & ad eos fines inutilem, ita per tot priora sæcula, inauditum fuisse in Ecclesiâ Dei, ipsos annales Ecclesiasticos, aut Patrum scripta pervolventi apertissimum & certissimum est. Ut qui è diverso animadvertit, ubicunque aliqua de scripturæ sensu, aut traditione etiam non scripta, exorta esset dubitatio; semper usitatum, quod rursus lib. 1. contra Cresconium c. 32. sapienter admonet Magnus Augustinus; *ut quisquis falli metuit obscuritate questionis, eandem Ecclesiam consulat, quam sine ulla ambiguitate, sancta scriptura demonstrat.* Ita videlicet, ut vel Apostolicâ Sede consultâ, sensus exquireretur Ecclesiæ; vel, ubi res esset majoris moliminis, coacto legitimo plenarioque Concilio, quid tenendum esset, definiretur.

Quod quidem etiam ex toto decursu harum apparebit Exercitationum; neque oppositum, si vel se ruperint, demonstrabunt adversarii: iis nempe exceptis, qui ea propter ab omnibus hæretici sunt habiti, quod ab Ecclesia secessionem

facientes, uti suprà vidimus, compulsi sunt, ad magis arcanas ac, cæcas vias confugere, quò aduersus apertam Ecclesiæ Catholicæ fidem, ejusmodi obtentu errores suos velarent atque proregerent.

Verùm hoc omisso, lubet in præsentia aliâ ratione, & quibusdam, rursus quasi fidiculis adhibitis, eandem veritatem ex ipsorum ore extorquere.

Quarto enim ex ipso Calvino, ejusve asseclis, quicumque ad spiritum illum intestinum arcanumque veluti normam credendorum, aut discerniculum legitimi sensus scripturæ divinæ, confugiunt; eodemne spiritu præditos fuisse arbitrentur, prisæ ac primæ Ecclesiæ Patres atque Doctores sanctissimos, excelsos heroes, quibus ipsi comparati, quasi locustæ videbuntur; Iustinum, inquam, Irenæum, Athanasium, Basilium, Nazianzenum, Chrysostomum, Ambrosium, Augustinum, & tot alios; qui, ut Augustini rursus voces usurpem, *cælorum instar, à terra suspensi, Deum portantes, præceptis tonantes, sapientiâ coruscantes, addere liceat, miraculorum gloriâ, ac prodigiorum splendore fulgurantes*; Ecclesiam Dei illuminarunt, defenderunt, confirmaverunt: an eos è contrâ, arcano illo Dei spiritu, quo se donatos ipsi jactitant, destitutos fuisse existiment?

Num. 14.

In Ps. 18.

Quid hic dicturos censes, Lector optime? Vtrinque enim angustix sunt; & utroque cornu instat dilemma.

Dicentne fortassis, & illos eodem fuisse spiritu præditos, ne sibi præ illis nimium arrogare videantur,

videantur, eaque re odium offensionemve sibi  
conferant inexplabilem?

At continuò contrà instabimus: quando, uti  
postea specialius demonstrandum est; negare  
non potest, neque verò negat Calvinus; eos  
ipsos Patres in variis fidei articulis; putà in  
altaris sacrificio, sanctorum invocatione, ora-  
tione pro mortuis, aliisque similibus, suæ sectæ  
adversos repugnantēque fuisse; consequenter  
hoc loco sibi esse dicendum: articulos illos, non  
esse re ipsa verbo Dei contrarios; si in illis dis-  
cernendis adstruendisque, interiore Dei spiritu  
ducti fuerint SS. Patres, ut jam ponitur. Et hinc  
ulterius errare nostros Evangelicos, dum illos  
articulos Evangelio aut verbo Dei consentaneos  
non esse pronuntiant. Neque verò ipsos legiti-  
mo regi Dei spiritu; sed falso & fallace illudi:  
cū idem Dei spiritus contrarius sibi esse non  
possit. Aut sanè, quo jure à nobis jam postula-  
bunt, ut sibi credamus; eò quòd, ut alunt, agan-  
tur interno Dei spiritu? Si ipsi non credant SS.  
Patribus, quos jam admiserint, eodem secum  
Dei spiritu donatos?

Dicēntne igitur, eo spiritu privatos fuisse PP.  
Sanctissimos, eosdemque Ecclesiæ Dei summos  
Magistros atque Doctores?

At hoc jam insaniæ & intolerandæ audaciæ  
est; homines, ut ita loquar, nudius tertius exot-  
tos, & [Christi verbo] *in nomine suo* venientes, JOAN. 5.  
nullis miraculis, missionē suam ac prædicationē  
confirmantes, nullā cœlesti sapientia, aut eximiâ  
vitæ sanctitate conspicuos, sed superbos, tumi-  
dos, carni & sanguini mancipatos, ad hæc du-

plices animo , & inconstantes in omnibus viis suis, & eodem ore sibi contraria & compugnantia tradentes : hos , inquam , arrogare sibi suisque intimum quendam ac specialem Dei Spiritum , & familiare velut oraculum ; quo de omni fidei veritate , ac scripturæ sensu , etiam adversus hætenus , & per tot sæcula receptam Ecclesiæ Catholicæ sententiam , certò ac liquidò iudicent , & quasi ex tripode pronuntient. Quem interim Spiritum negent à Deo accepisse , prisca illa & illustrissima Ecclesiæ lumina , sanctissimos , inquam , atque divinos mundi Doctores , Spiritus sancti præclara organa , & ad infidelium conversionem electa à Deo instrumenta.

Quasi Christus Ecclesiæ Sponsus , suam hætenus Sponsam despexerit , quæ potius sub sua primordia illo Spiritu principali confirmari debuerat : tandemque his novissimis diebus , homines nescio quos è cæno ac pulvere suscitavit , eosque speciali & insolita virtute ex alto imbutos ad Ecclesiæ suæ reformationem submiserit ; eandem scilicet priorum doctorum inscitiam , fædis erroribus deformatam , Evangelicæ ( quod aiunt ) puritati , ac nativo decori restituturos.

Atque istud palam , nec dissimulanter de priscis Patribus pronuntiant Novatores nostri ; quoties eos in aliquo sibi adversos esse , diffiteri non possunt : prout liquere potest , ex his , quæ eam in rem , sæculo 1. veritate 2. §. 6. collecta proponit noster Gualterius ; ex quibus nonnulla hîc apponemus gratiâ exempli.

De S. Hieronymo , inter alia plura convitia ita scribit Calvinus in 1. Cor. caput 7. *Hieronymus*  
*excacatus*



*excecatus nescio quo zelo (proindeque carens Spiritu Dei) non labitur tantum in falsas opiniones, sed precipitanter ruit.*

Idem l. i. instit. c. i. i. §. j. Gregorium Magnum; quem tamen habet pro sancto, & vero Romano Pontifice; quia sacras imagines dixerit esse liberos idiotarum disertè negat, in scholâ Spiritus Dei edoctum fuisse.

At ipsi Calvini discipuli, in suæ fidei clypeo; de S. Irenæo agentes, quod alicubi Deiparam Virginem, appellarit Evæ Advocatam; aiunt ea verba potius esse Idololatræ cuiuspiam; aut si Irenæi sint, *Irenaum minimè habuisse veram confessionis fidei sanctæ Religionis Christianæ intelligentiam.*

De Sanctis autem Cypriano, Augustino, &c. quod preces pro mortuis approbaverint, aiunt (pro sua nempe Evangelicâ modestiâ) *talem doctrinam, præcipiti eorum stupiditati esse adscribendam, cum vacui essent à spiritu Dei.* Hæc & plura laudatus autor.

Verumtamen est indignius quiddam atrociusque quod his adjiciam; & tale, ut nesciam, nùm id è sectariis cordatus quisquâ æquo animo sufferre possit. Id autem est huiusmodi. Istos videlicet novi Evangelij Conditores, Spiritum illum peculiarem, quo de legitimo scripturæ sensu, & ipsa dogmatum veritate; certi evadant, aulos esse non sibi modò, sed etiam vulgò suorum sequacium, asserere; quem tamen negarent habuisse Christi Apostolos, etiam post acceptum Spiritum sanctum in die Pentecostes; quippe quos censeant, etiam per ea tempora, in fidei



rebus errasse. Quod quidem postremum quam rectè congruat cum illo Calvinì pronuntiato; fidem semel acceptam amitti non posse, videant qui ita senserint.

Proferentur autem loca, ne quis eis falso quidquam affingi, cavillari possit. Lutherus igitur in caput 1. Epist. ad Galatas: *Petrus*, inquit, *primus Apostolorum extra verbum Dei docuit, & vixit.* Cujus voces assertans & exaggerans ipsius asscla Ioannes Brentius, in apologiâ confessionis cap. de Conciliis: *S. Petrus*, ait, *Apostolorum primus & Barnabas, etiam post acceptum Spiritum sanctum, unâ cum totâ Ecclesiâ Hierosolymitanâ, errarunt.*

Calvinus autem in caput 2. Ep. ad Galatas; ita de Petro scribit. *Petrus in gratiâ Iudaorum discessionem fecerat à gentibus, ita ut ab Ecclesia communione eas arceret, nisi abdicatâ Evangelij libertate, legis iugum subirent.* Quæ non tantum audacter & temerè, sed quod ad expressam Apostoli mentem attinet, etiam falsò scripta esse, convincit ipsius Petri sententia, prolata disertè in Concilio Ierosolymitano.

Verùm, quod ad rem facit, Calvinistæ complures apud Brorlesum Tract. 2. c. 2. sect. 10. §. 2. expressis verbis tradiderunt, Apostolos etiam post spiritus sancti in illos descensum, errasse. Inter quos Vvitrakerus, contra Bellarminum &c. cum sibi obiecisset: *sed fortè dicent adhuc Petrum Ecclesiæ caput non errasse.* Immo (respondet) *ille etiam erravit, de legis caremonialis abrogatione. Hac erat res fidei; & in hoc erravit Petrus.* Omitto alios.

Igitur

Igitur ex mente Reformatorū, errarunt in fide omnes SS. Patres; etiā post Spiritus sancti descensum errarunt in fide Apostoli; erravit & Petrus Ecclesiæ caput, & super quem firmiter fundata est Christi Ecclesia. At modò errare non potest Calvino addicta muliercula, errare non potest vilis artifex, qui neque fortasse norit litteras: Quia nempe, si istos audimus, SS. Patribus, & ipsis Apostolis, datus non fuit Spiritus ille specialis ac privatus; quem, tametsi nullo fundamento, gloriantur & iactant, concedi sectariis suis. Sed nimirum nostri Reformatores, soli sapiunt; & contempta omnis antiquitatis veneranda canitie, se non modò Patrum Doctorumque Ecclesiæ Doctores iactitant, ausis etiam quibusdam Lutheranis insanè scribere: *Quod si iam videret Augustinus, se Martini Lutheri discipulum profiteri non erubesceret.* Verum ut in hoc quoque veterum Hæresiarcharum Spiritum (qui teste S. Irenæo sese emendatores Apostolorum esse gloriabantur) in se transiisse demonstrent. Etiam Apostolis Christi, post acceptum etiam Spiritum sanctum, sese magis à Deo illuminatos prædicant, eosque erroris, etiam in fidei doctrinâ condemnant.

Atque ut ejus rei magis pateat indignitas, attendi velim ac ponderari modò suggerendas Lutheri voces, quibus Satanicâ quadam superbiâ hac in parte sese manifestè præfert universis tum SS. Patribus, tum Apostolis Christi. Ita enim in primis loco suprâ citato, suam doctrinam exaggerat, ut dicat: *Esse Ecclesia, Augustinus,*

*Apud Brel. Tr. 2. c. 2. scilicet. 10. §. 9. lib. 3. cap. 1.*

& alij Doctores; item Petrus, Apollo, immò Angelus diversum doceant; tamen mea doctrina est eiusmodi, quæ solius Dei gloriam illustrat. Subdit autem verba suprâ posita: Petrus Apostolorum summus, &c. in eo apertè sese ipsi Petro opponens atque antepponens. Similiter autem insanientem eum videas lib. de servo arbitrio, contra Erasmum editione 1. prout iam antè retulimus: *Nihil recipimus nisi scripturas, sed sic ut penes nos solos sit certa autoritas interpretandi. Quod nos interpretamur, hoc sensit spiritus sanctus: quod adferunt alij, quamvis magni, quamvis multi, à spiritu Satana, & alienatâ mente, profectum est.*

Quibus iam, ut vides, vniversum SS. Patrum cœtum, quâ parte ipsi aduersantur, non tantùm spiritu Dei destitutos, pronuntiat, sed etiam contrario spiritu Satanæ inspiratos. Non intelligens id de se iustiùs præsumi atque proferri posse, ut qui sese, non parum ipsius Satanæ, aut Angelorum eius, magisterio profecisse professus sit. Vti demonstrabitur non ita pòst; si priùs de eius hoc in genere arrogantia, nonnulla iam dictis adjecerimus.



## CAPUT XII.

*Reprimitur insolens, arrogansque Lutheri iactantia: [ certum esse doctrinam suam habere se de calo ] assertatissime denuntiantis.*

**E**Am quidem insolentem iactantiam, vetustis omnibus hæreticis propriam familiaremque fuisse, ex his quæ de illis ante diximus, manifestum est. sed placet idipsum & de recentibus specialius: ostendere: quamque immerito id sibi sumant, argumentis peculiaribus demonstrare.

Atque ipsum Lutherum iam supra audivimus, in impudenti ac temulento scripto, contra Henricum VIII. Regem Angliæ, pro more suo, eiusmodi amplum de seipso ac magnificum testimonium absque ullâ dicti sui probatione perhibentem: ubi ita loquitur inter cætera: *Certum quod doctrinam meam de calo ( sive à Spiritu Sancto ) habeam: & quod non possit sibi esse contraria.* Itemque, in libro, adversus falsò nominatum Ecclesiasticum ordinem Episcoporum, in hæc verba protestantem: *Christum testem futurum in illo die magni iudicii, hanc doctrinam non esse meam, sed Dei, sed Spiritus Domini, purique & sinceri Evangelij.* Et infra: *Dei enim doctrina est, Dei, inquam, & non mea.* Quibus æmulari velle visus est salvatoris vocem, Ioannis 7. *Mea doctrina non est mea, sed eius qui misit me.* At

At enim eo in exemplo, ea observanda est differentia, quod Dominus noster, qui in quantum Deus, erat ipsa prima & summa veritas, & in quantum homo, plenus gratiæ & veritatis; suæ prædicationi tamen assertionive credi noluit, nisi suam à Patre missionem; signis manifestis, ac prodigiosis comprobaret operibus. Hinc enim est illud, quod ait Ioannis 5. capite: *Si ego testimonium perhibeo de meipso, testimonium meum, non est verum.* Id est, ibi sistendo; non est legitimum; aut fide dignum: addens idcirco Paulò post: *Opera qua dedit Pater, ut perficiam ea; ipsa opera qua ego facio; testimonium perhibent de me, quia Pater misit me.* Rursum; Matthæi 11. & Lucæ 7. legatis Ioannis interrogantibus, num ipse esset ille Messias, quem expectarent Iudæi; satius censuit mirabilibus operibus in ipsorum præsentia exhibitis; quam simplici vocis assertionem responsum dare; duntaxat subiiciens: *Euntes renuntiate Ioanni, quem audistis; & vidistis. Cæci vident; Claudi ambulant, &c.*

At verò è contrà, bonus Lutherus, nullis prolatis argumentis, & tanquam tabulis, missionis suæ; & multis in contrarium occurrentibus; expectat ut simplici assertioni suæ; cæcâ quadam obedientiâ, ut olim Pythagoræ, discipuli sui, fidem præstent non insulsi homines.

Vanè equidem, & insipienter: præsertim cum clarè ostendi possit, ( contrà quam affirmat ipse Lutherus ) ipsius doctrinam, multis & manifestis scaterere contradictionibus; de quo mox aliquid addemus:

Quod

Quod autem hîc ingerunt nonnulli Lutheri discipuli; ipsi, pro tabulis missionis suæ, esse ipsas divinas scripturas, quibus nempe ipsius doctrina planè consentiens est; quod quidem his verbis expressit Meißnerus ab Herimano Hugone relatus: *Exhibuit Lutherus patentissimas magni Iehonah* *In d. sens*  
*litteras Biblio codice comprehensas: rages iterum* *Conf. et r.*  
 agunt, & in vitioso circulo ludunt. Nam quan- *Leßianæ.*  
 quam hi non ita fatui sint, ut per hoc velint, ab ipsa scripturâ missionem Lutheri nominatim cõmendari (quamvis interim non desint ex illo grege, qui eius adventum à S. Paulo prædictum somnient) sed tantùm id intelligant in sensu indicato; quod nempe Lutheri doctrina, ex hoc quod scripturæ divinæ sit planè consentiens, videatur ab ipsâ scripturâ accipere, de sui autoris Apostolatu, testimonium irrefragabile. Attamè hoc ipso, uti ferè solèt, apertè petunt principiũ, & pro ratione responsi sui, id quod in quæstione est, adferũt.

Quod, ut intelligas; quæ subijcimus, quæso, lector, attende.

Controvertitur inter nos & Lutheranos; an Lutheri doctrina, sive (quod idem est) nova eius, & antiquitati cõtraria, sacrae scripturæ expositio, legitima sit, & ipsi Dei verbo consentanea. Negamus nos: affirmat, cum suâ schola Lutherus, idque ex eo probat, quod doctrina sua, ab ipso Deo profecta sit, & speciali Spiritus Sancti inspiratione accepta. Sed cum dictum istud, nullâ probatione, aut signo, confirmet, eoq; faciliè negetur à nobis; accurrunt subsidio discipuli; dicuntque id ex eo probari, quod Magistri sui doctrina, seu ab eo prolata sacrae scripturæ expositio, ipsi  
 verbo

verbo Dei sit manifestè consentanea ; atque has habere veluti patentes , immò patentissimas litteras missionis sive Apostolatus sui. Per quod patentissimè apparet , ad ipsum recurri contrariæ principium ; quod erat an doctrina , seu expositio Lutheri esset ipsi verbo Dei consentanea ; ad quod jam reditur ; atque id quod est in quæstione , & negabatur à nobis , adfertur denique pro ultimo fundamento contrariæ probationis.

Iam verò , quod idem Lutherus , ex eo quod sese doctrinam suam de cœlo habere assereret , convincendos nos credidit , eam sibi , non esse , nec posse esse contrariam ; in hoc nempe sese malum & infelicem dialecticum ostendit : ut qui contra omnes artis regulas , ex eo quod magis ignotum est , & nobis etiam improbabile , infirmare contendit veritatem certissimam , & quasi manu palpabilem ; quæ est , ipsius doctrinam innumeris , ut ita loquar , contradictionibus abundare.

Manifestum quippe id , oculos habenti , & Lutheri scripta inter se conferenti. Quo in genere , ut observat Lessius in consultatione : *Quæ fides & Religio sit capeßenda* , consideratione 9. ratione 6. de sola communione Eucharistiæ , ex ipsius operibus , ipso vivo notatæ sunt 36. contradictiones , à Gaspere Querhamer laico saxone ; & in lucem editæ cum maximâ Lutheri confusione , & autoritatis ipsius imminutione ; Extatque insuper Cœhlæi liber , inscriptus *Luthernus septiceps* , nihil aliud ferè continens quàm ejus contradictiones de omnibus penè controversis articulis , ipsius verbis expressas.

Sed

Sed & eâ de re extat aliud opusculum, inscriptum : *Antilogiarum Mart. Lutheri Babyloniarum*; innumeris in omni materiâ per quinquaginta duorum capitum locos communes refertum Antilogiis : Autore Ioanne Fabri, Episcopo Vienneſi. Tandemque ſi quis eò recurrere voluerit, compendij gratiâ, is in Theſauro Iudoci Coccij, libro 8, articulo 7. Antilogias Lutheri ſo. inveniet, ſingularum locis, & verbis autoris, ad longum extenſis, deſcriptas.

Ex quo jam proinde liceat nobis argumentum iſtud, in caput autoris retorquere. Nam cum ipſo teſte, doctrina, quæ Deum autorem habeat, nequeat ſibi ipſi eſſe contraria; immò ut agnoſcit ipſe Lutherus in Aſſertionibus Teutonicis, articulo 25. *Qui ſemel mentitur, hic certiffimè ex Deo non eſt, & ſuſpectus in omnibus habetur* : Quomodo credemus ex Deo eſſe doctrinam, quæ locis innumeris, partim manifeſtæ falſitatis ac mendacij convincitur; partim etiam, ut poſt oſtendam, fraudulentis divini Verbi corruptionibus, Deoque indignis opinionibus, abundare cognoscitur.

Quibus in præſentiâ diſſimulatis; iſtud duntaxat nunc adiunxero : ipſam ſtyli Lutherani formam, ac ſcribendi methodum, nihil minùs ſapere quàm Spiritum Dei.

Evidens quippe eſt ipſum legenti, univerſum, ſerè, quinti, ſeu Lutherani, Evangelij corpus, his quatuor tanquam elementis compoſitum eſſe. Primùm odioſâ & intolerandâ ſuperbiâ, quâ etiam ſeſe ſupra Apoſtolos ipſos extollit. Quò non abs re ſcripſiſſe dicatur,  
Conradus



Conradus Regius, autor acatholicus, libro Germanico contra Hessium, *de cana Domini: Deus ob peccatum superbia, quo se Lutherus (ut opera eius testantur) ceteris praeferbat; spiritum suum illi subtraxit, & loco eius, spiritum iracundum, fastuosum, mendacem dedit*, Deinde acerbâ mordacitate, procacibusque in qualvis personas contumelijs, nullâ dignitatis cuiusquam habitâ ratione. Qua in re, rectè philosophantè invenio Desiderium Erasmus; dum contra expostulationem Hulteni de Luthero loquens, ita ait, ex animi sui sententiâ: *Nec adhuc possum animo meo persuadere, Christi spiritum, quo nihil est mitius, inhabitare pectus illud, ex quo tanta scaturit amarulentia*. Ipsa etiam Luthe-  
In locis  
com. n. clas-  
se 4.ro hanc de se hominum opinionem his verbis agnoscens: *Videa ab omnibus in me desiderari modestiam*. Et rursus: *omnes ferè in me damnant mordacitatem*.

Ad hæc scurrili & scenica dicacitate. Ac postremò insigni verborum & spurcitia, & libidinosi amoris exaggeratâ atque inculcatâ commendatione.

Quo quidem spiritu, infano, inquam, amore mulierum quàm occupatum animum haberet, vel illud ostendit, quod (ut plures scriptores testantur) in suâ Germanica sacrorum Bibliorum editione, tenere se non potuerit, quin ad caput 31. Prov. v. 10. notam hanc margini (dignum nempè tali Apostolo scholion) opportunè scilicet adscriberet: hunc inquam cuiusdam cantilenæ impudicæ versum, qui latinè sic sonat: *Nihil in terris dulcius amore femina, si quis eo frui possit*.



## CAPUT XIII.

*Speciali ratione conficitur: Doctrinam Lutheri, non de calo, nec à Deo haustam, sed ex orco, & à diabolo profectam esse.*

POst omnia igitur, mihi cum Luthero velut cominus agendum est; neque iam per consequentiam, sed per se directè, & ex lat aperta ipsius confessione, demonstrandum; non veluti iactat, doctrinam suam se à Deo habere, sed eam à furvis Magistris, orciq; incolis ei suggestam, atque insinuatam esse.

Siquidem in-primis, in libro de Missa angulari, alijsque tractatibus, ingenuè iuxta, inverecundè que fatetur; habuisse sese familiarem quendam & assiduum ex orco convictorem, cum quo videlicet, plus uno salis modio comederit; quem etiā non erubuit alicubi scribere, illum secum in lecto, etiam crebriùs quàm suam Catharinam, condormivisse: eundemque sibi, longâ disputatione præmissâ, autorem fuisse, ut Missam impugnet, atque in eam rem argumenta sibi suppeditasse.

*In colloq.  
mensalib.  
German. fol.  
281.*

Ex quo satis apparet, quo ille Magistro sub suæ prætensæ reformationis initia, usus fuerit; & quo suggerente, doctrinæ suæ primordia, fortè & progressum, perfectionemque, uti mox amplius confirmabitur, acceperit. Etenim præter hunc assiduum paredrum, sive assessorem familiarem

F

liarem

L. I. c. 9.

Loco cit. fol.  
275.

liarem ( qualem etiam Marco hæresiarchæ ad-  
stitisse , cuius suggestione prophetare videretur,  
testatur S. Irenæus ) tradit insuper se habuisse, unū  
alterumve , non infimæ sortis , sed primi quasi  
subselliij Dæmones , atque aded ( ut ait ) Theo-  
logiæ Doctores inter Diabolos: à quibus utique  
suam Theologiam acceperit : quippe velut addit,  
in colloquijs Iste. de verbo Dei fol. 23. ( & un-  
de id, nisi propriâ edoctus experienciâ ? ) *Diabo-  
lum esse , qui sacras litteras bene docere solet.*

Quod expressiùs confirmans, Tomo 7. pag. 228.  
apud Fitzsimon , ait : *Quando Diabolum colla  
non habemus affixum , nihil nisi speculativi Theo-  
logi sumus.* Hoc ipso innuens , se eiusmodi ma-  
gistrum collo infixum habere: ne fateri cogatur,  
se nihil nisi speculativum Theologum esse. Cui  
consentaneum est , quod idonei autores tradunt:  
Maximilianum I. Imper. anno 1518. in comitijs  
Augustæ vindelicorum publicè prandentem , vi-  
disse dæmonem formâ corporeâ Lutheri hume-  
ris incubantem ( seu Lutheri phrasi, ipsius collo  
affixum ) idque indicasse tunc Baroni cuidam  
pincernæ suo ; simul exinde ominantem, multas  
postea calamitates ab eo monacho in imperium  
importandas.

Neque id aded mirum apparebit, aut inso-  
litum ; cùm , præter alia , quæ eam in rem ad-  
ferri possent , testetur Cassianus collatione  
8. cap. 32. audivisse se Diabolum aperte con-  
fitentem , se Ario , & Eunomio suam hæresim  
inspirasse.

Sed quid vos ad ista , ô inconsulti Evangeli-  
ci ? Annon operit confusio faciem vestram: cùm  
hæc

hæc tam absurda, tanque impia, magistrum vestrum, immò Apostolum & Evangelistam, de se tam putidè profitentem attenditis? & non incessit animum vestrum iusta formido, ne in vos conveniant verba illa Apostoli 1. Tim. 4. *quia in novissimis temporibus discedent quidam à fide, attendentes spiritibus erroris, & doctrinis demoniorum?* Sed tamen est aliquid ultra, hoc in genere, quod hoc loco vobis per occasionem repræsentem; horrendum sanè, & tam stultè impium, ut illud vix credat animus, ab aliquo vestrum nisi planè infano, proficisci potuisse. L. 2. de div

Verùm, ut huc quasdam M. Tullij voces proportionè transferam: *Nihil tam absurdè dici potest, quod non dicatur ab aliquo, Philosophorum dixit ille, nos hereticorum.*

Audite, sultis, Evangelistam vestrum, in colloquijs mensalibus editionis Islebientis, capite de operibus Dei, fol. 35. §. 8. rem, uti aiebam, prodigiosè insanam, de semetipso, his verbis, referentem. *Non semel Domino Deo nostro aliquos egregios articulos porrexi, & exhibui, eumque docere volui. Sed optimus ille ac bona frugis Deus, bellè mihi tergum suum* (hanc vocem honestiorem suppono pro eâ, quâ istic licenter spurcus Propheta usus est) *obvertit conspicandum: itaque sapientia illa in vanum recidit.* Hæc ille.

Quæ quidem quocunque te vertas, & quælibet illis sensum assignes, à supremâ quadam indignitate, & atroci in Deum contumeliâ, nullâ ex parte excusaveris.

Nam si de Deo vero ac Domino nostro dicta intelligas; ipsâ materiâ, & formâ sermonis, Blasphemia est impudentissima. Sin autem de Deo aliquo, quem sibi propriè adoptavit Lutherus, puta, qui iuxta nonnullos, ab Apostolo appellatur *Deus huius sæculi*; eâ iam ex parte, atrox est in verum Deum contumelia, quòd alius ab eo agnoscatur Deus, & ipsius quidem infensissimus inimicus, id est Diabolus.

2. Cor. 4. v. 4.

Quod tamen ab ipsâ Martini mente non abhorre; deprehendet, qui eum audierit, Tomo 3. Germanico Ienenfi, in epistola de libro adversus rusticos, de se suisque itta promentem: *Nos à Diabolo captivos teneri, veluti à Principe ac Deo nostro, ut cogamur facere, quidquid nobis inspirat.* Quam postremam vocem notari velim; ut tandem intelligant discipuli sui, cuius Dei spiritu inspirata sit Magistri sui doctrina.

Et nõ tiñiunt ambæ aures vestræ Domini Neo-Evangelici, ad tam insanas tamq; impias Apostoli vestri voces: quem ipsi ter sanctum appellabatis; quem à Deo Missum ad orbem illuminandum jactabatis; quem denique ut virum incomparabilem, & cuius ipse Augustinus non dedignaretur esse discipulus, tantum-non pro idolo vestro adorabatis.

Quem modò è contra, si hæc quæ tradimus, aliquousque admittitis in animum, aut tanquam splendide insanum despuere, si vel hoc prætextu tanta velari possit impietas, aut velut atheum, atheoque pejorem, abominari debeatis.

Neque denique ad istam lucem aperitis oculos; quos, sive ignorantia veri, sive affectata vitæ licentia,

centia, sive domestica traditio, & usu inolita disciplina, clausos hactenus tenuit; & res salutis vestrae in tuto collocandi desiderio, veteri vos redditis Ecclesiae, à qua uti vel hinc, nunc iam potestis intelligere, Diabolica fraude seducti secessionem vestri incautè fecere maiores?

Quà videlicet, aut ei affini, contemplatione, ad hoc ipsum adductos, & hodie complures, & antehac quàm multos, è consortibus vestris, compertum est, viros prudentiâ & doctrina præstantes. Cuius rei fidem indubitata facit, quod legere liceat apud Brerleium Tract. 3. sect. 4. à Fulcone Protestante relata, neque improbata, Stapletoni Doctoris Catholici verba, congreges vestros sic alloquentis. *Quam plurimi à vobis, etiam magni nominis & excellentis eruditionis viri, ad Catholicam migraverunt, vestras non tam insipientias & ineptias, quàm impietatem & blasphemias pertasi, atque exosi. Huiusmodi sunt (ut paucos, inquit citatus Doctor, è multis nominem, eosque solos, qui etiam scriptis monumentis, suam à nefariâ sectâ vestrâ discessionem, orbi testatam reliquerunt) Georgius Vicellius, Fredericus Staphilus, Franciscus Baldvius; Sanissius Oricovius; & (alijs omissis, quos ibi refert) nuperrimè duo Ministri Galli, Matthæus Lannoy, & Henricus Pennetier; qui etiam vestras insipientias & improbitates, sibi ex aliquot annorum consuetudine notissimas, scriptis gallico idiomate libellis, generi sua propalarunt. Quibus plures addit ex suis Anglis ipse Brerleius.*

Sed de alijs pluribus Lutheri & Calvinii horrendis in Deum Christumque blasphemijs, infra alijs erit dicendi locus.



Illud ad extremum duntaxat hoc loco lectorem ingenuum admonuerim ; quæ suprà diximus de Lutheri doctrina , non à Dei Spiritu , sed ab ipsa Diaboli inspiratione profecta ; nō eò tantummodo valere , ut sectam illius primitivam ac rigidam , orbi exosam , abominandamque redderent , aut illas quoq; sectas varias ac multiplices , quæ sub Lutheri , quidem auspicijs , eius tamen sententias pro suâ quæque ratione ac modo temperantes , diversâ censentur appellatione : ita ut hic quoque verum sit , quod de Donati parte seu factione , olim scripsit , B. Augustinus : sectam itidem Lutheri , in multa minutissima frustra esse conscriptam.

*l. 1. de Bapt.  
contra Do-  
natistas , c. 6.*

Verùm insuper eodem titulo eas quoque sectas recentiores , quæ , à Luthero deficientes , à suis proprijs institutoribus diversimodè nuncupatæ , universè uno Religionis Reformatæ nomine veniūt , nobis exosas , suisque item sectatoribus vehementer suspectas , esse debere.

Etenim si fonte infecto , necesse est infici & rivulos inde deductos : pariter necesse est diabolico veneno pollui particulares Religionēs , quarū primordia , in primævâ suâ origine , pestilente satanæ spiritu , atq; halitu , seu suggestionē , intincta atque infecta sint.

Atqui posteriores sectas , originem suam ac primordia , veluti primævo prætensæ Reformationis auctori , seu quinti (uti nos loquimur) Evāgelij , fonti , ipsi Luthero debere : esse debet extra controversiam . Quando ipse Calvinus eā gratiâ à principio Lutherum pro insigni Christi Apostolo se habere , testificatus est ; & epistolâ suâ 409. *Ex Ecclesia VVittenbergenſi* , in quâ tum Lutherus

therus hæresim suã disseminabat, fluxisse hac atate Evangelium, agnoscit. Disertissimè denique libro de necessitate reformanda Ecclesia; ubi: *Deus*, inquit, *initio Lutherum & alios excitavit, qui nobis faciem ad reperiendam salutis viam prætulerunt.*

Sed & Zuinglianissimum originem suam posse quodammodo ad Lutherum quoque reducere; ex eo apparet, quòd Andream Carolstadium, priusquam sacramentarius fieret, eamq; hæresim Zuinglio discipulo suo instillaret, satis constet Lutheri asseclam, eiq; conjunctissimum fuisse. Tandem etiam Anabaptistas prodixisse ex Lutheranis, ostendit florimundus Ramundus l. 2. de ortu hæresis, &c. c. 2. ubi Rotmannum quendam memorat, ex Lutherano, Calvinistam, ex Calvinista Anabaptistam; atque Thomam Muntzerum, Anabaptistarum facilè principem, testatur Melancthon apud Gaulterium, etiam in Lutheri discipulis numeratum esse.

Audatur demum rem verbo uno absolvès ipsemet Lutherus; dum Tomo 3. in c. 5. Epistolæ ad Galatas: *Nostro tempore*, inquit, *primum defecerunt à nobis sacramentarii* (quo nomine Zuinglianos & Calvinistas intelligit) *post, Anabaptistæ.*

Neque nobis contestim opposueris: si, uti dicitur, à Luthero defecerint: non posse meritò eorum doctrinæ, ut quæ iam Lutheranæ contraria sit, huius malignum ac perversum spiritum, aut pestem illam ex orco haustam, affricari.

Ad hoc enim facilè reponam. Quod, tametsi ex eo dicantur à primo autore quinti Evangelij defecisse, inquantum super fundamēto, quod ille posuit, varia super ædificarunt, ipsius menti con-



traria; ex vetustâ nempe, usuque perpetuo præscriptâ, hæreticorum licentia; quam jam olim memorans Tertullianus: *Mentior, inquit, si non à regulis suis variant inter se; dum unusquisque proinde suo arbitrio modulatur, quæ accepit, quemadmodum de suo arbitrio illa composuit ille qui tradidit. Denique penitus inspectæ hæreses omnes, in multis, cum autoribus suis dissentientes deprehenduntur. Nihilominus tamen; quamdiu ipsum doctrinæ Lutherianæ fundamentum retinent, hoc est, inquâ, illud pestilens nefariumque dogma: *Iustificari hominem per solam fidem*; quod Protestantes varij apud Breilegium, tanquam Ecclesiæ suæ animam habent, solum primum salutis fontem, omnium deniq; articulum primum ac summum, & de quo reipsa Novatores nostri omnes consentiunt; negari non potest, ea ex parte, eorum doctrinam ipso Lutheri spiritu esse imbutam, ac proinde non de cælo, aut à Deo, sed ex orco, & diabolo esse profectam.*

Nam quis illum dubitet, primum ac summum doctrinæ suæ caput, accepisse ab illis colendis suis præceptoribus, magnis videlicet Theologiæ æternæ Doctoribus: maximè cum dogma sit eiusmodi, quod & summam vitæ corruptelam, in orbem Christianum inducat, cum optatâ malignis genijs, animorum strage ac pernicië; & ipsius Christi Evangelium, ut post ostendemus, perversissimâ interpretatione ab imo convellat ac subruat: opportunè dicente in rem nostram in caput 1. Epistolæ ad Galatas, B. Hieronymo: *Perversâ interpretatione, de Evangelio Christi, hominis fieri Evangelium; & quod pejus est (inquit) diaboli.*



## C A P U T · XIV.

*Calvinum, aut Calvinistas, quod eis propriè Spiritus privatus competat, nullâ satis firmâ ratione probare posse.*

**E**VM spiritum, ut ante vidimus, sibi suisque propriè arrogat ipse Calvinus. Verùm & Lutherum, eundem sibi, suisque vindicare, ex eo collegimus; quòd in Assertionibus, articulo 115. & sequentibus, Concilia etiam œcumenica, ita contemnat, ut perinde atque Calvinus, dicat, quidquid illa definierint, id omne cujusvis privati hominis judicio esse subiectum: atque aded quid credendum sit, quid non credendum, relinquendum judicio cujusvis viri spiritualis. In quem itidem sensum Ioannis Brentij expressa verba, citavimus.

Atque, ut veteres suprâ memoratos omittam, similem sibi spiritum è recentioribus arrogarunt Libertini quidâ suvenkfeldiani, & Anabaptistæ fanatici: quibus hac in parte affines censeas ( nisi quod re ipsa videantur esse quidam Calvinismi Surculus ) in Anglia dictos Tremulantes; quòd veluti jugiter in divini Numinis constituti conspectu, præ summæ atque infinitæ Majestatis horrore perpetuo tremore membra quatiant: quemadmodum à Præcolo & Sanderò memorantur ex Anabaptistarum grege ejulantes appellati, quòd ex simili aliquâ contemplatione, continuis lacrymis

lacrymis & ejulatu cuncta complerent.

His autem positis: cum prædictas sectas, com-  
pertum sit inter se, variis in articulis esse contra-  
rias; & aliunde constet, Dei spiritum sibi adver-  
sum & contrarium esse non posse: evidenter  
sequitur, earum aliquas (aut potius omnes) fal-  
so fundamento eum spiritum sibi vindicare; ac  
proinde earum quamlibet non immerito fraudis  
ac falsitatis esse suspectam; nisi siqua id privi-  
legij, sibi præ cæteris (uti specialiter contendunt  
Calvinistæ) concessum esse ostenderit.

Quam in rem in-primis audire juvat ipsum  
Calvinum, de spiritu Dei, quo præditus sit, li-  
bro 2. *de libero arbitrio adversus Albertum Pi-  
ghium*, magnificis verbis testificantem. *Desinat*,  
inquit, *stupere Pighius, unde hac nova & inaudita*  
*doctrina nostra efficacia: quando res ipsa clamat,*  
*neque nos hodie loqui, sed Deum ex cælo virtutem*  
*suam exercere.* Quibus satis innuit, Deum ipsum,  
seu Dei spiritum, per os eius esse loquutum; quod  
magis expressit mox referendâ formâ loquendi.

Verum, ut Calvino, iustâ ratione jam non og-  
geram, quod immerito Salvatori nostro objecta-  
bant Iudæi. *Tu testimonium perhibes de te ipso, te-*  
*stimonium tuum non est verum: ante omnia ex ore tuo re-*  
*i dico*, testis fallax, & insipiēs. Audio enim te ejul-  
dē Tractatus lib. 1. in Lutheri laudibus his vobis  
fatue exultantem: *Res ipsa clamat, non Lutherum*  
*ab initio loquutum, sed Deum per os ejus fulminasse.*  
Et iterum: *Testamur Lutherum nos habere, pro in-*  
*signi Christi Apostolo*, eundemque epistolâ tuâ  
145. vocas, *eximium Dei servum, & fidelem Eccle-*  
*sia Doctorem.* Quæro igitur nunc ex te; an au-  
thenticum

thenticum hoc, luculentumque, quod de Lutheri doctrinâ, spiritu, Apostolatu, dedisti testimonium verum fuerit; an non?

Si etenim falsum illud fuisse responderis : hoc ipso te falsum prophetam, eoque Dei spiritu, quo veram fidei doctrinam à falsa te discernere jactas temer destitutum ostenderis.

Si autem illud verum fuisse, atque adco Lutherum reipsa fidelem Apostolum Christi fuisse, Deumque per os ejus loquutum, pertenderis; jam te ipsum sanè cōdemnaveris ore Lutheri. Quippe qui ex spiritu Dei loquens, isto te fulmine, atque tecum omnes universè sacramentarios, Deo utique ( veluti loqueris ) per os ipsius fulminante, perculit : *Hæreticos seriò censemus & alienos ab Ecclesia Dei, Zwinglianos, & omnes Sacramentarios, qui negant corpus & sanguinem Christi ore carnali sumi in venerabili Eucharistiâ.* Verba sunt Lutheri asseritione 27. contra articulos Lovanienses. Atque vt dissimulem, quæ eâdem in causâ pluribus disputat in libro inscripto: *Defensio verborum cœnæ &c.* vbi cum ipsum errorem tuum, appellat phantasma diaboli: audi quid proprè de tuo tuorumque spiritu judicet, apud Gretserum, libro 1. contra Goldastum cap. 12. dicens: *Spiritus Calvinistarum est diabolicus spiritus, mendax spiritus, rebellionis & dissensionis spiritus,* sic ille.

Vides ut undique constricta teneris vulpecula: permittes etenim, ut eo te nomine compellem; Augustinum sequutus; cujus utique monitu, hanc ipsam contra te argumenti formam propensius usurpem. Is siquidem enarratione in psalmum 80.

cum



cùm præmisisset *vulpes, insidiosos, maximeque hæreticos, significare, fraudulentos, in cavernosis anfractibus latentes & decipientes, odore etiam retro putentes*; atque illo prolato, ex secundo capite Canticorum versiculo: *Capite nobis vulpes parvulas, quæ demoliuntur vineas; latentes in cavernis tortuosis*; quod quidem in hunc sensum explicat *Capite nobis, convincite nobis; capis, enim, inquit, eum quem de falsitate convincis*. Postremò eam rem, ipsius cõfirmat Salvatoris exemplo, Matthæi 21. Principes Sacerdotum simili dilemmate, seu quæstione ancipiti, perurgētis: *Vulpes, inquit, solent habere tales foveas, ut ex una parte intrent, & ex aliâ parte exeant: ad utrumque foramen captor vulpium retia posuit. Dicite mihi, baptisumus Ioannis, unde erat: è cælo, an ex hominibus?* Quo verbo cõstricti, adversarij obmutuere. Ex quo demum infert præclarus Doctor, in rem nostram: *obtemperemus ergo & nos docenti Verbo Dei: proponamus ad foramen utrumque; ut unde vulpes exeat, capiatur. Quod eo loco ipse facit; & nos hîc & alibi, facimus.*

Neque propositi argumenti vim effugeris, si fortè dicas Calvinũ restrictè locutũ de Luthero in ipsis initiis; quãdo nempè nondũ Calvini placitis opposuerat se, aut eũ pro hæretico habuerat.

Contrà enim facit: tum quod ipsi Lutheri discipuli, quò doctrinæ Magistri sui, seu inconstantiâ seu cõtrarietatem excusent, cõpellâtur dicere, illum diversa sensisse à principio, cùm nondum haberet Spiritum Dei. In quo rursus ambages, & Labyrinthus inextricabilis: ipso præsertim Luthero verbis expressis contradicente, dum superius ita scribit cõtra Regẽ Angliæ: *Certus sum, quòd*

*quod doctrinam meam de calo habeam, & quod non possit esse sibi contraria.*

Tum, quod hæc responsio aperte repugnat ipsi Calvino, disertè docenti: eum, qui a meli verâ fide, ac Spiritu præditus sit, non posse eundem, aut spiritum Dei deinceps amittere. Ex quo statim sequitur; quod si Lutherus ab initio, cum eum Calvinus pro vero Christi Apostolo habuit, vero Dei Spiritu præditus fuerit; etiam postea, cum ipsum Calvinum pro hæretico perverso habuit, eundem spiritum retinuisse, dicendus sit.

Verum his obiter, rei illustrandæ, insinuaris; quid supra relatis Calvini verbis, aut veri subest, aut verisimilis, magis directâ ratione consideremus.

*Res ipsa clamat*, inquis. Quæ res, inquam?

An ipsa fortasse doctrina tua per se spectata: quæ non nova duntaxat ( nisi fortè quatenus, ex obsoletarum rancidarumque hæresum parentibus scrutis confuta atque conferta est ) ipsique adde Catholicæ Doctrinæ, continuâ ab Apostolis Christi, eorumque successoribus, per tot sæcula, traditione acceptæ, eidemque tot confirmatæ divinis prodigijs, tot sanctorum Doctorum scriptis, tot martyrum sanguine roboratæ, prorsus contraria in his Tractatibus à nobis ostenditur; verum etiam per sese instabilis, & varia, & secum ipsa fœdè pugnans, insuper in Deum, Divosque injuriosa, tandemque omni licentiæ, probroque favens, ac obnoxia?

Quibus utique titulis, à nobis paulatim demonstrandis, non divinam sese profectò clamat, sed humano, eoque versatili, excogitatam ingenio, &

ab

*Isaia 19.*

ab eo, quem scriptura memoret, Spiritus vertiginis esse conceptam.

*Res ipsa*, inquis. Num illa, quam commendas doctrinæ tuæ efficacia; quâ velut magnus quidâ Apostolus Gentes complures ad purum Christi Evangelium reduxeris, & collapsos Chritianorum mores, uti prætendebas, ad veram virtutem sanctitatemque reformaveris?

At, præterquam, quodd religio tua exiguis sanè terrarum spatijis circumscripta esse noscatur, eaque vix usquam tecum perfectè consentiens; ut manifestum sit ex aded diversis singularum gentium, fidei, ut appellant, confessionibus: è diverso, inquam, mirum videri potest, quod vobis libertatem Evangelicam, hoc est immunitatem ab omni lege, & laxam carnis licentiam, prædicantibus, non plures ab Ecclesiæ Romanæ castris ad vestra signa confugerint.

*Sup. 4.**l. 4. contra**Parmen.**Matth. 15.*

Vt jam non addam, quod res ipsa clamat, & alibi expressius confirmabitur: prætenfam vestrâ religionem in dies labi ac deficere; & *spuria ista vitulina* (qua voce S. Optatus M. levitanus designari credit hæreticos) sensum evelli extirparique: ut sit indicio, ex Salvatoris denuntiatione, eam plantationem à Patre cœlesti plantatam non esse.

Porrò, quod ad mores tuorum discipulorum attinet, quàm ij non ad amussim veræ sanctitatis exacti fuerint, liquidò apparet ex verbis tuis, quibus eos, qui te ab initio affectati sunt, quique primitias spiritus tui, & reformationis tuæ primævam formam præferre debuerunt, comodo describis atque deformas, ut in ijs non Christi

Christi discipulos , sed Antichristi præcursores, & quasi emissarios, quibus facile possit agnoscere. Verba tua, certioris fidei gratiâ, opportuno loco postea annumerabimus.

Denique, *res ipsa clamat*, inquis. Virtutes fortassis, signa, prodigia, quibus suorum Apostolorum Deus , consuevit ornare prædicationem , & verba confirmare ! Quæ nulla à vobis exhibita, aut ostensa fuerunt : ut de vobis quinti Evangelij præconibus loquens rectè observarit, familiaris vester , Desiderius Erasmus : *Non credebatur Apostolis ; nisi miracula adstruxissent fidem doctrina : nunc quilibet sibi postulat credi, se habere spiritum Evangelicum ; cum interim, ut addit: nullus vestrum adhuc extiterit , qui vel equum claudum sanare potuerit.* Et si qua fortassis attentaretis miracula; non ex mortuis vivos, ut Apostoli; sed ( ut de te , Calvine , speciatim testatur Ioannes Bolsecus, primùm tuus, ac deinde noster) ex vivis effeceritis mortuos.

Ex quibus omnibus apertè colliget lector ingenuus : quod, cum , ex Ambrosij pronuntiato; *Morale sit omnibus , ut qui fidem exigunt , fidem adstruant;* ab hac quoque lege sese liberum prætendens Calvinus , qui iactabundè quidem de semetipso, suaque doctrina pronuntiet; non esse se qui ea quæ docet , eloquitur , sed quoddam per os suum, loquatur Deus , id interim sibi credi velit, nullo id sat firmo fundamento adstruens ; multò autem minùs, quæ, est præsentis capituli intentio, id sibi, suisque, pro cæteris sectis, competere, ullo signo, indiciove confirmans.

Etenim si ex Calvino Calvinistisve quæramus,  
utrum

L. I. in c. 1.  
Lucæ.



utrum Lutheranos ; exempli causâ , in rebus fidei dijudicandis , eodem secum spiritu privato, seu interiori Spiritus persuasione , donatos esse credant; difficulter , opinor , eâ se quaestione extricabunt.

Nam ex unâ parte si consequenter loqui velint , affirmare non possunt : ne continuò quis inferat , Calvinistas ipsos , vero Spiritu Dei carere : quippe cum internus eorum spiritus , Lutheranorum spiritui planè contrarius sit ; quem iam admiserint verum spiritum Dei esse.

Negabunt igitur ; sed mox instabitur ex adverso : quòd cum Lutheranis v. g. ( perinde ac ipsi ) eo se spiritu præditos esse protestantibus , & certam itidem illius in animo suo experientiam allegantibus , fidem ipsi habendam non censeant : iniuste à nobis alijsve postulent , ut ipsorum potiùs de suo spiritu attestationi fidem habeamus ; quando , ut apparet , pro parte suâ , nullis argumentis indicijsve probare possint , suum potiùs spiritum , legitimum ac verè divinum esse , cæterorum autem falsum atque fallacem , & meram cerebri sibi somnia fingentis aberrationem.

Nisi fortè , quod quidam insinuant , id exinde à se probari putent , quòd spiritus ipsorum reipsâ sit cum Dei verbo consentiens , à quo aliena sit , interior illa adversariorum persuasio.

Sed præterquam , quòd ita incidunt in apertum, & suprà à nobis rejectum circulum ; dum ( uti patebit consideranti ) spiritus sui sinceritatem,

tatem ex legitimo Scripturæ sensu, & legitimum Scripturæ sensum, ex spiritus sui sinceritate, recipere confirmant: Id ipsum licebit adversariis ipsis dicere: nempe spiritum suum verbo Dei esse consentaneum, aliorum autem ab illo dissentire.

Vt proinde sicut per refugium suum ad interiorem illam Spiritus sancti persuasionem, in eoque contumaciter persistentes Calvini sectarii, eripiunt nobis aliisve facultatem omnem errores suos ex Dei verbo directe convincendi, quia quidquid in contrarium adferas, præfractè dicent, id non eum in sensum, qui prærenditur, sed in eum quem illis dicet spiritus privatus, esse accipiendum: pari ratione, eandem sibi facultatem præcludant contra adversarios, similiter ac ipsi, ad cæcum illud interni spiritus latibulum confugientes, & consimiliter de sapore intimo, quo scripturarum sensum legitimum à non legitimo discernere queant, insolenter gloriantes.

Multo autem minùs erit, unde intra seipso, intra ipsam, inquam, Calvini scholam, exortas de fidei doctrina controversias, possint componere: quando apud ipsos, & unica fidei comprobanda regula sit verbum Dei, & eorum quilibet æquo jure interiori illa Spiritus sancti persuasione sese præditum jactare ac pertendere.

Quæ omnia, quantam, in Ecclesiam Dei, religionum confusionem, animarumque perniciem invehant; unoquoque scilicet, eo prætextu, fidem sibi propriam modulante atque constituyente; & ipsa rei natura monstrat, & confirmat experientia, ipso jam olim eâ gratiâ  
G indignante.

indignante Luthero ; *cujus hæ voces sunt in epistola ad Antuerpienses : Tot inter nos Religiosos sunt quot homines : nec asinorum quisquam est tam hebes & vecors , qui insomnia proprii capitis & propriam opinionem , pro instinctu Spiritus sancti , & seipsum prophetam , haberi nolit. Sic ille.*

At piget me tandem , tædetque fortassè lectorem meum , prolixioris in hoc argumento confirmando sermonis. Quanquam operæ fuit , ei fallaciæ denudandæ demonstrandæque verba pluscula facere : quòd eo fundamento sublato , necesse sit ruere , omnem istarum sectarum machinam & columen Religionis reformatæ.

Nam cum ea fides , seu Religio , ut ipsi adstruunt , propriè & unicè fundetur in scripturæ canonicæ autoritate ; quæ autem scriptura sit canonica , & quis verus illius sensus , habeant demum atque discernât ex illâ Spiritus sancti persuasione : si hæc persuasio , quàm sibi ad omnia adesse & sufficere jactant ; uti tot modis satis apertè demonstratum est , frivola sit & insufficientis ; immò verò fallax & erronea : conficitur , eorum religionem , quam ipsi Reformatam appellant , sub obtentu speciosi nominis , umbraticam esse , inanem , falsam , & humano generi perniciosam. Quippe cum ejus sectatores , suæ imaginationi aut affectui obsecundantes , animi proprii conceptus , pro puro verbo Dei vendicent , & tum ipsi sese , miserè delusi , decipiant , tum aliorum simplicitati imponentes ,

imponentes , eos secum in fraudem inducant.  
Quod quidem præsertim evincere , scopus est  
operis præsentis.

Sed modò, hunc ipsum in finem, aliâ nobis viâ  
procedendum est.



## C A P U T XV.

*Novitias sectas à Deo non esse , ex ipsarum fructibus aperte colligi. Atque in primis , ex inducta per illas , in orbem Christianum magnâ vitæ licentiâ , ac supremâ morum improbitate.*

**P**roximè vidimus, ex una parte Lutherum pro certo & comperto ponentem , se doctrinam suam de cælo & à Deo habere : ex altera Calvinum , ex Dei virtute manifestâ , auctoritatem sectæ suæ conciliare satagentem : neutrum asserti sui probationem efficacem adferentem. At pergimus nos præsentî capite, prorsus oppositum ex ipsarum sectarum fructibus , efficaciter demonstrare.

Certissimum est Salvatoris nostri , 'Matthæi, 7. capite pronuntiatum : cùm de falsis prophetis doctoribusve , qui prætentâ boni specie Ezechielis phrasi , *capiunt animas volantes*, detegendis ac dignoscendis agitur ; doctrinæ eorum fructus spectandos. Quia , cùm non possit arbor bona malos fructus facere : si doctrinæ eorum fructus , sive effectus , mali sint , pro

certo habendum, ipsam quoque doctrinam, malam esse.

Quapropter instituti nostri non parum interest, diligenter attendi, quos denique fructus, novitiæ sectæ, sive quoad morum integritatem, sive quoad ipsam fidei Christianæ conservationem, in Ecclesia Dei protulerint; ut quales ipsæ sint, non præsumptione temerariâ, sed indubitato documento cognoscatur. Et quando ea res, non melius, neque efficacius constare potest, quàm ex eorum, qui eas sectas, vel instituerunt, vel sectati sunt, ipsâ videlicet veritatis vi, extortâ fideli confessione: idcirco expressâ proferemus eorum testimonia, ut nulli hac de re dubitatio restare possit. In primis igitur Patriarcha Lutherus, sectatorum suorum, in ipsis suæ prædicationis exordijs, quo tempore solet, cuiusque Religionis studium ac fervor comprimis vigere atque spectari, vitæ rationem moresque solennes, hisce coloribus, nec uno loco, graphicè depingit.

Imprimis enim sic illum audimus in Postilla Dominicæ 1. Adventus; eâ super re pronuntiantem. *Mundus ex hac doctrina* (Lutheranâ scilicet) *in dies deterior evadit: quod pessimi demonis opus & negotium est: Enimvero videmus, quòd hoc tempore homines sint magis avari, immiseri-cordes, impudici, procaces, adeoque deteriores quàm antea in Papatu fuerunt.* Et in sermonibus convivialibus Germanicis: *Mirabilis, inquit, & plena offendiculo res est; quòd ab eo tempore, quo prima Evangelij doctrina in lucem revocata fuit, mundus de die in diem deterior evasit,*

*evafit , Chriftiana libertate quilibet ad libitum abutitur , non fecus ac fi cuilibet quidlibet facere concefsum fit.*

Iam è Lutheranis Andreas Musculus lib. de Prophetiâ Chrifti : Iterum , cogor dicere , quia verum eft : contumacioreſ homines , in quorum animis , omnes omnis virtutis & honeſtatis ſcintilla ſunt extinâta , & apud quos nihil iam pro peccato habetur , nuſquam nec apud Ethnicos , Iudeos , Turcas inveniri , quàm inter Evangelicos ; apud quos omnino ſolutus ac liber viget diabolus ; utque paucis rem omnem eloquar , illud nunc eſt , eoque noſtra Lutheranorum res redijt : ut ſiquis videre cupiat magnam turbam , nebulonum , Atheorum , uſurariorum & deceptorum , ei adeunda ſit civitas aliqua in qua Evangelium predicatur. Denique , pluribus aliis omiſſis , quos indicat Tannerus diſp. 1. de fide q. 3. dub. 4. non minùs tragicè de fratribus ſuis , Evangelicâ illâ libertate abute ntibus , concione 4. ad caput 21. Lucæ , ſcribit Iacobus Andræas Schmidelinus ; ubi hæc habet inter cætera : *Atque ut totus mundus agnoſcat , eos ( ſcilicet , Lutheranos ) non eſſe Papiſtas , nec bonis operibus quicquam fidere , illorum etiam operum nullum penitus exercent. Iciuniij loco , comefſationibus & perpotationibus nocte dièque vacant. Vbi pauperibus benignè facere oportebat , eos deglubunt & excoriant. Precationes vertunt in juramenta , blaſphemias , & divini nominis execrationes ; idq ; tam perditè , ut Chriſtus ne ab ipſis quidem Turcis hodie tantopere blaſphemetur. Sic ille.*

Addo ad extremum Paulum Eberum præfatione in comment. Philippi , in epiftolas ad

Corinth. Germana ingenuitate sic proloquentem: *Vniuersa nostra Evangelica congregatio, tot schismatibus & offendiculis patet, ut nihil minus sit, quàm quod se esse gloriatur. Et infrà: Quæ mala cum quisque proprijs oculis intuetur, meritò dubitat, an noster Evangelicus catus vera sit Ecclesia &c. in quo tot & tam enormia vitia conspiciuntur.*

Sed neque hoc loco omitti debet illa Simonis Pauli Lutherani Superintendentis, nec fundamento carens, & zeli plena, tametsi ex parte ridicula, comminatio: ita in sermone Dominicæ tertiæ post Trinitatem, effervescentis: *Nostro tempore justè cõqueri possunt, & dicere verbi Ministri. Va tibi, Lubeca; va tibi Rostochiũ &c. Et tu Saxonia, licet cælum usque exaltata sis, ob Evangelium, quod ex te primum ortum, totum terrarum orbem, jam ante diem iudicij sanctum pervasit; (qua in in parte sese, rem callentibus deridendum propinat bonus superintendens) in inferno tamen detrudèris, eò quòd tantum donum non agnoveris, & in tanta Evangelij luce pravos mores non correxeris.* Quæ postrema etiam insulsè scripta. Quasi nempè quintum Evangelium, morum correctioni, & non potius corruptioni, serviat: cum juxta Lutherum, sola infidelitas peccatum sit, & opera bona saluti potius perniciofa: ut infrà.

Tandem neque molestum arbitror fore Lectori meo, si hominis non Lutherani quidem, sed iis amici, verba etiam pluscula suggeram, quòd res, apud me momenti non levis, tantà inductâ nube testium extra controversiam habeatur.

beat. Ad Calcem determinationis facultatis Theologicæ Parisiensis, super quàmplurimis assertionibus Desiderij Erasmi: adjecta est quædam ejus ad amicum Religiosum (qui per occasionem exortatum hæresum, in suscepto statu nonnihil fluctuare videretur) sapiens in primis epistola; ubi inter alia his illum verbis aggreditur: *Vereor ne imponant tibi, quorundam hominum prastigia; qui jactant hodie splendidis verbis libertatem Evangelicam. Crede mihi, si propius nosset, minùs te taderet istius vita. Video genus hominum exoriri, à quo meus animus vehementer abhorret. Neminem video fieri meliorem, deteriores omnes quotquot ego sanè viderim: ut vehementer dolèam, me quondam in libris meis predicasse libertatem Spiritus; quamquam id bono animo fecerim, nihil minùs suspicans, quàm hujusmodi populum exoriturum. Optabam aliquid decedere caremoniis humanis, ut multum accresceret vera pietati. Nunc sic exentiuntur illæ, ut pro libertate spiritûs succedat effrans carnalis licentia. Civitates aliquot Germania implentur desertioribus monasteriorum: non aliud quàm saltatur, editur, bibitur. Omitto reliqua.*

Quibus affinia cum tradere videas in alia quâdam epistolâ, à Tannero relata loco citato: ubi, *Circumspice, inquit, populum istum Evangelicum: & observa num minùs illuc indulgeatur luxui, libidini, & pecunia, quàm faciunt ij, quos detestamini. Profer mihi quem istud Evangelium, ex commessatore sobrium, ex feroci mansuetum, ex rapaci liberalem, ex maledico benedicum, ex impudico reddiderit verecundum. Ego tibi multos osten-*



*dam, qui facti sunt seipsi deteriores.*

Sed his multò plura ex eodem Erasmo collecta invenies apud Gretserum in Tractatu inscripto : *Erasmi de novo Evangelio &c. judicium*: Ex quo pauca ista lubet insuper adjicere. libro 19. epist. ad Melancthonem &c. de Evangelicis, seu Lutheranis proloquitur Erasmus. *Hic nobis hoc Evangelium gignit novum hominum genus, praefratos, impudentes, fucatos, maledicos, mendaces, sy-cophantas, inter se discordes, nulli commodos, omnibus incommodos, seditiosos, furiosos, &c. Hac ille.*

In quibus observa, rectè ab eo dici hoc Evangelium talè hominum genus gignere : ne quis intelligat, hos pessimos mores ex consuetà naturæ infirmitate subnasci ; sed ex ipso sectæ ingenio ; eosque quinti Evangelij, & ejus Spiritus, fructus proprios ac genuinos esse.

Quò etiam spectat, quod paucis, sed efficacibus scripsit lib. 1. epist. 28. ad Hezium : *Omnes, inquit, habent in ore quinque verba : Evangelium, Verbum Dei, fidem, Christum, & Spiritum.* Et tamen hîc ( Basileæ nimirum ) *tales video multos, ut non dubitem, quin agantur spiritu Satana.*

Atque hæc de primorum illorum Evangelicorum ( si Deo placet ) sibi optimè perspectis moribus, homo alioqui ab eorum placitis non per omnia alienus Desiderius Erasmus.


Attamen ut hîc obiter notetur istorum hominum, probrosa ( tametsi illis solemniss ) in affirmando, negando ve inconstantia : is ipse Lutherus, quem supra vidimus, de suorum sequacium moribus adèd acerbè atque tragicè declamantem ; is, inquam, in alterum extremum temere

re inconstanterque deflectens, in caput 28. Genesis, ausus est de suis fidelibus ita scribere: *Non debet Christianum proximum, omnium minimum, inferiorem aestimare D. Petro & omnibus Sanctis, qui sunt in cælo.* De quo numero alibi, ne ipsam quidem S. Deiparam excipit. Neque excepturum crederet, ipsum Sanctum Sanctorum, Christum Dominum; qui apud eundem Tomo 3. Germ. in admonitione ad Argentinenses legerit: *opera esse minimam & vilissimam particulam in Christo, eaque in re Christum cæteris Sanctis parem esse.*

Aliunde porro, cum rursus ex ejus doctrinâ habeatur; omnia justorum opera, quantumcumque bene sint facta, si per se spectentur, esse opera peccati, & opera diaboli: an putes eundem cò furoris esse venturum, ut hac quoque in parte Christum cæteris parem faciat, & quod vel cogitare horret animus, etiam opera Unigeniti Dei, opera dicat esse diaboli.

En amice Lector, quæ verborum tricæ, doctrinæ vortices; immò quam insani & in semet ipsos protervè incurrentes, ipsoque conflictu, semet elidentes & opprimentes, fluctus sententiarum! sed de his alibi.

Quod si non ubique fortassis inter acatholicos, ea secuta sit, aut adhuc persistat, vitæ licentia, morumque corruptio, id partim populorum in honesta ac justa propensæ indoli; partim publicis locorum, quatenus id ad pacem communem necessarium visum est, institutis & legibus tribuendum est. Alioqui, ex ipso sectarum genio, quid è diverso subsequi natum sit, manifestum est, ea quæ diximus, consideranti.



## CAPUT XVI.

*Extenditur ad Calvinistas, eorumque mores à nobis suscepta demonstratio.*

Videamus modò num fortè mollius benigniusve de primigeniorum sectatorum suorum moribus ipse Calvinus, eorumque consortes pronuntient. Expedit siquidem per hanc occasionem accuratius recognoscere, cujusmodi fuerint Sancti illi scilicet, qui hisce novissimis temporibus, sese, præ cæteris, qui unquam extiterint, Ecclesiæ sanctæ Doctoribus, intestino illo atque arcano Dei Spiritu dignatos atque præditos jactant; Confessionis illius Calvinisticæ, sive omninò Ecclesiæ (quam appellant) Reformatæ conditores. Vt enim odiosè Calvini lilia jam non refricem, neque Coapostolo ejus Beza, pudendos Candidæ Audebertulique amores, eâ ipsâ avenâ, quâ postea sacrorum Davidis carminum Gallicam versionem modulari aggressus est, propudiosè cantatos (ut olim Ario Thaliâ suam Soradicam, Athanasius, & Patres alij) importuniùs exprobrem: ea duntaxat in medium proferre contentus ero, quæ de surgentis istius Ecclesiæ primitivis fulcris ac columnibus nobis suggerit testis locuples, ipse Calvinus.

*Orat. contra Arianos.*

Quippe qui de iis agens, qui à Papatu ad Evangelium (sic enim loquitur, quasi in Papatu

tu

tu Evangelium non sit; cùm à Papatu Evangelium, non enim à Iudæis, opinor, ipse acceperit) per ea tempora confugiebant; qui utique soli constituebant musteam illam ac primitivam Ecclesiam; quibus illi, inquam, exculi moribus, quâ vitæ sanctitate ornatī essent, non uno loco in hæc verba describit.

*In exiguo illorum numero* (inquit Calvinus scribens in caput 11. Danielis) *qui se ab Idolomaniis Papatus subduxerunt, major pars plena est perfidia & dolis. Praclarum quidem zelum simulant, sitamen intus excutias, reperias plenos esse fraudibus.* Et commentario in 2. Petri caput 1. *Vix eorum decimus quisque est, inquit, qui alio sine Evangelio nomen dederit, quam ut solutius in omnem lasciviam diffunderet.* Apostatæ scilicet monachi, è quibus septem, si Fevardentio credimus, primi autores fuerunt Confessionis fidei Gallicanæ.

Nimirum, ut epistola quadam ad Vvilibandum observat Erasmus cujus, testimonium nihil admodum est cur suspectum habeant sectarij: *Duo tantum querunt novi Evangelici, (qui nempe à Papatu, & Sacerdotio, votisque monasticis, ad Novatorum sectas transeunt) censum & uxorem: cætera præstat illis Evangelium; hoc est, potestatem vivendi, ut velint.*

Quibus paria scribit Bucerus; tum sacramentarios, tum Lutheranos; iterato transfugio expertus, libro 1. de Regno Christi cap. 4. ita proloquens: *Maxima eorum pars, id tantum ex Evangelio Christi petiisse visa est, ut jugum qualiscunque*

*liscunq; disciplina, pœnitētia, & religionis univērsalē, quæ in Papatu reliqua fuit, abjicerēt; proq; carnis suæ arbitrio ac libidine, instituerēt agerētq; omnia.*

Ad hanc igitur formam effecti live exculpti erant, si ipsum Magistrum audimus, major pars, aut plerique omnes, qui primâ illâ nascentis Ecclesiæ Reformatæ ætate, adhæsere Calvinæ discipuli; atque ipsas adeo, ut ita loquar, Calvinistici spiritus primitias habuere. Hi sunt quorum autoritate ac nomine condita est prima illa fidei Reformatæ Confessio; in qua profitentur, eos se esse, qui secundum Evangelij Christi puritatem ( si superis placet ) cupiant vivere; qui interiori Spiritus sancti persuasione, verbum Dei discernant, & ipsa penetrent fidei divinæ mysteria; qui denique ad hoc submissi sint, ut Catholicam Christi Ecclesiam in fide ac moribus reforment; cū teste ipsorum Apostolo, ipsi intus essent pleni perfidiâ, dolis, fraudibus; & foris luxu lasciviaque dffluerent.

His fulcris, siue stipitibus, innexa surrexit illa machina, & speciosum nomen, principio quidem splendide ostentatæ, at modò sentim obscuratæ, & in dies evanescentis, prætensæ Reformationis.

Atque his ritè considerâtis; meritò convenio consciētiam tuam, quisquis salutis tuæ seriò cupiens, sed nescio quibus detentus officiis, Calvinæ adhuc adhærescēs, in istas paginas incideris; tibi ne ipsa fieri possē persuadeas; ut quando spiritu Dei dictante, aut ipso quoque rationis lumine, compertum sit: quod *in malevolam animam non introibit sapientia, nec habitabit in*

*in corpore subdito peccatis*: itemque, quod *Spiritus sanctus disciplina effugiet fictum*; eiusmodi homines, quos jam expressis coloribus, graphice describit proprius ipsorum Propheta, plenos perfidiâ, simulatione, dolis, fraudibus, & qui, non veritatis studio, sed, ut idem ipse de plerisque ingenuè agnoscit, vitæ licentioris & lasciviæ gratiâ, novo illi Evangelio nomen dederint; eos, inquam, interim credatis, præ veteris Ecclesiæ SS. Patribus, singulari illo arcanoque donatos Dei Spiritu, & intimo illo quasi sapore mysteriorum, quo legitimum Scripturæ sensum, aut veras scripturas à falsis, perspicuè possent discernere; prout profitetur, ipsorum etiam nomine edicta fidei Reformatio.

Quando, huc præsertim facere possit, id quod scribit Cyrillus lib. 1. in Ioannem cap. 4. *Sapientiam hanc, quæ in malevolam animam non ingreditur, esse cognitionem mysteriorum; & malignam animam esse cuiusvis hæretici, hypocrita, &c.*

Cùm & alioqui eos ipsos, de quibus agimus, illo suo privato Spiritu destitutos fuisse, agnoscere debeat ipse Calvinus; ut qui eum spiritum solis tradat convenire fidelibus; istos autem, non fide & sinceritate, sed perfidiâ & hypocrisi plenos fuisse; confiteatur.

Quid si porro his adjunxerimus, quod in L. 8. tit. 12. Thesauro Catholico observat Iudocius Coccius: eundem Calvinum, concione 10. Gallicè scripta, in Epistolam ad Ephesios; oratione suprâ quàm expectari posset, exaggeratâ, pronuntiasse: *sua secta homines esse mortalium omnium sceleratissimos*

tissimos & facinorosissimos ; & , cum verba, illorum sceleribus satis congruentia invenire non posset, illos denique tetra monstra, & malos genios , human-

L. I. C. II. in nam formam indutos, appellasse.  
fine.

Quid si rursum illud , quod refert autor Britannomachiae : ipsosmet Ecclesiae, Genevensis Ministros atque Pastores , in libro Gallico de scandalis , ita ab eodem Calvino describi : ut uno verbo , dicat ; eos nequitia , vel aliorum vitiorum exempla ; & mirari se vulgi patientiam, quod non eos luto & stercoribus operiant.

Quibus demum consonans Sebastianus Castalio , sub ea tempora Genevensis Ludimagister, ( apud Bezam , libro quem sycphantam inscripsit ) eodem respectu , in has etiam magis odiosas voces erumpit. Vocant , inquit , Genevam civitatem sanctam, conventiculum verò suum Ierolimam. At nos dicimus: ô Babylon ! ô Babylon ! ô Egypte ! ô sacrificuli Egyptij, & Babylonici incantatores ! ô pollutissimi Sodoma & Gomorrha filij.

Annon ad tam foeda , tamque contestata, majorum vestrorum, primorumque vestrae Ecclesiae fundatorum probra attoniti hæretis , ô Reformati ? atque , ex pronuntiato Salvatoris , infelicem arborem , quæ adeò nefandos ac pestilentes , primâ & integrâ ætate sua fructus protulit , ab imâ radice præcidendam esse censetis ?

At non ita sanè , scimus à suis initijs fundatam veram Christi Ecclesiam : sed illius primos sive satores , sive cultores , veluti demonstrant Apostolorum Acta , eâ floruisse laude virtutis,

ut

ut eorum vita cæteris & exemplo esset, & venerationi. Neque, si ea uti dicitis, reformanda erat, credi potest opposito modo processuram Dei sapientiam, aut eum in finem ejusmodi operas destinaturam, quæ morum suorum improbitate, non jam collapsam instaurarent, sed potius etiamnum stantem disjicerent, etiam integram labefactarent.

Verum enim verò, huc ad extremum adducendæ, & observandæ mihi, veniunt ambrosiæ quædam & magnificæ Calvinî voces, quibus in Præfatione Institutionis suæ, Galliarum Regem Franciscum primum in hunc modum affatur.

*Nec tam infeliciter, ( inquit ) gratiâ Dei, in Evangelio profecimus; quin istis obrectatoribus, vita nostra castitatis, benignitatis, misericordiæ, continentie, patientiæ, modestiæ & virtutis cujusvis exemplar esse possit.* Hæc ille.

Quæ ipsum non credam communiter scripsisse de suæ sectæ hominibus: alioqui apertæ falsitatis, aut mendacij arguendus, ut qui tot locis, tamque exaggeratè, eorum insignem improbitatem descripserit.

Quod si de seipso singulariter hæc locutus sit: credat qui volet, tam authenticum de semetipso testimonium perhibenti.

Mihi quidem monstro simile videtur, selectas illas discipulorum primitias, aded à dilecti Magistri moribus abhorruisse, aut degenerasse; si ejus vita, ut ipse testatur, omnis virtutis Christianæ speculum fuerit.

Neque



Neque facillè inducar , ut credam: eam Evangelicæ virtutis absolutionem , repertam eo in homine ; qui ex disciplinæ suæ scitis , profiteretur , solâ fide justificari hominem , absque subsidio bonorum operum ; immò omnium etiam fidelium opera , secundum se spectata , esse peccata , & quidem mortifera ; ipsamque adeò Dei legem esse observatu impossibilem ; quidquid autem in eam committat, non imputari fidem habenti. Quæ postea expressè demonstranda , hoc loco , per occasionem sufficiat indicasse , & cum ea-, quàm sibi Reformator iste assumit ac vendicat , eximiâ vitæ sanctitate comparasse.



## C A P U T XVII.

*Pari ratione , consimilibusque testimonijs ostenditur , easdem sectas , ac nominatim Calvinianam, viam pronam ac latam , ad Atheismum patefacere.*

**T**Ametsi hujus dicti veritas , ex his quæ proximè diximus , spectatâ ipsâ rei naturâ videatur omnino consequens : quandò ipso usu sat compertum est , insignem morum corruptelam, hominem sensim ad impietatem deducere, & , ut ita loquar , inter Epicureismum & Atheismum, propinquam esse cognationem. Sive id ex eo fieri dicamus , quòd ab insano rerum præsentium amore , & assuetudine voluptatum, paulatim homini

mini obbrutescat mens, eique subrepat rerum  
cœlestium æternarumque oblivio: sive quod  
vitiis immerfus animus, quo ea vivendi licen-  
tia sibi libera & imperturbata sit, obstitentis  
conscientiæ morsum reprimere satagens, id ut  
consequatur efficacius, eò denique deveniat, ut  
supremâ quadam insipientiâ, dicat in corde suo:  
*Non esse Deum.*

Attamen, cum res proposita, sit per se mo-  
menti gravissimi; possitque specialibus rationi-  
bus, & multiplici experiëntia, ipsaque adeò secta-  
riorum attestazione comprobari, necessarium  
videtur, id paulò pluribus exequi, remque om-  
nem ob oculos ponere studiosi Lectoris.

Ac primum, quod ad Lutheranam sectam at-  
tinet: audire licet ipsum Lutherum, de plerisque  
suis gregalibus, quorum Epicuræam vitam supe-  
riùs bellè describit, egregio utique acroamate  
pronuntiantem: *Vivere ut sues, credere ut sues,* *Referitur*  
*mori ut sues.* Quod quid est aliud, quàm bestia- *l. i. Britan-*  
rum instar, absque Deo, absque fide, absque con- *nom. c. i. i.*  
scientiâ vivere; & prout vixerit, pariter instar  
bestiæ mori?

Quibus consonat, quod Iacobus Andreas Sch-  
midelinus ad cap. 1. Lucæ: in magna parte suo-  
rum Germanorum, Lutheranorum utique, Epi-  
curæam & bestialem vitam agnoscit.

Et verò superiùs, ex ipsius Andreæ Musculi  
confessione vidimus; per occasionem libertatis  
Evangelicæ, inductæ scilicet per quintum Lu-  
theri Evangelium; Civitates ipsas plenas Nebu-  
lonum & Atheorum esse inventas.

Quò item spectat Ioannis Brentij Vbiqueta-  
riorum

H

riorum parentis, oratio; Homilia 35. in caput 20. Lucæ ita scribentis : *Etsi inter nos nulla sit publica professio, quod anima simul cum corpore, in-tereat, & quod non sit mortuorum Resurrectio; ta-men impurissima illa vita, quam maxima pars ho-minum sectatur, perspicue indicat, quod non sen-tiant esse vitam, post hanc. Nonnullis etiam tales voces, tam ebriis inter pocula excidunt, quàm so-briis in familiaribus colloquiis.*

Atque si Luthero, jam Carlostadij inimico credendum putamus : is quidem de illo ( teste Canisio, in Præmonitione ad Commentarios de corruptelis verbi Dei ) graviter asseverat, *Carlostadium adeò atheum fuisse, ut non crederet vel in cælo, vel in terra, esse Deum.*

Et de ipso sanè suprà memorato Iacobo Andrea, quem inter primarios Lutheranos nomi-nant, tradit Hospinianus, Historiæ Sacramen-tariæ parte 2. ex eorum qui diù ipsi Iacobo con-vixerunt, relatione; *cum, nullum habuisse Deum, nisi Bacchum atque mammonam* : profertque nominatim Nicolaum Sebhecerum & Andream Musculum; qui eundem Iacobum Andream erronem & levissimum scurram vo-cant; qui, ut ex dictis & factis ejus cognoscitur, neque religionem, neque conscientiam ullam habeat.

Sic illi, de consorte suo, & primario Luthe-rano.

Neque, si rei natura, & ea quæ infrà per oc-casionem referam, spectentur, erit à vero pror-sus abhorrens suspicio : eodem in grege, eiuf-dem villi plures pecudes, furvas utique, & exti-risse

tisse olim , & etiamnum superesse. Quâ etiam mente fuissè videas Desiderium Erasmus ; qui in epistola quadam ad fratres inferioris Germaniæ apud Gretserum supra : *Non dubito* (inquit) *quin multi sub hoc Evangelico pallio lateant, titulo Christiani , animo Pagani : quam item mentem suam , ait non uno experimento comprobata.*

Verùm , ut deinceps de Calvini sectatoribus speciatim agam : qualis in-primis nuperâ ætate, eius rei in Gallia status esset ; testatur , in suâ Christomachia Calvinianâ vir ijs in rebus multum versatus , Vvielhemus Damasi Lindanus, Ruræmundensis Episcopus : ubi de Eucharistiâ agens : *Hinc videmus* , inquit , *tam multos Calvinistas , Turcas fieri , vel susceptâ ipsorum circumcissione carnali. Item , plurimos inter eos existerè Atheistas : de quo & ipse Beza , & Henricus Stephani , & alij plurimi eiusdem fermenti Pharisæici , suis de commanipularibus lugubiter conqueruntur : lamentantes , non modò per Galliam innotescere varia Atheistarum genera , sed nomen etiam sibi vindicare Deistarum.*

Sub eadem tempora Ioannes Maldonatus ; qui annis pluribus magna doctrinæ laude , in Gallia floruit , ita scribebat in Commentario ad caput 26. Matthæi versu 26. Vbi cùm dixisset , multos ex Calvinistis factos esse *Arianos , à quibus ea hæresis propagata sit in Polonia : nonnulli* (subdit, idque propriâ doctus experienciâ ) *progressi sunt longius , ut nihil crederent. Quorum unus, cum libellum quendam , de arte nihil credendi*

*composuisset, nihil in eo, nisi hoc unum, verum dixit: oportere primum Calvinistam fieri, qui Atheista esse vellet. Additque ad marginem: hunc fuisse Hofridum à valle; qui ex Calvinista factus Atheus, Lutetia anno 1572. publicè exustus est.*

Attamen eo in genere deploratio est, quantum intelligimus, desperatioque religionis Anglicanæ status; ubi opinor, nemo mirabitur; homines, illinc ingenti odio Romanæ sedis abductos (cui sese olim pro cæteris obnoxiam profitebatur Anglia) hinc autem, in tanta hæresum acerimè inter se compugnantium, neque in semetipsis satis consistentium, colluvione, non invenientes, ubi pedem tutò figere possint; denique ad nihil omnino credendum devertere, & præ desperatione inveniendæ veritatis, ad supremam omnium falsitatem, Atheismum inquam, præcipitare.

Quâ de re cum inveniam Henricum Firsimon nostrum, in Britannomachiâ Ministrorum, libro 1. c. 12. ex professò exactèque disputare; placet ex ijs, quæ illuc profert, Anglorum, sive Protestantium, aut Formalistarum, sive Puritanorum testimonijs, nonnulla seligere, & ad rei fidem faciendam, ipsorum verba annu-merare.

Igitur ex sectarum in Anglia ebullientium varietate, earumque inter se, de fidèi rebus interminatis contentionibus latam Atheismo expandi portam, verbis quæ subjicio, fatentur Parkes: *contentiones nostra, non minima sunt ad Atheismum præparationes.*

Sandes:

Sandes : *nostra lites ad augendum Atheismum domi , & Mahometismum foris , vehementer faciunt.*

Barlous : *Religio in Anglia , ab annis multis conversa in statismum , brevi transibit in Atheismum.*

At verò reipsa Angliam scatere Atheistis utinam falsò jam tum agnoscebant ij quos modò proferam. Zanchius: *inter alia monstra , Ministri Satan , Atheismum ex inferis in Reformatam aliquas Ecclesias invexerunt.* Covellus: *Atheismus & hypocrisis in omnibus ordinibus huius regni , orta ex Puritanismo.*

Vvhitgistus Cantuariensis: *Ecclesia nostra plena est Atheistis.*

Kingus Londinensis Episcopus , quanquam id potius ad morum corruptelam atinet : *Ita vivimus , ut potius convincamur perfecti Athei.*

Et ne solos putes ejus impietatis suspectari , aut accusari Puritanos : ipsos vicissim Puritanos apud suprà laudatum autorem videas , libro 3. cap. 2. inter alia encomia , quibus è diverso Ministros Formalistas exornant , proclamare , illos esse multitudinem reproborum & perfidorum Atheorum. Sic illi. Fortassis ex verbo veteri ; *cacabo ollæ , & ollâ cacabo* , vicissim nigrorem obiectante.

Tandè , ne fortassis Hollandos Calvinistas ejus pestis immunes existimemus : Maximilianus Sandæus noster , & ipse gente Hollandus , Parte 1. Hydri Hollandici lib. 1. cap. 2. testatur ; didicisse se ex ipsis Hollandiæ Doctoribus , in eâ quàm maximè Atheismum radices egisse.

A qua infaniâ nō longè abfuisse è Remonſtrantibus Arminianis Conradum Vorſtium , in Leydenſi Vniuerſitate Theologiæ Calvinianæ hoc noſtro ſæculo profeſſorem , ejuſque ſectarios; oſtendunt illius prorſus indigni de Deo ſenſus: quem nimirum negat, eſſe actu infinitum, ſimplicem, immutabilem, ubique præſentem, æternâ, ſeu totâ ſimul, duratione præditum &c. Propter quæ veluti Atheus ab aliis Calviniſtis inceſſitur.

Inter quos Academici Heydelbergenſes , in ſuâ adverſus illum teſtificatione; propter aſſertiones ejuſmodi, dicunt ſe verè timere, ne Ieſuitæ & Lutherani, illud capitale ſuis Eccleſiis exprobrent: *eaſ Deum abnegare; eaſ Atheiſmum aperte introducere.* De quo plura Gaulterius ſæculo 17. cap. 6.

Accedit, quod ipſi inter ſe Hollandi Remonſtrantes & Contra-Remonſtrantes, univerſè ſeſe aut Atheiſmi accuſent , aut ſuſpectos faciant. Nam, uti videre eſt, apud eundem Sandæum: Remonſtrantes, horridas atque præduras Calvini & Contra-Remonſtrantium aſſertiones , & illam nominatim , de Deo ad peccatum impellente, inſectantur præſertim hoc nomine: quod (uti loquuntur ) idipſum ſanè fons ſit & abyſſus, omnis Atheiſmi & impietatis. Neque verò deſunt etiam è Reformatis, qui eo titulo , Calviniſtarum Deum, Diabolum eſſe contendunt.

Contra-Remonſtrantibus ex parte ſuâ , ſimile quiddam in ipſos regerentibus: quos ſpeciatiim videre eſt, eo ſcripto, quo Hollandiæ ordines deterrere conantur , ne controverſiarum fidei cognitionem ( ad quod à Remonſtrantibus ſollicitabantur)

tabantur) in se suscipiant; demonstrare volentes, quantæ ex eo Remonstrantium conatu corruptelæ suboriri natæ sint? *Quarum*, inquit, *quis fructus?* Nisi, ut alterâ alteram ducente, veritas tandem exulet; Ecclesiæque pessundatis, merus Atheismus aut Epicureismus obtineat, &c. sic illi.

Vt jam minùs opus sit, præter ante dicta & mox addenda, id ipsum de Calvinistis Germaniæ operosius comprobare.

Ex his quippe Lector ingeniùs, facilitè inducet in animum; quod verissimè dixisse ac prædixisse, Cardinalem Hosium, memorat Cornelius à Lapide, in Prioris ad Corinthios caput 11. numer. 125. *Hæreticos tandem fore Atheos; & hæresis omnis finem esse Atheismum.* Nimirum, ut addit citatus autor, dum à fide Catholica ad hæresim desciscunt, in eaque nihil inveniunt stabile, nihil constans, nihil solidum: quid restat, nisi ut hæresim abjiciant, nihil credant, dicantque in corde suo, non est Deus; Quod utinam (subdit) in dies non experiremur.

Quò itidem facit; quod Fabianus Quadrantiùs è Reformato Catholicus, in libro Recantationum, ipsius Cardinalis Hosij jussu edito, Recantatione primâ; inter rationes quibus compulsi sit, Romanæ se credere Ecclesiæ, hanc proferat tanquam gravissimam; quod adversariorum (inquit ipse) altercationibus eò rem vidit perductam, ut ad Atheismum inclinare viderentur.

Atque eam ipsam, hujus scandali petram, si-  
ve lapidem offensionis, esse, sentiunt, & vel invitè agnoscunt.



agnoscunt ipsi sectarij. Inter quos Henticus Bullingerus ( à Berleio relatus Tract. 2. c. 3. sect. 5. §. 6. ) ita loquitur : *Ipsi Evangelici inter se acriter pugnant & pugnant. Commovere vehementes & implacabilis hac dissensio non paucos: adeo ut animum veluti despondentes dicant, se posthac nihil amplius, nisi quod ipsis libeat, credituros; quin immo fidem abjicientes, clamant: quid, oro, fidei, in tot factiones distracta tribuas.*

At verò Gaulterius noster sæculo 16. c. 109. quod est de Atheis & Epicuræis, Hedionem profert, de suis Evangelicis, in quadam ad Melancthonem epistola, sic conquerentem : *Satanam callidum huc multos agitare, ut cum summâ inconstantiâ iâ hoc, iam illud credant, posthac nihil prorsus credant, & evadant in populum Asotiorum.* Hoc est, ( ut apparet ) in mecos Epicuræos, sive homines luxu & lasciviâ perditos: quales Græcè Asoti appellantur.

Porro generalius expressiusque ex eadem Germania Ioannes Spangenbergius, relatus à Coccio, in Thesauro lib. 8. artic. 12. *Postquam admirabili quadam & singulari Dei gratiâ ( ita enim loquitur impius ) Antichristianisini, seu Papatus, horrenda mendacia, doli, deceptionesque manifestata sunt; incipiunt iam homines nihil amplius velle credere; & postquam à vinculis Papatus se liberos esse vident, volunt etiam esse liberi ab Evangelio, & à præceptis Dei; & volunt ut deinceps rectum & iustum sit, quidquid unicuique visum fuerit.* En crimen; en causa. Et an non apparet, hunc ipsum, uti demonstrabimus, verum agnatum

genuinum ipsius Lutheri spiritum esse.

Huc denique spectat, quod ait Georgius Major in oratione de confusione dogmatum, apud Brerleium, Contzen &c. *Objiciunt, inquit, nobis Papiste scandala & dissensiones. Ingenue fateor, eiusmodi talia esse, ut satis desleri nequeant. Et inde simplicium animos, ita commoveri, tentari, perturbari, ut omnino dubitent, ubinam locorum in profundo demersa veritas, invenienda sit; an etiam vera Dei Ecclesia uspiam adhuc supersit. Quam dubitationem (subjicio ego) proximum esse ad Atheismum gradum, rem ipsam vel leviter consideranti, manifestum evadet.*

Sed stulti tamen qui propterea dubitent : quando ea ipsa de Novitiarum sectarum veritate ac securitate, fluctuatio, si ad id pacatè reflectant animum, efficaciter persuadet, repetendam esse veterem Ecclesiam, à qua ipsi, aut eorum majores, inconsultò alibi reperiendo veritatis obtentu, temerè stultèque discesserint. Atque jam absterfis iis nebulis, quæ illis Romano-Catholicæ Ecclesiæ sincerum vultum obfuscabant, pronum sit illis, ex veræ Christi Sponsæ Notis, illam, & non aliam, veram Ecclesiam esse, manifestè dignoscere : proclamante B. Augustino : oportere prorsus cæcum esse, qui montem tam magnum, tamque Illustrem non videat.

*Tract. 4. in  
Joan.*

Quod quamdiu non præstant ; aut fluctuare non desinent, aut ipsa fluctuatione oppressi, in desperationem, Atheismum, certumque demum animæ interitum, præcipitabunt.

Alioqui etenim & iste alius offensio-  
procliviter

procliviter insuper occurret: ut nempè homines huiusmodi, persuasum habentes, defecisse Romanam Sedem, & jam evalisse Antichristianā, neque uspiam alibi, veram Christi Ecclesiam, quæ ex ipsius verbo, perpetua & fixa permanferit, inveniētes; consequenter inducant in animum, falsam fuisse promissionem Christi; ipsumque aded non verum Messiam, aut Dei Filiū fuisse, sed seductorem. Quod tum aliis quibusdam, tum nominatim Davidi Georgio Hollando, qui multis annis Basileæ Protestanticam Religionem fuit professus, accidisse; ex eius hitoria Basileæ edita, per diligenz talium eventuum

*Tr. 2. c. 1. Sc. 5.* observator atque collector, Ioannes Berleius testatur. Vbi etiam aliud profert exemplum Allemanni Redemontani, qui antea Beza familiarissimus, & strenuus Calvinista, simili ex causa Religioni Christianæ valedixerit.

Postremò Adamum Neusserum, olim Ecclesiæ Hygdelbergenfis primarium Pastorem, ex Zuinglianismo, per Arianismum, ad Mahometismum, cum aliis non paucis Calvinistis, iisdem gradibus progressum esse.

Vt ea propter, doctus Lutheranus, Ioannes Schutz, non sine fundamento dixerit: *Mahometismum, Arianismum, Calvinismum, fratres & sorores esse, seu* ( ut addit verbis è trivio petitis ) *Tres caligas ex eodem yanno confectas.*

Denique extremam hanc ejusdem effectus rationem placet adjungere: quod apud laudatum autorem observavit olim Vvolfgangus, Musculus, & hodierna quoque non uno loco demon-

strat

strat experientia , spectato præfenti Ecclesiarum Reformatarum statu , proclive esse, ut populus paulatim incidat ( ut Musculus loquitur ) in adiaphoriam ( seu indifferentiam ) religionis, omnium pestilentissimam , & Epicurismum imbibat , omnis videlicet religionis vastationem & extinctionem. Sic ille.

Atque ex his tandem, quæ pro rei momento ac gravitate , stylo paulo diffusiore produximus, duo quædam habentur, instituto nostro peropportuna.

Primum est; quod si , velut prætendebat argumenti propositi ratio ; ex salvatoris voce, falsorum doctorum prædicatio , non ex eo quod extremâ specie ostentant ac præferunt, sed ex ipsis fructibus cognoscenda sit ac discernenda: certum ac manifestum esse debeat, cuius contrarijs præjudicijs non nimium occupato, quo denique loco habendæ sint sectæ novitiæ, quæ specioso nomine sese Reformatas appellant, quarum proprios fructus , tam pestilentes ac perniciosos esse jam constiterit.

Ipsò etiam sapienter monente B. Ambrosio; dū prædictas Salvatoris voces ad hæreticos accommodans: *siquis ergo, inquit, specie movetur; fructum* 1.7. in c. 10  
*interroget.* Etenim , exempli gratia , purum verbum Dei, libertas Evangelica, Reformatio Ecclesiæ, & eiusmodi voces, quæ in ore nostrorum Sectariorum assidue sonant , pulchram quandam speciem, apud imperitos præ se ferunt: sed si quis cordatus illorum doctrinæ fructum interroget, & quanta exinde corruptio morum, perversio fidei, scripturarum profanatio, animarum denique pesti

Hincenim illud est, quod apud Gretserum, in suppetijs pro Luthero Academico c.8. quidam ex Carlostadij disciplinâ ( teste, ut inquit, Erasmo Albero ) in Atheismum prolabens; inter cætera: *Quis scit, aiebat, an sacra scriptura sit à Deo? Quis scit, an verum sit, existisse aliquando talens hominem, qui Christus appellatur.*

Atque Erasmus alter Roterodamus, quadam ad Hedionem epistolâ, meminit quarundâ Othonis Brunsfelsij, ( qui ex Carthusiano factus fuerat Evangelicus ) Epistolarum: *Bellarum*, ut ait per ironiam; *ut qua Evangelia quoque vocent in dubium.*

Magna igitur labes est veræ Religionis ipsa fidei mysteria proprio sensu ac ingenio temerè scrutandi ac dijudicandi, inconsulta curiositas.

Vt proinde hîc locum invenire possit, quando ejus nunc mihi venit in mentem, illa quæ olim in Belgio, familiari inter nos sermone ferebatur, uti appellabant, vocis *Curiosus* declinatio: quæ, etsi in speciem levior & ludicra videatur; quia tamen; quibus quasi gradibus ad extremam hoc in genere nequitiam, tandem dilabatur infelix anima, ingeniosè ostendit; fortassis arridebit nonnemi, si hisce chartis inseratur. Ita igitur habet.

Nominativo: *Curiosus*. Genitivo: *Dubitantis*. Dativo: *Pertinaci*. (malim ego, *Erranti* adhuc scilicet sine pertinaciâ, quæ jam hæresim constituit) Accusativo: *Hæreticum*. Vocativo, ô *Politice*. Ablativo: *ab Atheo*. Plurali: *Maleficia maleficiorum*.

Quò significatur, Atheismum, fontem immò & abyssum, esse omnis sceleris ac nequitiae, secūdum quod de his in extremo gradu insipientibus, Ps. 52.

scriptum

Ecclesia prohibitum esset ; quòd ea quæstio indifferens sit , & cuique liceat utramvis partem tenere , neutram autem disputando impugnare. Cùm tamen clarum sit , eo in decreto , Pontificem agere contra quosdam , re ipsa Averrois , potius quàm Christi discipulos , qui nempe auderent asserere , quod Anima Rationalis mortalis sit , aut unica in omnibus hominibus , idque saltem secundùm Philosophiam verum esse ; atque ab eo expressè damnari , ut hæreticos ista asserentes , aut in dubium vertentes , sive in favorem istorum errorum disputantes ; non autem ( quod facit ibidem ipse Pontifex ) eos ex scriptura aut ratione refellentes.

Pari autem , aut etiam majori malignitate , ait in Colloquiis Germanicis cap. de *Antichristo* : in eodem Concilio , primùm cognitum & decretum esse , credendam mortuorum resurrectionem.

Quasi is articulus non fuisset semper in Ecclesia creditus , velut contentus in Symbolo Apostolorum : aut , quasi aliquid , eo in decreto , Leonis , non , ut ait , Iulij II. ( qui jam obierat ) aliquid novè de illo constitutum esset : cùm istic duntaxat Pontifex inter alia , exinde probet animæ immortalitatem , quòd alioqui , nec resurrectio mortuorum expectanda foret , & Sancti ac iusti miserabiliores essent ( juxta Paulum ) omnibus hominibus.

Ex quo insulsus & impudens veterator , fabricavit illud præclarum suum commentum , de tunc primùm cognitâ ac decretâ fide resurrectionis.

Idem

Idem Lutherus lib. de Conciliis, aperto mendacio imponit S. Hieronymo ; quòd lamentabilibus litteris scripserit ad Damasum, cupiens expungi vocem Homoousion : cùm legenti manifestum sit; de ea voce nusquam dubitasse Hieronymum; sed tantùm an dicendæ essent tres Hypostasies, Sedem Romanam consuluisse.

Eadem insolenti audaciâ in Colloquiis Latinis eodem cap. *de damnatione & inferno*, negat Augustinum, quicquam habere de Purgatorio &c. cùm tamen si quis Patrum frequentissimè, illud adstruat Augustinus. Videri potest lib. 2. de Gen. contra Manich. c. 20. in ps. 37. lib. 21. de Civit. c. 16. &c. Eadem, ad librum Ducis Georgij &c. asserit Papistas docere ; *posse hominem propriis viribus sine gratiâ Dei, mandata servare.*

Quibus affinia sunt illa Melanchthonis primarij ejus discipuli ; in disp. de pœnitentia, affirmantis, stultè & impiè docere Scholasticos; *peccata remitti per contritionem sine fide.* Rursumque in Apologia cap. *de numero Sacramentorum*; ex eorundem assertione *Sacramenta nova legis, conferre gratiam ex opere operato sine bono motu.*

Idem Philippus in eadem Apologia, cap. de invocatione Sanctorum, negare ausus est, Scriptores ante Gregorium, illius meminisse. Cujus oppositum adeò evidens est ut Kemnitijs, apud Brerleium Tract. 1. sect. 3. §. 7. agnoscat, saltem circa annum Domini 370. eam per Basilium, Nyssenum, & Nazianzenum in publicos Ecclesiæ conventus introduci cœptam. Et Centuriatores ibidem, eandem, Origeni, & Cypriano, etiam

etiam illis antiquioribus attribuant.

Tandem ipse Lutherus atque Philippus, à Tannero relati, ubi de peccato Originali; asserunt Augustino, quasi dixerit: peccatum in baptismo remitti, non ut non sit, sed ut non imputetur. Quod nō de peccato, sed de cōcupiscentia dixit Augustinus lib.1.de nuptiis & concupiscentia.

His adjungi possunt mendaces istius Pseudo-prophetæ prædictiones, quarum plures refert Ioannes Tannerus noster disp.1.de fide quæst.2.n.86. & hanc inter cæteras; quòd Tomo 2.lennensi Germanico fol.69. ariolatus sit: si à se suisque duos adhuc annos novum Pseudo Evangelium prædicetur; futurum, ut *tanquam summa evanescant Papa, Episcopi, Cardinales, Sacerdotes, Monachi, Moniales, Campana, Patres, Missæ* &c. Cum tamen, ut idem observat, post hoc vaticinium anno 1522. editum, annis 24. superfuerit, & Evangelium suum prædicaverit Lutherus, & tamen adhuc incolumis stet Papatus, Cardinales, Episcopi, &c.

Qui rursus pari insolentiâ ac temeritate id ipsum prænuntiavit, scribens his verbis ad Regem Angliæ: *Dogmata mea stabunt, & Papa cadet invitis omnibus portis inferi, & potestatibus terra ac maris. Instat enim mors Papatus abominabilis: urget eum, ineluctabile suū fatū, ut Daniel ait, ad finem sui venit, & nemo auxiliabitur ei.*

Quarum prædictionum vanitatem, non solum convicit eventus dictis contrarius; sed ipsius quoque illorum autoris, aliis in locis effata opposita, quo Spiritu afflatus priora illa effuderit, manifestius ostendunt.

I

Sic



Sic enim scribere, & quasi ominari visus est, in locis communibus Classe 3. pag. 40. *Timeo quod ista doctrina nobis extinctis iterum obscurabitur.* Et rursum: *Si nostra Ecclesia pulcherrimè instituta &c. Sic subvertetur, ut me amplius doctorem suum agnoscere non vellet, id quod (inquit) aliquando fiet, si non vivetibus nobis, tamen sublati.* Et Classe 2. pag. 53. *legis usus, ut timeo, post tempora nostra, iterum obscurabitur, & prorsus obruetur.* Hæc ille.

Quæ quomodo consistant, cum illa aded fortiter affirmata denuntiatione, & thraonica jactantia: *Dogmata mea stabunt, & Papa cadet, in vitiis omnibus portis inferi, &c.* aveo ex illis intelligere, qui ariolum istum, pro Summo Propheta habent, & tantum non adorant.

Quid si addamus ejusdem Lutheri expressas voces, despondentis animum, deque eo jam desperantis, quod brevi futurum tantâ asseveratione denuntiaverat? Ita enim eum audias loquentem in Colloquiis, Titulo de Bonis Ecclesiasticis, *Conamur Papam & Episcopos extirpare; sed frustra sumus, nihil proficimus.*

Ut proinde in ipsum Lutherum meritò retorqueas, quæ ipse relatâ haud absimili Zuinglij prophetia, in ipsum intorquet, apud Gretserum libro primo, contra replicatorem

*Tomo 2. Latino Colloq. ti. de Adversariis fol. 36.*

cap. 3. ubi sic de Zuinglio Lutherus: *Publicè clamavit, inquit: Nihil nos moretur; perrumpamus. Videbitis in triennio Hispaniam, Galliam, & totam Germaniam &c. Evangelio lucrifactam. Sed hac suâ fictâ victoriâ se ipsum confudit, & scandalis Evangelium deformavit.* Sed

Sed neque sinceriores aut veraciores eundem Lutherū videas , in divulganda quadam , de suo in orbem adventu , præclara scilicet prophetiâ ; quam in gratiam curiosi Lectoris , non gravabor hîc apponere.

*S. Ioannes*, inquit Lutherus in Glosâ adversus edictum Imperiale , *de me prophetavit*. Vbi nam putas , Lector amice? An fortè in Apocalypsi cap. 9. ubi S. Ioannes describit genus quoddam locustarum exeuntium de fumo putei abyssi , habentium faciem sicut hominum , & capillos sicut mulierum ; itemque loricas quasi ferreas ; & *vox alarum earum , sicut vox equorum multorum currentium ad prælium* ; & habebant caudas similes Scorpionum , & Regem super se , cui nomen , *exterminans*.

Quibus graphicè describi hæreticorum sectas , & nominatim Lutheranam , facile perspiciet , qui hæc attenderit. Primum enim hæreticorum est , semperque fuit , proprium , vultu blando atque pellaci , qualis solet esse mulierum , conciliare sequaces suos , prætentâ exempli gratiâ , Reformatione Ecclesiæ , puritate Evangelij , Christianâ libertate &c. Ad extremum autem habere in caudâ , Scorpionum aculeos : quia , ut verbis utar Commentarij in Apocalypsim , adjecti operibus S. Ambrosij , de Antiquis Hæreticis tradentis , quæ in recentiores perappositè conveniant : *Hæretici , qui propter notitiam Scripturarum , Prophetas se esse æstimant , non inconvenienter caudis Scorpionum assimilantur*.

*Quia eorum doctrina falsa erat & venenosa. Unde & aculeos in caudis habuisse dicuntur : per*

*aculeos namque blasphemia, quas in divinis Scripturis intermiscébant, designantur.*

Quod quidem in Lutherum ritè quadrare manifestum est:quem tot blasphemias divinis scripturis intermiscuisse, partim ostendimus, partim amplius aliàs videbitur.

Porro Loricæ quasi ferreæ, & vox equorum currentium ad prælium portendit novarum hæresum rebellionis spiritum, & arma sumpta adversus legitimos Principes, & quintum Evangelium, non tam verbo, quàm ferro propagatum.

Quo inter alia pertinet illud Lutheri classicum, Tom. 2. Ienenli Germanico, fol. 132. *Quicunque opem ferunt, corpus bona, & famam impendunt, ut Episcopatus devastentur, & Episcoporum regimen extinguatur; hi sunt dilecti filij Dei, & veri Christiani, observantes præcepta Dei, &c.*

Rectè igitur in Lutherum cadit hæc Prophetia. Veruntamen ista de se prædicta non agnoscet ipse Lutherus, nec vero nomine Sancti Ioannis, quod primâ fronte videri poterat, intelligit istic dilectum Domini discipulum, sed alium toto cælo diversi ordinis, sive categoriæ sanctum; Ioannem Hussum videlicet, quem veluti suæ Religionis martyrem agnoscit; cum tamen de eo, expressis verbis scribat in Colloquiis Germanicis capite de Antichristo: *Papista Ioannem Huss, cum is ne latum quidem unguem à Papismo discederet, combusserunt.*

Sed quidquid de hoc sit, audienda tamen est præclara illa Prophetia. Sic igitur Lutherus: *Sanctus Ioannes de me prophetavit, quando ex carcere,*



*carcere, Constantiâ in Bohemiam litteras misit. Nunc assabunt quendam anseres; ( Huss enim anserem dicunt ) & post centum annos, audient cantantem quendam cygnum, quem pati debent. Sic ille.*

Attamen, ut hanc prophetiam brevi commettario illustrem. In primis observo, Iudocum Coccium, virum in hæreticorum scriptis versatissimum discretè tradere; nusquam hoc legi in epistolis Hussi.

Deinde, satis mirum videri potuisse Lutherum præsumere, hæc de se ab Husso prænuntiata, aut omnino illū pro Sancto Propheta habere. Quando, ut insinuavimus ex Luthero, & expressius tradunt Protestantes alij, Ioannes & transsubstantiationem in Eucharistiâ admiserit, & Primatui Papæ faverit, & iustitiam operum agnovit: Luthero interim contra Regem Angliæ fortiter pronuntiante: *Impium esse, & blasphemum, si quis dicat panem transsubstantiari. Catholicum autem & verè pium, qui contraria docuerit.*

In qua videlicet dogmatum primariorum dissensione & discordiâ; non apparet, quomodo, aut Lutherus Hussum, pro Sancto & verè pio; aut Hussus Lutherum, pro candido & canoro olore, & non potius pro corvo nigerrimo, ac ferali bubone, habere potuerit.

Et sanè, si ex cantu avis dignoscitur, blasphemix tuæ, Luthere, quantumvis in eâ oloris appellatione te ames, non te cœli volucrum, aut avem Paradisi, ostendunt, sed infaustam avernalemque stringem manifestè demonstrant.

Porrò, ut à Luthero, ad ejus sectarios deveniâ: centurias Lutheranorum Magdeburgensium plu-

ribus scatere mendaciis , variis ostendam occasionibus. Relatu dignum est , quod Tomo 1. Inventarij Plessæani cap.1. observat noster Fronto Ducæus : Prædictos nimirum , Magdeburgenses c.8. centuria 4. columna 602. cum S. Hieronymū nimia in scribendo acerbitatē accussassent, splendido mendacio , hoc subicere : *Id quod etiam Gregorio visum est: qui de scripto Hieronymi contra Vigilantium, ita censuit : In Vigilantium ita debacchatur Hieronymus, ut plusculum in eo modestie cogar desiderare.* Quæ tamen verba , ut observat Ducæus , nullius Gregorij, neque Romani, neque alterius cujusquam , S. Hieronymo posterioris , sed ipsissima sunt Erasmi Roterodami ; in argumento libri contra Vigilantium, expressa. Tamen si animadvertam, doctissimum Baronium , ad annum Domini 406. n. 51. non adscripto loco similia verba S. Gregorio attribuisse.

Vt jam particularim non exaggerem, tot scriptorum mendacissimorum turbam , confictasque monstrosissimas fabulas , quibus isti homines sibi adversantium Catholicorum famam lacerant, id jam à principio in illis observante atque damnanante ipso Desiderio Erasmo : cujus hæ voces sunt , scribentis ad comitia Helvetica: *Quod apud Ethnicos erat capitale facinus , ( nimirum libros famosos conscribere ) nunc quorundam ludus est, qui sibi videntur Evangelica doctrina propugnatores.*

Neque rursus illa , quæ de profano suo pulpito in eosdem intorquent probrosa convitia, & ( qui alter istorum ludus est ) sacrorum hominum

hominum deridiculas portentosasque descriptiones ; quas populo simplici atque credulo eâ gratiâ insinuant , ut cum hi illorum personas oderint , consequenter & doctrinam averfentur.

Quò non agrè adducar , ut credam quod Tractatu 5. Theologo-Iuridico cap. 23. n. 119. per occasionem scripsit , vir istarum rerum experiens , Georgius Gobat è nostra societate: Videlicet, *hæresim Lutheranam Calvinianamque majora incrementa accepisse , à putidissimis mendaciis scelestissimisque fabulis , quas de Pontificibus Romanis, Cardinalibus, Clero, Monachis, Jesuitis comminiscuntur Ministrelli, quàm à falsa interpretatione divinarum paginarum.*

Quam in rem memorat , quod hîc non gravabor adscribere : Multa istîc societatis Collegia , experta esse à Suecicarum copiarum ductoribus ea occupantibus , humanitatem tantam, quantam vix ab amicis : eâ nempe de causa, quòd ipsorum in Suecia Ministri , Iesuitas tam fædis coloribus depingere consueissent , ut jam non homines , sed hominum monstra crederentur ; quorum è diverso morum integritatem , honestatemque conversationis ipso experimento comprobantes, conceptum odium jam in amorem verterent ; sese à suis tam fædè delusos indignati.

Et quando in hunc locum Iesuitarum incidit mentio: siquis aggeratam mendaciorum struem, quæ adversarij, sive illorum doctrinæ, sive moribus imponunt, velit ob oculos legentium exponere, multorum profectò magnorumque voluminum res sit.



Perlepidum istud est, ut pauca duntaxat, specimenis gratiâ proferam: quod Rogerius quidam Protestans, in Doctrinâ Ecclesiæ Anglicanæ, refert: in Cathechismo Iesuitarum, (authentico scilicet opere) libro 1. cap. 10. haberi: *Non feminarum, sed virorum Christum esse Redemptorem: mulieres verò salvari per quandam nomine Ioannam.* Haud dubium, quin per Sanctam Ioannam, vxorem Chusæ, Procuratoris Herodis: ut cujus solius Ioannæ mulieris, mentio habeatur in sacro textu.

Magis seriò delirat Confessio Mansfeldica, capite de Erroribus Iesuitarum, Vbi: *Error*, inquit, *secta Iesnita est: quod Christus, etsi mediator & intercessor noster fuerit, nunc tamen non sit amplius: sed jam solos sanctos, intercessores esse & mediatores nostros.* Quod à nobis tradi, nemo credet, nisi qui nos non norit, aut affectatè oderit.

Audiat postremò Eliardus Lubinus Lutheranus, Iuvenalis interpres, relatus à Daniele Bartoli, in Historia Societatis, quæ ad Italiam pertinet, Parte 1. l. 2. c. 14. qui nempe Grammaticus eo nomine, quòd Iuvenalis satyras iuventuti nostræ prælegendas ab obscenitate expurgassemus, tragicè in nos exandescens: cum illud à nobis eâ gratiâ factum dixisset, quòd sceleratissimam vitam nostram iis satyris velut in speculo expressam non sustineremus; eo denique societatem nostram Virgiliano exornat elogio: *quâ non immanior ulla pestis, & ira Deum stygio sese extulit orco.* Quippe, quæ (ut ait) ex quo in orbe comparuit, ex eo pietatem, fidem, sanctitatem

tatem, virtutem omnem, & omne bonum exterminavit. Cui elogio, seu confirmando, seu exornando attexi possunt, complura alia eiusdem fursuris Epitheta, quæ ex variis sectariis collecta, in hanc seriem digessit Becanus noster, in Aphorismis Calvinistarum; Aphorismo 10. *Iesuitæ sunt blasphemæ monachi, impuri Spiritus, membra diaboli, turbatores pacis, inimici Regum, seductores patriæ, corruptores iuvenis, sicarii, proditores, progenies viperarum* (addi potuit ex Beza, *locusta, Iesu nomen e mentientes*) *cauda Antichristi, &c.*

In quo quidem postremo ( si istorum ingeniorum acumen utcunque assequor ) id mysterij latere existimem : quod cum Papam Romanum, dementer ac stolidè pro genuino Antichristo habeant; eius nos caudam appellitent, propterea quod; ex speciali instituti nostri ratione, nos ei præsertim addictos esse intelligant, & verò fortassis, plusquam ipsis expedit, sentiant.

Quò spectat, quod Paræus Calvinista, in oratione de strophis Iesuitarum; adversus Ecclesiam Catholicam, majori strepitu, quàm effectū, classicum inflans : *Nunc omnia arma, inquit, tela, signa & acies concitanda sunt, in Antichristum Romanum, eiusque primipilares & principes Iesuitas* : ( quam ille voculam ex Atticâ suâ pharetrâ depromsit, honoris nostri gratiâ, quod expressius significaret, nos in exercitu, contrario, esse veluti Antesignanos, & in primâ acie pugnare. A quibus, quàm sibi suæque religioni timent, pergit ostendere, dum addit : *qui ante fo-*

res



*res commune exitium omnibus Ecclesiis machinantur. Sic ille.*

Sed quidquid de hoc sit : velim eiusmodi blaterones semel intelligant ; ea nos maledicta , & tamquem probra , quæ ignominia gratiâ in nos jactitant, ea, inquam, nos non opprobrij loco , sed magnæ gloriæ ducere : ut quibus modestè, & proportionem quadam, usurpare liceat , quod assimili in causâ , contra Petilianum cap. 16. de se ipse scripsit Magnus Augustinus : *Non sanè parva est , parumque gloriosa consolatio cuiuscunque nostrum, si ab inimicis Ecclesia, cum ipsâ Ecclesiâ criminemur.* Cui addi potest, quod ad ipsum Augustinum scribens Hieronymus, ep. 25. inter Augustinianas : cum illa præmisisset : *In orbe celebris : Catholici te venerantur atque, suspiciunt ; ad extremum addit : Et, quod signum majoris gloriæ est, omnes hæretici te detestantur.*



## C A P U T XIX.

*Id ipsum iraditur de Calvinistarum Spiritu.*

**Q**Uod jam de Lutheri Lutheranorumq; spiritu demonstravimus , eum videlicet sanctum ac divinum non esse , ex eo quod sit spiritus mendax ; id pariter modò de Calvinii & sequacium spiritu specialiter ostendendum est.

Quo in argumento ; illud , nec injustè, quantum apparet , præmitti posset : si quæ Lutheri ;  
ipforum

ipforum Patriarchæ, apud Calvinianos fit autoritas, ( quam equidem magnam esse oportet, ipso Calvino atque Beza, illum pro insigni Christi Apostolo agnoscantibus ) causam, quam tractamus, jam præjudicatam atque evictam esse: quandoquidem ut suprâ vidimus, ille primus Germaniæ, ut aiunt, Apostolus, in hæc verba discretè pronuntiet: *Spiritus Calvinistarum, est diabolicus spiritus, mendax spiritus, rebellionis & dissensionis spiritus.*

Et sanè qui Bezam audiat, in responsionibus ad Claudium Sanctesium, verbis adeò exaggeratis Lutheri spiritum commendantem: *Lutherus eximium est Dei organum, toto ore* ( id est in omnibus quæ proloquitur ) *divinitus inspiratum, in quo* ( subdit ) *qui spiritum Dei non sentit, nihil sentit:* exinde consequenter inferet, etiam istud, quod protulimus, ut profectum ex Dei spiritu, pro vero ac certo suscipiendum. Ex quo utrimque fiat, mēdacem habendum eum Calvinistam, sive mendaciter, sive ex vero, in hunc modū de Luthero scripserit.

Verūm hac quasi velitatione prætermisā: juvabit potiùs, partim ipsis factis atque exemplis, partim ipsâ eorum, cōtra quos agimus confessione, rem omnem conficere.

Quo loco in-primis producere placet decumanum, ut ita appellem, Calvini mendaciū: quando nempe, cæco in sedem Romanam odio abreptus, neq; animadvertens, quantam eo pacto existimationi causæ suæ labem inferret, non veritus est, veluti rem certam exploratamque sibi, scribere: *apud Romanos Pontifices eum pridem vigere arcantum sensum: ut nullum Deum, nullū Christum, nullū*  
resurre

*resurrectionem esse, persuasum habeant. Verba eius in l.4. inst. c.7. §.27. esse sunt ista.*

*Quasi verò dubium sit, qualem religionem sint iam pridem professi Pontifices, cum toto Cardinalium collegio, & hodie profiteantur. Primum enim arcana illius Theologia, qua inter eos regnat, caput est; nullum esse Deum. Alterum; quaecunque de Christo scripta sunt & docentur, mendacia esse & imposturas. Tertium: doctrinam de vitâ futurâ, & ultimâ resurrectione; meras esse fabulas. Iam pridem hac ordinaria capit esse Pontificum Religio.*

Et ista quidē mendacissimo calamo Calvinus; Quæ tamen, veluti & per seipsa incredibilia, & iis quibus perspecta esset Curia Romana, manifestē falsa, cum animadverteret se orbi persuadere non posse; infelice astutiâ adiunxit; hanc esse *arcanam* istius curiæ *Theologiam*; quam nimirum ipse, cæteris utique oculatior, introspexerit, ac certò & indubitatē deprehenderit.

Sed quid jam miremur, quantumvis indigna de Romana sede, ipsoque Pontifice ab iis impudentē vulgari; qui illum esse Antichristum habeant pro articulo fidei.

Sed pro ipsâ Calvinii impudentia luculentius demonstrandâ, placet per occasionem eas proferre, probrosissimas & mendacissimas appellationes, quibus augustissimi Concilij Tridentini Patres integerrimos ac sapientissimos, quos erroribus suis adversantes experiretur, sparsim insignire dignatus est; quas ita proponit idē Becanius Tom. 1. Opusculorum, op. 4. in præfatione ad lectorem:

*Calvinus in antidoto Concilij Tridentini, eius Concilij*

*gilij Patres vocat: Tridenticolas, sub Neptuni auspiciis militantes, indoctos, stupidos, quisquilias, asinos, porcos, pecudes, crassos boves, Antichristi legatos, Christi hostes, otiosos ventres, medicabula, purida cadavera silicernia, Blaterones, Patres cornutos, Tridentinam colluviem, exitialia monstra, degeneres ac spurios, Romane fidei, id est, manne meretricis filios, emptitios monachos, Patres ad sesquipedem auritos.* Ita Calvinus. Belle, præclare.

Atq; ista interim tam indecora dicacitas, adeoq; projecta audacia, quæ ne à vilissimo quidē scurra, adversus tantæ autoritatis viros, expectanda, aut toleranda esset, ab ejus tamen sectariis, digna germano Christi Apostolo, atq; ab intimo Dei spiritu orta, & eructata, censetur.

Eodem faciunt mendaces illæ calumniæ, quibus Papistas insectantur assidue; veluti meros idololatrias, & (quod subinde addunt) paganis ipsis deteriores; quod nempe in Eucharistiâ, panē adoremus; cū tamen, non in panē, sed in Christum quē adesse credimus, nostra feratur adoratio: vel sanctos ipsos, aut etiam Romanum Pontificē, pro Christo aut Deo colamus: cū manifestum sit, illos quidem tantū, ut Dei amicos, & hunc ut Christi vicariū; neque iam latriâ, quæ soli Deo debita est, sed cultu quodā inferiore, à Catholicis honorari.

Sic enim mentitur Calvinus in 1. ad Timotheū c. 3. Ecclesiam Romanam hætenus docuisse cultum Idolorum, & Christo abnegato, hosti eius Antichristo militasse. Et *lib. de Reformatione Ecclesie*; Papistas, non solum sanctos loco Christi adorare, sed etiâ eorū ossa &c. Quibus addi potest, quod è Lutheranis Lucas Osiander in *Epitome*,  
centuriâ

centuriâ 11. de Sanctissimo Præsule Malachia, non erubuit scribere : *Superstitiones Pontificias amplexus , Romanum Pontificem pro Deo coluit.*

At mendacia mendaciis cumulans Gabriel Povellus , in libro de Antichristo , fronte perfricta , Catholicos fingit ista sentire & tradere. *Primum quod Papa possit dispensare contra novum & vetus Testamentum. Deinde quod possit creare , seu aliquid ex nihilo producere. Rursum quod Sacramenta à Christo instituta, mutare possit quoad eorum substantiam. Postremò : quod maius peccatum sit comedere carnes die prohibito, quàm adulterium committere.*

Sed ne plura cogar ejusce rei exempla congerere , facit quod jam addo : ex ipsa Calvini discipulorum confessione haberi ; quod in negotio Religionis , illicitum non sit fraude uti , aut mendaciis eandem protegere.

Sic enim in-primis Theodorus Beza in Colloquio Mombelgartenfi ( quod editum extat ) aperte professus est : *Licetum esse fucis , fraudibusque ac mendaciis fidem tueri.*

*Britannom.*  
*li. c. 11.*

Testaturque etiam in responsione ad Robertum Abbatum Doctor Bistropus , apud Henricum Fitzsimon , quendam Ministrum Anglum disertis verbis edixisse : *Fidei propagandæ causâ , non posse sufficienter mentiri.* Atque à Brerleio citatus Osiander, Centuria 16. audacter ait : *Hanc maximam seu regulam habere Calvinistas : licere pro gloria Christi mentiri.* Sic illi.

Sed efficax sanè, nec omittenda , Iacobi Regis , Magnæ Britanniae in libro quem



quem inscripsit Βασιλικὸν δῶρον de suis Puitanis  
 autoritas : ubi ; *Testor* , inquit , *coram Deo Opt.*  
*Max. nunquam te experturum plura & deteriora*  
*mendacia, quàm apud hos fanaticos Puritanorum*  
*Spiritus.*

Et quando nunc de Angliis agimus , non ve-  
 rebor per hanc occasionem , quod à quodam è  
 Nostriis Patribus Angliis , viro integerrimo, eam  
 in rem accepi , Lectori meo proponere.

Referebat ille Nobilem quendam , qui  
 jam destinarat , fidei se Catholicæ redde-  
 re , etsi id nondum palam profiteretur , cum  
 Oxonij ( quantum memini ) Ministri cujusdam  
 concioni interfuisset, apertis refertæ adversus  
 Catholicos mendaciis, subinde ipsum Episcopū  
 adiisse officij gratiā , & inter cætera , eā ipsā de  
 re esse conquestum : quod si quis Papista can-  
 dem concionem audisset, meritò potuisset, ho-  
 minis impudentiam retundere.

Porro Episcopum subridentem , ei respon-  
 disse : Non est , quod hoc tibi mirum videatur,  
 Domine mi. Nostra enim Religio , sicut per  
 mendacia ortum habuit , ita mendaciis confo-  
 veri , debet , & conservari.

Egregiè , scitè , perdoctè ; & perinde atque  
 si ad illud Philosophi respiceret ; libro 8. *Histo-*  
*riæ animalium* cap. 1. §. 7. dicentis : *incremen-*  
*tum quibusque, secundum naturam, ex eadem quâ*  
*constiterint , materiâ fieri.*

Vt vel hinc videas , hac etiam in parte , in  
 hos recentiores immigrasse veterum Hæreti-  
 corum spiritum ; apud quos , ut scribit Sanctus  
 Irenæus libro 1. cap. 15. *Perfectus habetur nemo,*  
*nisi*

*Contra Va-  
lentini, c. 5.*

nisi qui maxima mendacia fructificaverit. Ita ille, ut cum appellat Tertullianus, *omnium doctrinarum curiosissimus explorator.*

Ex quibus omnibus meritò inferatur denique, sectariorum spiritum, non veritatis esse, sed mendacij : ac proinde non esse à Deo ; sed ex eà classe , cuius erat ille , qui 3. Regum cap. 22. de se professus esse legitur : *Egrediar , & ero spiritus mendax in ore omnium Prophetarum eius.*



## C A P U T XX.

*Et olim , & modò , usitatum esse Hæreticis , ipsum Scriptura Divina Textum , ad usum suum variè corrumpere atque adulterare.*

**M**Omenti plurimum ( attende , obsecro , Lector benigne ) eo in argumento, quod tractatum inus , ad destinatos nobis fines, positum est. Eâ nempe de causâ; quoniam si illud quod pollicemur , evicerimus ; hoc ipso manifestum fecerimus ; adversarios nostros , in re ad salutem æternam pertinente , scelestè impièque procedere; aut in eo sanè ab ipso Satana miserè illudi ; ad extremum denique , dum divinas Scripturas ad sensum suum vel invitas student pervertere , non eas reipsa ut fidei regulam , sed animi sui anticipatam persuasionem sectari ; atque ad eadē ( Augustini verbo )

*l. 3. contra  
Donat. c. 19.*

*ad speciem non ad salutem tenere.*

A

Atque ut hinc ordiar : usitatum fuisse jam ab initio primævis hæreticis ; ut quamvis & ipsi, præter scripturas , nullam aliam credendi regulam agnoscerent , siquid tamen in illis , suis erroribus adversum deprehenderent ; *id vel detractiōe , vel adjectiōe , vel transmutatione* ( familiari Tertulliano phrasi ) *remediarent* : expresse nec semel tradit is autor , in libro *de Præscriptionibus*. celebris est illa , ex eius libri capite 17. desumpta sententia ; in qua, si attendas, & recentiorum hæreticorum genium ( uti ferè inter se moribus congruunt ) tanquam in speculum, possis inspicere.

*Ista hæresis* ( inquit perantiquus scriptor ) *non recipit quasdam scripturas ; & si quas recipit adjectionibus, & detractiōibus, ad dispositionem sui instituti pervertit ; & si aliquatenus integras præstet, nihilominus diversas expositiones, commentata convertit. Tantiùm veritati obstreperit adulter sensus, quantum & corruptor stylus. Hoc ille præclare : Quibus paria invenias apud Clementem Alexan-* *l. 7. strō. c. 9.* *drinum eiusdem ævi scriptorem.*

Nominatim autem ibidem , & alibi, eam perversam artem Marcioni Pontico imputat idem Tertullianus ; quòd nempe *scripturas opinionì suæ resistentes, de industriâ alias rejecisset, alias corrupisset ; ad idque ( ut loquitur loco laudato ) non stylo, sed macharâ, exertè & palam usus sit ; quoniam videlicet, enormi quadem truncatione, ad materiam suam, eadem scripturarum confecerit*

Eodemque facit ironica illa & subamara eiusdem approbatio : *Circumspice, Marcion, si tamen non delesti : stulta mundi elegit Deus &c.*

K

Porro



Porro Marcionitas subsecuti Manichæi, & ipsi quasdam scripturas non recipiebant, cum saltem testamentum vetus ex toto rejicerent; & quas recipiebant, non recipiebant integras; non hoc sensu fortassis; quod eas ut Marcionitæ fecerunt truncarent (tamen tale quidpiam videri possit innuere ipse Augustinus; dum libro de utilitate credendi cap. 2. ait, *illos scripturas discerpisse atque dilanasse*; & expressius Titus Bostrensis statim citandus.) Sed quod, ubi quicquam sibi adversum in scripturis sanctis, deprehenderent; qualia complura stultissimæ hæresi necesse erat occurrere; id à nescio quâ malâ manu intrusum esse contenderent, & fatuâ audaciâ, seu, ut Augustinus, *privilegio quodam diabolico*, ad ipsam divinam scripturam pertinere negarent. Sic enim falsè apteque is S. Doctor libro contra Faustulum 22. c. 15. quoddam quasi *privilegium diabolicum* ad id Manichæis competere innuit; *ut quidquid est in Evangelio, vel in epistolis canonicis, quo adinvari hæresim suam putent, id esse à Christo, & Apostolis dictum teneant atque suadeant. Quidquid autem ex eisdem codicibus adversus eas sonuerit; immissum à falsatoribus, ore impudenti ac sacrilego, non dubitent dicere.* In quem fortè sensum l. 2. contra illos scripserit Titus Bostrensis, etiam Augustino antiquior autor; Manichæos *divinis litteris adscripsisse quacunque voluerunt, & detraxisse, quacunque voluerunt.*

Attamen quod *diabolico spiritui* loco citato S. Augustinus, id ipsi peculiari Spiritus Sancti suggestioni assignabant, dicentes, *sibi Paracletum, quid crederent, & quid respuerent demonstrasse.*

Quam

Quam in partem obiter observēs, consimilem mentem, paremque Spiritum, illinc Manichæorum, hinc nostrorum Calvinistarum; utrisque profitentibus, sese interiori privataque divini Spiritus suggestione discernere in scripturis sanctis, quid tibi credendum, quid respuendū sit: hoc tamen discrimine, quoddam illi somnient, se interiore suo spiritu detegere, quid in illis legitimum, quid autem intrusum sit: hi verò, quis cujusvis loci sensus legitimus, quis alienus agnoscendus. In quo quanquam manifestior sit Manichæorum stultitia, utrobique tamen par periculum, eademque errandi licentia: quando in utrisque perinde valeat, quod adversus priores lib. 32. c. 19. his verbis intorquet Sanctus Augustinus: *Videtis id vos agere, ut suus cuique animus autor sit, quid in quaque scriptura prober, quid improbet.* Proprius nimirum cuique sensus speciosa illa, sed prorsus fallaci, suggestionis divini Spiritus umbrā, prætextuque, velatus. Ita enim sese magis explicans subdit S. Doctor. *Id est, ut non auctoritati scripturarum subjiçatur ad fidem; sed sibi scripturas ipse subjiçiat: non ut ideo illi placeat aliquid, quia hoc in sublimi auctoritate scriptum legitur, sed ideo rectè scriptum videatur, quia hoc illi placeat. Quò te committis anima misera, infirma, carnalibus nebulis involuta: quò te committis?* Sic Augustinus.

Postremò ne longum faciam, solum his addo ex veteribus tum Arianos. De quibus agens Ambrosius lib. 2. de fide cap. 4. in fine; eos facit Antichristo similes: *quia, inquit, Filio Dei*

*derogant, nec martyribus pepercerunt; & quod fortasse ille non faciet ( Antichristus uti quæ) scripturas falsare divinas. Cujus rei exem plum adfert libro 3. de Spiritu Sancto cap. 11. erasisse has voces: Quoniam Deus Spiritus est. Ioan. 4. Tum Nestorianos: de quibus Socrates libro 7. hist. cap. 12. Omnes, inquit, qui divinitatem ab humanitate Christi se jungere studebant; hanc sententiam (omnis Spiritus qui solvit Iesum 1. Ioan. 4.) ex vetustis exemplaribus delere non dubitarunt.*

Ostendamus modò, veterum Spiritum transiisse in Recentes Hæreticos; eosque sibi privilegium illud ( quod diabolicum appeller Augustinus ) haud dissimulanter usurpasse.

*Lib. de Sa-  
loma. c. 4.*

Quòd quidem in-primis de Luthero recentiorum hæresum primo autore, & ( uti Arium appellat alicubi S. Ambrosius ) adversus Petri navim *Archipirata*; manifestum est.

Quippe, qui ut sese & pictorem & fictorem ostenderet, Scripturas divinas, uti suprà loquentem audiebamus Tertullianum *adjectionibus & detractionibus, ad dispositionem sui instituti pervertit*: cujus utriusque formæ seu modi, necesse est quædam exempla subijcere.

Et adjectionis quidem, pervulgatum illud, & passim notum: quod ad illa verba Pauli Rom. 3. v. 28. *arbitramur hominem justificari per fidem, sine operibus legis*; in Bibliis suis Germanicis, sacrilegâ audaciâ, addiderit vocem *solam*; quò nempè præclaram illam, & ut doctrinæ suæ primum fundamentum, sibi prædilectam sententiam: *Hominem scilicet justificari per*

*per solam fidem*, apud fraudis ignaros firmitus ac profundius stabiliret. Cumque à Catholicis de ejus loci falsatione accusaretur, impiâ quadam vesaniâ respondit; uti videre est Tomo 4. Germanico Vvittembergensi, editionis anni 1551. *Doctor Martinus Lutherus vult sic se habere; & dicit; Papistam & Asinum rem esse unam.* Et rursus: *Lutherus ita vult: & ait se doctorem esse super omnes Doctores totius Papatus.* Quibus relatis, verbis rectè subjungit Cornelius nosler: *Audisti Luciferum Lutheri ore loquentem?*

Cujus audaciæ aded eum non pœnituit, ut insuper dixisse feratur; pœnitere se, quod non addiderit etiam *omnibus & omnium*, ut ita expressius legeretur: *Arbitramur hominem iustificari per solam fidem, sine omnibus operibus omnium legum.*

E diverso autem, eâdem ex causâ, scripturæ loca, quibus commendatur necessitas, aut studium bonorum operum, detractatione quadam, quoad potuit, enervare visus est. Ut cum exempli causâ, in eo quod habetur 2. Petri 1. *Magis satagite, ut per bona opera* &c. in suis Bibliis omisit voces, *per bona opera.* Quæ etsi in Græcis communiùs non habeantur; tamen antecedens satagendi vox; necessarium videtur ad illa respectum importare.

Similiter in loco illo 1. Thessal. c. 4. *sanctificatione vestra, ut abstineatis vos à fornicatione,* postrema illa de fornicatione suâ autoritate expunxit. Rursusque in illo, ex capite 6. ad Ephesios: *ut possitis resistere in die malo; & in*  
K 3 *omnibus*

*panis vivus*; non autem ζωοποιῶν; quod esset *vivificans*. Ut hac nempè fraude, hunc locum eriperet Catholicis; inde arguentibus; panem quem Christus ibi promisit se daturum, in Sacramento Eucharistiæ videlicet, esse reipsa corpus Christi, & Christum ipsum, qui solum appellari potest, panis seu cibus vivus, cum ipsa symbola inanima sint.

Rursum ipse Beza alijque sectarij, verba illa, Actuum Apostolorum capite 15. versu 41. *precipiens custodire precepta Apostolorum & Seniorum*, in sua versione omittunt: forte ne quis inde adstruere possit traditiones Apostolicas; quas Catholici contra sectarios admittunt.

Addere liceat, universè loquendo, apud Sectarios nullam extare scripturæ versionem, quæ non, variorum ex ipsis confessione, multifariam perversa & inquinata sit. Quod operæ pretium erit, aliquousque demonstrari; ut vel hinc intelligant populi, quàm parum tuta sit, ipsorum fides, quæ reipsa non puro atque sincero verbo Dei, sed variè adulterato subnixa sit.

Quod quidem videns Gallix sectariis, non sine causa quondam objecisse, Ioannem Armandum, tunc Episcopum Lucionensem, postea Cardinalem de Richelieu, in sua præcipuorum fidei Catholicæ capitulum, defensione: in quâ sic illos alloquitur. *Vestri in scriptura depravationes adeò sunt perspicuæ, ut eas ne vestri quidem dissimulent.* Cuius rei testem profert in primis Carolum Molinæum, hominem utique aliqua



sectarum aspersum fuligine : in sua translatione Novi Testamenti ita de Calvino loquentem.

*Calvinus in suâ Harmoniâ, textum Evangelicum desultare facit, sursum, versum, ut res ipsa indicat; vni infert littera Evangelica, & illam multis in locis transponit; & insuper addit littera. Hæc Molinæus; verbo insuper addens, Bezæ versionem, de facto mutare textum. De quâ idem Cardinalis, hoc subdit Castalionis iudicium, in defensione suarum translationum dicentis: magno opus fore & volumine; quo omnes eius (Bezæ versionis) errores notarentur.*

*Tract. I. tit.  
1. quest. 5.*

Cujus è diverso criminationem, quàm bonâ mensurâ ac super effluente ipsemet Beza remensus sit; videre licet apud Decanum tomo 4. opusculorum; ubi refert Bezam in suis annotationibus, vicissim Castalionis versionem falsam, ineptam, blasphemam, execrandam, erroneam, impiam, & à Spiritus Sancti sententiâ prorsus discrepantem, indiguisse. Ita illi mutuò se scabunt.

Addit denique præfatus Cardinalis: versionem Bibliorum Genevensem, Regi magnæ Britanniae Jacobo in Colloquio Hamptoncuriensi, visam esse omnium deterrimam Qui interim simul agnoscens (apud Gaulterium) sæculo 17. capit. de Antipuritanis) nondum à se visa Biblia ulla in linguam Anglicam rectè conversa; statuit ibidem, ut alia ederetur versio, absque ullis ad marginem notis; quandoquidem Bibliorū Genevensiū notas invenerat admodum partiales, falsas, seditiosas, nimiumq; redolētes animæ periculosa ac perversissima, machinationes.

Quid

Quid quod ipsi synodi Calvinianæ Dordracenæ Patres conscripti ( teste Sandæo Tractatu de eâ Synodo, confid. 12. ) versionem sacræ Scripturæ Belgicam agnoscunt scatere mendis? quia facta sit ex Germanicâ Lutheri malè intellectâ.

Quamquam & hanc, etiâ prout oportet intellectam, infinitis scatere erroribus, demonstrent inter alios, apud Sandæum, Dictembergius, Emserus &c. Cum interim eâ in versione ita se amet ipse Lutherus, ut cuius alteri eam longè præferendam existimet. Ausus etiam, pro suâ modestiâ, Græcam versionem, 70. Interpretum, valdè fatuam appellare; & non ferendâ fatuitate, ipsos Hebraicæ Linguae fuisse im- peritos, pronuntiare. Cui simile quiddam au-  
In symposia-  
sum dicere Sebastianum Munsterum, refert *cis c. 69.*  
itemque ad  
cap. 46. Gen.  
 Coccius in Thesauro Catholico lib. 6. art. 2.



## CAPUT XXI.

*Quàm non bonâ fide tractent Calvinista scripturas Divinas, in eorum facili Principe Theodoro Beza, specialim ostenditur.*

**E**Tenim, ut ab eo quod principale est, incipiâ: cum ex verbis institutionis Eucharistiæ apud Lucâ c. 22. v. 20. ad agnoscendum in sacro calice realem Sanguinis presentiam ipse Theodorus efficaciter urgeretur; ex eo quod Calix ille ( seu contentum in calice ) dicatur fundendus pro nobis, scilicet ( ut addit Matthæus ) in remissionem peccatorum, quod non nisi  
 ver

vero Christi Sanguini, competere poterat, non autem figuræ, seu vino; quod iuxta Calvinum, solum continebatur in calice. Neque verò particulas illas, *qui pro vobis fundetur*, referri posse ad Christi Sanguinem, cum quo relativum *qui* conjungitur proximè, in textu nostro: obstare enim aperte textum græcum, in quo sic legitur. *Hoc poculum novum testamentum est in sanguine meo, quod pro vobis effunditur* (Græcè τὸ ἐκχυρόμενον) quàm vocem clarum esset ex ipsa verborum constructione, ad poculum seu calicem referri.

Hujus nimirum argumenti vi oppressus Theodorus, in majoribus suis ad eum Lucæ locum annotationibus, aliud non habuit quod responderet, nisi ita quidem legi in omnibus etiam vetustis codicibus; attamen vel ab Evangelista sollicitissimum esse commissum, cum scribere debuerit; *καὶ ἐκχυρόμενον*; vel eam lectionem è margine in ipsum Lucæ textum irrepsisse, eumque depravasse: Quæ quidem responsiones, tam futes sunt tamque commentitiæ, ut eas clarum sit, nō hominis esse, quid re ipsa tradat divina scriptura, cognoscere volentis, sed eam ad anticipatos sensus suos, omni studio, & per fas & nefas, accommodare satagentis.

Quā quidem in parte, ad eum hunc Calvini copistolium sua excacæcavit perfidia: ut nihil pensi habens, quantum detrimenti vel inde caperet Religionis reformatæ autoritas; ausus sit in suā versione Latinā, ipsum Lucæ textum pro arbitrio suo corrigere, & ita reponere: *Hoc poculum est novum illud testamentum, per sanguinem*



*guinem meum, qui pro vobis effunditur*: cùm iuxta originalem & genuinum Evangelistæ textum in cā Bezae versione, legendum esset; *quod pro vobis*, & non *qui*; ita ut pronomen, cùm voce *poculum* & non cum voce *sanguinem* cohereret. Subscribente interim ei corruptela, etiam Calvino; dum formam calicis ita expressit, *Hoc poculum novum testamentum est in sanguine meo, qui pro vobis effunditur*. Atque hoc tunc Beza, perfidè & propudiosè ausus est.

Veruntamē postea, cùm eum fortassis eius audaciæ puderet atq; pæniteret; atq; interim ei Lucæ loco (ut Proverbio fertur) effossos pervellet oculos; studuit, honorique suo consultius censuit, eum totum versum, in quo illæ voces habentur (quò jam illâ suâ odiosâ emendatione opus non esset) si non reipsâ è sacro textû expungere, sed saltem in dubium revocare. Quippe, qui (teste Iacobo Gordono Huntlæo Controversiâ tertia c. 12.) in responsione ad primam Repetitionem doctissimi viri Claudij de Sainctes, versum illum Lucæ 20. (in quo interim ipsa consecrandi calicis forma continetur) exinde suspectum reddere conatus sit; quòd in quodam antiquissimo MS. Codice Græco-Latino, qui penes ipsum erat: de quo penes ipsum (si tamen aliqua esse possit) sit fides; non legeretur totum illud, quod apud Lucam, de posteriori poculo dicitur.

Addit idem Gordonus; eundem in ultimis suis annotationibus in novum testamentum, anno 1598. editis, etiam illa verba versûs 19. *quod pro vobis datur*, suspecta & dubia habere: quia hæc

hæc omnia in suo illo venerandæ vetustatis cōdice non haberentur. Similiter autem, & versûs decimum septimum, & decimum octavum eiusdem capituli; quod non extant in Syro interprete.

Sed & ipsum Bezam priorem suam suspicionem inde confirmare: quod verba illa, *qui pro vobis funditur*, non habeantur in Paulo, qui tamen videtur, ex eo loco Lucæ suam dominicæ cænæ institutionem, descripsisse. Sic ille insulsus ac temerarius Calvinus Archidiscipulus.

Perinde atque si, non potius, aut negligentia, aut suspectæ fidei, accusandus esset, incognitus ille atque invisus Theodori Græco-Latinus cōdex; in quo pars illa Institutionis Sacramenti, quæ illis verbis cōtinetur: *Similiter & calicem dicens: Hic calix novum Testamentum est in meo sanguine*; quam Matthæus, Marcus, & Paulus tam diligenter expresserunt; inter describendum ipsius Lucæ textû, exciderit: quàm ut credibile sit, re ipsa à Luca prætermisam: quando cæteroqui in reliquis Lucæ, sive Latinis, sive Græcis exemplaribus, hætenus inventa, & retenta sit.

Neque verò ex Paulo eam in partem quicquam habetur præsidij. Sive quia ipso Paulo, non tantum negat se ab homine didicisse Evangelij; sed ea ipsa, quæ de Sacramenti institutione traderet, affirmante se à Domino accepisse; absque fundamento, & falsò dicitur, quod ea ex Luca descripserit. Sive, quia tametsi verum sit, ea à Paulo prætermisæ esse, nequit tamen dici ideo factum, quod ea in Luca non invenerit. Alioquin enim (quod Bezam ista scribentem effugit) simili-  
liter

liter Paulus omisisset illud : *quod pro vobis tradetur* : quippe quod, ipso fatente Beza, non magis habeatur in suo illo præclaro codice, & consequenter neque in textu Lucæ, siquid valeat istius arioli divinationo.

Ad extremum, neque ferendum est, quod versus illos, decimum septimum & decimum octavum ( qui quidem ad ipsam institutionem Sacramenti non pertinent ) contra cæterarum editionum & versionum, fidem ; suspectos habeat ex solâ Syri Interpretis, qui cos prætermiserit, autoritate. Hac enim ratione, vacillabunt & aliæ plures divinæ scripturæ, alioqui indubitata, sententiæ : quando fieri pronum est, ut inter tot divinæ scripturæ in alias linguas, versiones, ista sacri textus sententia ab aliquo interprete, illa ab alio, & consequenter plures à pluribus, aliâ ab aliis occasione, inveniantur prætermissæ.

Addere possumus ; universè verum non esse, prædictos versus à Syriaca versione abesse. Extant enim in eâ, quam in suis Bibliis Polyglottis, typis Londinensibus, edidit Brianus Vvoltonus ; tametsi fateatur, eos nec in Codice Viennensi, neque in MS. Bibliothecæ Regiæ, quo passim usus sit, reperiri.

Atque hæc plusculis, minutiusque persecuti sumus ; tum ut speciatim appareat, quàm levibus de causis, eiusmodi homines ad textum sacrum immutandum, truncandû inve propendeant ; & hinc ulterius, quàm non  
reveren

reverenter , nec castè ac piè , divinas scripturas reipsa tractent ; qui apud plebem imperitam , sese puri puri verbi divini in omnibus affectandi tuendique præ cæteris esse studiosos, assiduo boatu circumsonent, jactent, venditentque.

Sed & aliud est , in quo eiusdem Bezae similis notatur & acculatur audacia. Quod nempe in suis in eiusdem Lucae caput 2. annotationibus , ad illa verba : *Hæc descriptio prima facta est à Praside Syriae Cyrino* : cum non inveniret , quâ ratione occurreret quorundam eruditorum objectioni , quod variis de causis non videatur , id temporis Cyrimus, seu Quirinius, Syriae præfuisse; ut eâ se difficultatè expediret , ausus sit rursus in dubium vocare, num fortassis prædictæ voces , ab aliquo primum margini adscriptæ, non fuerint deinde temerè in textum intrusæ,

Cum tamen in omnibus Evangelij textibus , & linguarum etiam peregrinarum versionibus eadem voces reperiantur: nisi quod in græco originali , Certarumq; Gentium versione, neque nonnullis item Latinis codicibus , præpositio A , quæ in vulgatâ nostra legitur , prætermissa sit. Ad quem Bezae Genium visus est respicere Lutherus : dum Tomo 7. *in defensione verborum cana*, ita insultat Sacramentariis ; *Quid inepti , nihilne consilij habetis &c. Dicite verba illa primum margini adscripta ; postea verò ab aliquo textui inserta.*

At

At id, quod modò subijcio , attendat Lector & judicet , plussne improbae malignitatis an fatuae temeritatis contineat ; Dum nempe ad caput Matthæi 10. ejusque versum secundum, ubi Evangelista duodecim Apostolos enumerans : *Primus* , inquit , *Simon* , qui dicitur *Petrus* ; istum Beza commentarium adscribit : *Primus* , inquit , *πρωτος* , *Quid si hoc vocabulum ab aliquo additum est , qui Petri Primatum vellet stabilire ? nihil enim sequitur , quod cohercat.*

In qua suspicione , & malignæ se mentis ostendit ; & ex cæco affectu incoherentem Sancto Evangelistæ sermonem adscribit ; cùm tamen agnoscat ita legi in omnibus exemplaribus : Insuper & ridiculum se facit ; quasi apud cordatos suspicio aliqua subnasci possit ; quod Græcorum aliquis ; quorum semper fuit potius studium ; Romani Pontificis auctoritatem imminuendi , ut eam augetet , Evangelium corruperit ; & addita ab eo Matthæi textui vox , *πρωτος* , in reliqua deinceps exemplaria absque ulla contradictione , promanaverit. Omitto alia.



## CAPUT XXII.

*Quàm iniuste sese pro Evangelicis haberi velint, qui non modo corrumpunt Evangelium, sed ipsum autorem Evangelij, Christum Dominum, omni studio deprimere conantur.*

**M**agna iterum vis, ni valdè fallor, eo in Argumento posita est: quando manifestum esse videtur; qui eâ, quâ dixi ratione adversus Christum Salvatorem se gerant, hos non modò non esse habendos pro Evangelicis, sed neque ipso Christiani nomine simpliciter dignos esse censendos.

Porro eâ se ratione gerere, recentiores sectarios, Lutherum in primis patriarcham, tum reliquam ejus progeniem, attende, Lector, & obstupesce.

Lutherus igitur in Colloquiis Islebiciensibus, titulo de lege & Evangelio, expressè tradit: *Christum in monte Oliveti, nescivisse discernere inter legem & Evangelium. Itaque necesse habuisse ut Angelus de cælo Evangelium diceret.*

Idem Lutherus commentario in Epistolam ad Galatas, ut Christum omninò legem veterem (etiam Decalogum, ut alibi ostendo) abrogasse efficaciter significaret; ad id fædissimis & ignominiosis appellationibus usus est; ipsum Christum vocans, *tyrannum, tortorem, carnificem legis, & diabolum, legisque adversarium*, cum & aliaqui

alioqui prae divinæ legis odio ausus sit scelestus, etiam in eius autorem Deum, contumeliosus esse; ita impie scribens, Tomo 1. Vvitembergenfis editionis, fol. 189. & 190. apud Cornelium à Lapide. *Oportet cor humanum, legem Dei, atque adeò Deum ipsum, supra modum odisse.* Gal. 2. n. 47.

Sed quid facias his hominibus, qui etiam ponentes in cælum os suum, effrænâ quidlibet effutiendi licentiam, ex formulâ quinti Evangelij, Sanctam & Christianam libertatem appellant?

Iam verò quid dices, Christiane Lector, si eundem Lutherum in citato commentario in epistolam ad Galatas, ita audias adversus Dominum & adversus Christum eius, loquentem dicam, an furem? *Omnes Propheta viderunt hoc in spiritu, quòd Christus futurus esset, omnium maximus Latro. Homicida, Adulter, Fur, Sacrilegus, blasphemus.* Cap.

Et ne ipsum putes figuratè tantum esse locutum: eo nempe sensu, quo etiam scripturæ phrasim secuti dicimus, Christum peccata nostra, sua fecisse; cum se apud Patrem, vadem pro nobis constituit, & ita quandam portavit peccatoris imaginem: id ipsum etiam exaggeratiùs confirmat, Homiliâ 1. de Baptismo; ubi rursus de Christo: *fit (inquit) gravissimus & longè omnium maximus, & unicus in terris peccator, nã alius, præter ipsum, nullus sit peccator; subditq; eum opus habuisse baptismo in remissionem peccatorum.*

Quem ea in parte æmulari visus est Calvinus; in eandem ad Galatas epistolam, & alibi molliùs

L tamen



tamen modestiùsque scribens, Christum ita personam nostram suscepisse, *ut peccator fuerit* ( *fuerit*, inquit, non tantum figuram imaginemque peccatoris sustinens ) & *maledictionis reus*. Sed de Calvino graviora postea.

Eodem faciunt & illa Lutheri in psalmum 22. *Quid ergo dicemus? simul Christum summè iustum & summè peccatorem; simul summè veracem & summè mendacem; simul summè gloriantem, & summè desperantem, simul summè beatum, & summè damnatum? Nisi e in hac dixerimus, non video, quomodo à Deo sit derelictus.*

Tandem ut furibundi hominis, insanis in Christum maledictis, supremum hunc velut colophonem imponam: eo denique prorupit impietatis; ut in confessione majori, de cœna Domini, non solum humanam Christi naturam passam esse diceret, sed etiam divinam: *quia* ( inquit ille ore blasphemio ) *non credo quod sola humana natura pro me passa sit: Christus ille vilis, nec magni pretij salvator est: immò ipse quoque salvatore opus habet.* Quod Lutheri dictum vel ipse fertur exhorruisse Zuinglius in responsione ad confessionem Lutheranam.

Attamen eâ ipsâ in parte, eundem secuti Andreas Musculus: & Ioannes Islebius ( teste Silvestro Czezanoria, apud Berleium Tract. 2. c. 2. sect. 10. §. 8. ) palam professi sunt, divinam Christi naturam, unâ cum humanâ mortuam fuisse in cruce; Quamquam aliunde is ipse Lutherus, altero in extremq, non obscure visus est, Christo seu huic homini, divinitatem adimere. Dum, ut refert Gretserus in suo *Luthero Academico*

*Academico* in hæc verba scripsit, tomo 2. Colloquiorum Latinorum, Tit. de *Adversarius*: *Non minus, immò magis, disparata est prædicationis, si dicas: Deus est homo; quam si dicas: Homo est asinus.* Ex quo rectè infert Gretserus noster: ergo magis falsa erit illa: *Deus est homo;* quàm illa: *Homo est asinus.*

Etenim si vim vocis spectemus; disparata sic definiuntur apud Tullium lib. 1. de Inventione: *Disparatum est autem, id quod ab aliqua re per oppositionem negationis separatur, hoc modo: sapere, & non sapere.* Si igitur Deus & Homo, disparata sunt; possunt per oppositionem negationis separari, dicèdo, *Deus non est Homo.* Quod ne ipse quidem Nestorius tam crudè adminiserit, cùm inter duas Christi personas agnosceret saltem quandam communicationem nominum.

Ego autem cui similem dicam audacissimum <sup>cap. 13.</sup> hominem istum? nisi illi bestię, in Ioannis Apocalypsi ascendenti de terra, quæ agni quidpiam fronte præferens, loquebatur ut draco.

Nam quando, ex Apostoli verbo, *nemo in 1. Cor. 12. spiritu Dei loquens, dicit anathema Iesu;* id est, maledicit & execratur Iesum; necesse est ista proferentem, ex illius loqui spiritu, à quo ipse sese moveri atque inspirari audacter fatetur; de se nempe suisque Tomo 3. Germanico Ienensi in epistola de libro ad rusticos, in hæc verba, quæ antea retulimus, proloquens: *Nos à diabolo teneri, veluti à Principe, & Deo nostro; ut cogamur facere, quicquid ipse vult, & inspirat nobis.* Cujus item familiari afflatu, & ista, opinor, effuderit, Tomo 2. colloquiorum con-

vivalium : *Magis cupio per diabolum , quàm per  
Casarem mori. Morior enim per magnanimum  
atque potentem Dominum.*

Et hæc de se testantem auditis Doctorem vestrum, Lutheri sectarij ; eique interim ex eodem spiritu cuncta novanti , & Ecclesiæ fidem , ac verbum Dei adulterantis, incautè inconsultèque creditis ?

Porrò ad Calvinum ut deveniam ; is sanè in eo Dominum Iesum deprimendi studio cum ipso Luthero certare, aut eum etiam supergredi, aut transcendere velle visus est : dum in primis in Harmonia in 26. caput Matthæi, de oratione Christi in horto agens, ita de eo inverecundè indignèque loquitur : *Non fuit hac meditata Christi oratio, sed vis & impetus doloris subitam ei vocem extorsit, cui statim addita fuit correctio. Eadem ( subdit ) vehementia præsentem cælestis decreti memoriam illi abstulit, ut non reputaret in ipso momento, se hac lege missum humani generis Redemptorem.* Et mox : *mediatoris officio defungi , quantum in se est , renuit ac detrectat.*

Iam autem Christi à Patre in passione sua derelicti conditionem , quàm nefario, atque infami sermone describat, attende.

Primum enim lib. Instit. 2. c. 16. §. 12. & in Matthæi caput 26. ait , illum in ea derelictione , *de anima sua salute timuisse.*

Tum verò in caput Matthæi 27. elapsam Christo desperationis vocem : itaque ex omni parte fuisse vexatum , ut desperatione obrutus ab invocando Deo absisteret , quod erat ( inquit ) *saluti renuntiare.*

Postremò

Postremo, citati 16. capituli §. 10. *et m oportuit, ait, cum inferorum copiis aeternaue mortis horrore quasi confertis manibus Luctari & ( quod etiā atrocius ) diros in anima cruciatus damnati ac perditū hominis perferre.* Quæ quodam quasi compendio in has horroris plenas voces colligens Beza, in caput 26. Matthæi, & 22. Lucæ. *Ingenti, inquit, onere divina ira obrutus, flammis inferni addictus, profundo inferni gurgite sepultus, deversus periit.* Denique Lambertus Darnæus responsione ad Ostandrum disertè docet: *Christum inferni dolores in ipso inferno passum.*

Atque è Lutheranis Iacobus Andreas (quando & Lutherum ab ea blasphemia non abhoruisse, videre est Tomo 3. Vvittembergensi in psalmum 16.) in oratione quadam Tubingæ impressa anno 1559. Christus pro te, ait, *descendit ad inferos, & non modò corpoream mortem, verum etiam mortem aeternam, ignemque infernalem expertus est, & degustavit.*

Ad quos tam horribiles blasphemias meritò *To. 1. Theol. l. 3. c. 4.* exclamat Petavius noster, cum Patribus Quintæ Synodi, collatione 8. *Propitius sis, Domine; nec demones ausi sunt talia contra te loqui.*

Nec refert, quod ipse Calvinus in caput 27. Matthæi, neget se dixisse, desperasse Christum, sed tantum vocem desperationis emisisse: alioqui enim, quanquam sensus, carnis exitium apprehenderet, fixam tamen stetisse fidem ejus in corde.

Nihil quippe novi est ipsi Calvino; id quod opere & re ipsa facit, ad molliendam dicti invidiam; eodem loco, id esse mentis suæ, verbo

& ad speciem tantum negare. Quod cum item in re præfenti factitasse comperiet, qui ea quæ ex ipso Calvino in idem caput Matthæi 27. supra posui, consideraverit.

Nam si quod istic ait, adeò fuerit desperatione obrutus, ut ab invocando Deo absteret, & *id* ( uti subdit ) *erat salutis renuntiare*: desperavit utique ( immò & ipsâ quoque desperatione revera obrutus atque oppressus fuit ) quando voces illas intelligenti, renuntiare salutis suæ, idem reipsa sit, ac de salute suâ desperare.

Cujus blasphemix Calvinianæ supra modum excrescit atrocitas: quod, cum salutis nostræ autoris sacratissimæ humanitati, si de eâ condignè sentiret, non tantum salutis quantumvis certam experientiam, sed, etiam in vita mortali manifestam Dei visionem cum doctoribus Catholicis, ipsamque salutis æternæ possessionem attribuere deberet: è contrâ de eâ adeò abjectè indignèque senserit, ut eâ in parte, Christum infra omnes suæ fidei, ( Calvinianæ inquam ) professores depresserit.

Quippe cum alibi audiamus illum ita disertè loquentem: *Verè fidelis non est, nisi qui solidâ persuasione, Deum sibi propitium benevoluntque esse persuasus; de eius benignitate omnia sibi pollicetur; nisi, qui divina erga se benevolentia promissionibus fretus, indubitatam salutis expectationem præsumit.* Et rursum eodem capite: *ubi primum vel minima fidei*  
*curia*

*gutta mentibus nostris instillata est, iam faciem Dei placidam & serenam, nobis, ne propitiam contemplari incipimus, procul id quidem & eminùs, sed ita certo intuitu, ut sciamus, nos minime hallucinari.*

Tandemque ibidem affirmat, illud in fide primas ac potissimas partes tenere, ut mens divina erga se voluntatis perspicuâ notitiâ fruatur.

Quod si id proprium veræ fidei officium est, adeoque verè fidelis non est, nisi qui ejusmodi indubitata salutis suæ præsumptione fruitur: quomodo de Christo tam indignè sentit Calvinus, ut eum jam nobis inducat, de salute suâ dubitantem, timentem, desperantem, cum aternæ mortis horrore luctantem: quæ equidem nequeunt, cum illâ salutis indubitata præsumptione, certo intuitu, ac perspicuâ notitiâ, consistere?

Atque ejusmodi blasphemiarum auctores atque satores, Deum per os suum loqui jactitant; &, quod satis mirari, satisque dolere non possunt, iis securè credunt infelices populi; eosque habent pro Christi Apostolis: qui adversus Christum adedò indigna blaterantes, mirum si apud cordatum aliquem haberi valeant pro Christianis.

Sed evolvamus nos ex hoc horrore; amice Lector: nisi quod ad extremum clausulæ gratiâ (quo vel hinc videas, etiam hac in parte verum esse, nefariis parentibus sobolem nequiorem succrescere, adjungere placeat, quorundam novorum Reformatorum de Christo

dicta , quæ fortè etiam magis horreas.


Invenio siquidem in Henrici Fitzsimon Britannomachia Thomam Rogerium in *doctrina*  
*Lib. I. c. 5. Ecclesia Anglicana*, de quibusdam suis fratribus ita scribentem ; nempe : *Matthæum Hamant, dixisse Christum esse virum impium.*

Itemque Christophorum Vitelz : *non paucos esse hodie superstites Christo in bonitate pares.* Cui affine est, quod de quibusdam Anabaptistis tradit Augustinus Marloratus ; eos sub synaxin , clarè profiteri , habere se tantam charitatem ,  
*In cap. II. quantam habuit Christus in cruce.*

*Epist. I. Cor.* Tandemque apud Gaulterium sæculo 17. extremo , inter 14. propositiones Sivrandi Lubberti à Conrardo Vvorstio impugnatas , hanc invenias numero nonam : *Christum non incessisse eâdem virtutis & sanctitatis viâ , quam nobis monstravit. Neque adeò , ( quod habet decima ) adeptum esse eam felicitatem , quam aliis promisit.* Infantia , portenta , propudia.

Et hos interim fructus , progignit denique irobrum ( si superis placet ) fidelium animis , ex privati spiritus suggestione , quidlibet fingendi sentiendive licentia. In hos , non jam dico cæcos anfractus , sed in hoc altum patensque barathrum , devolvit errantes , insanum Romanæ Sedis odium , & puri scilicet verbi Dei , reformationisque Ecclesiæ specioso prætextu velata , à Catholicæ fidei regulâ , infelix & animorum saluti adeò perniciofa defectio.





## CAPUT XXIII.

*Perabsurdè Scripturam Sacram , ut legitimam credendorum regulam prætendi ab iis , qui eam facientur non usquequaque , nec per omnia , infallibilem esse.*

**M**Anifestum videtur pronuntiatum hoc attendenti ipsius terminos : cum per se evidens sit , eam regulam , quæ aliquando fallit , aut potest fallere , non esse absolutè certam ; nec proinde securam ac legitimam. Atque specialiter in re presenti indubitatum sit : eo ipso quòd scriptura aliqua , non per omnia est infallibilis , non esse re ipsa verbum Dei ; cui utique falsum subesse nullo modo potest. Idipsum his verbis attestante S. Augustino , epistola 8. ad S. Hieronymum : *Admisso enim in tantum autoritatis fastigium aliquo mendacio , nulla pars horum librorum manebit , qua non possit in dubium revocari.*

Qui rursus adversus Manichæos scribens ; qui ea quæ in Apostolo Paulo , contra ipsos sonarent , à nescio quibus corruptoribus , falsa esse contenderent , eos exinde redarguit , dicens : *Videtur id vos agere , ut omnis è medio tollatur Scripturarum autoritas , & suis cuique animus , &c.* prout aliàs retulimus.

Atque ante hos Montanistæ Cataphryges , cum secundas nuptias illicitas esse crederent , eundem

eundem Paulum Apostolum, quòd eas fidelibus permisisset, ex eo dicebant allucinatumi; quòd, ut ipsemet agnoscebat, non nisi ex parte cognosceret. In suæ autem sectæ homines venisse quod perfectum est: quippe qui, (vt ex Augustino hæresi 26. apparet.) *aduentum Spiritus Sancti, à Deo promissum in se potius, quam in Apostolos, fuisse redditum delirarent.*

Verùm veteres istos, aliòsque ejusmodi furfuris, fanaticos homines talia sensisse; non adèd mirum esse videtur, aut insolens. At quod etiam nostri Evangelici, qui assiduè crepant, *verbum Dei, verbum Dei*; & se putum Dei Evangelium, pro certâ & unicâ credendorum regulâ habere jactant ipsius scripturæ autoritatem elevent; quivis meritò perabsurdum, inexpectatúmque censeat; & hoc ipsum, ut validum arietem, quo ipsorum pulsetur, conquasseturque Religio, miror ego non passim, nec à pluribus objectari.

Et Lutherum quidem proprium ipsorum Evangelistam (quidquid ipse dissimulet, & ut existimo, negaturi sint ipsius sectarij) eòdem tendere; nisi valde fallor, apertè convincere, & lectori attento, nec pertinaci, persuadere possum.

Quid enim aliud eum facere dixerimus; dum eas Scripturas, quæ necessitatè studiúmve bonorum operum manifestè adstruunt, ita susque, deque habeat; ut non tantùm eas, in sensu opposito accipiendas esse dicat; (quod est rotundè dicere, illas reipsâ, & prout jacent falsas esse) sed etiam ab illis ad ipsum Christum provocet; quod est confiteri, & illas doctrinæ suæ esse contrarias;

rias ; & rursum easdem, Christi sententiam, aut verbum Dei, non esse ; & proinde , saltem eâ ex parte, scripturâ sacrâ non esse infallibilem ; neque adeo pro certâ credendorum regulâ haberi posse.

Quod ut liquidius perspiciatur ; attendantur illæ Lutheri voces, postea rursum non multùm ab simili occasione referendæ ; quippe quas dignissimas censeam, quæ repetantur , ut profundius ab ejus sectariis , & doctrinæ eius adoratoribus , ponderentur. Audiatur ergo sic expressè proloquens in Commentario fuliore, in Epistolæ ad Galatas cap. 3. *Potius honorem habere & credere velim uni Christo , quàm permoveri omnibus locis , quæ contra fidei doctrinam , pro iustitiâ operum statuendâ , producere possent. Quare simpliciter eis ( Catholicis nempe ) respondendum est : Hic, Christus ; illic , scripturæ testimonia de lege & operibus. Christus autem , dominus est scripturæ & omnium operum. Et innox: Nihil moror scripturæ locos , si etiam sexcentos producas pro iustitiâ operum , contra fidei iustitiam , & clamites scripturam pugnare. Ego autorem & dominum scripturæ habeo , à parte cuius volo potius stare , quàm tibi credere. Tandemque Tu urges servum , hoc est , scripturam , & eam non totam, neque potiore e'us partem ; sed tantùm aliquot locos de operibus. Hunc servum relinquo tibi: ego urgeo Dominum, qui rex est scripturæ. Ita ille novus Germaniæ Apostolus.*

In quibus, profectò , cæcum esse necesse est, qui non animadvertat : Christum eâ in parte, & scripturam ; Dominum ac servum ; doctrinam  
fidei,

fidei, & testimonia scripturarum: ex aduerso inter se opponi ac disparari. Quòd apertè evincunt illæ particulæ: *Potius velim credere uni Christo, quàm &c.* Item: *à cuius parte. volo potius stare &c.*

Ex quibus proinde liquidò apparet, iuxta Lutherum: scripturas, quæ à nobis allegantur pro iustitiâ operum non esse verbum sive doctrinam Christi, aut testificationem Dei; atque aded esse falsitati obnoxias, immò & falsas; cum opponantur doctrinæ Christi & fidei. Et consequenter, ipsum Evangelium v. g. in quo ea falsitas reperitur, non posse à Luthero, aut ejus sectariis haberi pro regulâ credendorum infallibili. Quod erat probandum: velimque à sectariis paulò attentius considerari.

Eodem facit quod de Æcolampadio, suo aliquando discipulo, in *Defensione verborum cœnæ* scribit Lutherus: *Sic enim (inquiens) habet sua Hypothesis: Ego Æcolampadius, dico quod scriptura in hac re sibi adversetur.*

Adde & Bucerum (teste Sanderò l. 2. de Schismate Anglicano,) Duci Northambriæ, aliquando professum esse: *Sibi non omnia quæ in novo Testamento de Christo scripta sunt, certa & indubitata videri: quamvis id hætenus expressè dicere noluerit.*

Et non obstupescis, Christiane lector, ad tam sacrilegam, eorum præsertim, qui se divini verbi unicos sectatoresque defensoresque gloriantur, adversus Testamenti novi sacrum volumen, irreverentiâ?

At

At verò Hulricum Zuinglium, apud Bre-  
leium audio; Tomo 3. contra Catabaptistas, de  
Pauli Epistolis, ista inverecundè atque inscitè  
effurientem: *Ignorantia vestra est, quod putetis,*  
*cùm hac Paulus scriberet, Evangelistarum &*  
*Apostolorum Epistolæ, iam in manibus Aposto-*  
*lorum atque auctoritate fuisse: quasi verò Paulus*  
*Epistolis suis, iam tum cùm illas scriberet, tribue-*  
*rit, ut quidquid in eis contineretur, sacrosan-*  
*ctum esset: quod esset Apostolis imputare immode-*  
*ratam arrogantiam.* Sic ille.

Quasi verò Paulus non manifestè profiteretur  
se, Evangelium quod prædicaret, accepisse Gal 1.  
ex revelatione Iesu Christi, sermonemque suum Cor. 2. & 7.  
ex Dei spiritu procedere: tandèmq; etiam,  
quæ scribendo traderet, eundem spiritum au-  
torem habere.

Sed nimirum audax & inconsulta hominum  
natio, quæ Dei spiritum, suæ qualibet sectæ  
arrogat; eundem denegat veris atque indubi-  
tatis ipsius Christi Apostolis. Illudque insuper  
usurpare præsumit (Augustini phrasi) *de aboli-*  
*cum privilegium*: ut divitas scripturas, cùm e  
suæ ita expedit, vehementer extollat; cùm au-  
tem usus aliud postulat, contemptu sacrilego  
deprimat; easque ipsius Zuinglij verbo, non  
veritati, sed tempori servire faciat.

Audiat denique etiam robustius impuden-  
tiusque delirans, Franciscus Iunius primùm ex  
Catholico Atheus (ut ipse fateatur) tum ex  
Atheo Calvinista: qui in locis communibus  
pag. 61. & 62. (teste Adamo Conzea, in ingres-  
su operis, inscripti *Iubilum Iubilorum*) ita  
disertè

accusaret ; ipsúmque adeò legis Decalogum , non modò non ligare Christianos , sed eum insuper omnium hæresum fontem esse diceret ; atque ad extremum nullam legem Christianis positam ; proindeque legem Evangelicam , nullam esse , contenderet.

Quæ omnia adeò à Christiano sensu abhorrentia , atque ad Epicuræismum , omnémque vitæ licentiam palam deducunt , nequis falsò obtendi , eique auctori injustè imponi existimet : erunt à nobis hoc capite , & consequentibus , ipsius Lutheri & assèclarum verbis expressis , distinctè , sigillatimque comprobanda.

Atque , ut id modò , quod isto capite nobis propositum est , exequar : illum audire licet , de lege Moyse , ipsóque Moyse , sic disertè loquentem : In Colloquiis mensalibus Germanicis , capite *De lege & Evangelio : Moysen cum sua lege nolo ego habere. Est enim Christi Domini hostis. Et rursus : Suspectus tibi sit Moyses , tanquam pessimus hæreticus , pejor ipso Papa & diabolo , quia cum lege suâ , nihil aliud agit , quàm terrere , urquere , & occidere.*

Tandem Tomo 3. Vvittembergensi , in P<sup>al</sup>um 45. doctrinam Moyse doctrinæ profanorum sapientum haud obscurè æquiparans : *Colligite* , inquit , *omnes sapientias Moysis , Gentium , Philosophorum , & invenietis coram Deo , esse vel idololatricam , vel sapientiam hypocriticam , vel , si est politica , sapientiam iræ. Faceat igitur Moyses , &c.* Atque hæc , de lege veteri & Moyse , satis apertè.

Quod autem ad Decalogum attinet : Sermo-  
ne

molliendæ causâ , id se ita sentire , verbo negare. Qua præsertim arte uti Calvinum , observavimus supra , & deinceps observaturi sumus.

Cæterum, quæ hic protulimus, istius Pseudo-Apostoli effata , adeò absurda & impia sunt, ut per se corruant, neque operosâ indigeant refutatione. Quando & quæ contra legis veteris præcepta dicuntur , non tam Moysen, eius, promulgatorem, condemnant, quàm ipsum Deum , primum eius autorem, accusant.

Et manifestum est, ipsum Christum in Evangelio Moysen , non ut hostem , sed ut adventus sui prænuntium laudasse; eundemque in Transfiguratione suâ , in familiarem gloriæ suæ testem adhibuisse. Itémque Decalogum legis, quoad præcepta non cærimonialia, sæpius confirmasse ; ut ampliùs apparebit ex dicendis.

Atamen illud hîc præmittimus, quòd verticosum hominis ingenium , & licentiosam quidlibet pro libitu novandi audaciam , manifestiùs demonstret. Eum ipsum Lutherum , quem hoc capite vidimus , adeò furenter in legem Mosaicam declamantem ; ut ejus. ( quod expressit ali- *Tomo 3. Latino Vult.* ) nullum ejus ad nos , sive punctulum , sive apiculum vellet pertinere : eum ipsum, inquam, quædam ejus legis sibi placita capita , tametsi cum Christi Evangelio directè pugnancia , in usus Christianos inducere tentasse , & reipsa quoad ipsi licuit , induxisse.

Quam indignitatem subsequens ostender , ac prorsus convellet dissertatio.





## CAPVT XXV.

*Ostenditur, quemadmodum Lutherus & quidam alij, polygamiam, & libellum repudiij, inter Christianos licita esse, adversus Evangelium, docuerunt.*

**I**Sta hoc loco discutienda proponimus, quò vel hinc quoque appareat, quàm parum deferant Evangelio, qui se præ cæteris Evangelij puritatem sectari gloriantur.

In primis igitur, quod ad polygamiam, sive ad plures uxores simul habendas, attinet; eam satis apertè in novâ legè prohibitam non esse, tradit Lutherus; in propositionibus de Bigamia Episcoporum; his verbis: *Polygamia non magis nunc abrogata est, quàm reliquum legis Moïsis; sed indifferens, utpote, nec præcepta, nec prohibita.* Hæc ibi. In quibus illum observes, ita loqui, quasi lex Moïsis non esset abrogata; quòd id ei loco magis serviret, cùm ex supradictis sese ejus legis juratum hostem toties professus sit.

*Summula  
casuum cap.  
de Matrim.*

Idem etiam pluribus tradit Tomo 4. Ienensi in cap. 16. Genesis, anno 1528. cujus verba ex Germanico ita effert Gretserus noster: *Abraham habuit duas uxores; & etiam alij viri sancti longè plures. Certum autem est, omnia illa externa opera, qua in Veteri Testamento antiqui Patres gesserunt, libera esse debere, non interdicta. Prohibitum*

*bitum non est , ut vir habeat plures uxores. Itaque hoc verare non possum , sed suadere nolim. Quas postremas voces ab eo per artificiosam dissimulantiam adjectas esse , ex eo colligas quod , ut refert Gretserus supra, ipsemet Lutherus cuiusdam Principi concesserit duas uxores ; ita tamen, ut prior duntaxat, hæredes & successores in principatu gigneret ; idque patere ex libro Lutheri contra Henricum ducem Brunzuvicensem , tomo 4. Germanico Ienensi.*

*Porro Magistri sui sensibus obsequens Melanchthon , in Conciliis Theologicis ; Henrico VIII. Angliæ Regi , divortium cum uxore sua priore meditati , non dubitavit ita scribere. Si vult Rex successioni prospicere , quanto satius est id facere , sine infamia prioris conjugij. Ac potest id fieri , sine ullo periculo conscientie cujusquam , aut fame , per polygamiam. Quia polygamia non est res omninò inusitata. Habuerunt multas uxores Abraham , David , & alij sancti viri. Unde apparet Polygamiam non esse contra jus divinum. Sic illi , præclari scilicet , Ecclesiæ Christi Reformatores.*

Idem tamen error , præcipuo titulo , Bernardino Ochino tribuitur ; propterea quòd librum de licità uxorum multitudine scripserit.

Verumtamen certissimum esse debet inter Christianos illicitam esse polygamiam : ipso Christo videlicet , Matthæi 19. v. 5. pro lege nova, matrimonij condiciones ad primævam ejus institutionem revocante : secundum quam, ut ex Gen. c.2. sumitur, debuit tantum esse unius cum una. Quod, etiam efficacius probatur, ex eo quod

apud Matthæum v. g. constituit Christus ; eum qui dimiserit uxorem suam, permanente scilicet vinculo conjugali , mœchari si aliam duxerit. Vnde sic argumentatur Innocentius III. cap. *Gaudemus* de Divortiis ? *Quod si uxore dimissa alia duci de iure nō potest, fortius & ipsā retentiā.*

Et hanc fuisse intentionem Christi , confirmat ab ipso initio ad hæc usque tempora, continuata Ecclesiæ traditio ; ut proinde veluti ad rem in Ecclesiā inauditam , adversus Lutherum insurrexerint, non tantum Catholici doctores, sed etiam sectarii ; ut è Lutheranis Kempitius, è Calvinistis Beza , scribens contra Ochinum,

Iam autem , quod ad divortij libellum attinet : eo casu , quo alter conjugum , ab altero per proterviam v.g. vel quacunque ex causa, discedat, vel ei cohabitare nolit, licere alteri coniugi, aliud matrimonium inire ; expressè tradit idè Lutherus Tomo 5. Vvitemb. sermone de *Matrimonio* ; Apostolo ad id , ex inscitia, an malignitate ? contra verba eius, & mentem allegato.

*Neque enim*, inquit , Lutherus , *os Paulo obstruere possumus &c. verba eius aperta sunt, quod frater vel soror à matrimonij iugo liberatur, si alteruter ab altero discedat , vel cohabitare nolit.* Sic ille.

1. *Cer. 7.*

Atqui ( observa Lector ) verba quidem Pauli aperta sunt ; sed si adjungatur particula ista, malā, ut apparet, fide omiſsa : *Quod si infidelis discedit, discedat.* Apertum enim est ex ipso textu, ibi agi de casu, quo infidelis discedit à fidei converso.

Alioqui enim , si matrimonium inter fideles contractum

contractum sit , non posse per discessus alterius conjugis , ipsum matrimonium reipsa dissolvi ; antè significarat Apostolus ibidem , v. 11. dicens : *His autem qui matrimonio juncti sunt ; precipio non ego , sed Dominus : uxorem à viro non discedere ; sed si discesserit , manere innuptam , aut viro suo reconciliari : & vir uxorem non dimittat.*

Et sanè , quod suprà insinuabamus ; excepto casu fornicationis ( quem non urgemus in præsentia ) virum uxorem , quacunque aliâ ex causâ dimittentem , non posse aliam ducere , aded expressâ est Salvatoris sententia ; ut qui contra fenserit , nullâ tergiversatione excusari possit. Atqui , ex ipso Domini sensu ( ut Paulus testatur ) eadem est ratio uxoris relinquentis virum , quam propterea ( nisi reconcilietur ) necesse sit manere innuptam ; eo quod hoc casu matrimonij vinculum non solvatur.

Ergo inexcusabilis est ipse Lutherus ; quia contraria Christo docuerit. Et tamen ille , velut Propheta habetur à suis adoratoribus , & verba ejus tanquam oracula de cælo.

Verùm hoc in genere , omnem admirationem , quin & fidem superare videtur ( nisi quod ipsa verba & loca habentur præ manibus ) Martini Bucerî prorsus insolens audaciâ. Quippe qui non contentus , ex ipso Lutheri spiritu , ad quem à Catholicis primùm defecerat ; tametsi ab eo ad Zuinglianos , ab his rursus ad ipsum Lutherum , ab hoc iterum ad Zuinglianos ( cum non inveniret , ubi pedem solidè figeret ) desultoriâ fœdâque levitate transfugerit : non

contentus , inquam , cum Luthero edicere ; libellum repudij , eo ferè modo , quo Iudæis olim , propter duritiam cordis eorum , extra ordinem , permissus erat , etiam in lege novâ licitum esse. Contrà quàm , Christi expressa verba Matthæi 19. ipsi qui aderant intellexere discipuli. Ulterius eò audaciæ insolentiæque prolapsus est , ut errorem suum ex ipsis Evangelij locis , quibus oppositum decernebatur , deduceret , atque ipsis adeò Salvatoris verbis , adversus apertam ejus mentem , impiè pugnaret. Ita enim illum scribentem videas , in ipsum Matthæi caput 19. *Quemadmodum & hodie par est cordis duritia ; sic etiam hodie uxoribus laborantibus non minus succurrendum est , quam olim. Neque enim nunc ( ut insulse addit. ) Magistratus minorem auctoritatem habet , quàm Moyses :quare & illam exercere debet.*

Confirmat ibidem assertum suum , præclarâ istâ ratione. *Quia non est credendum ( inquit ) Christum Dominum , quidquam eorum prohibere velle , quæ Pater eius mandaverat : mandavit autem duris corde , ut si uxores suas aqutate maritali irascere nollent , procurarent licentiam , aliam ducendi.*

Quasi verò , aut in lege veteri , Dei filius , semper existens apud Patrem , non simul mandavit , aut permiserit , quod pro illo tempore , mandabat aut permittebat Pater : aut in lege novâ Pater in Filio manens , non simul cum illo abrogaret permissionem illam.

Sic autem extendit eam permissionem , etiam pro lege nova , Bucerus : ut generatim velit ,

matri m o

matrimonium solvi posse , & aliud iniri , quoties uxor non se commodam viro , aut vir uxori non se commodum præbet ; quacunque videlicet de causa , conjuges sibi displiceant. Neque hîc omittenda videtur ratio illa , in libro de Regno Christi , generalibus verbis ab eodem autore prolata. *Hoc enim cùm in lege veteri præceptum fuerit , ad Christianos etiam pertinet.* Ex quo principio , quæ absurda sequantur , quivis facillè videre potest.

At hîc me tenere non possum , quin aliis tantisper omissis , ex te quæram , Lector ingenue ; an eos qui , Christo , locis expressis in Evangelio , matrimonij conditiones ad primævam suam institutionem revocante , & libellum repudij Judæis permissum , in lege novâ abrogante ; ausint tamen illius usum adhuc licitum , ore protervo defendere ; pro Christianis habendos putes ?

Non putavit sanè præclarus Doctor Ambrosius ; qui ad illa Lucæ 16. *Omnis qui dimittit uxorem suam , & aliam ducit , mæchatur* , illud ipsum opponens : *Quomodo Moyses mandavit dare libellum repudij , & dimittere ? Qui hoc dicit ( respondet ) Judæus est : qui hoc dicit , Christianus non est. Et ideò qui hoc objicit quod objectum est Domino , respondeat ei Dominus : Ad duritiam ( inquit ) cordis vestri Moyses permisit , &c.* Hæc Ambrosius.

Neque hîc mirentur Lutheri asseclæ , si eâ in caudâ de Luthero , eique adhærentibus , severius duriusque loquamur : quando in eam rem advocare possumus , ex A catholicis ( qualis

*Tract. 2. 1. 2*  
*sect. 10. §. 5.*


tunc erat ) Georgius Vvicelium , in methodo concordia Ecclesiastica apud Brerleium , haud mollius profectò pronuntiantem. *Reducat* , inquit , *ad calculum Lutheri factio* , & *retrahet* , *qua porienta* , & *quàm non pudicè admodùm scripta* , *ediderit* , *de conjugio* , *de divortio* , *de sterando post divortia matrimonio* , *de gradibus* , *de polygynaziâ* , &c.

Nimirum hæc denique ( si attendimus ) ad extremum recidit , speciosa illa , & simpliciorum oculis illudens , quam novitatibus suis prætexunt , plenisque buccis crepare solent Neo-Evangeliçi nostri , *Ecclesia Dei Reformatio*. Ut videlicet , ex unâ parte , pulchro Evangelicæ ( quam appellant ) libertatis obtentu , fidelibus ab omni lege , non humanâ tantùm , sed etiam divinâ , ipsius quoque Decalogi ( quem iste novus Evangelista , omnis hæresis fontem appellat ) exemptis atque absolutis ; ex alterâ autem , si quid in Veteri Testamento , istius gentis infirmitati , aut duritiæ cordis , pro tempore indultum aut concessum sit , uti nominatim de causis matrimonij vidimus , eo , inquam , omni laxamento , in lege nova reservato , & ad Christianos usus ac mores traducto ; inauditâ hætenus mixturâ , confletur quintum Evangelium , ipsi Christo Domino , ejusque puro veròque Evangelio , contrarium ; atque aliundè omnis licentiæ ac nequitiae irritamentum.

Ad extremum , caput hoc clausurus , Lectorem meum admoneo , censuram à nobis prolatam ; Lutherum præsertim , ejusque sectarios respicere. Non quòd , seu Calvinus , seu Calvinistæ ,



nistæ , Lutheranâ istâ fuligine , et am notabiliter aspersi non sint : in quantum & ipsi , non tantum in causâ fornicationis ( quo casu id permittunt etiam Græci Schismatici ) sed & aliis quibusdam casibus divortium concedunt, etiam soluto ipso vinculo matrimonij : quam in rem testantur nonnulli , inter Canones generales Genevenses anno 1560. extare statutum hujusmodi : ut si maritus absens esset , uxor illum voce præconis vocaret ; qui si infra præscriptum tempus non appareret , Minister licentiam concederet uxori alium ducendi. Attamen neque tam laxè eam licentiam extendunt , & à permittenda polygamia prorsus abhorrent , & in quibusdam aliis ejus generis non eousque exorbitant , atque ille nostrorum Reformatorum Protopatriarcha , olim Dei castus , post spurcus Veneris Sacerdos : usque eò nempe eâ in materia delirans ; ut etiam constante matrimonio , ubi propriæ uxoris deest copia , licentiam condonet , ad aliam fœminam quæ ad manum sit, sine scrupulo accedendi. Iuxta quod circumferri solet , in sermone *de Matrimonio*, ab ipso expressum, dignum tali Apostolo acroama : *Si non vult uxor , aut non possit , veniat ancilla.*



## CAPUT XXVI.

*De attentatâ , à pratensis nostris Evangelicis ,  
supremâ , atque omnimodâ legis Evangelica  
abrogatione.*

**P**ostremum istud est , eorum quæ adversus Lutherum ejusque asseclas antea demonstranda susceperam , eos videlicet , cum insigni Christi , ejusque testamenti , injuriâ aperte contendere ; nullâ lege teneri Christianos , nullamque adeo legem Evangelicam esse.

Quæ res , uti magni , ad ipsa sectarum fundamenta convellenda , momenti ; erit nobis deinceps exactius diligentiusque pertractanda. Ad quod ; ante omnia , facturus videor operæpretium ; si , Lectori meo , considerandum propono , quàm flexuosâ viâ Lutherus , ad id efficiendum consequendumque , grassatus sit.

Principiò etenim ; rem velut obliquè clandestinèque pertentans ; admonere institit sequaces suos , ne inter legendum Evangelium , ad præcepta legis attenderent , sed ea veluti pro non scriptis , aut nihil ad se pertinentibus , haberent. Cujus rei fidem faciunt ea , quæ libro de actis , scriptisque Lutheri tradit Cochläus , ad annum 1522. id est , sub initia apostasiæ ejus. *Iubebat , inquit , cavere Lectorem , ne ex Evangelio , legis & doctrina librum faceret. Evangelium non requirere opera , aut præcepta præscribere ,*  
*sed*

*sed solum fidem in Christum , & dulciter consolari credentem. Extantque hanc in rem expressa ipsius Lutheri verba libro de votis monasticis ; ubi ait Catholicos ignorare quid sit Evangelium ; dum precepta & consilia ex ipso faciunt , quod est mere promissiones Dei , exhibita beneficia hominibus annuntiantis.*

Quâ in viâ jam olim sibi præcuntes habuit Anomæos pessimos hæreticos ; de quibus sic scribit Sanctus Epiphanius , hæresi 76. *Cum occurrens aliquis præceptorum mentionem injicit , ex illius autoritate dicti , subjiciunt, nihil aliud à nobis flagitare , quàm ut cognoscamus ipsum : quemadmodum Christus declaravit his verbis : da ipsis, Pater, habere in seipsis vitam. Hæc est autem vita , ut cognoscant te solum Deum verum , & quem misisti Iesum Christum.*

Addebantque : si quis fidem habeat ( quod similiter docuit Lutherus ) parum referre , quid deinde committat facinoris: neque enim peccata imputari credenti.

Atque eâ in re constituēbat Lutherus , totam vitæ Christianæ sapientiam ; provt deinceps his verbis expressit , in argumento Epistolæ ad Galatas: *summa ars & sapientia Christiana est, nescire legem , ignorare opera , & totam justitiam activam. Et in caput 2. eiusdem Epistolæ: sola fides Christi necessaria est , ut iusti simus; cetera omnia liberrima sunt, neque precepta, neque prohibita.*

In quâ doctrinâ in-primis , mihi quidem videretur involui quidam Labyrinthus Inextricabilis.

bilis. Siquidem cum ait: *Evangelium, non esse librum legis, nec praecepta praescribere*: Vel intelligit in Evangelio nulla reipsa Christi praecepta contineri, vel siqua talia continentur; non obligare Christianos. Prius, tam aperte falsum est: ut vix aperiri, & vel leviter libri, possit Evangelij liber, quin continuo occurrant Salvatoris voces, ei qui salvus esse velit, mandatorum legis observantiam praescribentis; & ipsam etiam decalogi legem, quatenus non caeremonialis, sed naturalis aut moralis est, in novo Testamento confirmantis; & (ut alia omittam) cum Apostolos suos ad praedicandum Gentibus Evangelium suum mitteret, disertissime, ut eos docerent servare omnia quaecunque mandasset illis, admonentis atque praecipientis.

*Matth. 19. v. 18. Luca 18. v. 18 & alibi Matth. 28.*

*L. de pudicitia c. 6.*

Iam autem, quod erat posterius; agnoscere dari in Evangelio aliqua praecepta Christi, & iis non ligari Christianos; esset hominis ignorantis vocem suam; & contumaciam adversus divina mandata, insane impietate approbantis.

Est igitur Evangelium Christi, non tantum codex dogmatum fidei, sed etiam liber novae legis, & doctrinae morum, agnoscendus.

Sed neque jam dictis minus implexa aut involuta sunt, quae locis citatis in Epistolam ad Galatas, superaddit idem ille (suo iudicio) *Doctor Doctorum, & ipso Augustino Ambrosioque maior*; ad hunc modum proloquens: *Quando sic docetur fides, justificat quidem; sed simul oportet servare mandata Dei; quia scriptum sit, si vis ad vitam ingredi, serva mandata: ibi statim Christus negatus est; & fides abolita: quia mandatis tribuitur, quod*

*quod est solius Dei.* Sic ille.

In quibus in primis , istud occurrit mirabile: illum negare Christum , qui ex apertissimo ipsius Christi pronuntiato, mandatorum Dei observantiam , profitetur esse necessariam ad salutem : cui è diverso in hoc contradicit, eumque abnegat ipse Lutherus.

Deinde cui homini sano , ex ipsis terminis frivola & vanà non appareat , adjuncta ratio? cùm ex eà , in eadem formâ , perinde possit effici ; neque ipsi fidei attribui posse iustificacionem & salutem ; quia etiam tum , attribuitur fidei , quod est solius Dei. Neque enim fides magis Deus est , quàm ipsa mandata , aut eorum observatio, sed sicuti ex hoc , quòd Deus dicendus est causa principalis justitiæ nostræ atque salutis , non sequitur , fidem non posse ad illam inferiori modo concurrere ; sive ea dicatur habere se , ut dispositio , ut conditio, seu quocunque alio appelletur nomine , ita nihil obstabit , quo minus eadem ratione , legis observatio , nostræ justitiæ , sive salutis , dicatur servire posse atque debere.

Hæc igitur via cùm ad fines suos Luthero minus succederet; aliâ sectari instituit, à nobis antea memoratam: ut nimirum locis novi Testamenti quàm plurimis, quibus operû necessitatem aperte adstrui sentiret, nonnullos infirmos atq; enerves in contrariam opponeret & anteferreret. Ex veteri & istud hæreticorum more , videlicet : de quibus sic pulchrè Tertullianus : *Esse solenne perversis & hæreticis , alicuius capituli ancipitis occasione , adversus exercitum sententiarum totius testamenti armari.* Quod

Quod si uspiam , profectò vel maximè in nostro argumento , verum est. Hic enim , si usquam pro nobis pugnat exercitus sententiarum totius testamenti, adversus quem unius capituli ancipitis obtentu armatur Lutherus : & ejus equidem , quod ut sibi favere cogeret , malignâ fuit unius voculæ adjectione falsandum.

Et nonne adversus ejusmodi tanquam scripturarum exercitum sese proficitur audacter insurgere:quando loco supra memorato in hunc modum loquitur? *Nihil moror scriptura locos , si etiam sexcentos producas pro iustitia operum contra fidei iustitiam, & clamites scripturam pugnare.* ubi tamen iis velut diffusus scripturæ locis, quæ adversus illos sexcentos opponeret, iis prætermisissis, ad cæcum illud refugit Christi privatim pro se stantis subsidium:in hoc rursus usurpans vetustorum artes hæreticorum, de quibus iterum audire liceat Tertullianum, adversus Valentinianos cap.4.sic proloquentem? *si aliquid novi adstruxerint , revelationem statim appellant presumptionem.* Id est si quid ex proprii sensus præsumptione adinvenerint , quod scripturis sentiant non posse defendi, ad id sibi privata revelatione compertum temerè atque inscitè pronuntiant.Quem quidem Lutheri in re proposita dolosum sed inscitum conatum; satis apertè supra deteximus , nec inefficaciter infirmavimus ac repulimus.

Tandem cùm neque sic sententiâ suam apud intelligentes approbare se posse consideret, desperaretque aliud effugium opportunius invenire,

ut

ut Scripturæ locos sibi apertè contrarios, uno quasi spiritu elideret, eluderetve, non est veritus (obstupefce ad hanc hominis blasphemiam stoliditatem, si quis tibi sensus pietatis est reliquus, lector reformatæ) discipulis suis præclaram hanc regulam tradere, Tomo 3. Latino Vvitemb. folio 171. *Hæc tibi norma & regula erit. Breve esto, quam in Scripturis sacris intelligendis sequar. Vbi-  
que jubet Scriptura, bona opera facere. c. 10. p. 1. re; tu sic intellige, quod Scriptura prohibeat, bona opera facere: Sic ille.*

Potuitne verò (insanum caput, & quod ille ait, *tribus Anticyris insanabile.*) Potuitne quidquam à te proferri, sive ad tui cerebelli intemperiem orbi manifestandam opportunius; sive ad ipsius verbi divini auctoritatem elidendam, ipsūque impiorum ludibrio exponendum, efficacius; sive, in Christum, ipsius autorem, supremamque Dei sapientiam, contumeliosius denique, quod, præ cœcitate minùs attendis, ad prætextu à vobis Reformationis sectam, in invidiam, odiūque vocandam, quin immò etiam ab ipsis fundamentis subruendam, accommodatius; quàm tua illa generalis regula, & bella scilicet scripturas divinas, non jam exponendi, sed enervandi, confundendi, proculcandique; ac proinde, non ex spiritu Dei, sed ab illis tuis, quorum antea meminimus, arcanis magistris suggesta, atque è tenebris in hanc lucem producta ratio?

Quid enim; amabo, certum jam erit in divinis litteris; si, uti Luthero, ita cuivis cuiusvis alterius sectæ professori, licitum sit ex simili

mili



mili regulâ , quidquid in scripturis sibi repugnansprehenderit , in sensum non tantumimproprium aut figuratum , sed etiam contradi-  
 ctoriè , uti loquimur , oppositum flectere ? Si  
 Azio verba illa sancti Evangelij : *Ego & Pater  
 unum sumus* : Nestorio , illa : *Verbum caro fa-  
 ctum est* ; Zuinglio , ista : *Hoc est corpus meum* ;  
 Perindè liceat negatione subintellectâ interpre-  
 tari ; hoc est , legitimum eorum sensum , in  
 oppositum falsumque pervertere ? Quid si quo-  
 que adversus Lutherum parem licentiam usur-  
 pantibus : ubi is contra nos pro suis dogmatis  
 locum aliquem ex Evangelio proferre accepe-  
 rit , contendamus illum , non in sensu quem  
 præfert , sed in opposito intelligendum : quan-  
 tum hinc existet doctrinæ chaos , quanta uni-  
 versæ fidei nostræ perturbatio ?

Quid verò si Lutheri servus ( ut exemplo isto  
 familiari rei indignitatem magis demonstrem )  
 ipso quidpiam planis verbis præcipiente ; ut eo  
 mandato sese eximat , sibi persuadeat , herilia  
 verba non in sensu obvio atque proprio , sed in  
 alieno aut opposito , reipsa esse accipienda : an  
 non is meritò vapulet multis ; Et tu , propu-  
 dium , qui te præ cæteris , Evangelij Christi,  
 cultorem eximium , ejusque ad litteram obser-  
 vantissimum vendites , ipsius Salvatoris verbis  
 atque præceptis , non eam saltem venerationem  
 servitutémve à te justè deberi sentias , quam  
 mandatis tuis ab homine tibi non absimili ; non  
 immeritò præstari postules ; sed , ut te , fatuo  
 Evangelicæ libertatis obtentu , à Dei , ac Do-  
 mini tui justissimis legibus præstes immu-  
 nem ,

nem , in istas devolveris insanias ?

Neque animadvertis , non potuisse te , apud cordatum quemvis , graviores securim quinto tuo Evangelio infligere ; quàm si intelligatur , primariam illius basim ac fundamentum , articulum , inquam , de justitiâ solius fidei , nisi sic sustineri non posse ; sive , absque tanto Evangelij Christi dehonestamento , immò & fidei Christianæ subversione , non posse subsistere.

Equidem si ita faciamus : Hieroclem aliquem , aut Porphyrium , aut Iulianum Augustum , aut alium quemvis Christiani nominis juratum hostem , ejusmodi voces , quales ex Luthero jam audivimus , ex ore cujusquam , qui se Christianæ fidei Doctorem profiteretur , excipere : an non exultaret , illicò ad istud velut auribus suis jucundissimum actioama ; exinde nobis , ipsique Christo insultaturus , neque immeritò derisurus Scripturas nostras : quæ quidem à nobis haberentur pro divinis oraculis , atque aded certæ & infallibilis autoritatis ; sed ita tamen si plerisque locis , & passim obviis , non accipiantur in sensu , quem ipsa per se ingerunt cuilibet prudenter intelligenti ( in quo ipsæ Scripturæ jam falsæ sint , & perabsurdæ ) sed in sensu prorsus contrario , & qui nulli prudenti possit in mentem aut suspensionem venire ? Ex quo utique fiat ; ut Scripturæ nostræ , non sint ( quod nos dicimus ) divinæ veritatis promptuarium , sed è contra , cujusvis , & quantumvis absurdæ , armamentarium falsitatis.

Ad quam infidelium , eâ in hypothesi , justam equidem & ipsâ fallorum Christianorum confessione

N

fessione

fessione armatam obrectationem , approbationemve eludendam non video quid quisquam Lutheri assecla sive patronus, vel in speciem, possit obtendere.

Accedit : non tantum , per sese fatuam , absurdam , & à sensu cujusvis hominis abhorrentem , esse istam Lutheri præsumptionem; sed insuper ex eâ consequens esse ; ut ipse contextus Evangelij, iisdem in locis , prorsus perturbatus, ineptus , & incongruens sit; neque vel in quovis, qui ratione utatur, ferenda , Salvatoris oratio. Cujus rei placet , pauca de innumeris exempla proponere.

Matthæi 5. v.16. discipulis suis ait Salvator: *sic luceat lux vestra coram hominibus ; ut videant opera vestra bona , & glorificent Patrem vestrum qui in cœlis est.* Quo utique loco, si juxta Lutheri glossema , censeatur Salvator præcipere suis , ut à bonis operibus in hominum conspectu exercendis abstineant: quomodo subsister ei præcepto subjuncta ratio, ut *videntes opera vestra bona glorificent Patrē vestrum &c.* Neq; tamen dicat quis : etiam rationem illam in sensu contrario accipiendam: quia sic perabsurdè censebitur Christus prohibere , ne id agant fideles, unde glorificetur Pater.

Ibidem à versu 3. Beatos pronuntiat Christus, qui varia virtutum opera , & speciatim v. g. qui misericordiam erga alios exercuerint. Si Lutherum audimus , censendus erit iis verbis Christus , vel miseros dicere misericordes ; vel immisericordes , beatos : quo casu , prorsus incongruens invenietur subjecta ratio : *quoniam*  
*ipse*

*ipsi misericordiam consequentur* : supple , quem-  
admodum eam , ipsi erga alios exhibuerint.

Sed multò amplior & generalior erit in textu  
eiusdem capituli perturbatio : si Christo dicente  
v. 20. *Nisi abundaverit iustitia vestra plusquam  
scribarum & Pharisaorum , non intrabitis in reg-  
num cælorum* : quisquam cum Luthero , id eam  
in partem acceperit : quasi prohibeat reipsa  
Salvator , ne iustitia nostra, ( id est , ut clarum  
est ex exemplis à Christo subiectis , ipsa divi-  
næ legis observatio ) in nobis exactior aut per-  
fectior sit , quàm vel exigenter ab aliis : vel sibi  
usurparent , scribæ & Pharisei. Tunc etenim  
prorùs incongruens , & incoibilis , erit multi-  
plex illa, iustitiæ Pharisaicæ, & eius quam Chri-  
stus à suis requirit , collatio, sive oppositio : ve-  
luti patebit textum attentè consideranti , aut  
ipsa Salvatoris verba , ad sensum non pror-  
ùs absurdum reducere , ac reconcinnare sata-  
genti.


Sed aliis omissis , etiam clarius efficaciusque  
videri potest , quod subijcio. Salvator noster,  
in extremo post cœnam sermone , in quo, quem-  
admodum postulabat temporis ratio , seriò ac  
solicite multa commonet dilectos discipulos  
suos ; inter alia exemplo suo proposito , horta-  
tur illos ; ut , quomodo ipse Patris sui præcepta  
servavit ; ita ipsi sua præcepta servant : eo pacto  
mansuri in sua dilectione. Ita enim legimus  
Ioannis 15. v. 10. *Si præcepta mea servaveritis,  
manebitis in dilectione mea : sicut & ego Patris  
mei , præcepta servavi ; & maneo in eius dile-  
ctione.* Dicerne hîc Lutheranus aliquis, primam

istius sententiæ partem , accipiendam in sensu contrario? quasi dicat Salvator : *Si præcepta mea non servaveritis , manebitis in mea dilectione*. Atqui nemo homo , nisi prorsus infans , dixerit : dilectum sibi fore , qui sua præcepta non servet : multò minùs ipsa sapientia Dei. Deinde hoc dato : quomodo subsistet comparatio ipsatùm sit prorsus incongruens , dicere : Ne servetis præcepta mea , ut maneatis in meâ dilectione, quemadmodum & ego Patris mei præcepta servavi ; & maneo in eius dilectione. Porro, si postrema hæc pariter accipias in sensu contrario ; jam ex ea parte non quidem incongruens, sed , quæ Dei filium Patris præcepta non servasse pronuntiet ; blasphema erit & impia prorsus oratio.

Ad hunc denique locum & istud observari velim. Prorsus mirabile , & insanæ cujusdam arrogantiae plenum videri : mortales aliquos Christi servitutem professos , Christianæ libertatis obtentu , negare se illis præceptis aut oneribus legis obnoxios : quando ipse Christus Dei Filius ac Dominus noster , non modò paternis præceptis subiectus esse voluerit ; verùm etiam , quò nos ad sui imitationem provocaret, de eorum , quantumvis difficilium exactissima observatione quodammodo gloriari visus sit; Ioannis 14. v. ultimo ita proloquens : *Vt cognoscat mundus , quoniam diligo Patrem , & sicut mandatum dedit mihi Pater , sic facio. Surgite , eamus hinc.*

Alibi itidem exhortans nos , ut si requiem animabus nostris invenire optemus , tollamus

mus iugum suum , seu legis suæ onus , super nos ; iugum equidem amantibus suave , sed tamen iugum ; & onus leve , sed onus tamen.



## CAPUT XXVII.

*Refelluntur Zuinglij & Calvini ad argumentum  
iam propositum responsiones.*

**P**ermolestum est adversariis nostris , argumentum ex verbis Salvatoris in Evangelio toties inculcatis petatum , adversus dogma de justitia solius fidei ; quod superiori capite deduximus , Lutherum impugnantes. Cujus quidem ad illud responsio , aded inopinata , vesana , impia apparet ex suis terminis , ut , si Lutheranus sum , vel unicum istud sufficere possit , ut desertâ tam sacrilegâ sectâ , ad Catholicam me recipiam : eodemque modo , prudentem quemlibet , & de salute sua sollicitum , censeam affectum , atque animo comparatum , esse debere.

Et sentiunt quidem argumenti vim , alij etiam Reformatarum sectarum procures : verum ut Lutherani responsi invidiam declinent , mollioribus vocibus , minúsque apertis , negotium transigunt : quanquam , ut videbimus , perinde vanâ atque futili cavillatione.

Et Zuinglius quidem , contentus vocis perplexitate rem involvere , frigide respondet , præ-

dictas scripturas esse hyperbolicas, & cum eo verbo transilit, dissimulatâ, sive suppressâ, ulteriori rei difficultate. Ipsius hæc verba referuntur, ex Tomo 2. folio 371. *Ista sunt hyperocha & hyperbola: si vis ad vitam ingredi, serva mandata, & quaecunque alia promissa nostris operibus facta sunt.* Sic ille.

At nos non tam facile acquiescentes, quid istis verbis subesse possit, ex Zuinglio quærimus. Nam ex una parte, quid apud Rhetores hyperbole sit, non ignoramus; & scripturam sacram eâ subinde uti, non diffitemur; aliunde autem, quâ in re præsentî locum habeat, videre non possumus. Etenim tunc hyperbole est, cum manifestè veritatem excedit sententia, sed ita tamen ut ipso excessu, seu rigore verborum sublato, aliquid supersit, quod per illam intelligi volumus. Exempli gratiâ, cum Ioannis 12. dicunt Pharisæi; totum mundum post Christum abiisse; hyperbole est; &, si vox *mundus* in rigore sumatur, manifestè falsa est oratio; sed tamen vera est, quia ex usu & intentione loquentium, istic eâ voce, solum significatur, magna hominum multitudo. Et idem apparet in eo quod sæpe dicit scriptura, v. g. fuisse homines, sicut arenam maris innumerabiles. Et ita de aliis.

At quando ea est nativâ vocum simplicitas, ut earum germano rigorosoque sensu sublato, assignari non possit, infra rigorosum aliis quipiam, qui ex intentione proferentis, simpliciter verus sit, tunc non hyperbole, sed mendacium appellabitur. Atque ita contingit in re præsent



præfenti. Iſtæ enim voces; *ſerva mandata*; nul- *Matth. 19.*  
lum exceſſum veritatis ſignificant; quo ſublato  
reſter ſenſus alius, qui verus cenſeri poſſit, ex  
ipſa loquentis intentione.

Igitur dum Zuinglius, in prædictis hyperochen  
agnoscit, aut hyperbolen; tantummodo voce rem  
involvit, revera autem difficultatem integram  
relinquit.

Adde: etiam ubi ſcripturæ voces, ex parte ſua  
pati poſſunt ſenſum hyperbolicum, non conti-  
nuò, neque pro libitu, licere cuique, eum in il-  
lis ſenſum agnoſcere. Alioqui licebit Ariano  
in verbis illis Ioannis 10. *Ego & Pater unum  
ſumus*, hyperbolen agnoſcere, quemadmodum  
in verbis illis Aët. 4. *Multitudinis credentium  
erat cor unum & anima una*. Quibus utique non  
ſignificatur vera unitas cordium, ſed tantum  
conſenſus & concordia voluntatum. Itemque  
Neſtoriano; illud Ioannis 1. *Verbum caro factum  
eſt*; non de ſubſtantiali aut hypostatrica conjun-  
ctione accipere; ſed de aliquâ tantum acciden-  
tali, per inhabitationem, affectum &c. Et ſic ni-  
hil certum habebimus in divina ſcripturâ. Sed  
pro Zuinglio hæc ſatis.

Minus intricatum eſt, ſed intellectu magis fa-  
cile, quod ad verba Chriſti Matth. 19. *Si vis ad  
vitam ingredi*, &c. Prorſus tamen ſtolidè, &  
contrâ quàm ferant circumſtantia loci, respon-  
det Ioannes Calvinus: iſtas nempe voces à Chri-  
ſto pronuntiari per ironiam; deridente ſcili-  
cet adoleſcentem à ſe quærentem viam regni  
cælorum, ex eo quòd ad cum effectum lega-  
libus ſuis operibus fideret; cum non man-

datorum observatio, sed fides sola sit via ad cælum.

Circa quæ in-primis observo : cum Ironia apud Rhetores, definiatur ; allegoria, quæ non solum aliud sensu, aliud verbis ostendit, sed contrarium : Calvinum hac in re, tametsi testius loquentem, re ipsa consentire Luthero, dicenti, verba salvatoris, *serva mandata* &c. Sic intelligenda, ut non jubeat, sed prohibeat, mandata servari. Quod cum, ut supra ostendimus, ex suo genere, & natura rei, perabsurdum & impium sit; consequenter non est in iisdem verbis agnoscenda ironia, nisi ubi eam re ipsa inesse, ex formâ loquendi, aut ipsius contextus circumstantiis, manifestum sit.

Ostendamus igitur ex ipso contextu verborum, non tantum non exigi, aut insinuari ironiam, sed neque hanc posse cum ipsorum dictorum inter se responso, aut orationis coherentiâ consistere.

Primum enim, illa Calvini suspicio : desiderii à Christo adolescentem, quasi nimium confisum suis legalibus operibus : non videtur in textu fundari, sed potius insinuari contrarium. Quippe tam ingenuè ex Christo querentem, quid sibi faciendum esset ad consequendam vitam æternam, apparet potius subdubitalse, ne fortè insuper aliud quidpiam ad eum finem esset sibi necessarium : parato utique promptè exequi, si tale quidpiam ab ipso ei suggere-retur.

Quod etiam vel hinc declarari & confirmari potest: quòd cum ad olescens *hæc omnia*, præcepta

cepta scilicet, sese à juventute suâ observasse diceret, subjungatur apud Marcum c. 10. *Iesus autem intus eum, dilexit eum*; id est, signa aliqua dilectionis exhibuit: qui, si in hoc quicquam nimîa præfidentia peccaret, e contra fuisset coarguendus, admonendusque, ne in præceptorum observatione, sed in solâ fide spem reponeret.

Cuius contrarium, si solerter attendimus, prorsus insinuat illa altera Christi responsio: *Si vis perfectus esse, &c.* Etenim qui, quærenti: *Quid adhuc mihi deest*; scilicet, ut consequar vitam æternam; eo quo dixi, modo respondet; perinde se gerit; ac si diceret: Nihil quidem tibi ad eum finem absolute consequendum deest; sed si vis perfectus esse (non enim jam dicit: *Si vis ad vitam ingredi*) *vade, & vende quæ habes, &c.* Sic enim omnino supplenda videtur Salvatoris oratio.

Adde, has ipsas voces: *vade, vende quæ habes, & da pauperibus, & habebis thesaurum in celo; & veni, sequere me*; non ironice profectò; sed seriò à Christo prolata; non adolescentis tantummodò inde exortam tristitiam; sed, eo dilapso, salvatoris ad discipulos sermonem de eo, quod difficillimum sit, divitem intrare in regnum celorum, atque ad extremum Petri de relictis omnibus, pro Christo exultationem &c. ea ipsa ritè perpendenti, manifestè ostendere.

Et profectò alioqui consequenter dicendum esset: toties iteratam in Evangelio Salvatoris ad sui sequelam, abdicatis omnibus, invitationem, ironice factam; & Apostolos aliosque, qui Christum

Christum eiusmodi illecti promissionibus, hac ratione secuti sint ab eo deceptos illusosque fuisse. Quod, absque blasphemia, & sacri textus tot in locis fatuâ perturbatione; nemo dixerit.

Quod si pars illa verborum Salvatoris: *Vade, vende omnia*; in sensu suo naturali ac proprio omnino videtur intelligenda; etiam quæ antecedunt in eodem sensu accipienda sunt: quia si priora in sensu contrario, & posteriora in proprio intelligerentur, non esset contextus satis coherens, aut sibi congruens ea Salvatoris dissertatio.

Sed neque ista consideratio hoc loco videtur prætermittenda. Quod videlicet, si verba illa generalia: *Serva mandata*: explicanda sint ironicè, & in sensu contrario; perinde atque si potius prohibeatur ipsa mandatorum observatio: etiam mandatorum in specie, ibidem subjuncta enumeratio, similiter accipienda fuerit in sensu ironico & contrario. Ita nempe ut ea mandata, quæ ipsâ formâ locutionis negativa sunt, accipiantur ut affirmativa; perinde ac si præciperetur: Homicidium facies; adulterabis; facies furtum. Et contrà, quæ affirmativa videntur, sic accipiantur, atque si negativè diceretur: noli honorare parentes; noli proximum diligere. Quæ præter deliram temerariamque divinæ legis ita pro libitu interpretandæ, immò pervertendæ licentiam; etiam ex parte materiæ, jus omne naturale subverterent; & omnem dissolverent Evangelicæ legis harmoniam.

Nam

Nam, ut in mandato, quod postremo loco protulit Salvator, exempli gratia insistam: quis, iis exceptis, qui suo privato indulgentes Spiritui, & infano acti quidlibet novandi studio, (quidquid contrà prædicent) at re ipsa tamen, num eorum doctrina vero ac legitimo scripturæ sensui sat consentanea sit, nihil admodum pensi habent; quis, inquam, extra recentiores sectarios non tantum credere, sed vel in dubium revocare audeat, num fortè diligendi proximi mandatum, ab Evangelij & gratiæ lege ablegandum sit, quo nihil frequentius in novo testamento commendat Christus, & Apostoli sui; quod ille confirmans Matthæi 5. adversus perversam Phariseorum interpretationem, extendit expressè ad dilectionem inimicorum; adjectâ illâ ratione: *ut sitis filij Patris vestri; qui solem suum oriri facit &c.* Quæ quidem ratio, ut suprà observabamus in re simili, neutiquam posset consistere, nisi ipsa inimicorum dilectio seriò & in proprio sensu præciperetur; ad quod denique ipse Salvator, eâ verborum inculcatione in sermone post cœnam, iisque temporis circumstantiis, quæ nullam profectò simulacionem paterentur, tanquam ad proprium sibi præceptum exhortans discipulos suos: *Mandatum novum (inquit) do vobis: (observa, lector, verborum energiam) ut diligatis invicem, sicut dilexi vos.* <sup>104.13.</sup> Et mox: *In hoc cognoscent omnes, quia discipuli mei estis, si dilectionem habueritis ad invicem.* Et multo inferius: *Hoc est preceptum meum (meum, inquit, & non Moysis tantum)* <sup>104.15.</sup> *ut diligatis invicem.* Quæ, & his paria, aded clara

clara & expressa sunt , ut si quis putarit ea ad sensum ironicum trahi aut detorqueri posse; nihil futurum sit in universo Evangelio , quod non similiter eludi atque perverri possit.

Quò jam nihil opus sit , eum in finem , aut Ioannis loca in epistola sua prima , quæ tota ferè est de dilectione fraterna , studiosius accumulare : cuius quidem præceptum & vetus & novum appellat , addens eum , qui fratrem non diligit , manere in morte ; aut etiam ad Paulum eâ gratiâ recurrere ; qui , inter cætera , dilectionem proximi ita commendat , ut eam dicat esse plenitudinem legis ; Evangelicæ scilicet , uti paulò pòst demonstrabimus.

Iam autem , ut inde , petitam probationem impleam : si in illo Christi cum adolescente sermone , dilectionis proximi mandatum , non ironicè , sed seriò commendatur à Domino ; manifestum est , ita exigente contextus coherentiâ , cæterorum quoque , quæ uno tenore , eadèmq; sermonis formâ commendantur , observationem seriò ac propriè præcipi ; & consequenter ipsum generale , de servandis mandatis edictum , nullâ veri specie , posse irrisoriè accipi.

Cæterum , quod de Apostolo Paulo insinua-  
bam , placet eum ipsius locum specialiter exponere ; non jam eo nomine tantum , quod dilectionem proximi commendat ; sed eò maximè , quod , ut ego quidem persuasissimum habeo , is , vel solus etiam , atque unicus possit , si rectè & absque præiudicio expendatur illud Novatorum de iustitia solius fidei commentum , peremptoriè conficere ac jugulare ; atque eâ basi Religionis  
reforma



reformatæ convulsâ ipsam Religionem velut ab imo concutere.

Rem, velut apparet, magnam spondeo, sed lite non longâ nec difficili, apud æquos iudices, quantum arbitror, obtinendam.

Verba Apostoli, quæ producimus ex Epistola ad Romanos c. 13. v. 8. ecce sunt ista. *Nemini quidquam debeatis; nisi ut invicem diligatis: qui enim diligit proximum, legem implevit. Nam non adulterabis; non occides &c. & si quod est aliud mandatum, in hoc verbo instauratur: diliges proximum tuum, sicut teipsum.* Ex quo mox infert, quod supra insinuabamus: *Plenisudo ergo legis est dilectio.* Quibus verbis, ut vides, Romanos Christianos hortatur & invitat Apostolus ad debitam dilectionem invicem præstandam; eâ ratione, seu incitamento: *qui enim diligit proximum, legem implevit.* Quæro nunc ex Luthero, Zuinglio, aut si quis est qui eorû partes in proposito sustinere velit: quæro, inquam, ex illis: quam legem putent his verbis ab Apostolo intelligi? Eamne, quæ olim Hebræis data, illos ad sui observantiam obligavit, sed quæ nunc adeò non liget Christianos, ut eius obligatio illis potius perniciosa futura sit? At fatuus sit, eâ in hypothesi, qui nos hac ratione ad aliquid faciendum incitet: non minùs quàm si diceretur, quòd hac ratione, essemus Iudæorum Thalmud, aut Mahumeti Alcoranum impleturi. Agit ergo Paulus de lege aliquâ, etiamnum vigente, & cuius etiam Christianis incumbat obligatio. Quæ ex eius mète, est ipsa lex divini Decalogi; ut patet ex eo, quòd mandatorû ipsius legis, de qua loquitur, exempla proferens; adducat præcepta secundæ tabulæ.



tabulæ Decalogi : *Non adulterabis ; non occideris ; non furaberis*. Eo ferè modo, quo Salvatorem supra vidimus adolescentem illum, Matthæi 19. informantem.

Per quæ manifestè , & prorsus , exploditur, quod isti dicunt , eam esse libertatem Evangelicam , ut nullâ sit apud Christianos lex aut iustitia , nisi fidei ; sed è contra efficitur adhuc Christianos teneri præceptis Decalogi ; nec verò , ut antea blasphemantem audivimus Lutherum , ipsum Decalogum omnis hæresis fontem esse.

Iam verò , ex eadem ipsâ ratione , qua utitur Apostolus dicens , eum qui diligit , legem implessè ; eam videlicet quæ proximum spectat, de qua nominatim & directè istic agit Apostolus : non minùs apertè perimitur illud , quo inter cetera , ijdem utuntur , ad ironicè explicandas Scripturas Novi Testamenti , quæ mandatorum legis observantiam videntur expressè præscribere ; quòd nempe dictitent mandata Dei esse observatu impossibilia. Quam blasphemiam apertè refellunt prædictæ Apostoli voces : quoniam qui legem Decalogi ( quâ parte saltem proximum respicit ) per eum qui diligit, dicit impleri, hoc ipso testatur præcepta illa , esse observatu possibilia ; cum legem implere non sit aliud , quàm illam integrè observare. Eodémque spectat Apostolicum illud epiphonema : *Plenitudo ergo legis est dilectio* ; quo significatur , per dilectionem impelli hominem, ad legem plenè atque perfectè observandam. Dicente idcirco ad hunc ipsum locum Tertulliano

lib. 5.

lib. 5. contra Marcionem cap. 14. *Merito totam Creatoris disciplinam, principali ejus praecepto conclusit: Diliges proximum tanquam te.*

Igitur ex eo Apostoli loco, firmiter adstruetâ & stabilitâ legis Decalogi inter Christianos etiamnum vigente, & ex consequenti; bonorum operum, quæ eâ lege præcipiuntur, necessitate & justitiâ; multò autem magis eorundem præceptorum, etiam ultimi: *Non concupisce*; quod inter alia nominatim istîc recensetur à Paulo, quoad observantiam morali possibilitate: manifestum evadit, quod demonstrandum susceperamus, Idolum illud Religionis reformatæ, justitiam inquam solius fidei, funditus subruï ac corruere; & illam (ut ipsi agnoscunt) Ecclesiæ suæ tanquam animam, peremptoriè elidi ac suffocari.

Verumtamen, etsi, quæ toto hoc capite, adversus Calvinum in prædictis Salvatoris verbis ironiam, somniantem prolixè deduximus; satis clara & efficacia sint; placet tamen & hanc rationem meo judicio non contemnendam, iis confirmandis ad extremum superaddere: sermonem nimirum, ijs circumvestitum circumstantiis, in quibus etiam prudens auditor, nulla ratione credere, aut suspicari possit, eum qui secum agit, fictè seu ironicè loqui, non jam derisionem rationabilem, sed fallacem deceptionem esse; præsertim cùm de re, quæ audientis plurimum intersit, agitur. Id autem in re propositâ locum habere, ut cùm maximè; confestim intelliget, qui id quod subjungo, quod per se clarum, & in confesso est, etiam apud adversa

adversarios , attenderit ; legem nimirum Decalogi , tantâ accuratione digito Dei scriptam , tantâ solennitate à Moyse populo promulgatam , non ironicè profectò aut præscriptam , aut promulgatam ; sed juxta tenorem sonumque verborum reipsa obligasse Hebræos , eoque sensu ab illis receptam & observatam. Eâque porro , seu persuasionem , seu observantiam , ad Christi ætatem perdurasse , vel inde esse manifestum ; quòd Scriptura , etiam per id tempus , volens aliquos , putà parentes Præcursoris , commendare à justitiâ , dicat illos incessisse in omnibus mandatis & justificationibus Domini sine querelâ : itémque ex eo quòd Christi parentes dicantur perfecisse omnia secundum legem Moyse. Eâ autem , quam dixi , communi & justâ , apud Iudæos persuasionem suppositâ : potuitne quisquam , qui Christum de via salutis interrogans , ab illo audiret : *Si vis ad vitam ingredi , serva mandata* : Eas voces aliter , quàm in sensu proprio , & ab omnibus recepto , intelligere ? Aut ipse Christus , si veri Magistri fungeretur officio , eas simpliciter proferens , in sensu alieno proferre ? Quòd apud quemlibet prudentem , non esset docere , sed decipere , & suppositâ adversariorum opinione , non viam salutis , sed perditionis indicare. Qualiter reipsa fecisse Christum , verbis summam impietatem præferentibus , significasse fertur Ioannes Brontius , homilia 1. in Dominicam 3. post Trinitatem ; dicens : *ita adolescenti respondisse Christum ; ut ei potius viam ad æternam damnationem indicaverit.*

Luc. I. |

CAPVT



## CAPUT XXVIII.

*De eo, quod ex doctrina suâ infert Lutherus :  
solam infidelitatem esse peccatum.*

Complura ex illo, de solius fidei justitiâ, principio, partim à nobis inferri possunt, partim reipsa à sectariis inferuntur; tum per se absurda, tum verbo Dei apertissimè repugnantia. Quorum aliqua hoc loco discutiemus; ut magis appareat; quàm infectus sit fons, ex quo tam pestilentes rivi promanant.

Primum, sit illud, quod tanquam consequens, ad fundamentalem illam prætenſæ Reformationis, de fidei justitiâ, doctrinam, intrepidè pronuntiat Lutherus : *Solam infidelitatem esse peccatum.*

Quod vel ipso auditu, non modò paradoxum, sed etiam paralogum est; adeoque à sensu communi, non Christianorum duntaxat, sed etiam Gentilium sapientum; abhorrens, ac denique tam capitaliter ipsi verbo Dei, atque universæ Christianæ disciplinæ repugnans, ut mirum sit in ejus Doctore, quamvis alioqui insolenter audacis, mentem ac calanum potuisse incidere; mirabilius autem, ab aliquo rem intelligente; quantumvis ei sectæ addiſſimo, in Doctore suo, dissimulari, aut patienter tolerari posse.

Verumtamen vel hîc valere potest, quod ipsi  
O
Luthero

Luthero generatim exprobrat, quamvis in ipso fundamento consentiens, Zuinglius, Tom. 2, in responsione ad confessionem Lutheranam: *Lutherus*, inquit, *obstinato animo, conceptam semel opinionem, persequi & obtinere conatur; nec multum curare solet, quodcumque tandem de re quavis pronuntiet; etiamsi vel sibi, vel divini verbi oraculis contradicere deprehendatur.* Sic ille.

Porro hæc Lutheri, non uno loco, expressa & clara doctrina est. In primis enim, contra Ambrosium Catharinum, apud Coccium, disertè pronuntiat: *Nullum est peccatum, nisi incredulitas.* Explicatius autem in locis communibus, Classe 5. cap. 17. *Sicut præter fidem nihil justificat: Sic nihil præter infidelitatem, peccatum est.* Et in 2. Parte postillæ Germanicæ, editionis Argentinensis anni 1537. *Nullum peccatum tantum est, ut possit hominem damnare; sola enim infidelitas, quotquot damnandi sunt, damnat.* Postremò, in libro de captivitate Babylonica, Tit. de Baptismo, Tomo 1. Latino Virtembergensi. *Vides quàm dives sit homo Christianus, qui etiam volens non potest perdere salutem suam, nisi nolit credere: nulla enim peccata possunt illum damnare, nisi sola incredulitas.* Ita ille Quinti Evangelij Evangelista.

Quæ interim doctrina, uti prædixi, cum toto novo testamento adeò manifestè pugnat, ut ei funditus subruendæ, sufficere possint aliquot Apostoli loca, tam expressa & fortia, ut nullâ possint tergiversatione declinari.

Is enim in primis cap. 5. Galatas alloquens:

*Spiritu*

*Spiritu*, inquit, *ambulare*, & *desideria carnis non perficietis*. Et Paulo post: *Manifesta sunt autem opera carnis, quæ sunt; fornicatio, immunditia, impudicitia, & alia plura quæ enumerat, à peccato infidelitatis, longè diversa, de quibus subdit: quæ prædico vobis, sicut prædixi; quoniam qui talia agunt, regnum Dei non consequentur; & quod hinc consequens, æterno igne damnabuntur.*

Deindè, itidem ad Ephesios 5. cap. *Fornicatio autem & immunditia, nec nominetur in vobis; sicut decet sanctos*. Et mox. *Hoc enim scitote intelligentes; quòd omnis fornicator, aut immundus, aut avarus, non habet hereditatem in regno Christi & Dei*. Subdit denique: *Nemo vos seducat inanibus verbis* (dicendo scilicet hæc peccata non esse; sicut Lutherus &c.) *propter hæc enim venit ira Dei in filios diffidentia.*

Primæ Cor. 2. capite, pari efficacitate verborum: *Nolite errare*, inquit, *neque fornicarij, neque molles, neque masculorum concubitores, &c. regnum Dei possidebunt: Et hæc quidam fuistis; (cùm viveretis in Gentilismo videlicet) Sed abluti estis; sed sanctificati estis; atque aded jam (quod subintelligendum est) aliter vos, instituente Christianâ lege, non amplius tales estis. Quòd illud pertinet, quod idem Apostolus Ephes. 4. Hoc igitur, inquit, dico & testificor in Domino: ut iam non ambuletis, sicut & gentes ambulant; qui desperantes, semetipsos tradiderunt impuditiæ &c. Vos autem, non ita didicistis Christum. Hæc ille.*

Sed miserum fanè est, ingratiq; laboris; oportere nos tantum operæ ponere, ut veritatem in sacris libris sole ipso clariorem, demonstramus hominibus voluntariè cæcutientibus; & qui, quò ampliùs urgentur, hoc magis retrusì in semetipfos, suis se ament obvolvere tenebris, Quando & alioqui; vel ipsa supremi Iudicis adversus reprobos pronuntianda sententia sufficere possit ad eam insaniam revincendam: ex quâ nimirum manifestum est, illos non ob solum fidei defectum damnandos; quia, ut in rem nostram observat S. Augustinus libro de fide & operibus cap. 15. *non increpat ( nec damnat illos ) quia in eum non crediderunt; sed quia bona opera non fecerunt*: eorum utique iudicium, separationemque propriè describens, *qui in Christum crediderant, & permixti iisdem Ecclesia pascuis utebãtur*. Ex quo rectè infert S. Doctor: *Si illi qui opera misericordia non fecerunt, ibunt in ignem æternum*; multò magis ituros illos, qui aliena rapuerint; aut alio aliquo atrociori facinore, conscientiam suam constrinxerint.

Quid enim, exempli gratiâ, si quis è Lutheri disciplinâ, fidelis quidem, ut ipsi autumant, aut Deum ipsum odio habeat, aut in Christum jaciat contumeliam, aut parentes, patriam, Regem ipsum, disperdere cupiat: *nunquid poterit fides salvare eum?*

Luc. 2.

Ad quæ, & his paria, equidem non apparet, quod, vel cum aliqua rationis umbra, reponi aut responderi possit.

Neque verò credam, exiturum quemquam adeò insipienter impium, ut, vel memoratas

Aposto li



Apostoli voces, tam affirmatè & exaggeratè prolatas; vel ipsam etiam, in iudicio extremo, à Christo pronuntiandam sententiam, audeat dicere, non in proprio naturalique sensu, sed in hyperbolico, ironico, ac denique contrario, esse intelligendam. Tanquam re ipsa damnentur reprobi, eò quòd opera fecerint; & electi salventur, ex hoc quòd illa neglexerint. Atque in hunc sensum exponenda sit Iudicis sententia: *Venite, benedicti, percipite regnum: Esurivi enim, & non dedistis mihi manducare. Ite maledicti in ignem aeternum: esurivi enim, & dedistis mihi manducare.*

Quod, quanquam, & cogitatu stultum, & dictu blasphemum, apud quemlibet verè Christianum, illico visum iri credamus; non tamen fortassis longè abesset à mente Lutheri: quando, & eum superius vidimus, docere ausum non conducere, sed è contrà perniciosà esse; eaque de causâ, sermone de novo testamento, sive de Missa ausus sit dicere: amplius cavendum ab operibus bonis & legibus quàm à peccatis; eumque insuper audire liceat, epistola 238. Melanchthonem sic adhortantem: *Esto peccator, & pecca fortiter &c. Sufficit enim quòd agnovimus, per divitias gloriæ Dei, agnum qui tollit peccatum mundi: ab hoc enim nos non avellis peccatum, etiam si millies, uno die fornicemur, aut occidamus.* Sic ibi.

Quâ ex occasione, obiter quidem, sed cordatè tamen, attendere te velim, optime lector, quàm capitaliter inter se dissideant, hi duo Apostoli; Paulus scilicet, germanus Christi

Q 3

Apostolus

Apostolus ; & Lutherus ( quod quidem ex ipsa cum Apostolo Christi manifestâ dissensione consequens est ) Apostolus , sive emissarius , Antichristi.

In-primis siquidem clamantem audivimus Doctorem gentium , severisque verbis admonentem Ephesios , tametsi fideles , & ( ut ipse loquitur ) sanctos : *Hoc enim scitote intelligentes , quod omnis fornicator , aut avarus , non habet hereditatem in regno Christi.* Clamat , seu reclamationem , Reformatorum Pseudo-Apostolus , & quando ita inferis placet perdoctus Doctor ( hoc enim titulo sese à Diabolo ornatum memorat , secum de abroganda Missa disputante ) suosque fideles hortatur , ut fortiter peccent ; ex eo quod à Christo illos non avellat peccatum , etiam si millies , uno die aut fornicentur , aut occidant.

Rursum Colossenses cap. 1. hortatur idem Apostolus ; *ut ambulent dignè Deo , per omnia placentes , in omni opere bono fructificantes.* Contrà insurgit , incitatque suos Lutherus , ut caveant quidem à peccatis , sed maximè à bonis operibus.

Ad hæc : Hortatur , studiosèque commonet Romanos , cap. 6. Sanctus Apostolus : *sicut exhibuistis ( in Gentilismo videlicet ) membra vestra servire immunditie & iniquitati ad iniquitatem : ita nunc exhibete membra vestra servire iustitie in sanctificationem.* At contrarium suadet Lutherus : dicens , è diverso ; quo

*Sermone de quibus sceleratior est , huic Deum citius infundere gratiam suam.*  
*piscatura Petri.*

Postremo , his verbis cap. 13. eosdem Romanos

manos informat B. Apostolus: *induimini Dominum IESUM-CHRISTUM*; ipsius nimirum vitæ sanctissimæ; operumque exemplis, vos obvolventes; eumque hoc modo repræsentantes. Lutherus, præter fidem docet, omnia esse indifferentia; neque inter legendum Evangelium intuendum in opera, siue exempla Salvatoris; eoque nomine, sibi præ cæteris, placere Ioannis Evangelium; *quod pauca habeat de operibus Christi.* *In 2. præf. novi testam.*

Quæso vos amici; estne istud, quod assidue jactatis vos reipsa sectari; tuerique purum verbum Dei? an è contrà; divinæ scripturæ sanctitatem fædo sacrilegio contemnerare; ipsius auctori inverecondè illudere; & prorsus contraria obtendendo, Evangelium Christi; in Antichristi Alcoranum deformare.

Attamen ultra hæc, in antea relatis generalibus Lutheri verbis quiddam latenter inest, cujus specialis indignitas atque fæditas, digna est, quæ hîc speciatim inspiciatur, & apertam proferatur in lucem.

Nam hætenus quidem audiebamus, Calvinum & quosdam alios, eâ in materiâ ita Philosophantes; ut dicerent; fidelibus quidem nulla peccata imputari; omnia autem imputari infidelibus. In quem sensum scribit ipse Calvinus Instit. c. 8. §. 58. &c. *omnia peccata esse mortalia infidelibus; fidelibus; omnia venialia.* Quod etsi falsum sit; uti dicemus, minùs tamen videri poterat à recta ratione abhorrens. At ecce nunc ex Luthero discimus; ne ipsis quidem infidelibus alia quævis peccata imputari ad pœnâ.

Ipso videlicet generalissimè pronuntiante ; quod sola infidelitas , quotquot damnandi sunt , damnat : nec minùs generaliter asserente ; quod sicut præter fidem nihil justificat ; sic nihil præter infidelitatem peccatum est ; & consequenter nihil præter illam , hominem damnat.

Et quamvis subinde videatur restrictè loqui de Christianis : attamen alibi , veluti visum est , generalissimè loquitur , & cùm dicat , *omnes qui damnantur* ( quales juxta illum soli sunt infideles ) consequens est illum etiam de infidelibus intelligi. Idque necessariò , ex proprio ipsius principio , quo nimirum docuit , legem Decalogi solùm obligasse Iudæos : neque proinde nunc superesse legem moralem , cujus violatio , apud quoscunque peccatum sit.

Ex quo præter apertam cum recta ratione & apertissimis , præsertim apud Apostolum , verbi divini verbis , repugnantiam ; illud continuò inferri possit absurdissimum : fieri posse , ut sceleratissimus quisque reproborum , non majori , quin & mitiori , pœnâ damnetur ; si , ut fieri potest , non majorem culpam , aut etiam minorem , infidelitatis contraxerit. Contra illud Christi Matth. 16. *Tunc reddet unicuique secundum opera ejus.* Et illud Apostoli ; *ut referat unusquisque propria corporis , prout gessit , sive bonum , sive malum.*

2. Cor 5.

Ut hîc non exaggerem , tam istis , quàm illis , summam indulgeri sceleratè vivendi licentiam , eamque & majorem , quàm quisquam Gentilibus , quantumvis Epicuræus Philosophus , sectatoribus

ribus suis permiserit; de quo redibit sermo, Pronuntiato sequenti.

In cujus tamen expositione, præmoneo, studiose lector, nihil te nisi tortuosum, perplexum, absurdum, inopinatumque expectare debere. Ita enim eo in argumento, non inter se duntaxat Cadmæâ pugnâ configunt, ex eiusdem draconis dentibus progenerati homines; sed, quod non vanum est falsitatis & mendacij indicium, illorum quisque secum ipse pugnat, suoque se gladio conficit.



## CAPUT XXIX.

*De opposito sectariorum pronuntiato; omnia etiam fidelium opera esse peccata, eaque per se mortifera.*

**A**lterum igitur, in rem præsentem discutiendum, idque cum præcedenti è diametro pugnans, est Novatorum istud, ac præsertim Calvinistarum, pronuntiatum. *Iustum, seu fidelem, in omni opere suo, etiam bono peccare mortiferè: id tamen ei non nocere, neque à Deo imputari.*

Calvini loca pòst citabimus. Priùs enim mihi conveniendus est progenitor eius Lutherus; & in eius dictis, ostendendum quiddam profectò inextricabile, in eo nimirum; quòd cum, cum jamjam audierimus, adèò solenni præconio proclamantem: *solam infidelitatem esse*

esse peccatum; eundem modò ostendere possumus; in eo, quo de agimus, pronuntiato, idem Calvino sentientem. Sic enim in primis, expressè tradit in Assertionibus, artic. 31. *Iustus in omni opere bono peccat.* Referturque Tomo i. operum Lutheri editionis Vvitembergensis, anni 1558. Opusculum eius hoc Titulo: *Quod iustus etiam inter bene operandum, peccet.* Quod etiam fortiùs expressit ex discipulis ejus Melanchthoni in locis communibus: *Omnia, inquit, hominum, quantumvis laudabilia opera, planè vitiosa sunt, & morte digna peccata.*

Neque enim ista Lutheri dicta possunt conjunctim consistere; nisi consequenter admitatur iustū in omni opere suo peccare infidelitate: quod & per se absurdum est; et incredibile; neque si subsisteret hypothesis; quia alioqui, ita peccans iam fidelis esset; quia sic supponitur; & non esset fidelis, quia peccaret peccato infidelitatis.

Neque verò tantum dixit Lutherus; quod ei tribuit Vvitrakerus libro de Ecclesia p. 301: *Siquis actum fidei habeat, ei peccata non nocere, sed expressis inculcatisque verbis; præter infidelitatem, nullum peccatum esse.*

Aliunde autem subsistere nequit eadem Lutheri propositio: *Iustum in omni opere suo, etiam bono, peccare.* Si nempe audimus; virum eruditum; & gente Anglum, Ioannem Berleium, in Apologia Tract. 2. cap. 2. sect. 18. §. 4. & alibi, testantem: Lutherum in libro, quem ipse refert Anglicè scriptum, docuisse: *opera ab operante bonitatem sumere, & quod nullum opus*

*opus Deo , displicet , nisi auctor eius prius displiceat. Tandemque quod : Bonus nil nisi bonum operatur ; nec potest esse non bonum , quod ille iam bonus operatur. In quem item sensum profert idem auctor, è sectariis Musculum, in locis communibus pag. 28. ita loquentem. Sciendum est ; magis in hac causâ , personas peccantium quàm peccata, esse considerata.*

His enim positis , & his quasi membris in unum compactis , quodnam doctrinæ monstrum necesse sit demum existere ? consequens quippe erit ; & opera bona ab homine fideli & iusto exercita , mala esse ; quia nempe iustus in omni opere suo peccat , priori propositione ; & è contrario , opera mala ab eodem exercita , bona esse ; quia , ut jam additur , non potest esse non bonum , quod bonus seu iustus operatur : ex quo denique fiat , tam hæc, quàm illa , in sui exercitio , simul & bona & mala esse.

Quo ex Labyrintho , his quidem positis , nescio cuius filii beneficio , sese Lutherus extricaverit.

Iam autem ad Calvinum quod attinet ; quamvis non tam apertè videatur pugnancia dicere, tamen in hoc ipso , quod docet omnia iustorum opera , per se spectata, & seclusâ Dei misericordiâ , peccata esse ; & absurdè loquitur , nec est sibi ipse usquequaque consentiens.

Audiantur hæc eius verba , lib. 3. Instit. c. 14. §. 9. & sequentibus. *Habemus , nec unum à sanctis exire , opus quod si in se censeatur, non mereatur*



*reatur iustam opprobrij mercedem. Et mox : nos cum omnibus nostris conatibus & studiis , morte & interitu dignos esse. Tandemque cap. 20. §. 43: universè asserit : nihil ex nobis prodire nisi vitiosum.*

In quibus in-primis satis absurdum & mirabile est ; homines sanctos ; Deoque dilectos, velut filios charissimos ; & quos, ut loquitur Apostolus ad Ephesios 1. *gratificavit in dilecto filio suo* , si spectentur , cum suis quibuscunque operibus , in Dei conspectu , morte & interitu dignos esse : Neque ab his quicquam prodire posse, non vitiosum, aut quod Deo placeat: frustra jam scribente ad Colossenses cap. 1. eodem Apostolo: *ut ambuletis dignè Deo per omnia placentes, in omni opere bono fructificantes*; & mox etiam subiungente, *qui dignos nos fecit in partem sortis sanctorum &c.*

Et profectò vel ipsâ naturâ rei , seu operum ipsorum conditione spectatâ : quis prudens sibi inducat in animum: hominem iustum, pro gratiâ sibi à Deo communicatâ viribus , diligentem Deum, ut summum bonum, aut etiam credentem Deo &c. hoc ipso conatu mortis reatum incur-rere? Rursusque nec posse, nos , iuxta præscriptum Salvatoris, à Deo petere nobis dimitti debita nostra, quin hoc ipso actu committamus novum peccatum , & novo debito , nos interitu dignos reddamus ? Hæc qui sincerè & ex animo pronuntiet, eum arbitror , quid rei dicat, ignorare.

Quapropter & ipsum Calvinū videas, quò prædictæ suæ assertionis invidiam ex parte declinet,

aut

aut temperet, sibi met non satis congruentem, lib. 3. inst. c. 15. §. 3. ita se exponere; ut admittat: *Placere Deo ( iustorum ) opera bona, nec suis autoribus infructuosa esse : quin amplissima Dei beneficia remunerationis loco referre.* Et si confestim addat, veluti rediens ad ingenium : *non quia ita merentur : verum, Dei largitatem ; nihil tale merentia opera, indebitis premiis munerari.*

Quod interim, neque verbis Christi satisfacit, assidue in Evangelio mercedem reddendam bonis operibus testificantis, quâ voce non significatur, donum aliquod immerenti collatum: Apostolo item illam appellante coronam iustitiæ: neque verò sufficit, ut prorsus tollatur inhærens ipsius Calvinii dictis contradiçtio: cum, ea opera quæ ante dixerit, esse de se morte & interitu digna; jam dicit, placere Deo, nec esse autori infructuosa, in quantum contingit, ex ipsa Dei largitate, illa ab eo mercedem accipere. Atquæ hæc de eius pronuntiati parte priore.

In cuius autores, iis quæ deduximus perpensis, merito illud Isaïæ cap. 5. verbum intorqueas: *Va, qui dicitis, malum, bonum; & bonum, malum; ponentes tenebras, lucem; & lucem, tenebras &c.* Quid enim aliud isti faciunt, pro animi sui libidine, cuncta miscentes, ac pervertentes?

Iam verò circa id quod ibidem addunt; peccata scilicet non nocere fideli: non minores extant verborum ambages, nec dispar dissensio sententiarum.

Id

lius Diaboli sit ; at verò Dei filius peccatum non faciat , quamdiu est , & persistit esse filius Dei.

Propter hæc igitur, plures eiusdem scholæ à Beza dissentientes, dixerunt: Davidem v.g. adulterium committentem, amisisse spiritum Dei; in quo tamen in-primis ab ipso Calvino apertè re-edere visi sunt; Harmonia in Matthæi caput. 13. ( ut antea quoque monuimus ) sic proloquente: *Cordibus fidelium semel infixæ Dei veritas nunquam effluit , sed usque in finem viget.* Et infra : *Porrò ut nunquam extinguatur Spiritus ille ; ita & fidem , quam semel insculpsit piorum cordibus, evanescere & perire , impossibile est.* Ita Calvinus.

Deinde , cum ad modum devenitur , quo ea peccata , tametsi peccantes ipsâ iustitiâ atque spiritu Dei priventur , fidelibus tamen non noceant , hîc rursus ambages anfractusque inexplicabiles ; quemadmodum necesse est eos , in avia & cœcos errores incidere , qui verum iter amiserint.

Quam in rem in-primis adferri potest ; quod cripuisse fertur ; quidam Vvottonus in Respon- sione ad articulos Papisticos : *peccatum fidei non nocere ; quia , ut ait , remittitur , quàm citò committitur.* Quod quidem hunc sensum habere posset , ut censeatur illico remitti , non eo instanti quo committitur , si revera privet Spiritu Sancto & Dei gratiâ, sed proximè postquam commissum est , Deo illum statim in gratiam tuam recipiente. Verùm aliud sonat , quod alibi expressè dicit : *fidei simul remitti peccata prater-*  
rita,

etiam ea, quæ ex objecto (veluti loquimur) bona censentur, peccata sint; & quidem n. *re-  
tiferæ*, in quantum (ut ait lib. 2. inst. c. 3. §. 59. *omne peccatum est adversus Dei voluntatem rebel-  
lio, quæ eius iram necessario provocat*; consequens est illos, vel in quibuscunque actibus suis, retinere statum iustitiæ, Deo peccata illis non imputante; vel quidquid faciant, semper carere iustitiâ, & in statu peccati remanere. Ex quibus apparet, quâcunque in partem se vertant novatores isti, eos in meris tenebris & caligine cæcâ ambulare.

Vt jam non exaggerem, quod suprà insinuavimus, & manifestum erit consideranti eam Philosophandi rationem omni licentiæ, & corruptelæ morum, fræna, laxare. Nam quo tandem, fræno a licentia vitæ coerceretur in conspectu Dei, qui persuasum habeat nullo, se peccato damnationis reatum incurrere; imò nec idcirco, vel ad momentum excidere gratiâ Dei.

Sed ecce hîc nobis novus Labyrinthus occurrat, nec dissimulanda doctrinæ istorum inconsequentia. Pro quâ ad extremum, observari velim, quod in Calvinistarum Catechismo à Francisco Feuardentio, libro 8. Théomachiæ, Latine converso, & digno commentario, castigato, præscriptum invenio in rem præsentem. Ibi quippe cap. 1. cui titulus, *De precibus &c.* videas eius sectæ fideles, sese in hunc modum in conspectu Dei accusare. *Affiduè & sine intermissione, tua transgredimur præcepta. Quod dum facimus, perniciem nobis creamus atque interitum. Velis*

P igitur

igitur nostri miserescere, Pater benignissime, delens omnia peccata nostra &c. Ita illi præfensi Reformati, & nimirum secundum puritatem Evangelij vitam instituentes. Sed quam consentaneè reliquæ doctrinæ suæ, breviter hoc loco attendendum est.

Primum enim libens intelligam; quomodo possint transgressionis præceptorum Dei, seu divinæ legis, sese apud Deum reos agnoscere: nisi adhuc vigeat, ipsosque liget divina lex? Quod omnino negant, ipso etiam Calvino libro 3. Instit. capit 19. §. 2. expressè profitente; ad Christianam libertatem pertinere, ut *fidelium conscientia, sese supra legem erigant atque efferant, totamque legis institutiam obliviscantur.*

Etenim qui supra legem est, non est subditus legi; & manifestum est, neminem peccare, nisi qui transgreditur, aut facit contra legem, se obli-gantem,

Deinde non satis intelligitur; quâ ratione fideles illi seridè divinam misericordiam implorent, ut deleat ipsorum peccata; quæ intelligant, jam sibi remissa, virtute Baptismi olim suscepti; itemque hoc ipso quod fideles sunt, sibi reipsa non imputari ad pœnam.

Denique si verum est, quod dicunt; sese assidue & sine intermissione, transgredi præcepta Dei, eoque perniciem & interitum sibi creare: difficulter sanè intelligi potest, quod infra subdunt n. 31. *Crescimus in fide, qua in omnibus bonis operibus operatur.* Adjunctâ præsertim illâ aliâ ipsorū doctrinâ,




doctrinâ ; quâ affirmant omnia fidelium bona opera , si per se spectentur , opprobrio & pœna digna esse. Atque hæc contra Calvinistas.

Veruntamen hæ ipsæ Catechismi Calviniani voces ; in memoriam me revocant affinium Lutheri verborum , relatorum à Tannero, ex commentario in caput 1. Epistolæ ad Galatas ; quibus nimirum docet : quemlibet suæ sectæ fidelem , in periculo & pugnâ mortis , verè ac seriò profiteri posse ac debere : *nihil se habere præter peccata, eaque vera & gravissima, nō ficta & inania; videlicet summam infidelitatem, dubitationem, contemptum Dei, odium, ignorantiam, blasphemiam Dei &c.* Quæ nimirum est istorum hominum religionis reformatæ præclara sanctitas.

Sed præterquam quòd hîc confestim appareat illa , quam modò Calvinistis objectabamus, fædissima doctrinæ inconsequentia : quâ nimirum possit tam variè peccari ab istius sectæ fidelibus, si velut toties inculcâtem audivimus Lutherum, ab omni lege , & obligatione contrariarum virtutum , prorsus liberi sint; nominatim autem si hæc attendimus ipsius verba in caput 2. eiusdem Epistolæ ad Galatas ; *sola fides Christi, necessaria est, ut iusti simus, cetera omnia liberrima sunt; neque præcepta, neque prohibita.* Ex quo statim sequitur: quodlibet aliud licitum esse, quomodo ergo peccant, qui quod licet faciunt? Præter hoc , inquam , triplicem aliam , in his pauculis verbis deprehendo cum ipsâ Lutheri doctrinâ repugnantiam.

Primum enim quæram ex Luthero , quomodo tot modis specialiter peccare possint sui



## CAPUT XXX.

*De altero Lutheri corollario : timorem divinorum  
iudiciorum , fidelium cordibus , non à Deo sed  
à Diabolo immiti.*

Cæterum his , quæ per plura capita studio-  
sius deduximus , confirmandis ac concludendis ,  
placet & hoc alterum Lutheri pronuntiatum ,  
eodem fundamento subnixum proferre , atque  
convellere : nimirum , timorem divinorum iu-  
diciorum , fidelium conscientiæ incussum , non  
à Deo , sed à diabolo ortum habere.

Ita enim illum claris verbis loquentem au-  
dias , Tomo I. Germanico Vvittembergensi , *Apud Fitz-  
folio 273. §.3. cùm tibi venit in mentem Christum non l. i. Bri-  
velut Indicis , qui te villicationis , sive acta vite , tan. c. 19.  
rationem reddere iussurus sit , tum pro certo & ex-  
plorato habeas , eum non Christum , sed ipsissimum  
esse à abolum.*

Quò itidem facit , quod in Postilla Domini-  
cæ 6. post Trinitatem tradit his verbis : *Hoc dis-  
camus & bene notemus ; ne mortem & extremum  
iudicium metuamus. Nec enim venturus est Chri-  
stus , ut nos iudicet : sed qui non credunt , illos  
iudicabit. Cui Patriarchæ sui dicto subscribere  
velle visus est Calvinus , harmoniâ in caput Mat-  
thæi 27. Neque enim ( inquiens ) timendum est ,  
ut in Dei iudicium amplius veniant peccata nostra ,  
à quibus tam pretiosa mercede nos absolvit Dei  
Filius.*

Quæ rursus Lutheri doctrina , tot Scripturæ



locis manifestè convincitur ; ut nisi quis per insanum contemptum , ironice rursus illos excipiendos existimet , nulla possint arte declinari , aut pertinacia eludi.


Nam exempli causâ, nunquid ipsemet Christus, & non diabolus, Matth. 10. discipulos suos, utique jam credentes , ejusmodi timore injecto, ad constantiam in cruciatibus incitabat , dicens: *Timete eum qui potest & corpus, & animam perdere in gehennam?* Atque beati Apostoli , Petrus & Paulus , utique ex Dei , & non diaboli spiritu , eodem timore incitabant fideles , ad quos scribebant. Vti videre est 1. Petri 1. ubi mentione injectâ Dei judicantis secundum uniuscujusque opus ; consequenter additur : *In timore incolatus vestri tempore conversamini.* Et cap. 4. *Si justus vix salvabitur : impius & peccator ubi parebunt.* Itaque & hi qui patiuntur , secundum voluntatem Dei , fidei Creatori commendent animas suas in beneficiis. Prioris ad Corinth. 10. *Itaque qui se existimat stare , videat ne cadat.* Et posterioris cap. 5. *Omnes enim nos manifestari oportet ante tribunal Christi, &c.* Et mox : *Scientes ergo timorem Domini , hominibus suademus.* Tandemque ad Philippenfes 2. *cum metu & tremore salutem vestram operamini.*

Denique ipse Paulus , non , opinor , ex ipsissimi diaboli , sed spiritus divini suggestione, salutari illo divinorum judiciorum timore , semetipsum stimulabat : cum 1. Cor. 4. ita scriberet : *Nihil mihi conscius sum ; sed non in hoc justificatus sum : qui autem me judicat , dominus est.* Et cap. 7. *Castigo corpus meum , & in servitium*

*tem redigo, ne forte, cum aliis predicaverim ipse reprobus efficiar. omitto alia.*

Etenim ex res, divinas Scripturas, absque ullo mentis in adversam partem præjudicio, legenti adeò evadunt manifestæ; ut rursus miraturi sint fortè nonnulli, me tam operosè ac sollicitè, nec sine seu meo scribentis, seu ipsorum legentium tædio, rebus adeò compertis demonstrandis insistere. Sed veluti suprà Insinuabamus; nihil clarum est voluntariè cæcurientibus; & potius paratis, universam divinæ Scripturæ structuram & harmoniam confundere, quàm ab adamata semel novitate, & præsumptâ opinione discedere.

Siquidem, velut indicavimus, etiam istud adeò apertè verbo Dei repugnans pronuntiatum, originem suam debet illi basi fundamentoque Religionis reformatæ, de justitia solius fidei: quæ nimirum fides, ex ipsa Lutheri definitione, sermone in Dominicam 2. Quadragesimæ; *est certa altissimèque animo insidens divinæ bonitatis & gratiæ (adeoque & future salutis, vitæque æternæ consequenda) fiducia.* Cum qua videlicet certissima persuasione, consequenter loquendo, stare non potest ullus timor divini judicii; immò (si ipsi Luthero credimus) neque opinio, quod à Christo judicandi sint. Quod tamen rursus manifestè pugnat cum verbis Apostoli 2. Cor. 5. suprà relatis; & ad Romanos 14. *Omnes enim stabimus ante tribunal Christi.* Et mox: *Itaque unusquisque nostrum pro se rationem reddet Deo.*



## CAPVT XXXI.

*Appendix & conclusio ante dictorum.*

**T**Ametsi ex hæcenus dictis, quantum ego arbitror, satis efficaciter ostensum habeatur, quantopere repugnet Evangelio Christi, & quantata animarum pernicie inducta sit in orbem terrarum reformata illa solius fidei iustitia; eoque jam visus sim finem imposuisse ei disceptationi: quia tamen modò in quosdam autores incidi, qui, quamvis aliâ occasione quosdam nobis suggerant Lutheri locos; ex quibus evidenter appareat: Novatorem illum ex vesano illo bonorum operum odio, eò devenisse impietatis, ut non nostris tantum detrahat meritum apud Deum, sed ipsa etiam Salvatoris opera ita deprimat, ut ea dicat, nihil aut parum ad salutem nobis profuisse, ex quo inter alia, consequens sit, illum re ipsa non fuisse Redemptorem mundi, atque inde rursus omnem perverti novi testamenti æconomiam: idcirco necesse est, istam supradictis velut appendicem superaddere; ac primum ipsos Lutheri locos ob lectoris oculos proponere, cum quanta ex illis in fidei negotio absurda sequantur, aperire.

Prior locus in hunc modum refertur, ex Tomo 3. Germanico, in Admonitione ad Argentinenfes: *Non esse hominibus opera Christi inculcanda, & cuiusmodi exemplum nobis Christus præbuerit.*

*buerit. Christi enim opera esse minimam & vilissimam portiunculam in Christo, eaque in re Christum ceteris sanctis parem esse.*

Posterior adfertur, ex Præfatione in novum Testamentum Latinum, ubi sic loquitur: *Si alterutro carendum esset, vel operitus, vel verbis Christi: modis omnibus mallet ignorare Christi facta, quam eius verbis & concionibus privari. Non enim multum Christi opera mihi profunt, sed verba eius dant vitam.* Hæc ille.

Sed hîc fidem tuam obtestor, quisquis hæc legis, si modò quacunque saltem ratione Christianus es; quanta in pauculis, istius ter Sancti (ut eum appellant cultores sui) aut, (ut ipse sese) à Deo submissi novi Evangelistæ, verbis, & quàm manifesta atque comperta sunt crimina.

Nam istud in-primis quale est; quòd cùm tota ferè novi testamenti pagina, nobis inculcet opera Christi, & quæ ille nobiscum conversans aut egit, aut passus est, imitationi nostræ proponat: quam in rem expressissimè faciunt, illa S. Petri prioris epistolæ cap. 2. *Christus passus est pro nobis, vobis relinquens exemplum ut sequamini vestigia eius*, & illud à Paulo non uno loco inculcatum: *Imitatores mei estote sicut & ego Christi*: quod est dicere: Imitamini me, quia me imitâdo, Christum quæimitor, & ipsi imitabimini. Et illud 1. Ioannis 2. *Qui dicit se in ipso manere, debet sicut ille ambulavit, & ipse ambulare.* Tandemque cùm ipse Salvator nobis via factus, veritas, & vita, toties inculcatis istis, aut affinis vocibus: *Qui vult venire post me, tollat cru-*

com

De Sanct.  
virg. c. 27.

*cem suam* ( ex mei scilicet imitatione ) & *sequatur me*: iis videlicet insistendo vestigiis quæ ipse impressi , & ipso sanguine meo signavi. *Quid enim est eum sequi* , inquit Augustinus , *nisi imitari* ? Et ne fortè expressum exempli nomen de ipso Salvatore desideres : idem ipse Ioannis 13. post opud illud profundissimæ demissionis , quo discipulorum pedes abluit Dominus & Magister ; disertè subjecerit : *exemplum enim dedi vobis, ut quemadmodum ego feci vobis, ita & vos faciatis.*

His interim omnibus non obstantibus , ausit iste Novator præfractè negare , inculcanda esse hominibus opera Christi , aut quibus exemplis in suâ nobiscum conversatione præluserit.

At enim ad ista minùs attendit novè Evangelij conditor ; audax præ animi obstinatione vel sexcentos Scripturæ locos sibi adversantes contemnere , aut , si necesse sit , eos omnes in sensu ironico , aut prorsus contrario accipere , & ita ubique Evangelium Christi , ut suum substituat , subruere.

Sed facîle in his advertet Lector ingenuus , vel hoc loco fallere nos Scripturam divinam quod dictu nefas est Christiano : vel , quod consequens est , ipsum Lutherum falsum Prophetam , & merum impostorem esse.

Iam verò quid dices , si alterum illud propositæ doctrinæ caput attenderis : quo sancta opera humanæ in Christo naturæ , quæ ( qualiacunque sint secundum se spectata ) tamen ex infinità personæ Verbi sanctitate summam dignitatem atque pretium accipiunt , idcirco appella-



ta à SS. Patribus *Theandrita* : rem in ipso Christo vilissimam esse pronuntiat. Atque ex ea parte, hominem illam teste Scriptura, non tantum Sanctum, sed & *Sanctum Sanctorum, innocentem, impollutum*, & excelsores coelis factum, quippe hominum Angelorumque caput; eundemque *plenum gratiae & veritatis*, de cujus plenitudine nos omnes accepimus; denique de quo etiam scriptum est: quod cum unxerit Deus oleo exultationis *pro participibus suis*: hunc, inquam, Lutherus adedò redigat in ordinem, ut eum cæteris Sanctis parem faciat. Et quid dico Sanctis? Immodò cuius etiam de grege suo nebulari aut meretrici: quos quidem si fidem habeant, & ipsos cæteris Sanctis æquales facit; ita de se suisque proloquens, Tomo 2. Latino, enarratione in primæ Petri caput primum; *pares sumus in honore & dignitate D. Petro, Paulo, & S. Deipara Virgini. Habemus enim eundem Thesaurum à Deo, bonaque omnia tam largiter, quam ipsi*. Sic ille. Quod quis dubitabit? cæteris accensendum blasphemias, quas ille evomit ore maledico, adversus Dominum, & adversus Christum eius.

In quo cursim attende stultæ hæresis infelicem astutiam. Siquidem Reformati isti, ut vitæ molli delitiisque licentiosè indulgeant (neque enim ad se pertinere autumant, quæcumque à Christo, de arctâ viâ, ferendâ cruce, abnegatione sui &c. inculcantur in Evangelio) dicunt asperitates ejusmodi incassum à nobis, & cum Christi iniuria suscipi: quasi ille suâ passione ac morte non abundè pro nobis satisfecerit: eumque

*Daneus in  
Resp. ad Bel-  
larm. &c.*

que in finem, operum ac passionem Christi, pro nobis susceptarum, valorem ac pretium exaggerantis, ac proinde Sanctos Antonium, Hilari- nem ac similes, *bis stultos* appellantes, quod absque ullâ necessitate, aut fructu, semetipsos tant asperè tractarint, ac quodammodo sui ipsorum carnifices extiterint.

At cum è diverso, ad Christi operum passio- numque imitationem provocantur; negant, uti vidimus, eam imitationem adeò esse inculcan- dam; eo quod ea quæ Christus in carne gessit, aut passus est pro nobis, minima sit & vilissima par- ticula in Christo, eaque in parte, nihil supra cæ- teros Sanctos; ipse Christus præstiterit. Ita illi, utrimq; fallaces, & instabiles, & semper in gyro & circuitu ambulantes.

Postremum caput, quod in ea doctrina nota- bamus, istud est; quod, juxta Lutherum sustineri nequeat, Christum re ipsa generis humani Re- demptorem fuisse. Siquidem cum scriptura sacra locis innumeris, Redemptionis mundi effectum, non prædicationi sive doctrinæ Christi, sed il- lius morti ac passioni, seu nominatim ipsius san- guini pro nobis effuso, constanter attribuat; si ipsa Christi obedientia, quâ sese ad mortem, mor- tem autem crucis, pro salute nostrâ Deo Patri obtulit, humano generi, ex Lutheri verbo, pa- rum profuit, sed verba ejus sint quæ dant vitam; jam non venerit Christus, ut tanquam Redem- ptor mundum salvaret, sed tantum, ut veluti Doctor viam virtutis monstraret; quæ fuit hæ- resis Petri Abailardi, apud S. Bernardum, epistolâ 190. frustra que toties inculcat scriptura, Chri-

stum



stum redemisse nos in sanguine suo. Et quod expressius eam in rem Matth. 20. v. 28. dicitur, *ve-* Coloss. 1. v. 14. Ephes. 1. v. 7. 1. Petri 1. c. 1.  
 nisse filium hominis dare animam suam ( id est vitam & sanguinem suum ) redemptionem  
 pro multis.

Neque quicquam obstat, si fortè dicas cum Calvino: redemptionem mundi assignari Christi operibus, non quòd id præmium condignè mererentur; sed tantum quòd per illa offerretur condignum redemptionis pretium, putà vita & sanguis vnigeniti.

Quoniam siue hoc, siue illo modo rem explices; perinde vincitur, quod Lutherus dixit: Christi opera non multum profuisse mundo: nisi fortè, patet, quod mundi redemptio nullius, aut levis momenti res extiterit.

Præterquam quòd & ipse Calvinus, alibi denique modum loquendi Catholicum admi-  
 ferit; epistolà scilicet 317. dicens: *Ex pluribus scripturis colligi, quod verè Christus suâ obedientiâ, nobis gratiam apud Patrem acquisierit, ac promeritus sit.*

Ad extremum, ut vel cæco pateat, in quod impietatis barathrum sensum sine sensu provolvat Novatores nostros; bella illa, & ab ipsis temerè & inconsultè adamata, solius fidei iustitia, vel in ipso Luthero, lector benigne, recognosce. Nam cum consequenter ad eum errorem, ipsis etiam Christi operibus omne meritum, pretium, dignitatemve detractam vellet, nec tamen auderet manifestè illum, Redemptorem mundi, quòd tota scriptura confitetur, abnegare; ut hoc saltem modo imperitis fucum faceret, commen-  
 tus

tus est illum , non passione , aut morte naturæ humanæ , sed ipsius divinitatis suæ , mundum redemisse . Ita enim illum , si meministi , suprâ loquentem audivimus in confessione majore , de cænâ Domini : *Non credo, quod sola humana natura pro me passa sit: Christus ille vilis, &c magni pretij salvator est; immò ipse quoque salvatore opus habet &c.*

Quibus verbis serpens ille, velut linguâ bifidâ , & Christum secundum humanitatem cæteris exæquat hominibus, qui & naturâ filij iræ, & arbitrio suo multis sceleribus vivunt obnoxij; & passioni ac morti subiicit, nescio à quo deinde resuscitandam , cùm destructa seipsam resuscitare non possit, incommutabilem eius divinitatē . Quæ quidem impietas , si non Atheismi furculus, at stygiæ tamen fornacis est non obscura strictura.

Qua etiam in re, non insanam tantum ejus impietatem, at insuper improvidæ mentis temeritatem aspicias; ut qui nō intelligat, quod, cùm universa scriptura Christi sanguini pro nobis effuso redemptionem mundi attribuat, consequenter ei commento suo; compellendus sit divinitati, venas assignare, & sanguinem, cujus effusione, mundi redemptionem; operata sit: quod nescio an hominum cuiquàm , quantumvis stulto & impio, venire possit in mentem: Demum eadē occasione omittere non possū, quin ipsos Lutheri discipulos , pro eo quo feror in eorum salutem studio, cordatè commoneam ; ut tantisper ad hæc, sed seriò, reflectant animum; quàm falsò ipsorum Propheta, sese apud illos, pro puri Christi Evangelij

gelij aut verbi Dei, eximio sectatore, jactet atque venditet: quando in exemplo, in quo versamur, impiam illam de divinitatis passione sententiam, pro animi sui libidine, ipsis obtrudat; cujus ne vestigium aut umbra extet in verbo Dei; & è contra, articulum de humani generis, per ea quæ Christus in carne sua gessit ac pertulit, partâ salute, quem (ut ita loquar) mille locis Scriptura adstruit, stultè atque præfractè neget. Et hæc quidem digna essent, etiam pluribus exaggerari.

Sufficiat addere: id jam olim, ut hæresis proprium notatum Tertulliano adversus Gnosticos ita scribenti: *Sed hoc est perversitas fidei, Scorp. c. 4. probata non credere, non probata, præsumere.*

Verùm ut denique isti argumento colophonem imponam: Ex hætenus dictis, nisi meus fallit animus, clarissimè apparet Lectori ingenuo, & nisi quis malignè ab ipsa luce avertat oculos: Basim illam Religionis novitiæ, & (ut ipsi agnoscunt) tanquam animam quinti Evangelij, nullo modo posse cum ipsa Evangelij Christi veritate ac sinceritate consistere: sed vel illâ stante, ipsum Christi Evangelium ab imo subruendum, & conculcandum esse, (quod ne ipsi quidem, qui re ipsa illud subvertunt, si Christiani sint, apertâ voce admiserint) vel certè, quod nos contendimus, illam ipsam basim, & quidquid ei inædificatum est, prorsus evertendum ac dissipandum esse.

Caterùm, quò magis cōsidero, infelix illud de solius fidei iustificatione commentum, quod & ipse Calvinus libro 3. Instit. c. 11. §. 1. *præcipuum Religionis*

*Religionis Christianæ sustinenda* ( *Reformatae* videlicet ) *Cardinem* appellat , adeò perversum & omni ex parte Evangelicæ legi ac disciplinæ repugnans apparet ; ut ne ab ipsis quidem inferorum portis , validius quidquam ad Ecclesiam Christi , si quæ fieri posset , labefactandam adinveniri posse existimem : dignum proinde dogma , quod & Mago Simoni primævam suam originem debeat , inquantum & ille ( ut auctor est Sanctus Iræneus ) negabat hominem secundum opera justa salvari , & post tor sæcula , quibus in Ecclesiâ Dei inauditum fuerat , à Martino Luthero , si non mago , ac certè à dæmonum familiaritate infami , velut ab inferis suscitatum , in orbe redivivum apparuerit.

Neque adeò mirer ; inveniri inter Christianos , qui sive novandi , & exinde gloriæ captandæ , libidine , sive studio homines ad sectam suam pelliciendi , posthabita doctrinæ Evangelicæ sinceritate , talia comminiscantur aut venditent : sed quod etiam viri alioqui prudentes , nullo compendij utilitatisve respectu tam impios suorum Apostolorum ( ut appellant ) conatus , intelligentes , etiamnum illis pertinaciter adhærescant , & nescio quomodo , etiam videntes volentesque seipsos fallant ; id verò præsertim , & queror , & miseror , & doleo.

Cæterum ut vel hinc perspicuè denique cognoscant Lutheri discipuli , quàm hac ipsâ in parte , improvido , futili , & ( qui hæresis est genius ) instabili Doctore , credant animas suas ; ad extremum placet , illis ob oculos ponere :  
quod.

quid ipse Lutherus, post tot occasione istius dogmatis, excitatas in orbe tragœdias; post invidiosam insolentemque eius tanquam sui inventi iactantiam; post, eâ gratiâ, quantum in ipso fuit, ab imo convulsam Evangelium Christi: quid, inquam de hac re ipse perferibat, Tomo 4. Vvittemb. commentario in caput 15. Ioan. quæ admodum refert autor Britannomachiæ lib. 1. cap. 12. *Vbi sola fides docetur (inquit) sunt falsi Christiani, qui de fide quidem gloriantur & baptizati sunt, inque Christianorum numero censentur; nullum tamen succum habent, neque fructum edunt. Sic ille.*

Quod, quid aliud est, si attenderis; nisi basim illam Religionis reformatæ funditus destruere, convellere cardines, & animam ipsam novi Evangelij elidere?

I nunc, quisquis es, & fide sis illi magno ac fideli quinti Evangelij oraculo; & cœcus cœcum, in foveam erroris, & perditionis barathrum, cum illo præcipitandus, ducem sequere.



## C A P U T XXXII.

*Quibus aliis modis Reformati nostri, novi testamenti auctoritatem concutiant atque convellant.*

**T**Andem ut nonnulla quæ adhuc ad novū testamentum attinent, specialiùs exequar: observo in-primis ipsum Lutherum, in Prologo novi testamenti seriò admonuisse lectores suos;



ut

ut hanc falsam aboleant opinionem; quòd scilicet quatuor sint Evangelia; *Siquidem*, ut ait, *Evangelium Ioannis*, est *unicum*, *pulchrum*, *verum*, ac *principale Evangelium*; aliisque tribus *longè ac longè præferendum & anteponendum*; adeò ut *Pauli & Petri epistola*, *longè præcedant tria illa Evangelia*, *Matthæi*, *Marci*, & *Luca*.

Quibus ille quidem, puri Evangelij magnus jactator; quid aliud, quæso, agere videtur; nisi, ut tria illa Evangelia sic deprimendo, præ altero, eorum auctoritatem suspectam & dubiam; efficiat; immò si attendimus, eadem reipsa non esse vera Evangelia significet. Quippe cum Ioannis Evangelium sic anteferat, ut illud dicat, *unicum, pulchrum ac verum esse Evangelium*, consequens sanè est, ut tria reliqua, vera *Evangelia* non sint. Immo, si teneat alibi dictorum consequentiam, conficitur ex eius mente, doctrinam cuius ipse autor est, dictis Evangeliiis potiore ac certiore esse.

*Lib. contra  
Regem An-  
glie &c.*

Etenim cum sæpe pronuntiet, non duntaxat certum se esse, quòd dogmata sua de cælo habeat; sed etiam alicubi dicat expressissimè: *cerrò novi, doctrinam meam non esse aliud quàm sacrosanctum verumque Evangelium*, ausus etiam, arroganti vanitate, quò dictis suis auctoritatem asfereret, sese hisce titulis inscribere: *Affero ego, Doctor Martinus Luther, Domini nostri Iesu Christi indignus Evangelista*; quis non videat, eum doctrinam suam potiori loco, quàm Matthæi, Marci aut Lucæ, revera habere; quando sibi certum esse testatur, doctrinam suam esse verum Dei Evangelium,

gelium, quod satis apertè de doctrina dictorum sanctorum videtur negare, aut in dubium saltem revocare. Ex quo ibidem factum, ut teste Lavathero, Calvinista apud Berleium Tr. 2. c. 2. sect. 10. §. 2. quidam Lutherani, iique non infimæ notæ, non veriti sint pronuntiare: se malle doctrinam Pauli in dubium revocare, quàm doctrinam Lutheri, seu Confessionem Augustanam.

Quemadmodum etiam apud eundem Calvinista quidam, pari insaniâ dixisse fertur: si Paulus eadē hora Genevæ prædicaret, quā Calvinus; relicto Paulo, sese Calvinum auscultaturum esse.

Ita videlicet sectariorum mentes sive fascinante, sive obturbante & circumagente spiritu erroris ac vertiginis, ut cū ex una parte, in rebus fidei controversis, ad Ecclesiæ Catholicæ sensum definitionemve recurrere, atque in ea acquiescere non sustineant; quodd indignum putent, verbi Dei veritatem, oportere (quod aiunt) humano sensu & interpretatione fulciri: ex altera tamen, unius hominis, ut de Donato aiebat Augustinus, nudiustertius, noti, (puta Lutheri, sive Calvini,) qui sese, nullis idoneis missionis suæ signis prolatis, Christi Apostolum aut Evangelistam jactitet, auctoritate sic irretiri ductarique se patiantur; ut eius doctrinam, tametsi toti antiquitati repugnantem, inconstantem, fallacem, sibi que ipsi contrariam, quā ex multis etiam capitibus adversus Deum ipsum blasphemam, attamen pro divina habeant, eamque ipsi indubitato Dei verbo, aut exæquent, aut etiam anteferant,



At enim in eo quod ad sacros Evangelistas attinet, eodem quo Lutherum spiritu seductum observes Guilielmum Clebitium, ex Luthera-  
no ( ut aiunt ) Calvinistam : quippe eorum te-  
stimonia inter se componens, immò opponens,  
perinde de iis philosophatur ; ac si in eis nulla  
inesset humanâ major autoritas. Perpendantur  
hæc eius verba ex libro quem scripsit, de *Victo-  
riâ veritatis, & ruina Papatus Saxonici. Mat-  
thæo & Marco, duobus testibus, plus fidei adhibe-  
ri debet, quàm uni Luca* ( ea videlicet, quæ Chri-  
sti Passionem ac Sacramenti institutionem spe-  
ctant, referenti ) *qui synaxi* ( inquit ) *non in-  
terfuit, quemadmodum Matthæus.*

Inscitè prorsus, atque absurdè. Tanquam vi-  
delicet in re præsentî ; attendendæ essent huma-  
norum iudiciorum formulæ ; in quibus, si testes  
contrarij sibi sint, cæteris paribus, plus fidei  
defertur pluribus quàm uni ; & uni oculato, plus  
quàm auritis decem. Cùm è contrâ ubi de ver-  
bo Dei agitur, non hominum, per quos loqui-  
tur Deus, privata conditio, sed solius Dei, per  
eos loquentis, eosque dirigentis, autoritas spe-  
ctanda sit. Quæ cum per se summa sit, atque  
suprema, & usquequaque infallibilis ; falsò  
supponitur, eos per quos loquitur, testari con-  
traria : neque potest uni præ altero minùs fidei  
deberi, nisi eo ipso desinat illius sermo esse ver-  
bum Dei : cuius ubicunque par esse debet, idest  
absolutè infallibilis, autoritas.

Quæ quidem rem ipsam vel mediocriter at-  
tendenti adedò clara sunt ; ut mirum sit eos, qui  
se orbis Doctores, Ecclesiæque Reformatores,  
eoque

etque cæteris oculatiores, haberi velint, in re tanti momenti tam turpiter allucinari.

Iam autem quid esse dicemus; quod ipse Lutherus, non tantum decalogum Moſis (qui tamen à Christo Domino in nova lege renovatus & confirmatus est) velut omnium hæreſum fontem, explodendum cenſuerit; ſed inſuper divinam illam precandi formam, à Christo diſcipulis ſuis, & per illos nobis, in Evangelio traditam, eam inquam, ipſe velut execrabilem habuerit in hæc verba in 5. caput Matth. ſcribens: *Nemo, Pater noſter, rectè precari poteſt, quin ſimul diras & execrationes admifceat. Nam Pater noſter ſine execrationibus non rectè oratur.* Quæ cum adeo infanè ſcriberet, profectò oportuit illi, aut cerebellum nimio vino æſtuaſſe; aut mentem ab ipſo Satanâ (à quo ſe regi alibi ſcripſit) occupatam fuiſſe.

Addere liceat; alio in loco, auſum eſſe, bellum illum Evangeliftam, ſeu veriùs inverecundum ſcurram, ipſius Dominicæ orationis, quaſi ab ipſo Christo minùs perfectè, ſeu expreſſè conceptæ, petitionem, uti loquimur, quartam in hunc modum, ſupplere dicam, an contaminare? *Domine Deus da uxorem, & panem quotidianum.* Perinde atque ſi (ut iocabundus ait, iſtud refe-rens, Greſſerus noſter) edixiſſet Chriſtus: *Querite primùm uxorem, & cætera adjicientur vobis.*

*Summula  
caſuum &c.  
de matrim.*

Cæterum ut per occasionem hoc adjiciam: orandi formulam ſectæ ſuæ propriam præſcribere volens Doctör Martinus: en quo mentis faſtu, quâ verborum in ipſum Deum contumelia

id aggreditur. *Oraturus, inquit, memento ut  
 Rom. 2. Ger- audacter & fronte perfrectâ, sive adiles, sive ge-  
 man. Vult. nus flectas; hocque modo Deum appelles. Domine  
 in orat. con- rogo, utque annas volo: ut Ita &, Amen, esse de-  
 tra Turcas. beat, & oporteat. Sic, inquam, & non aliter: aliqui  
 neque oro, neque oratum volo. Cui nimirum suæ  
 ut ipse appellat, audaciæ, ut ego, impiæ ad-  
 versus Deum impudentiæ, visus est alibi, tamen  
 si verbis haud minùs audacibus, hoc tanquam  
 umbraculum velle prætere: Quid, inquit, orando frustra obtundit aures Dei? Neque enim  
 In Assert. aliter Deus cum hominibus agit, quàm verbo pro-  
 mt. 36. missionis. Tanquam si aliis (etiam Dominicâ)  
 orationibus posthabitis, illam unicè proba-  
 ret precandi formam, quam, ex simili spiri-  
 tu, familiarem habuisse ferunt mox memoran-  
 dum Guilielmum Hacketum, insanum Nova-  
 torem: Domine tu potentiam habes; ego habeo fi-  
 dem. Ergo fiet.*

Atque interim iste, quem ante dicebamus, non hoc tantum nomine, sed aliis infrà tangendis blasphemus in Deum, iste legis Dei, verborumque Christi contemptor; est ille nimirum (ut ejus sectariis loqui placitum) ter Sanctus Martinus Lutherus, quo nemo maior ab Apostolis surrexit, immo proximo post Christum & Paulum loco collocandus.

Verumtamen omnem hoc in genere sive insanam impietatem, sive impiam insaniam superat, illa prædicti Guilielmi Hacketi ad Deum sub mortem precatio. Quippe qui, cum sese non Puritanorum tantum (quod vulgo appellabatur) sed universæ terræ Regem appellaret, sensimque inductus

inductus à suis , etiam se Christo parem haberi vellet , eaque gratiâ , hoc modo compelleret Deum : *Pater , scio , te , non minùs teipso , me diligere &c.* Tandem veluti perduellis , ad supplicium ei crimini constitutum damnatus , extremis sub patibulo verbis ( quæ ex Actis publicis refert Fitzsimon Britannomachiæ l. 2. c. 6. ) Deum non tam orasse , quàm sacrilegâ comminatione in hunc modum aggressus , proditur.

*Deus cœli , potentissime Iehouah , ac & eo , Domine Dominorum , Rex Regum , æterne Deus. Tu me nosti , verum ipsum Iehovah , quem misisti. Miraculum aliquod ostende his infidelibus , & libera me ab his inimicis meis. Sin minùs , cœlum succendam , & te è throno detractum , manibus meis lacerabo.* Sic ille. Et cum hac præclara prece , statim suspensus est , & in membra discerptus.

Quas equidem voces infani potius capitis quàm impiæ mentis esse dixeris. Sed eas tamen visum est hoc loco ita referre : ut ex hoc exemplo , aliisque quæ proferri possunt , perspiciat lector ingenuus : ad quam denique , quamque enormem , seu impietatem , seu insaniam , sensim deducat sectatores suos , cœca , & profana , neglecto scilicet Ecclesiæ Catholicæ sensu , quilibet credendi quod suus cuique suggerit spiritus , haud pridem in orbem Christianum inducta libertas. Quam spiritus sui suggestionem , miseri & cæci pro interiori Spiritus Sancti persuasionem habent : quando eum , non Dei , sed Diabolicum esse spiritum ; prout de Calvi-

nistarum spiritu testatur Lutherus, & de Lutheranorum Calvinus, vel ex ipsis constat effectibus.


Addo, quod his scriptis, de Thomâ Muntzero, è Lutheranò Anabaptistarum duce, traditum invenio à Florimundo lib. 2. cap. 1. num. 4. Eum videlicet haud absimili impudentia, ita, cum suis, Deum precari solitum: *Pater, infunde animo meo, propensum desiderium iustitiae tuae. Quod nisi feceris: te, tuosque Apostolos ad unum omnes abnegabo.* Sic ille insanus.

Cæterum, ut de Calvino, eiusve scholâ, istud huc pertinens extremo loco adjiciam: quàm ad horum quoque palatum parum faciat, nobis commendata ab ipso Christo orandi forma; ex his ostendi potest, quæ loco citato observat autor Britannomachiae; ubi & Calvinum testatur, in quatuor posteriores Orationis Dominicæ petitiones (ut ipse ait) datâ operâ declamare; & ipsam Dominicam orationem, Puritanis (id est, rigidis in Angliâ Calvinii discipulis) exosam esse.

Ex quo profectò jam minùs videatur incredibile; quod de Georgio Buccanano, his ipsis verbis tradit libellus, inscriptus *Elixir Calvinisticum*, & Andreae Scioppio attributus: in mortis (inquit) limine rogatus à Ministris, orationem Dominicam diceret, primam Propertij elegiam, cynæa voce exorsus est: *Cynthia prima suis miserum me cepit ocellis, Contactum nullis ante cupidinibus.* Negavitque aliam

aliam orationem Dominicam, sibi ante hos sexaginta annos extitisse.

Quod, quæso, quid esset: nisi cum Atheus ante vixeris, etiam Atheum occumbere? sed nempe vel inde confirmare licet, quod supra dictum à Calvinismo ad Atheismum, facilem ac pronam viam esse.



## CAPUT XXXIII.

*Calvinum, impiâ temeritate, Evangelicorum Christi sermonum, censorem & correctorem agere.*

Verum inter ea, quibus Calvinistas, indigne tractare scripturas divinas (contra quam ipsi insulse & false venditent) partim vidimus, partim visurifumus; nihil est fortassis, quod iustius ac vehementius adversus hanc sectam commovere possit, piam in Christum, ejusque verborum serio reverentem animam; quam si ipsum Calvinum audierit, non quomodocunque ipsum Evangelij textum adulterare & corrumpere, sed in suis etiam in Evangelia commentariis, passim ipsarum Christi, Incarnatæ, inquam, Dei sapientiæ, vocum, sententiarumque censorem, momum, & castigatorem agere, & si quid in illis minùs probarit, de eo, non aut dubitanter & velut discendi gratiâ, sed defenitè,

nitè & pro quadam quasi libertate Evangelicæ pronuntiare.

Attendat, quæso, sedulus Lector, quos eam in rem, & causâ exempli, ex Calvinî scriptis locos colligit Feuardentius dialogo quarto, errore Calvinî 99. itemque 100. & sequentibus.

Et priore quidem errore, ostendit eum passim, idque exemplo pessimo, Evangelicas Salvatoris locutiones improprietas arguere, ut cum ad illa Matth. 12. *Aut facite arborem bonam* &c. *Impropria*, inquit, *est locutio.* & cap. 15. *De corde exeunt cogitationes male* &c. *Impropria est loquendi forma.* & cap. 20. *Quicumque voluerit inter vos maior fieri* &c. *Improprie loquitur.* Et Ioannis 3. cap. *Qui autem facit veritatem, venit ad lucem. Hoc videtur improprie & absurdè ( seu, sine ratione ) dici.* Et cap. 17. *Pater quos dedisti mihi, volo, ut ubi ego sum* &c. *Est, quoad Grammaticam attinet, impropria locutio.*

Sed fœdiora, sunt, quæ subjiciuntur, errore 100. &c.

Etenim in primis in caput primum Ioannis v. 48. *Illâ*, inquit Calvinus, *Christi responsio ad Nathanaëlem, videtur parum apposita.* Similiter & Ioannis 3. de illis Christi ad Nicodemum: *Nisi quis renatus fuerit: è longè petitus*, inquit, *& propè intempestivus videtur hic sermo.*

At in Lucæ cap. 16. & 22. *Dura & longè petita videtur similitudo.* Item: *similitudo cribrandi non omni ex parte quadrat.*

Iam in Matthæi cap. 7. ad illa verba: *Omnia ergo*



*ergo quacunque vultis &c. supervacua, inquit, est illatio, quemadmodum sæpè in concisis sententiis particula ista abundat.*

Denique, quos extremos locos, velut magis impiè insolentes notari velim: In eiusdem Matthæi cap. 9. *Vi autem sciatis, quia filius hominis &c. videtur*, inquit; (Christus scilicet) *parum solidè ratiocinari.* Et in capite 12. *obiectam sibi calumniam primum refutat proverbiali sententiâ: videtur tamen parum solida esse refutatio.*

Tandemque in eiusdem 22. capite, illam Salvatoris divisionem, *in ea qua Cæsari, & qua Deo reddenda sint*, velut ineptam & inconvenientem redarguit, dicens: *videtur quidem non quadrare partitio; quia propriè loquendo, dum officio defungimur erga homines, obsequium hoc Deo impendimus.* Hæc omnia Calvinus.

Et credemus illum agitari divino spiritu, qui diabolicâ præsumptione, supra Christum ipsum se efferens; eius se censorem castigatoremque constituit, quem Pater æternus nobis ut supremum orbis Doctorem atque Magistrum proposuit? Eâ ipsâ impiâ audaciâ divinæ eius sapientiæ plerimum detrahens, & Evangelij ab eo conditi, cuius se Calvinus perstudiosum cultorem venditat, prorsus elevans ac pessundans auctoritatem.

Clausulæ loco istud attexo: Beza in videlicet Magistri sui sumiolum, verbis Gabrielis Archangeli Luc. 1. v. 37. in nomò Dei, cuius is nomine atque mandato loquebatur, præsumptione simili, ausum hanc suam censuram adscribere:

*Non*

*Non est impossibile apud Deum omne verbum. Iſt non credendum, nec univerſaliter recipiendum ſed conſtanter propugnare.* Ita ille in Catechiſmo brevi Geneveſi articulo 1. apud Fitzſimon Britan-  
nomachia lib. 2. c. 2.

Vt proinde ex his ad extremum confici valeat : ſi quod oraculum unquam effudit primarius ipſorum Propheta Lutherus ; illud ſanè deprehendi veriſſimum ; quod apud eundem autorem libro citato cap. 6. pronuntiaſſe fertur , in colloquiis Iſlebienſibus de verbo Dei , fol. 22. *Reformatos ſcilicet ſcripturas contemnere , in ordinem cogere , adulterare , irridere , exagitar e*  
Sic ille.



## C A P V T   X X X I V .

*Confessionem fidei reformatæ Gallicanam , ne ab ipsis quidem Calvinistis pro verâ & indubitâ fidei regulâ habendam eſſe.*

**P**aradoxum iſtud apparebit , quantum exiſtimo , pleriſque Eccleſiæ Reformatæ ſectariis. Quippe cùm ex ipſa vi vocis , ſenſuque communi, fidei Confefſio aliud non ſit, niſi formula quædam, complectens articulos, qui certâ fide credendi ſint , ab omnibus certam Religionem profitentibus. Et communis ſit vulgo perſuaſio, ſiquis aliquod eorum capitum , quæ eâ formulâ contineantur , aut negaverit , aut in dubium pertinaciter revocaverit , con-  
feſtim

festim ex Ecclesia , & à reliquo fidelium cœtu , velut hæreticum præcidendum ac separandum.

Igitur ut ista assertio , quam manifestum est magni esse momenti ad fidei Calvinianæ vanitatem demonstrandam , ipsamque aded Religionem Reformatam ab imo quasi concutiendam ; clariùs efficaciusque stabiliatur , primo loco itas attendi velim Calvinì voces , libro 4. Instit. c.9. §.8. *Quoties Concilij alicuius decretum profertur , expendi primùm diligenter velim , quo tempore habitum , quâ de causâ habitum , & quo consilio , quales homines interfuerint : deinde illud ipsum de quo agitur , ad scripturæ amussim examinari , idque in eum modum , ut Concilij definitio pondus suum habeat , sitque instar præiudicij ( seu velut habere Gallicam editionem testatur Gaulterius , admonitionis ) neque tamen examen , quod dixi impediatur.*

Et rursus , etiam expressiùs , ibidem §. 12. *Nulla , inquit , Consiliorum , Pastorum , Episcoporum nomina nos impédiant , quo minus , & verborum & rerum documentis moniti , omnes omnium spiritus ad divini verbi regulam exigamus , ut probemus , num ex Deo sint.* Ita Calvinus.

Quibus consentaneè ( velut antea retulimus ) cap. præcedenti §. 10. irridet Romanenses ( id est Romano-Catholicos ) quòd pro certo & confesso sumentes ( utique ex omnium sæculorum indubitato sensu usuque ) Concilium generale legitime congregatum , esse veram Ecclesiæ imaginem , simul absque dubio statuunt , regi immédiate à Spiritu Sancto eiusmodi Concilia , ideoque *crare*

Cap. 9. §. 9.

*rare non posse. Tandemque rem omnem quasi concludens, ita ex sensu suo pronuntiat. Hoc perpetuum esse nego, ut vera sit & certa scriptura interpretatio, qua Concilij sufragiis fuerit recepta. Sic ibi.*

Atque huic Doctoris sui doctrinæ conformantes se eius discipuli, in Concilio nationali Dor-dracensi ( de quo ex professio multa dicemus in sequentibus ) expressè declararunt, eius Synodi decreta non ligare conscientias, sed privatim cuique iudicium, relinquitur re ad verbi Dei normam & amissim, expensâ, illa vel admittant vel rejiciant.

Hoc autem jacto fundamento; idem consequenter de Calvinianæ fidei confessione dicendum; vel hinc manifestè, quantum arbitror, convinci potest. Quod synodo conflata, ex Calvino v.g. & paucis per ea tempora, quos in Gallia habebat, suæ Ecclesiæ Ministris, per quos condita est fidei confessio pro Galliâ, aut cuivis alteri in Germaniâ, Angliâ, Scotiâ, confessionem propriam condenti; nusquam appareat, aut ostendi possit, à Christo promissa, in rebus fidei definiendis, seu declarandis specialis & certa Spiritus Sæcti, assistentia; quæ interim appromissa nõ sit Generali, aut alicui œcumenicæ sive Catholicæ, sive (ut hoc demus) Calvinianæ Synodo; absque dubio magis expressè, quàm ulla Synodus particularis, Ecclesiam universalem repræsentant.

Ergo si ( vel ipsis Calvinistis consentientibus ) fas est unicuique fidei, etiam Synodi Generalis decreta, sive articulos ab eâ definitos ac tradituros, ad verbi Dei examen revocare, & si illi dictor

dictet spiritus privatus, hunc illumve articulum verbo Dei scripto minùs esse consentaneum, ab eo saluâ fide, & tutâ conscientiâ, discedere: multo id magis permissum erit, quoad articulos Confessionis ipsorum Reformatæ; quæ, etsi nomine aliud præferre videatur, in re non est aliud, quàm Synodi cuiusdam particularis, aut nescio cuius Consistorij, definitio.

Alioqui sanè, in contrario Philosophandi modo, magna statim, & oppidò enormis apparet inconsequentia, si ritè inter se comparentur extrema, & in hoc, aliove non absumili paradigmatè, res tota oculis quodammodo subijciatur.

Exorta olim est in Oriente, exempli gratiâ, &, magno tumultu, nec minore scandalo, inter Arianos Catholicosque agitata, de Filij Dei divinitate controversia. Et componendæ, Nicææ in Bithynia, cum Apostolicæ sedis legatis, legitimè convocati conveniunt universè trecenti decem & octo Episcopi, omnes virtute & doctrinâ, præstantes, permulti etiam in causâ fidei tormentis affecti, & inde relictis cicatricibus illustres. Atque re à Patribus diu multumque consideratâ, perpensis scripturis, examinatâ priscæ Ecclesiæ traditione, magno consensu declaratur fides Catholica, & Arius cum suis anathemate percellitur.

Atqui eo tanto molimine, si Calvino credimus, nihil adhuc absolutè actum est.

Quippe cùm ea universalis Concilij definitio, accedente qualibet Apostolicæ sedis approbatione, tantum vim habeat cuiusdam quasi præjudi

præjudicij, ita ut civiliter Christiano etiamnum liceat, decretum Concilij ad divini verbi regulam exigere; & si illud quidem, ex animi sui sententiâ, verbi Dei regulæ minus congruens invenerit, pro irritò & nullo habere.

Parte altera, Genevæ Allebrogum, non de uno alterove fidei Christianæ articulo, sed de reformandâ antiquâ Ecclesiâ, novaque quasi de integro, permultis, iisque summis, in capitibus, instituendâ, condicitur conventus. Conveniuntque cum Magistro Calvino primores discipuli, per eâ musteæ Ecclesiæ primitiva tempora, pauci & mali. Nam quales fuerint, quod ad mores attinet, primævæ illius Confessionis, seu confarcinatores dicas, seu comprobatores, ex authentico apparet ipsius Calvinii testimonio; quod nos superiùs occasione aliâ produximus.

Neque verò doctrinæ censu, multò instructiores fuisse existimabimus; si istud recipimus, quod magnæ vir autoritatis, Petrus Cortonus, ut sibi *Tractatus de* *fidei* relatione, compertum tradit. Ministris Genevensibus, pilæ lusu & aliis ineptiis, temporis multum perdentibus, cum à Francisco Balduino (Iurisconsulto insigni, & ipsi Calvino familiari tunc & intimo) pro amicitia admoneretur, cogendos potius, ut SS. Patrum lectioni, studioque vacarent, quò se idoneos ministerio suo redderent; frigide ad id respondisse Calvinum: se pro illis laborare, & satis fore, si docerent, quæ illis scriptis traderet.

Sed quales, quales hi fuerint, qui eum in finem convenire: conscribitur ab illis confirmaturve,

*Tractatus de*  
*sacram. &*  
*sacris. Missæ,*  
*discursus 6 c.*  
*20.*

ture, fidei Reformatæ confessio, 40. capitibus constans. Adjecto postea in aliis Synodis, ridiculo: *Romanum*, inquam, *Pontificem esse realiter ac propriè illum, quem scriptura extremis temporibus venturum prædixit, Antichristum.*

Et huic, sic fabricatæ adornatæque Confessioni, si vos ô rigidi Calvinistæ audimus; perinde atque si de cœlo delapsa, aut ab ipso Christi ore profecta esset, fides rata fixa indubitata habenda erit? Ita ut nemini prorsus liceat contra illam hiscere; aut (quod vos interim adversus cuiuscunque Concilij, sive Catholicæ, sive etiam vestræ Reformatæ Ecclesiæ, decreta conceditis) illam ulteriùs ad verbi Dei amussim examinare?

Et ubi jam erit generale illud atque expressum Doctoris vestri, loco suprâ citato pronuntiatum? *Nulla Conciliorum, Pastorum, Episcoporum nomina* (quæ subinde, inquit, tam falsò obtendi, quàm usurpari possunt) nos impédiant, quò minùs, & verborum & à rerum documentis moniti, *omnium Spiritus* (attendite vocum exaggeratam amplitudinem) *ad divini verbi regulam exigamus, quò probemus nùm ex Deo sint.*

Quando & è diverso, ex ipsiusmet Calvini mente, verbis quæ ibidem subjicit, expressâ, agnoscendum sit: *multo plus ponderis habere debere definitionem, in quam communiter Ecclesiarum Pastores, invocato Christi nomine, consenserint; quàm si quisque seorsum domi conceptam populo traderet, vel pauci homines privatim eam conficerent.*

R

Ac



Ad quod sanè non est , quod vel apparenter à Calvinistis respondeatur.

Nisi fortè quis dicat : speciale id esse in ipsâ Confessione fidei , quodd eius articuli omnes ac singuli, ex verbo Dei desumpti sint; sitque velut extractum quoddam textûs ipsius divinæ scripturæ : quod non ita competit cuiusvis Concilij declarationi.

Siquidem hoc ipsum significare , & exigere videtur , ipsa Confessionis Gallicanæ ratificatio : quæ ita habet : *Omnes Gallia Ecclesia approbant, & ratificant supra scriptam Confessionem, in omnibus suis capitibus, & articulis; ut qui integrè fundati sint in puro & expresso verba Dei.*

Contrà quippe apertè facit, quod Confessionem ipsam legenti manifestum sit ( potestque id esse altera probatio seu confirmatio pronuntiati nostri ) plerosque eius articulos , atque eos omnes qui Doctrinæ Catholicæ contrarij sunt, in nullâ scripturâ expressè & integrè haberi.

In quo enim , quæso , divinæ scripturæ libro in terminis suis, aut æquipollentibus, continentur isti Confessionis Reformatæ articuli , quos hîc subijcio ex Fevardentij versione ? Puta, imprimis , quod dicitur articulo 24. *Solâ fide nos iustificari.* Item ; quæ traduntur articulo 24. *Non esse licitum orare, nisi iuxta formam ab ipso Deo præscriptam, Matth. 6. Quidquid homines imaginari sunt, de intercessione sanctorum, qui excessere ex vivis, nihil esse nisi abusum, & fallaciam Satana. Purgatorium, vota monastica, peregrina-*

*peregrinationes ad loca sancta , Confessionem auricularem illusiones esse ex eadem Satana officinâ profectas. Articulo 26. In catibus Pontificiorum puram Dei veritatem exulare ; Sacramenta esse corrupta ; in iisdem , superstitionum & idololatrarum omne genus regnare. Demum articulo 35. Esse tantum duo Sacramenta toti Ecclesie communia. Quorum, & aliarum consimilium assertionum terminos attendenti, clarum est, nec vobis nec pedem in verbo Dei puro & expresse apparere.*

Sanè cum aliquando , à Catholico Principe Lutheranis Marchionis Durlacensis Theologis , propositi essent novem fidei Lutheranae articuli ; quorum quatuor priores erant isti : *Missâ non est sacrificium propitiatorium. Matrimonium non est Sacramentum. Sunt tantum duo Sacramenta. Non datur Purgatorium.* Urgerenturque, ut, secundum suam professionem, ostenderent; eos omnes, in terminis suis expresse contineri in verbo Dei ; ad extremum fateri compulsi sunt eos expresse in scripturâ divinâ non inveniri.

Cumque deinde, per eam occasionem, iisdem propositis articulis , ad hoc ipsum urgerentur Calviniani Ministri Sedanenses , variè primum tergiversati , ut qui rem arduam ab se flagitari sentirent ; eò demum confugerunt , ut dicerent ; *propositiones illas esse, negativas , negationes autem non posse aliter , quam per affirmationes probari.*

Quo quidem infelici responso ; partim scripturæ, styli parum peritos ; partim ut de

Vviclefo Valdensis , sese rurales dialecticos, ostenderunt.

Quasi nempe scriptura , non passim abunde propositionibus negativis : quarum utique veritas , ex ipsarum formalibus terminis in scripturâ expressis, probari queat, non autem per ullam affirmationem.

Nam , exempli causâ, per quam affirmativam ex scriptura petitam , probabitur hæc negativa, Iosue 10. *Non fuit antea , nec postea, tam longa dies.* Aut illa Ioannis 4. c. *Et nunc quem habes, non est tuus vir.*

Deinde, ut demus adversariis, affirmativas propositiones, negativis illis oppositas: has videlicet: *Missæ est sacrificium propitiatorium. Matrimonium est Sacramentum. Datur Purgatorium &c.* non satis expressè, aut sufficienter, ex scriptura , haberi, & ( quod ipsi quidem putant consequens) easdè de fide non esse. Hoc inquam, dato; per quâ dialecticam inferri potest, negativas illis oppositas, ut ipsi contendunt, ad fidem divinam pertinere? Cùm manifestum sit , ex hoc quòd scriptura propositionem aliquam non affirmet, consequens non esse eius contradictoriam ab eadem scripturâ, adstrui; quippe quæ de rebus innumerabilibus prorsus taceat, neque quicquam de illis; utramvis in partem definiat.

Attamen ne prorsus tacere viderentur Ministri Sedanenses; addiderunt denique , primam ex propositis assertionibus negativis , nimirum: *Missæ non est Sacrificium propitiatorium ;* contineri in illâ affirmativâ Heb. 10. v. 10. *Sanctificati sumus per oblationem corporis Iesu Christi semel,*

semel duas sequentes, in verbis illis Deut. 4. v. 2. *Non addetis ad verbum, quod vobis loquor &c.* Quartam autem: *non datur Purgatorium*, in illo 1. Ioan. 1. v. 7. *Sanguis Iesu-Christi emundat nos ab omni peccato*: & sic de aliis: sicut videre est in Epistola Ioannis Gauterij data ad Gubernatorem Sedanensem.

Qui tamen ministrorum conatus, frivolus apparet consideranti. Neque enim possunt illæ negativæ in his affirmativis contineri; cum ex suis terminis prorsus differant; immo neque possint illæ ex his etiam deduci per necessariam consequentiam; de quo erit aliàs opportunior dicendi locus.

Etenim præsentī instituto satis est: confessionis Calvinianæ articulos plerosque omnes, non integrè fundari in puro & expresso verbo Dei. Quod quandiu ostendi non potest, non vanitatis modo, sed etiam falsitatis, convincitur ipsa confessio.

Addimus denique maioris, seu confirmationis seu declarationis gratiā: quantumvis daremus in Ecclesiam Reformatam convenire; quod tradit Calv. l. 4. Instit. c. 8. §. 11. & 15. *Spernendū non esse Ecclesiæ consensū: ex eo quod tota fidelium societas, nihil pronuntiat nisi ex verbo Domini*; nihil tamen inde confici posse in rem præsentem.

Observandum quippe est, confessionem de qua loquimur, pro Gallis duntaxat conditam esse, atque editam, & à solis Galliæ Ecclesiis, non autē à tota reformatā Ecclesia approbatā aut admissam: cum tamen ut habet Regula iuris 26. in sexto: *Quod omnes tangit, ab omnibus approbari debeat.*

R. 3

Et

Et verò, teste Fevardentio in examine prædictæ confessionis : unaquæque reformatorum natio propriam sibi confessionem, & ut ipse ait, à Gallicanâ ferè toto cœlo differentem fabricata est ; idque ( addo ego ) plerumque ex nutu ipsorum Principum sæcularium. Atque , ut testatur Florimundus Remondus libro 8. de hæresis ortu &c. c. 7. n. 6. Angli Calvinistæ, Gallorum nec fidem, nec religionem, multò minùs cæremonias probant : Germania quoque nihil ferè cum utrisque habet commune.

Additque à Bernensibus Zuinglianis anno 1555. cum cæteris Calvini scriptis , ejus etiam confessionem ut hæreticam & blasphemam, publicè esse combustam.

Quid, quod ipsi quoque Calvinistæ in Synodo nationali Dordracenâ congregati confessionem , non Gallicanam , sed Belgicam ; & Catechismum , non Gallicanum , sed Heydelbergensem , velut verbo Dei magis consentaneum præeligere visi sint ? Quamquam in suis ipsi decretis, isti seu Catechismo, seu confessioni, non usquequaque congruentia tradiderint ; ut videre licet apud Ioannem Malderum Episcopum Antuerpiensem , in Anti-Synodicis.



## CAPUT XXXV.

*Variis exemplis ostenditur ipsos Reformatos, confessionem fidei suæ, pro indubitata credendorum regulâ non habere.*

**P**ORRÒ quæ in nostri pronuntiati comprobationem capite superiori, deduximus; videntur esse ejusmodi, ut non pauci de Calvinii schola simili aliqua consideratione inducti confessionem fidei suæ, non usquequaque certam ac fixam, sed ulteriori examine dignam censuerint, Quod nonnullis exemplis demonstrari, non parum conducet in rem præsentem.

In-primis igitur attendi possunt, quæ apud Batavos Provinciæ ultrajectivæ ordines in Synodo quadam Calviniana anno 1612. habitâ & à Petro Cudsemio è Belgico latine translata, & in lucem edita, eam in partem constituerunt sive declaraverunt. In cujus nimirum synodi Prologo, postquam articulo 2. declarassent; nullam aliam à se agnosci fidei vitæque regulam quam solum verbum Dei, scriptis Veteris & Novi Testamenti, nempe Prophetarum & Apostolorum, expressum & subinde articulo 3. injunxissent verbi Ministris, ut teneant & servant capita Christianæ Religionis symbolo Apostolico comprehensa; ac insuper libellum cui Titulus *Confessio fidei Belgicarum Ecclesiarum*: Attendentes simul ad concordem confessionem



fessionem aliarum Evangelicarum Reformatarum Ecclesiarum , in unam harmoniam anno 1581. redactam : ad extremum articulo 4. expressè, & Calvinì verbis consentaneè subdunt: *Iudicant nihilominus, præfatam confessionem Belgicam* ( cui utique Gallicanam confessionem non anteferant ) *aliorumque similes, examinabiles esse ad sacram Scripturam.* Vt scilicet exactius cognoscatur , utrùm illæ ipsi Scripturæ sacræ satis congruant. Per quod apertè ostendunt , se de confessionum Reformatarum sinceritate diffidere, neque illarum articulos pro indubitatis , aut certâ fide tenendis habere.

Ad idem facit , quod in eadem Batavia Calvinianæ sectæ Ministri in synodis Goricomensi atque Delpheni , expresso decreto , Confessionis Belgicæ & Catechismi Heydelbergenfis revisionem, expetendam ac procurandam esse constituerint. Quod quidem non facerent , nisi iudicaret aliquid in eis ulteriori discussione dignum , ac proinde non prorsus certum atque indubitatum esse. Ex quo consequens est utriusque scripti auctoritatem, apud illos ipsos vacillasse.

Cùm autem postea per occasionem nationalis Dordracenæ synodi eam revisionem postulare capissent Remonstrantes, principiò quidem, Revisionis nomine offensi ij, qui tam Confessionem, quàm Catechismum pro certâ fidei normâ haberent, ab eo postulato, valde se alienos ostenderunt. Sed ut appareat complures Patrum diversæ sententiæ fuisse , ad extremum tamen postulato annuit synodus. Quamquam , ut videre est in ipsis Actis , nihil denique effectum sit; intercedentibus



intercedentibus Theologis Palatinis, ex expresso mandato sui principis; qui variari quidquam in suo Catechismo noluerit.

Tandem quod ad mentem ipsius Dordracenæ Synodi, universam quasi Calvinianam Ecclesiam repræsentantis, & fermè rigidis Calvinistis constantis, deprehendendam attinet; ponderari velim hæc eius verba relata à Maldero supra, cap. 1. num. 14. *Synodus hæc Dordrechtana, per nomen Domini obtestatur, ut de Ecclesiarum Reformatarum fide, non ex concervatis hinc inde calumniis, aut etiam privatis nonnullorum, tum veterum, tum recentiorum Doctorum dictis, sæpè etiam aut malâ fide citatis aut corruptis, & in alienum sensum detortis, sed ex publicis ipsarum Ecclesiarum confessionibus, & ex hac orthodoxæ doctrinæ declaratione, unanimi omnium & singulorum consensu firmatâ, iudicent.*

Vbi In-primis observet Lector ingenuus: publicas Ecclesiarum Reformatarum Confessiones, & orthodoxæ doctrinæ declarationem in Synodo factam, ab ipsa Synodo, pari loco haberi; sive, istud utrumque, ut certam fidei Reformatæ ideam, normam, amissim perinde constitui. Ex quo ulterius consequens videtur: ut quemadmodum explicuit Synodus, non esse intentionis suæ, per declarationem, sive definitionem suam, constringere conscientias, sed unicuique esse liberum ab eâ privatim dissentire: id ipsum etiam de Ecclesiarum Confessionibus intelligere censenda sit.

consensenda sit. Cùm nulla appareat ratio, quantum est ex parte ipsius Synodi, de utraque normâ diversè sentiendi, seu decernendi.

Quia è contrà, siqua esset, eâ in re agnoscenda diversitas; potiùs censendi essent Synodi Doctores, decretorum suorum unanimi omnium consensu firmatorum incolimitati consulere, quàm particularium Ecclesiarum cõfessiones, easque ut suprà dicebamus, inter se subinde contrarias, falsas tectas tueri velle.

Porro ea quæ dixi, assertionem superiùs propositam, ad eò evidentem efficiunt; ut planè mihi persuadeam, complures etiam esse in Galliâ Calvinianæ sectæ Doctores (nam vulgus ista non attendit, aut considerat) qui perinde atque hi quos memoravi, de variis Cõfessionis suæ articulis sese intus affectos sentiant, quidquid exteriùs præferant. Cui sensui meo confirmando, non pigebit proferre, quod ex viro gravi accidisse cognovi in ipsa Galliâ, eam rem narrantem, ut sibi testatissimam, quòd ex ore eius, cui contigerit, accepisset, possetque adhuc ex eius amicis, qui superessent de ipsius facti veritate cognosci, si quem eius rei cupido incesserit.

Aiebat igitur, virum eo in regno pernobilem, comitem de Brassac, sectæ Calvinii per ea tempora professorem, qui deinde inter utriusque regij ordinis equites allectus, ad primarias etiam legationes ac præfecturas adhibitus est, cùm circa nescio quem Cõfessionis Reformatæ articulum, validâ pulsatus dubitatione, fluctuaret animo, nec perspiceret satis, quâ ratione id dogma,

dogma, inter certæ fidei articulos, propositum esset: eum scrupulum suum ut evelleret, accessisse demum ad Petrum Molinæum, non obscuri nominis, eâ tempestate, Charentonij Ministrum. Cui, cum æstus animi sui candidè aperuisset, illum pari sibi ingenuitate professum esse, circa rem propositam non absimili hæsitazione, seu diffidentia laborare se: neque adeò unquam sibi probatum, quòd is articulus in Confessionem fidei Ecclesiarum Reformatarum relatus esset: & siquidem sibi integrum foret; eundem, & quosdam alios, ex ipsa confessione expuncturum.

Quo responso profus inopinato, hæsit ipse comes nonnihil attonito similis; at mox ipse secum.

Itane igitur ludificamur, inquit; & in iis ipsis, quæ fidei nostræ Confessio, velut certâ fide tenenda proponit atque præscribit hæsitantes atque fluctuantes, omni vento circumferemur? nec jam fixi quicquâ habebit nostra Religio; sed id quod hodie, cõmuni Ecclesiæ consensu, ut fide certū tenuimus, cras expūgetur ex ipsis fidei articulis, & sensim, veluti conversâ scenâ, aliam denique ab illa primæva, Religionis faciem, decretorum formam aspiciemus.

Iamque verum erit, quod nobis objectant Pontificij: nos, temerè contempta veteris Ecclesiæ testatissimâ autoritate, pessundatis Patrum traditionibus, sanctissimorumque conciliorum decretis firmissimis, dum purum & putum verbum Dei sequi jactamus, illud pro suo quisque sensu ac gustu interpretantes, decreta fidei hodie figere, cras refigere; &, breviter, pro puro Dei  
verbo,

verbo, commenta nostra, humanosque sensus ac cogitationes obtrudere?

Quin igitur, quando in re tanti momenti, quanti est æterna animæ salus, tutiora omnia sectanda sunt: quin; inquam ( aiebat ) veteri potius nosmet reddimus Ecclesiæ; quæ depositum Catholicæ antiquitatis, & SS. Patrum, circa scripturæ sensum, & fidei dogmata, perpetuâ serie usque huc deductis traditionibus insistens, in eo quod semel, ut ad fidem pertinens constituerit, perseverat immota, vera nempe columna & firmamentum veritatis.

Hæc igitur ille, hisquæ paria secum ipse convolvens, perinde atque si Deum intus se admonentem sentiret, atque his Augustini verbis, libro de *utilitate credendi* cap. 17. hortantem; ubi enumeratis variis præsidiiis; quibus in salutis viâ quærendâ, humanæ mentis imbecillitati consultum voluit, summa atque benigna Providentia: *Cum igitur ( ait ) tantum auxilium Dei, tantum profectum fructumque videamus: dubitabimus nos eius Ecclesia condere gremio, quæ usque ad confessionem generis humani, per successiones Episcoporum, frustra hæreticis circumlatrantibus, & partim plebis ipsius iudicio, partim Conciliorum gravitate, partim etiam miraculorum maiestate, damnatis, culmen autoritatis obtinuit: Cui nolle primas tradere, vel summe profectò impietatis est, vel præcipuiis arrogantia.*

Quæ sanè omnia in Romano-Catholicam Ecclesiam speciali titulo, proprioque iure convenire statim animadvertet, quisquis voces ipsas, absque contrario præiudicio, expenderit.

Inter

Inter has igitur cogitationes, mutandæ deinceps Religionis consilia coquens, ac parturiens generosus animus, Deo illuminante, manus dedit agnitæ veritati, & quod prudenter deliberavit constituitque, promptè & securè aggressus, Romanæ gremio sese condidit Ecclesiæ.

Tu, siquis hæc legis eodem forsitan in Labyrintho oberrans, & siqua te tuæ salutis in tuto collocandæ urget sollicitudo, parili te filo evolve.



## CAPUT XXXVI.

*Assertionis suprà posite aliunde petita confirmatio.*

**I**dem fidei Calvinianæ incertum, ambages, perplexitas; sive, qui eius articuli ad dictæ Confessionis quasi substantiam pertineant, obscuritas atque dubitatio; vel inde quoque manifestè ostendi potest; quod istius sectæ ac discipline coryphæi, hos etiam qui, de aliis sectis, in multis confessionis suæ articulis à Calviniana seriò palamque dissentiant, attamen in suæ fidei communionem vocent, & unius secum Ecclesiæ membra esse profiteantur; Ex quo consequens, est, quod dicebamus, ex ipsorum sensu, non omnes fidei Calvinianæ articulos, pro indubitatis, & quorum assensus ad salutem æternam necessarius sit, haberi, & hinc ulterius ipsius Confessionis auctoritatem incertam & vacillantem esse.

Audiat

Audiat in primis Theodorus Beza, qui epistola primâ ad Andream Duditium, ( in qua illum principio vidimus, fœderatorum suorum in materiâ Religionis inconstantiam deplorantem, de Lutheranis, Calvinistis, Zuinglianis, aliisque sectariis agens : *Colligimus*, inquit, *omnes cum Christo*; & *in re ipsa convenimus*; etiam si, *vel in ratione docendi adhuc, discrepemus*, *vel etiam in rebus nonnullis, salvo tamen manente fundamento.*

Et Paulò post, loquens de erroribus Vvestphali, Heshusij, Brentij, aliorumque Lutheranorum à se refutatis, expressè ait : *eos (excepto ubiquitatis dogmate) non esse ex earum questionum genere, quæ substantiam ipsam Christianæ Religionis respiciant.*

Circa quæ, pluribus, quæ urgeri possent, prætermisissis : Quæro ex te duntaxat, mi Theodore ( ut te ego compellem blandius, & non cum illo ex amicis tibi Lutheranis, memorato scilicet Tilmanno Heshusio, Epicuræum te, & blasphemum scurram appellem ) quæro, inquam, ex te, an saltem controversiam illam, de verâ & reali, vel figuratâ tantum, Corporis Christi in Sacramento præsentia, in minimis habeas, aut articulum illum ad substantiam ipsam Christianæ Religionis pertinere non putes?

Nam si quæstionem hanc pro tali habes, cuius pars utralibet, salvâ Religionis substantiâ, & fidei unitate, teneri possit : cur eâ de causâ, ad id insolenter baccharis in nos? cur eo præsertim nomine, nos ut hæreticos, ut impios, ut idolatras averfamini? Si autem è contrâ, cum articulum,



articulum , uti revera est , summi in Christianâ Religione momenti esse existimes ; atque ea-  
 propter , dogma de figuratâ duntaxat cor-  
 poris Christi sub sacris symbolis præsentia,  
 inter primarios fidei Calvinianæ articulos  
 reponitis:quâ fide,per Deum , quamque rectâ  
 mentis conscientia,immò quàm enormi, quam-  
 que probrosa, in fidei negotio contradictione,  
 oppositum Lutheranorum dogma,quod pro hæ-  
 resi apertâ habere debes,profiteris nunc (excep-  
 to illo , de Brentianâ ubiquitate ) substantiam  
 ipsam Christianæ religionis non respicere ; Et  
 dum salvum sit fundamentum , hoc est ( quan-  
 tum ex ipsis circumstantiis datur intelligi) dum-  
 modo in impugnanda Romana Ecclesiâ dam-  
 nandisque,quas vocant,Papisticis traditionibus,  
 & puro putoque verbo Dei scripto , pro regu-  
 la fidei sequendo,deque iustitia solius fidei se-  
 cum conspirent ; cætera non esse tanti momen-  
 ti , quò minùs ij censeantur in eandem fidem ac  
 Religionem reipsa convenire.

Ex antiquâ rursus familiarique hæreticorum  
 indole ; de quibus jam olim Tertullianus , de  
 Præscriptionibus cap.41. *Pacem quoque, inquit,  
 cum omnibus miscent. Nihil enim interest illis,  
 licet diversa tractantibus, dum ad unius verita-  
 ris expugnationem conspirent.* Cui consonans S.  
 Hieronymus in cap.7.Isaïæ , dicit , id quod ibi  
 de Razin & Phazee dicitur , juxta anagogen re-  
 ferri ad hæreticos , consentientes sibi , ut ex-  
 pugnent Ecclesiam.

Ergo idem dogma de vera & reali in Sacra-  
 mento Christi præsentia , seu de orali , ut ipse  
 loquitur,



loquitur , corporis Christi manducatione ( attende , amo te , Lector optime ) ex Evangelio secundum Bezam , in ore Catholico impium delirium est , monstrum cyclopicum , commentum denique , quo nihil neque magis falsum , neque minus ad Sacramentorum finem accommodatum fingi potest ; quæ sunt ipsius Bezae voces parte 2. de re Sacramentaria q. 56. & 58. id ipsum in ore Lutherano , quamdiu quidem de causâ communi , sive de susceptâ adversus Catholicos conspiratione fovenda agitur ; quidam est , quod ferri , sive dissimulari possit , utpote jam ipsam Religionis Christianæ substantiam non respiciens.

Ita nempe res habet , quatenus scilicet , ut Sampsonis vulpeculæ , colligati , caudis , ad Ecclesiæ Romanæ segetibus perniciem importandam , consentiant. Nam si inter illos , de dogmate aliquo controverso propria lis instituitur ; jam sibi mutuo aperti hostes , & hæretici sunt ; atque ( ut separati capitibus ) adversus invicem , non tantum latrant , Ambrosij phrasi , sed seipsos quoque dirè commordent & lacerant.

Siquidem his Sampsonis vulpeculis ex mente Patrum , ritè adumbrantur hæretici : qui , ut ait S. Augustinus , scribens in Psalmum 80. *Consistentes in posterioribus , tanquam caudis colligati , trahunt ignem corruptentem , sed non incendunt nostrorum segetes.* Ambrosius autem in Psalmum 118. enarratione 12. ait , *per hanc figuram significari ; quod fraudulentis homines , & maxime hæretici , libe-*

*rati*

*ram habeant linguam ad latrandum, sed exitus infelices.*

Verum, ut à Beza in præsentia me expediam; quando is, super re huic affini, non ita post nobis erit iterum conveniendus: duo quædam hoc loco, ex eo libens intelligam.

Primum: quidnam causæ ipse proferre possit, cur cæteras quidem Lutheranorum Calvino ad- versas opiniones neget Christianæ Religionis substantiam respicere; ipsumque dogma præsentia Christi in Sacramento, in quo Calvinistæ capitaliter à Lutheranis dissident, non dubitaverit inter adiaphora referre; attamen dogma ubiquitatis, unum unice exceperit. Quia etsi istud per absurdum esse, confitendum sit, non tamen hæc potest propria ac præcisa esse ratio, cur singulariter excipiat a communi cæterorum conditione. Præsertim autem cum ipse Beza alibi ab eo se non alienum ostenderit. Vti apparebit, si quando prodeant, quæ affecta habemus, de corporis Christi in Sacramento veritate.

Sed nimirum, quibus per novi Evangelij scita, licitum est ex spiritu privato, hoc est in re ipsa ex proprio cuiusque arbitrio, sensum qui eis placuerit, scripturæ verbis assignare, & sic quodammodo, quod sibi complacitum fuerit, fidei suæ articulū facere, hoc nihil mirum est, pari licentiā, quinā, ut ita loquar, primi aut secundi aut tertij ordinis sint articuli, definire; aut etiam eidem dogmati, prout rebus suis commodare censuerint, nunc majus, nunc minus pretium, æstimationemve, si- ve certitudinem, taxare.

Ex quo consequens sit, quod principiò signifi- cabamus, articulorum Calvinianæ fidei autorita-

S

tem

tem etiam apud ipsos Calvinistas incertam atque dubiam esse.

Alterum: si Beza, illud ipsum dogma de reali Christi in Sacramento præsentia, cum ea quæ nunc ex ipso protulimus traderet, etiam in Tilmanno Heshusio tolerari posse, & dissimulari censebat: quâ ratione, cum adversus ipsum eo de argumêto scriberet, scânâ jam conversâ, & quod eo loco ita ad suas rationes faceret, licuerit illi eundem Tilmannum, eo ipso nomine; *Polyphemum cyclopem, simium caligatum, asinum bipedem, ignorantissimum sophistam, petulantissimum furciferum, appellare*; & aliis exornare bellis encomiis, quæ Gallicè expressa legere est in Petri Cottoni Relapsu Genevæ plagiarîæ, Dialogo 3, §. 10.

Veruntamē hoc & similia ad scopum nostrū apprimē faciunt; quod vel hinc clariùs appareat, apud sectarios nihil esse fixum aut stabile: sed illos nunc in hanc, nunc in oppositam partem inflecti, prout illos oblata occasio, vel diversus animi impulerit affectus.

Quid, quod ipse Calvinus; qui, ubi nobiscū, de eadem reali corporis Christi in Sacramento præsentia, disceptatio est, tantâ exandescit animi impotentia, ut insanum appellet, si quisquam instet, *quidni faciat Deus, ut caro eadem plura diversaque loca occupet*, & cuius discipuli, eius maximè dogmatis gratiâ Religionem ac fidem Romano-Catholicam, averfantur: is ipse in suis adversus Joachimum Vvestphalum Lutheri sectarium Admonitionibus, postquam super eodem fidei dogmate diutulè esset altercatus; ad extremum, quasi Lutheranos nollēt nimium habere offensos,

offensos; iis similis qui aliquantum inter se digladiati, dextras conjungunt pacis gratiâ; ita ille postremâ admonitione, quasi in re non tanti momenti pacem affectans, adversarium, his alloquitur: *Prudenter considerant quod res est; cum utrimque inter nos conveniat, verè nobis in cœnâ offerri Christi corpus & sanguinem, quorum substantiâ anima nostra pascantur, & tantum in modo manducandi differant nostra sententia, non esse hanc iussam digladiandi causam.*

Eundemque refert apud Contzen in Iubilo ad annum 1535. Henricus Eckardus Lutheranus, patri dissimulatione alio quodam loco dicentè: *quæ initio certaminum maximè exacerbarint animos, nunc esse extra controversiam; solum de modo edendi certamen esse.*

Similique modo cum ipso Luthero molli manu rem agunt Sacramentarij. Quippe, qui, ipso Luthero teste, libro què inscripsit; *Defensio verborum cœnæ, contra fanaticos Sacramentariorū Spiritus: Rem aiunt esse levem, & pugnam exiguam, indignioremque, quàm ut propter eam charitas Christiana rumpatur.* Sic illi.

Acriter ob hoc indignante Luthero; & eam hæresim, velut à diabolo profectam, execrante.

Quid autem hîc dicas, cordate lector?

Nisi tibi videri: eiusmodi homines in re tanti momenti, sic se gerere, quemadmodum olim, teste Macrobio, joco innocente faceret lussit Casellius Romanus Iuriconsultus. *Lapidatus*, inquit citatus autor, à populo *Vatinius* (odiosum utique toti populo Romano nomen) *cum gladiatorium munus ederet; obtrinuerat, ut Ediles ediceret, ne quis*


Lib. 2. S. 41.  
c. 6.

*in arenam, nisi pomum misisse vellet. Fortè iis diebus Casellius, consultus à quodam, an nux pinea pomum esset, respondit: Si in Vatiniū missurus es, pomum est. Quasi è diverso si in quem alium, non perinde atque Vatinius, invisum populo, missurus esset, non jam pomum, sed prædura nux sit, & instar lapidis habenda. Ita enim illi, si qua de dogmatis instituatur disceptatio, prout rationibus suis magis expedire senserint, uni eidemque articulo, aliud & aliud nomen imponunt; & si, exempli causâ adversus Papistas agatur, jam utique putida hæresis, commentum impium, portentum cyclopicum est; contrà autem, si cum iis agant, quos minùs velint habere offensos, res utique adiaphora est, & quæ salvo fidei fundamento & charitate Christianâ defendi possit.*

*Quemadmodum olim oblires itidem fecisse Pelagium & Cælestium; qui tamen cum S. Augustino de peccato originali acerrimè digladiarentur; tamen, quòd ita è re sua esse existimarent; volentes astutè; quæ verba sunt S. Augustini, hæreseos invidiam declinare, asseriebant istam, præter fidei periculum, esse quæstionem: ut videlicet, si in eâ fuissent exorbitasse convicti, non criminaliter, sed civiliter, errasse viderentur. Sic Augustinus.*

*Sed jam Beza rursus, ex promisso nostro, nobis conveniendus est.*

*Lib. 2. contra  
Pelag. &c.  
cap. 2.*



## CAPVT XXXVII.

*Eandem in finem , aliud Bezanum pronuntiatum  
expenditur.*

**T**heodorus Beza in Iconibus virorum Illustrium sui sæculi ; ubi, permixtim indiscretèque commemorat , atque ut de vera Christi Ecclesia benemeritos , exaggeratè commendat, quotquot sæculo superiore, ab Ecclesiæ Catholice gremio se subducentes, ipsi quoque Romano Pontifici furiale bellum indixere ; tamen aliàs ab ipso Calvino , ejusque sectâ , capitaliter dissideant. Eò denique vesaniæ devenit, ut diceret : Primos ac veros Europæ Apostolos, hosce fuisse: *Ioannem Huf, & Lutherum in Germania ; Zuinglium & Oecolampadium in Helvetia ; Hieronymum Savanarolam in Italia, Farellum & Calvinum in Gallia ; Vvicleffum & Bucerum in Anglia ; Ioannem Knox & Buccananum in Scotia.*

In quo quidem suo , egregio scilicet commento , Beza ; partim, vel iplo primo intuitu, absonum sese & ridiculum ; partim inscientem ac vecordem ostendit. Ut qui minùs advertat quantum eo facto, sive generatim universæ Reformationum Synagogæ, sive speciatim suæ Calvinianæ sectæ præiudicet. Quod placet hoc loco aliquanto pluribus exponere.

Primum enim ; ut jam de electis à Christo ;

S 3

sibi que

sibi que adjunctis, Apostolis, Discipulisque nihil dicam: habuerunt Europæ nationes, proprios singulæ, sive à prædictis Apostolis, sive plerumque à Romanis Pontificibus, submissos Doctores; qui, ob Evangelium, fidemque Christi, sive Gentibus illis primùm investam; sive, cum eius observantia intercidisset, instauratam; earum Gentium Apostolicogno minati sunt. De quibus, si ex Beza quæram, quo loco illos habendos censeat, nescio sanè quid responsurus sit. Constringetur enim Vulpes ista, hoc dilemmate; ut si veros fuisse Christi Apostolos confiteatur; cogatur consequenter fateri temerè se, ac falsò, mendaciterque scripsisse; Novatores illos, quos memoravit, primos fuisse ac veros suarum Gentium Apostolos. Sin falsos dixerit: apertè sequatur, diversam profectò doctrinæ, morum, Religionisque formam, Gentibus illis ab initio instillatam, ab ea quam nunc vulgo prædicent, isti, novi typi morisque Apostoli; Neque enim ab his appellari possent falsi Doctores; nisi quia doctrinam tradiderint ei contrariam; quam ipsi veram existiment.

Igitur, sicuti Arianos Mediolanenenses, sermone de Sanctis MM. Gervasio & Protasio, olim redarguebat B. Ambrosius: qui, cum testatissimam notissimi cæci, ad attractum vestis, quâ eorum Sanctorum *Sacræ Reliquiæ* (sic enim loquitur) vestiebantur, illuminationem; omninò negare non possent; id tamen meritis ipsorum Martyrum attribuendum diffiterentur; illos, inquam, ex hoc scitè redarguebat Sanctus Præsul; quod eam gloriam Sanctis Martyribus invidentes,

*ostenderent*



*ostenderent alterius fidei fuisse Martyres, quam ipsi credunt.* Ita prorsus de Beza & Novatoribus dicere liceret in proposito. Neque enim illos primævos Gentium singularum Apostolos falsos Doctores appellarent, nisi (quod item ait Ambrosius) *fidem in his fuisse eam, quam ipsi non habent, iudicarent.*

Atqui nec hoc ipsum passim obtrudi, vobis, & boni, sat tutum esset. Neque enim audire sustinebunt populi, sese principio, à suis illis Apostolis, quos ut sanctitate vitæ præstantes, & prodigiis illustres, ipsi suspiciant, falsâ religione imbutos: Quidquid de eo sit, quod dicere soletis, irrepsisse sensim abusus varios; quos reformari oportuerit. Possetisque merito, cum Scribis illis à Christo de Ioannis baptismo interrogatis, apud vos ipsi cogitare: si dixerimus, hunc illumve hujus illiusve nationis Apostolum *Luc. 10. v. 6.* falsum Doctorem, seductoremque fuisse: *Plebs universa lapidabit nos.*

Sed neque; corruptam, ab ipsiis Gentium conversionis initiis; fuisse Evangelij doctrinam; satis consonat Magistri vestri, disciplinæque vestræ; principiis; quemadmodum alibi expressius demonstrabimus:  
Hoc primum esto.

Alterum est; quod etiam audire refugitis: Religionem vestram novam admodum & priscis sæculis incognitam fuisse: Nam cum nulla forma Religionis Christianæ, in provincias Europæ inducta sit, ante primos illorum Apostolos; secundum illud veri Apostoli: *quomodo Rom. 10. v. 14.* *audient; aut credent sine predicante?* aliunde

autem ante Vvicleffum nullus à vobis proferatur, vestræ Religionis Reformatæ in Europa verus Apostolus: manifestum est ( ut id vobis demus) fidei vestræ prædicationem ab annis circiter trecentis; quot nempe à Vvicleffi ævo, ad hæc usque tempora fluxere, initium suum sumpsisse. Nisi fortè proclamante Calvino libro 4. Instit. cap. 9. §. 8. & cap. 1. §. 17. Ecclesiam Dei veram scilicet, sive ( ex eius mente ) prætensam reformatam; semper & fuisse, & extitutam esse: sicut illa dicitur, prioribus sæculis, invisâ fuisse & invisibilis: ita illi, ante Vvicleffi ætatem, Apostolos invisos & invisibiles assignetis. Somnia, tricæ, & nugæ meræ.

*In defens. ar-  
tic. fidei Ca-  
th. cap.*

Quid quod è diverso Martinus Lutherus; quem tomo 7. apud Cardinalem Richelium gloriantem audimus. *Primus fui, cui Deus, ea quæ vobis predicata sunt, revelare dignatus est:* quique in Epistola ad Argentinenses, adversus Zuïnglium, id ipsum his verbis repetit: Christum à nobis primò vulgatum audemus gloriari &c. non faciliè cuiquam de Apostolici primatus gloria concessurus sit.

Cùm & alioqui quod ad Ioannem Huss attinet, eum Lutherus non modò inter suæ Religionis antecessores, sed ne affectatores quidem numeraturus sit. Quippe, qui ut nosque iam supra admonuimus, contra sectarios recentiores docuit sanctorum invocationem, cultum Reliquiarum, monarchiam Papæ, sacrificium Missæ, transubstantiationem, & alia plura. Ut & propterea ( ut dicebamus ) ipse Lutherus in Colloquiis Germanicis; cap. de *Antichristo*, dicat;

dicat : Ioannem Hussum , præter omne meritum , igni traditum fuisse : *cum tamen à Papa* ( ut falsâ quadam exaggeratione loquitur ) *ne latum quidem unguem receperit* : Sive ut molliori voce , sed magis impia , in assertionibus articulo 30. scripsit : *Romano Idolo non parum detulerit*.

Similiter autem de Vyicleffo tradunt plerique autores : docuisse invocationem B. Virginis , cultum reliquiarum , & imaginum , septem Sacramenta , animarum Purgatorium. Quem proinde velut hererodoxum damnet ipse Melanchthon , epistolâ ad Fridericum Myconium , & in Apologiâ , articulo 8.

En quàm bello delectu suos Apostolos bonus Theodorus creavit , aut fabricaverit. Nam quod præterea Hieronymum Savanarolam Italiæ primum ac verû Apostolum nominarit : id inquâ ( aliis omissis ) ipso dictu , cuius qui de eo aliquid inaudierit , absurdum ac deridiculum est.

Verumtamen cùm Italiæ , ejusdem formæ Apostolum aliquem attribuere vellet ( & mirum est eum ipsi Hispaniæ similem honorem invidisse ) atque fortè legisset , Lutherum alicubi asserentem ; communem sibi cum Hieronymo Savanarola esse doctrinam ; eum , re non amplius examinâtâ factioni suæ asseruerit. Sed hoc Lutheri dictum , à Cardinale Rossensi fuisse refutatum , testatur Bzovius in Annalibus , anno Christi 1498.

Illud porrò ( quod præsertim huc facit ) quàm dictu fatuum & sensu inextricabile : Eos velut unius ejusdemque orthodoxæ Ecclesiæ ,  
primos

mos ac veros Apostolos , serid à Beza recenseri; quos manifestum sit , uti fide, ita & cæribus animisque divisos , à mutua inter se communione abhorrere , & sese invicem pro hæreticis , & à Satana seductis , habere. Quasi inter se possint , in fidei rebus , capitaliter dissidere Christi Apostoli , aut doctrinæ sibi contrariæ, Apostolicæ & sanæ censeri.

Atque, ut exemplo luculento istud declarem: si Lutherus, Calvinus , Zuinglius, veri Christi Apostoli sunt ; Apostolica doctrina erit : Corpus Christi, saltem in ipso usu, verè ac realiter sub pane & vino contineri; quia sic Lutherus; Apostolica doctrina erit : non sic contineri, sed tamen in cœna verè & substantialiter manducari; quia sic Calvinus: Apostolica doctrina erit : non verè & realiter , sed in figura tantum, seu contineri , seu manducari ; quia sic Zuinglius : singuli equidem veri Apostoli, ore Apostolico tradidère.

Quo sanè loco , meritò exclamem , cum germano Christi Apostolo: *Divisus est Christus?* Aut in Christi doctrina invenitur, *Est & non*; sive manifesta atque formalis contradictio?

Rursum si tam Lutherus , quàm Calvinus Beza confessione , verus Apostolus est : ergo Lutherò damnante Calvinum , & Calvino Lutherum; utriusque doctrina simul & vera & falsa est. Quia videlicet v. g. Calvini doctrina vera, & Calvini oraculo Lutheri falsa est; idem que vicissim dicatur de Lutheri doctrina.

Quod quam implexum sit ; monstruosum & inopinabile, videtur etiam cuicumque rudi manifestum.

Vlterius

Uterius autem attende Lector, quod vel rideas vel obstupescas. Definit Lutherus quasi ex Cathedra; & Stentoreâ voce denuntiat. *Hæreticos feriò censemus, & alienos ab Ecclesiâ Dei, Zuinglianos, & omnes Sacramentarios, qui negant Corpus & Sanguinem Christi ore carnali summi in venerabili Eucharistia.* Thesi 27. cōtra Tigari-  
nos.

Quo Anathematismo, cùm, inter alios, & ipse Beza feriat: quippe qui 2. partē quæstionum de re Sacramentaria, quæst. 58. & c. oralem (quam vocat) Corporis Christi in Eucharistia manducationem, ut monstrum merè Cyclopicum, & commentum falsissimum, explodit: eo tamen ipso, quod eius anathematis autorem agnoscit pro vero Apostolo, imprudenter sese condemnat ore Lutheri, eiusque contra se prolatam sententiam affirmat.

Ad extremum, & istud addamus, in genere majoris probri, & vecordiæ Bezanæ. Quod nempe is in Epistola ad Andream Duditium aliàs citatâ, Confessionis Lutheranæ (Augustanæ dictæ) doctrinam, quantumvis Calvini Confessionis, suæque doctrinæ contrariam, propheticam esse & Apostolicam pronuntiet; addens tamen, sese nihilominus non cogi illius assertoribus, in singulis subscribere, nec illos sibi.

In quo brevi tuo pronuntiato, quanta sit Horat. confusio, implicatio, repugnantia, cæcus es, ô bone, si non videas. *Vix illigatum tetri formi Pegasus expediet Chimæra.*



## CAPVT XXXVIII.

*Quàm non fraternè se tractent, fratres Evangelici, quos Beza contendit, ad unam eandemve Christi Ecclesiam pertinere.*

**V**Erum tamè, ut hinc etià magis intelligatur quam inconsideratè, & ad fines suos inopportunè contenderit Beza, in unum corpus, & quasi massam conflare, tot hæresum, tamque inter sese pugnantium colluviem: nominatim autem quàm absurdè; coniunctim Lutherum & Calvinum pro unius eiusdemque Ecclesiæ primis ac veris Apostolis propositos esse voluerit: demonstrari iuvabit hoc loco, & tanquam sub unum aspectum, exponi, quàm non familiariter, sed quàm invidiosis ac peracerbis elogiis, vicissim exornent atque depectant, Lutherus Calvinum in suæ sectæ professoribus, & Calvinus Lutherum in sectatoribus suis. Ad maiorem fidem ipsa proferam illorum verba, ab aliis quidem variâ occasione relata, sed quæ hîc præsertim videantur locum suum habere. Lutherus igitur à Gretsero relatus, lib. 1. contra Goldastum cap. 12. *Calvinista*, inquit, *sunt fanatici, progenies viperarum, animicida, impij, blasphemi, deceptores, sanguinarij, germani Turcæ, à Satana missi, & obsessi, perdiabolati, transdiabolati, superdiabolati.* His enim bellis phrasibus utitur ille (si superis placet) ipso autore Beza, primus ac verus in Germania Apostolus: **Qui**

Qui etiam expresse in Colloquiis mensalibus fertur esse professus : *eam inter suos, & Calvinistas, sperari posse concordiam, quæ inter Christum, & Iudam intercessit.*

Id non nesciente, neque obscure ferente Calvinio; cuius hæ sunt voces in 2. admonitione ad Vvestphalum : *Lutherani tam virulento odio in nos crepant; ut citius illis, cum Turcis pax futura sit, & cum Papistis, quam nobiscum inducie.*

At Calvinus vicissim, pari largitate Patriarchæ sui dicta remetiens, admonitione ultima ad eundem Vvestphalum, hisce coloribus, sectatores Lutheri depingit : *Lutherani, homines sunt vertiginosi, Cyclopes superbi, factio gigantum, phrenetici, bestia, prodigiose cæci, desperatè impudentes, falsarii & impij, calumniatores, protervi, plus satis bardi, fastuosi &c.*

En quâ ratione, præclari illi, nupero sæculo orbi monstratæ religionis Apostoli, non jam ut mulus mulum, amicè se scabunt; verum haud sanè familiariter, duris se cæstibus contundunt: & armis quidem viribusque adeò paribus, ut in incerto sit; uter alteri palmam maledicentiæ reliquerit.

Et credemus, vel hos adeò impotenter atque insanè, adeoque extra omnem Evangelicæ modestiæ regulam, in se invicem debacchantes, ubi reformando à Deo submissos Apostolos? vel autores doctrinæ adeò contrariæ & repugnantis, eodem Dei spiritu, qui sibi contrarius esse, nequit, agitados & impulsos fuisse? Aut in unam denique candemque Christi Ecclesiam, quod

Bezanus



Bezanus conatus cōtendit,convenire atque coire posse? Prius(quod aiunt)lupus ovē ducat uxore.

Et sanè à Maioribus suscepta acerba odia , in posteris etiam cum incremento perennare; ostēdunt in-primis in Germania , atrocissimæ contumeliæ , quibus assidue , seu voce , seu scripto, sese invicem incessunt ; Lutheranis subinde Sacramentarios , non Christianos , sed baptizatos Iudæos , & Mahumetanos , appellantibus. Ut non à vero videatur abhorrens , quod suprà audivimus dicentem Calvinum Lutheranis citiùs cum Papistis constituram pacem,quàm cum Calvinistis inducias esse futuras.

Nec verò blandiùs familiariusve se mutuò tractant palpantve Angliæ fratres Evangelici, Puritani , inquam , Calvinistæ, Formalistæ ; & Formalistæ seu Luthero-Papistæ , Calvinistas. Ut patere potest ex elogiis , quibus sese honorant apud Henricum Fitzsimon , Britannomachiæ Ministrorum l.2. c.5. lib.3. c.2. & lib.1.cap:8.

Vbi nimirum Puritani à Formalistis inter alia, dicuntur;*factiosi, contumaces, amentes , hypocrita canes mordaces vivorum ac mortuorum,perduelles discipuli Satanae.*

A Brounistis autem , quamvis ea secta ex Puritanis progenita sit ; vocantur *impostores perniciosissimi, Calvinistici cometa, nova Anglia portenta , Apostata perfidi.* Et alio loco:vos estis (inquiunt)*fucati Hypocrita,Pharisaici ieiunij pracones,psendo-propheta,pestiferi seductores , iurati, conducti,ac cauterizati discipuli Satanae,perditi illutores,Apostata Reformatores.* Sic illi.

E contra autem Puritani Formalistas, Protestantēve, aiunt, esse *multitudinem reproborum & Atheorum, cæterum animicidarum, Porcos, Canes, Lupos, &c.*

Episcopi autem Protestantes, dicuntur illis, *partus diaboli, semi-Antichristi, Latrones, Sanguisuga, Dracones, Episcopi diaboli, &c.* Satis hæc planè?

Et satis sanum censebimus Bezam, qui hos suorum Apostolorum discipulos ita diversè animis affectos, adeoque dissidentes sensibus in unam seu fidem, seu Ecclesiam reipsa convenire existimet; aut iis, qui rem intelligant, id sese temerè persuadere posse putet.

Nisi quis fortassis, scetæ genium, & totius rei processum propius attendens, in eam è contra nec vanè, deveniat suspicionem, intimum illum Calvinæ discipulum, eo in negotio, non ex animi sui sententiâ, sed dicis, quod aiunt, gratia, & in speciem tantum ista proferre; neque veritati, sed tempori & rei suæ, ut aliàs non raro (de quo postea) eâ orationis formâ servire.

Quorsum enim inquiet, in illis virorum Illustrium iconibus, eorum quos sibi præsertim infensos sentiat, perinde atque si de ipsa Christi Ecclesiâ humanoque genere, supra omnem modum eximieque meriti essent, adeò affectata & importuna laudatio?

Ut cum exempli causâ Lutherum ait, *Evangelica lucis flamma, è densissimis tenebris sensim proferenda, præconem à Deo O. M. humani generis miserto, excitatum, & ad repurgandum Dei Templum*

*Templum evocatum esse. Et infra: Lutheri laboribus tantum debere Ecclesiam instauratam, quantum à multis sæculis vix cuiquam debet.*

Ibidem Zuinglium, cujus secta, sectæ Calvinianæ inimica est, commendat tamen ab excellenti doctrina, summa fide, invicta constantiâ quibus scilicet Alpinarum Regionum partem longè maximam, ex Anti-christi tyrannide, in Christianam libertatem asseruerit.

Similiter autem Petrum Vermillium cognomento Martyrem ibidem extollit, ut rarum Phœnicem, excellentem Theologum, ac fidelem Martyrem: qui tamen ob invec̃tam à Calvino, realem Christi in Eucharistia (absque reali sub sacris Symbolis præsentia) perceptionem, seu manducationem, à Calvino deficiens, dum sese ad illam refutandam accingit, non sine veneni à Calvinistis propinati suspitione extinctus est; ut autoribus citatis, tradit Gaucherius; ubi de ipso Petro Martyre sæculo 16.

Tandem Calvinistæ qui SS. Patres, immò & Christi Apostolos suis maledictis incellere non verentur; cæterarum sectarum, tamen si Calvinio adversantium præcones miris laudibus efferunt.

Quorsum autem inquiet? Non quod id tribuant eorum, quos laudant gratiæ; quippe qui, ut vidimus infesto odio sese invicem insectentur: sed quod suæ causæ ita se studere atque servire existiment. Sive, quodd hoc modo futurum videatur, ut saltem apud ignorantes existimetur ipsorum secta, abundare viris illustribus.

Sive,

Sive, quòd hoc modo futurum videatur, ut saltè apud ignorantes, existimetur ipsorum secta, abudare viris illustribus. Sive etiam, ut hac ratione cæterarum sectarum professoribus, sibi quodam modo conciliatis, eos sibi adjunctos & quasi succenturiatos habeant, ad Ecclesiæ Romanæ impugnationem: ut quamvis cætera divisi ( iuxta aliàs à nobis prolatam, de mente Patrum, Sampsonis vulpium allegoriam) attramentis colligati sint, ad segetibus nostris, pro voto suo, perniciem aliquam importandam. Sive denique, quòd vesano odio, & cæco furore in Romanum ( ut passim appellant ) Antichristum incitati, & illius subversionem, quem sibi præsertim infensum intelligant, omni studio & unice intenti, cætera dogmata, quibus ab invicem capitaliter dissentiunt, dissimulanda putent, & isto veluti salvo manente fundamento, reliqua omnia, pro adiaphoris, habeant.

Quemadmodum etiam videas Calvinum non utique ab simili Spiritu, in confessionis Regi Christianissimo oblatae, articulo 28. omnes Romano Pontifici adhærentes, verbis odiosis & exaggeratis, abscissos & separatos à corpore Christi, declarare: cæteros autem sectarios, qui nihilominus ipsius confessioni adversentur, affectatè præterire. Et ipsum Bezam epistolâ illâ ad Andream Duditium, professores earum sectarum, *qua Romano, ut inquit, Pontifici bellum indixerunt*, indiscretè pro suis agnoscere: non intelligentem, sese eo pacto apertissimè confirmare, quod in præsentì contendimus, & ampliùs patebit in sequentibus apud istos

T Ecclesiæ

Ecclesiæ Reformatores, perplexa & incerta esse omnia, neque satis constitui posse, quidnam ab ipsis necessariò credendum sit, sive quos suæ confessionis articulos, sentiant ad substantiam suæ fidei pertinere.

Atque, ut hinc quoque, Calvinistici sensûs ambages, & inextricabilis quasi Labyrinthus appareat; ex hæcenus dictis inferri potest: falsò quidem reipsâ, sed non sine magno in hoc Bezae doctrinâ, fundamento, edixisse Henricum Brandium, Zelandum Calvinistam, quod ei tribuit Hermanus Hugo in defensione consultationis Lessianæ lib. 3. Quippe qui ad argumentum Lessij, Ratione 3. obiicientis: si Calvinus missus sit à Deo, ex Bezae sensu, ut veras Christi Apostolus; Lutherum à Deo sic missum, non esse, & è contrario: eò quòd uterque alterius doctrinam erroris & hæresis damnet. Audacter negat id verum esse; quia inquit, si dissensio inter illos est, ea tantum est, in doctrinæ quadam circumstantiâ, non in eius fundamento. Quod, etsi ex iis, quibus illos vidimus inter sese acerbè & implacatè conflictari, manifestè falsum appareat: tamen Bezae exemplo, visum est Brandio, quò Lessianæ objectioni occurreret, dissensionem illam elevare, & tanquam in ipso doctrinæ fundamento consentientes (quodcunque tandem illud sit fundamentum, nec enim explicant) eos eatenus inter sese conciliare.

Et simile quiddam ausum esse videas, Iuellum quendam in Anglia verbi ministrum; relatum in Britannomachia libro 1. cap. 1. Cui sanè ignotus esse non poterat, celebris ille quem supra posuimus,

posuimus, Lutheri adversus Zuinglianos Anathematismus; quo illos seriò pronuntiat hæreticos, & alienos ab Ecclesia, addens ad extremum: *Maledicta sit charitas & concordia Sacramentorum in aeternum.* Et quæ vice versa, adversus Lutherum, declarat Zuinglius, & præsertim ejus discipuli: quorum equidem sensum, ex his ipsorum verbis Tract. 3. *contra supremam Lutheri confessionem*, faciliè licet cognoscere. Quàm aperte, inquit, hîc se *Lutherus demonium habere prodit?* Quàm turpia eructat, & omnes demones infernales spirantia. *Afferit enim diabolum, & nunc & semper Zuinglianos inhabitare: & quod pectora habeant blasphemam, insatanizata, supersatanizata &c.* in quibus agnoscas frendentis bestię (quem pro Apostolo nobis obtrudit *Vezaus Beza*) consuetas voces, atque condignas. Quapropter meritò concludunt, & quærent Tigurini: *An quisquam talia verba, vel à rabido ac infernali demone prolata unquam audivit?*

*Apud Brer-  
leium in  
Apol. Tract.  
2. c. 2. sect.  
10. §. 10.*

His interim omnibus non obstantibus, non est veritus Ministellus ille; in Apologia pro Ecclesia Anglicana, *Bezae* exemplo, aperte scribere: *Inter Zuinglianos & Lutheranos, in principiis & fundamento Religionis, nulla est discrepantia: sed tantum de una, nec ita gravi quaestione dissentiunt &c.*

Ex his autem apparet (quòd, vel me tacente iam observaverit Lector meus) ex sensu usuque Novatorum nostrorum; quantumvis certum sit, & luce ipsâ clarius atroces inter illorum sectas, & perniciales dissensiones existere, ubi ta-

men causa ita postulat, siue ut Ecclesiarum Reformatarum honori & existimationi consulatur, cuique integrum esse, id etiam impudenter negare, protestando illam dissensionem, aut nullam esse, aut exiguam. Idque consentaneè cuidam alteri ipsius Bezae pronuntiato: quem scilicet aliàs vidimus, in colloquio Mombelgarteni apertè professum: *licitum esse pro religione seu fide tuenda, fraudibus, mendaciis, ac periuriis uti.*

Claudam hoc caput: si emblematis gratiâ, Balthazaris Meisneri Lutherani ad suprà memoratam Lessij nostri objectionem, præclarum scilicet, & cognitu dignum, responsum adjectero.

Is etenim Brandio suprà relato sincerior, cum Calvinum Luthero adversari, in quibuscumque, etiam præcipui momenti capitibus, inficiari non posset; bellus & argutus sibi futurus esse visus est, si diceret: *Calvinum sanè, quatenus negavit claram scripturæ litteram, (asserentem scilicet realem corporis Christi sub panis symbolo præsentiam) eatenus non Doctorem, sed seductorem censeretur debere: at in quantum ex sacris litteris Papales idolomanias (si superis placet) demonstravit, eatenus Dei ministrum fuisse ipsum, & (quod in præsentem agebatur) missum à Deo. Apostolum, se non negare.*

Lepide prorsus, atque argutè. Sic enim vicissim Antagonistis suis Calvinistis permiserit; Lutherum ipsum quatenus realem Christi in Sacramento præsentiam agnoscit, seductorem appellare; at in quantum Papales idolomanias  
cum



cum ipsis rejicit , cum pro Christi Apostolo habere.

Nec jam quidquam oberit , quo minus etiam omnes veteres Hæresiarchas ; qui quatenus eorum errores ab Apostolica Sede damnati essent , illius refugiebant autoritatem ; eâ ex parte Apostolis suis nitantur adjungere ; quin & impurum Mahometem , tot in capitibus Christianæ fidei adversarium ; atamen inquantum imaginum cultum , & ipse idololatriæ deputat : immò & ipsum cacadæmona , primorum parentum verbis fallacibus seductorem ; prout tamen secum crucis Christi signum exhorret , inter Dei Ministros , seu Lutheranæ Religionis Apostolos , numerare.

Atque ex jam dictis istud ad extremum inferri potest ; non sine fundamento Becanum , inter Aphorismos Calvinistarum , hunc ordine decimum tertium illis attribuisse: *Simulandus est consensus cum Lutheranis , ut sic facilius obruamus Papistas , & in toto orbe Christiano dominemur.*



## CAPUT XXXIX.

*Confessionem Augustanam, multiplicem, variam, sibi quæ contrariam existere; ut proinde nemini Lutheranis satis constare possit, quid secundum illam, sibi sit certâ fide tenendum.*

**C**onfessionem fidei Calvinianam paulò pluribus examinavimus, nunc de Lutheranâ aliquid ad extremum dicendum.

Confessionis Augustanæ nomine, ea intelligitur: quæ à Philippo Melanchthone composita, ex parte Lutheri, & sequacium anno 1530. Imperatori Carolo V. Germanicè oblata est in Comitibus Augustanis.

Sed ut illicò intelligas, quàm aut inconsultè, aut infideliter concepta esset; aut quàm in fide suâ instabiles sint Evangelici: eam ante annum 1557. duodecies refabricavit Philippus, & quidem in gravissimis fidei capitibus, ipso etiam indignante Luthero, ut testatus est Andreas Musculus in colloquio Hertybergenfi.

Et verò, ut observat Becanus, cùm ejus primæ & originalis formulæ, quæ Carolo V. oblata fuit, articulus decimus, his terminis Catholicis conceptus esset. *Docent (scilicet Confessionistæ) sub speciebus panis & vini adesse in cœna Dominicâ Corpus & Sanguinem Christi*: in eadem Cōfessione anno insequenti Latine editâ,  
idem

idem articulus , omiſſa ſpecierum panis & vini mentione , his duntaxat verbis expreſſus apparuit : *docent , quod corpus , & Sanguis Chriſti , verè adſint & diſtribuantur veſcentibus in cœnâ Domini.* -

Postea tamen , in quibuſdam ſaltem eius Confeſſionis editionibus , eundem articulum plenè & apertè in ſenſum Lutheranum ſic protulerunt : *Docent quod cum pane & vino verè exhibeatur Corpus & Sanguis Chriſti.*

Sed neque hoc modo ſubornatus infelix articulus , diu perſtitit incolumis. Quippe ut apud Contzen , è Lutheranis teſtatur Henricus Eckardus ; ipſe Philippus ( quippe in animo ſuo Sacramentarius ) ſucceſſu temporis expunxit ex ipſa Auguſtana confeſſione , articulum illum Sacramentariis contrarium : qui tamen ab aliis poſtea quaſi poſtliminio reſtitutus ſit. Perinde atque ſi in aliquo Theatro , actori uni in diverſis ſcenis commutatâ perſonâ , alia injiciatur , atque alia forma veſtis.

Sed eam in partem generaliùs conquerentem audimus Iacobum Andream Schmidelinum de Vvirtebergenſibus ; ab iis prorſus immutatam & falſatam eſſe Confeſſionem Auguſtanam.

Atque aliis exinde parem ſibi licentiam , pro arbitrio ſuo , uſurpantibus ; ea ad extremum enata eſt apud Evangelicos , Confeſſionum fidei , & ex conſequenti rerum credendarum , perplexitas & confuſio , ut cùm eius rei ipſos puderet atque pigeret ſectarios ; nonnulli eorum ſeriò , ſed fruſtra , commonerent , cavendum ſedulò ne ea rerum fidei apud ipſos

instabilitas, cum non levi suæ Evangelicæ Religionis opprobrio, dimanaret ad Pontificios. Quasi illud sibi assumerent, è Threno Davidico carmen: *Nolite annuntiare in Geth, neque annuntietis in compitis Ascalonis; ne fortè latentur filia Philistim, ne exultent filia incircumcisarum.* Eaque gratia tandem indictus sit anno 1561. conventus Naumburgi, ut obviam iretur ei incommodo; dispicereturque inter tam varias confessiones, quid denique pro authentico esset habendum.

Cæterum hodieque nihil ea in re satis vulgo constitutum, aut compertum est: cum passim agnoscant, nullam Confessionem eiusmodi puram, incorruptam, & non adulteratam inveniri.

Cap. 61

Sed ipsa proinde Lutheranâ sectâ (quod olim de parte Donati lib. 1. de baptismo contra Donatistas, scripsit antea citatus B. Augustinus), in multa minutissima frustra, concisâ; necesse sit totidem fides, totidem confessiones diversas existere; magno argumento falsitatis, sed de his plura Adamus Contzen in Iubilo.

Atque Lepidum est, & valde huc faciens, neque omittendum, quod idem refert eodem Tractatu: Ad annum sæculi superioris 57. communi partium consensu indictum Vvormatiæ, inter Catholicos ac Protestantes, de Religione Colloquium: cui præsideret Episcopus Spirensis, & quatuor Principes essent Assessores. Sed cum in principio Colloquij visum esset ante omnia oportere, ut pars utraque fidei suæ confessionem ederet, cujus articulos parati essent pro  
veris

veris & certis defendere : Catholicis illico ex parte suâ in unam eandemque fidei professionem conspirantibus; urgentibusque adversarios, ut inter tam varias Confessiones Augustianas, quamnam, & quo sensu defendendam ipsi susciperent ; cùm dies sedecim eâ in deliberatione posuissent , & magna inter illos altercatione subortâ, inter se convenire non possent: septem è duodecim (tot enim utrimque Theologi ex condicto ad colloquium convenerant ) quinque reliquos à se ejecisse ; cumque nec ipsi septem adhuc inter se concordēs , essent ; neque in locum ejectorum suppetere , qui succederent: ad extremum & ipsos , ne tentatâ quidem pugnâ, subducentes se , Catholicis in campo, ut ita loquar, persistentibus , victoriam insignem , sine pulvere & sanguine dedisse. Sic ille. Sed ne quis fortasse suspectum auctoris Catholici eâ in parte testimonium habeat : inveniet, cui ea fuerit curiositas , Protestantes plures eidem narrationi *Tract. 3. sect. 4. sub finem.* consentientes apud Brerleium : ubi speciatim profert verba Dresseri Protestantis ; quorum hæc est extrema clausula. *Cùm ipsi inter se dissiderent Evangelici , factum est, ut neque respondere ad questionem Pontificiorum possent , neque cùm illis congregari : separatione igitur factâ, navari & effici nihil potuit : in quo vulnere sanando (inquit) satis negotij adhuc habet Ecclesia Evangelica.*

Atque deserti cum opprobrio à Theologis Protestantibus prælij, ille insuper fructus, extitit ; quòd eorum unus , Ioannes Listorius , perspectâ intimè suorum Symmistarum in rebus fidei discordiâ,

discordiâ, & quod in sectis novitiis, nihil esset solidi ac certi, deserto quinto Evangelio, sese Romanæ restituerit Ecclesiæ.



## CAPUT XXX.

*Lutherum & asseclas in tradenda fidei doctrinâ, non veritati aut conscientia, sed tempori usuique servuisse.*

**T**Ametsi ad istud pronuntiatum nostrum comprobandum sufficere possit, ipsa doctrinæ Lutheri, à nobis alibi demonstrata, in plerisque omnibus fidei suæ capitibus, summa instabilitas ac varietas, immò contrarietas & repugnantia; secundum quam liceat dicere; nullum ferme ab eo fidei dogma uno loco proponi, cuius oppositum alio loco non adstruxerit; non attendens scilicet, quid à se exquireret vis veritatis, aut sinceritas eloquiorum Dei; sed quid isti seu loco, seu tempori, magis conveniens aut expediens esset: attamen cum idem assertum factis singularibus, exemplisque propriis, confirmari insuper ac stabiliri possit; visum id nobis speciatim præstandum in præsentia, quò apertius intelligant ab illo seducti populi, quàm non sinceris fidisque verbi Dei Doctoribus, inconsultè ac periculose credant animas suas.

Neque nobis erit eum in finem laborandum in conquirendis aliorum scriptorum testimoniis: inter quos Ministri Argentineses, libro edito  
anno

anno 1533. disertè pronuntiant : *Lutherum*, pro ratione temporis, variè locutum, neque semper sibi præsentem fuisse : quando aliunde nullo negotio, ex ipsis nimirum Martini dictis & factis, potest ea res prorsus convinci, & quod aiunt, peremptoriè probari.

Audiat igitur ipsa bestia; in-primis in Præfatione Tomi 1. Vvitembergenfis, anni 1582. ubi lectorem sic alloquitur: *Invenies in istis meis scriptis prioribus, quam multa & magna concesserim Papa; quæ posterioribus & istis temporibus pro summâ blasphemîâ & abominatione habeo & execror. Dabis ergo hunc errorem, pie lector, temporis, & imperitia mea.* Tempori, inquit, quòd sub ea initia, eæ essent rerum circumstantiæ, quibus se, doctrinamve suam, adhuc eum in modum attemperare atque inflectere deberet.

Eodemque facit quod apud autorem Britannomachiæ citentur hæc illius verba: doctrinæ suæ sinceritatem suspectam habentis: *Proptomodum nescio, quo loco sim, & utrùm veritatem doceam, necne.* Idemque referat, Ioannem Mathesium in ipsius vitâ testari; ipsum aliquando cuidam de suis fallum esse: quòd ea predicaret, quæ ipse non posset credere.

Sed audiri potest libro de captivitate Babylo-nica, ita proloquens: *Principio neganda sunt mihi septem Sacramenta, & tantùm tria pro tempore ponenda.* Pro tempore, inquit: velut sibi reservans aliter docere, si fortè temporis ratio, aliam doctrinam postulaverit. Quanquam sese illico quodammodo corrigens: *si usu scriptura loqui velim*, inquit, *non nisi unum Sacramentum habeam, & tria signa Sacramentalia.* Ad



Ad hæc idem in parva Confessione Getināniz  
ca folio ( ut citatur ) 55. & alibi ; ita de seipſo  
inverecundè , & fronte perfrictâ loquitur. *Scie-  
bam Sacramenti elevationem idololatricam eſſe  
( utpote qua ſacrificium indicaret ) ſed tamen eam  
retinebam in templo Vvittembergſi , ut agrè fa-  
cerem diabolo Carolſtadio. Qui nempe , inter ſe  
atque Lutherum ( cui antea fuerat coniunctiſſi-  
mus ) diſſenſione inde exortâ , quòd , per Luthe-  
ri abſentiam , ipſo inſcio , & alioqui repugnan-  
te , Vvittembergæ Miſſam abrogaret , & alia  
quædam priſcæ Religionis monumenta , earu-  
ſus retenta , abjeciſſet , factus ei erat odioſiſ-  
ſimus. Ergo ille ter ſanctus , ille Chriſti verus  
Apoſtolus , ut animi ſui libidini , indignationi-  
que ſatisfaceret ; uſum , quem ipſe perſuaſus eſſet ;  
Idololatricum eſſe , retinebat tamen ; temporis uti-  
que , ſeu affectui ſuo magis , quàm veritati , & con-  
ſcientiæ ſerviens.*

Qui ruruſum alibi , non abſimili inverecundia ,  
at nescio annon etiam majori impietate , in has  
voces erumpit : *Nos tantum ad Papiſtarum de-  
ſpectum , utque moleſti eis ſimus ; credemus verè  
panem & vinum manere cum corpore & ſanguine  
Chriſti.*

In quibus verbis obſerva , Lector , particulas  
illas , *tantum ad Papiſtarum deſpectum* &c. qua-  
rum hic omnino ſenſus eſt ; ſe , vel ab hoc tan-  
tum , quòd hac ratione Papiſtis contrarius , at-  
que moleſtus futurus ſit ; ſubſtantiæ panis & vi-  
ni in Sacramento perfeverantiam , ut fidei ſuæ  
articulum credendum aſſumere ; quidquid interim  
ſit de articuli veritate , & ſive hæc , ſive altera  
pars ex verbo Dei habeatur.

Ex

Ex quo videre est , quàm non fidendum sit ei fidei, cuius articuli, non ex veritate, sed ex electione voluntaria, aut etiã ex animi impetu ac perturbatione, condantur,

Quapropter etiã varios ex sectariis, eiusmodi Lutheri dictorum ita pudit , ut dicerent illa Christiano Theologo indigna esse. Inter quos memoratur Amandus Polanus Professor Basileensis, qui iis relatis, hæc subiuxerit: *Nolo plura absurda Lutheri dicta recensere, quæ multa sunt: quæ regenda potius ( ut scilicet honori tanti Prophetæ consulatur ) quàm exagitanda censeo.* Sic ille.

At hunc tamen Spiritum , in fidei scilicet negotio sese tempori & occasione , tametiam non ex animi sui sententiã vafre accommodandi in Philippo Melanchtone primario Lutheri discipulo ( aliis omiſſis ) egregiè licebit agnoscere. Cuius equidem rei odorem præferunt , illæ eius ad Lutherum voces , epistola 2. *In Apologia* ( scilicet Confessionis Augustanæ ) *quotidie multa mutamus. Subinde enim* ( subdit ) *mutanda sunt , & occasione accommodanda.* Sed perfidam hominis versuti mentem illud convincit , quod scæna serviens perfectum se Lutheranum mentiretur, cùm, ut postea patuit, intus & occultè Sacramentarius esset.

Ita enim lêgo apud Claudium de Sainctes Tractatu de Eucharistiã , Repetitione primâ. *Heidelbergæ* ( inquit ) *excusum est iudicium Melanchthonis de cæna Domini ad Principem Electorem Rheni, ubi ait: suam de cæna Domini fidem in publicè editis lucubrationibus suis, nunquam*  
*antea*

*antea profiteri voluisse , attamen familiaribus amiculisque suis privatim non reticuisse ; se in hac re Lutherum damnare , & Zuinglio adstipulari. Suadetque proinde , ne de verborum Christi proprietate sollicitius disceptemus ; sed de eorum veritate , sua unicuique libera permittatur expositio.*

Atqui hic est ; inquam , Philippus ille Melancthon , conditor propugnatorque Confessionis fidei Augustanæ : in cuius articulo decimo expressè agnoscitur ; quod in Sacramento Eucharistiæ verè adsit corpus & Sanguis Christi. Et ecce hunc ipsum fidei suæ & Confessionis articulum , negat habendum pro fidei articulo ; sed suum de eo ait unicuique sensum liberum relinquendum. Quin si animi sui sententia exquiratur , testatur se eâ in parte , non Magistrum suum Lutherum sectari , sed Zuinglio Sacramentario adhærere.

Neque verò eam Philippi , seu vafritiem , seu nequitiam ipsi Calvinistis fuisse ignotam ; ex eo confirmes , quod supra laudatus Adamus Contzen , ad annum Domini 1557. memorat : in quodam eius anni in Saxonia Conventu , Philippum ( inter cæteros ) etiam Sacramentarios damnasse. *Sed , veluti subdit , Calviniani , non ignari Philippica ævis & impostura ; nomine Sacramentariorum , Philippum intellexisse dixerunt , eos qui verbis Christi insistent , & non ipsos tenent ; hoc est Catholicos & ipsos Lutheranos.*

At , amo te mi Lector ; in hoc ipso procedendi modo ; qui mæandri ! qui fluctus ! quanta  
cirandi

errandi licentia , perturbatio disciplinæ ! & poterit quisquam cui vel mica sit iudicij , & non prorsus nulla salutis suæ sollicitudo istis erroribus concedere animam suam ; quibus suâ ipsorum fides , ambigua , fluctuans , & in contraria verfabilis sit : quique ubi vel rerum æstus , vel aura temporum impulerit ( ut Apostoli prudens monitum huc transferam ) velut parvuli fluctuan- *Eph. 4.* tes, circumferuntur omni vento doctrinæ, in nequitia hominum , in astutia ad circumventionem erroris.

Quibus , ut ad rem nostram rectè exponit Commentarius Ambrosio adscriptus. *Fundatos & stabiles esse nos vult Apostolus ; in disciplina fidei Catholica, quam Petrus Apostolus, revelante Deo professus est; nec ventilari nos oberrantes per diversarum hæresum pestilentiosas asseverationes, nequitia humanâ inventas.*

Quamquam , si mihi permissum patem , in Apostoli verbis , nequitiam & astutiam inter se disparare ac seiungere, easdemque ad statum præsentium hæresum accommodare ; libens dixerim admoneri nos , ne circumferamur omni vento doctrinæ , in nequitia Lutheri , in astutia Calvinii.

Sed priusquam , sive à Luthero , sive à Melancthone abeam ; placet dictis addere, quæ post hæc scripta de utroque lego apud Florimundum Ræmundum , de hæresis ortu &c. non aliena ab argumento præsentis. Et de Martino qui- *Lib. 1. cap. 15. n. 10.* dem , testatur hic autor illum aliquando ad Bohemos scripsisse : quod olim se eorum adversarium professus sit , inde factum : quod Papani  
Anti

Antichristum esse , nondum persuasum haberet, coque eos , quos initio damnaverit , postea pro amicis & fratribus se palam habere , postquam nimirum certus iam sit Papam Antichristum esse. Sic enim (ut subdit laudatus autor) rationes suas instituerat, ut quisquis esset hostis Ecclesiæ, amicus suus esset.

Ex quo manifestum sit : illum , ut pro suis in Christo fratribus , eiusdemque fidei consortibus aliquos haberet , non veritati detulisse, sed affectui. Quanquam si Ræmundi testimonium recipimus : mirificè fluxum & instabilem eâ in amicitia oportuit esse Lutherum: quippe qui non tantum ab initio , quod supra vidimus , illos ut hæreticos damnaverit imò & alibi verbis expressis denuntiavit : *Maledicta sit charitas & concordia Sacramentariorum in æternum*: Sed etiam postea tractatu de cœna Domini , Tomo 2. Germanico fol. 174. cum sic audiamus loquentem: *Tanquam alterum iam pedem in sepulcro habens, hoc testimonium & hanc gloriam ad tribunal Domini adferam: quod hostes Sacramenti, Carlstadtium, Zuinglium, Ecolampadium, toto pectore damnarim &c.*

Verum de Philippo , laudatis rei narratæ autoribus , ita scribit Ræmundus libro 2. cap. 9. n.9. Melanchthoni iam animam agenti, matrem grandævam adstitisse, hisque ad eum verbis usam: *Mi fili, extremum iam me fortasse tu vides: ut qui jam jam, velut apparet, è mundo discessurus sis, & coram magno Iudice, eorum quæ fecisti exactam rationem redditurus. Tu scis Catholicam me fuisse, meque à te, ut religionem muta-*  
verim,

Tomo 7.  
Fviremb.  
fol. 381.

verim, & diversam ab eâ, quam majores mei secuti fuerunt, amplexa sim, inductam. Nunc ego te per Deum vivum adjuro, ut quamnam melior sit, mihi dicas, neque quidquam hac in re me celes. Tum Melanchthonem clara voce, ut ab omnibus intelligi posset, dixisse: Hæc plausibilior, illa securior. Plausibiliorem, opinor, appellans, Reformatam; quòd ad vulgi sensus, carnisque commoda, accommodatior sit: sed cum Catholicam securiorem agnosceret; si non plus humanis, duceretur respectibus, quàm veritati salutique suæ consulere; in illius sanè professione mortem oppetere elegisset.

Verumtamen neque etiamnum desunt in quos *Joan. 12.* conveniat illud dilecti discipuli: *Dilexerunt enim gloriam hominum, magis quàm gloriam Dei.* Et quod consequens est, æternam gloriam amiserunt.

Tandem generatim eodem spectat, in plerisque novitias religiones professis, proclivitas summa de secta ad sectam transeundi; ubi, vel hinc aliqua offensio, vel illinc spes majoris lucri, aut commodi alterius occurrerit: certo argumento, quòd vel primùm suscepta religio, nihil admodum ipsis satisfaciat; vel quòd ei non conscientiae ratione, sed aliquo alio temporali respectu, velut fortè fortunâ, adhæserint.

Quod quidem apud Henricum Fitzsimon cre- *Lib. 1. Bræ-*  
bro experimento sibi compertum, his verbis te- *tannom, c. 6.*  
statur Edmundus Bunnius Tractatu de Pacifica-  
tione. *Nunc planè adverte, inquit, homines*  
*V consentira*

*consentire nobis, potius ratione status & com-  
moditatis, quam ex conscientia & fide.*

Addo, quod his verbis accidisse sibi refert  
Becanus noster.

*In Tit. Calv.* Ante annos 14. cum in quodam itinere essem,  
*Tit. Zuin-* diverti ad rusticanum hospitem; ex quo amice  
*gliani q. 1.* sciscitatus sum, quam religionem profiteretur.  
*7. 4.* Respondit toties eo loco mutari religionem, ut  
vix sciret, quam sequi vellet aut deberet. Et  
vester, inquam, Prædicans quam sequitur? Annis,  
ait, superioribus Lutheranam secutus est, nunc  
Zuinglianam profiteri cœpit. Quid causæ? Quia  
Dominus loci, qui Lutheranus erat, mortuus  
est: nunc Zuinglianus successit. Prædicans igitur,  
ne cogatur solum vertere, tempori se accom-  
modat.

Verum de Luthero & Lutheranis hætenus.



## C A P U T XXXXI.

*Idem de Calvino & Sacramentariis ostenditur.*

**I**N quorum sanè Novatorum classe, merito suo  
Iagmen ducat Hulricus Zuinglius, Sacramen-  
tiorum facile princeps, & Calvinus præceptor  
plurimum scilicet colendus. Qui quidem,  
quomodo & ipse omni doctrinæ vento, in fidei  
dogmatis tradendis circumferretur, prout ni-  
mirum tempori, rebusve suis magis congruere  
sentiret; proclive est, ex eius ore, ingenuaque con-  
fessione cognoscere.

Quippa



Quippe cuius vulgò feruntur hæ voces , ex Tractatu , de vera & falsa Religione , cap. de *Eucharistiâ*. *Retraetamus hic igitur* , ( inquit ) *quæ illîc diximus ; tali lege , ut quæ hic damus ; anno ætatis nostræ 42. præpoderent iis quæ quadragésimo dederamus ; quando , ut diximus ; tempori potius scripsimus , quàm rei : sic iubente Domino , ut tali ratione adificemus ; ne intra initia , canes & porci nos rumpant.*

Sic ille lepidus , nuper exorti Evangelii ( quando eo nomine eum dignatur Beza ) Apostolus. Perinde atque si Salvator Matth. 7. informans suos Apostolos , ne Margaritas , sive pretiosam cælestemque Evangelij ac veræ fidei doctrinam , projicerent ante porcos ; indulgeret eis , ut inter initia prædicationis , tempori non rei , seu veritati servientes ; doctrinam falsam , & quæ postmodum retractari deberet , seu revocari , populis traderent. Aut quasi faciat ad nomen dignitatemque Apostoli , sive initio , sive in decursu Evangelicæ prædicationis , diversam doctrinam , sive sibi adversam , proponere.

Cum & alioqui , præ cæcitate non adverteret ; sese eo pacto ansam dare sectariis suis , suspicandi deinceps ; quod , quâ ratione anno ætatis suæ 40. fateretur se potius tempori quàm rei , seu veritati ; scripsisse , eadem & anno ætatis 42. etiamnum tempori serviens , potuerit pariter ; non ex animi sui sententiâ scribere , & successu temporis etiam eâ quæ tunc docuerit ; revocare. Quod sanè apparet , non modò probrosum esse auctori , sed ipsam quoque disciplinam suspectam reddere , & Zuinglianæ sectæ

vniversæ, non leuem invidiam infamiamque conciliare.

Et sanè istius cerebelli magnam in negotio religionis oportet fuisse levitatem & inconstantiam, si verum est, quod quidam tradunt, cum suam de verbis Christi, *Hoc est corpus meum*, expositionem, spatio trium annorum reipsa quadragies mutasse, cuius rei testem Ioannem Fabrum, in libro quem de retractatione Baltazaris Pacimontani composuit, citat Franciscus Turrianus, in Proëmio ad Tractatum suum de Eucharistiâ.

Cæterum hanc ipsam, artem, seu calliditatem appelles, ut nempe ten pori serviens variis locis variè loqueretur, familiarem fuisse Calvino, hoc loco licebit, ex eo quod dicam specialiùs cognoscere. Quippe qui, tametsi eo in negotio aliàs subinde perplexè loqui, & variè tergiversari visus esset; ipsâ ad extremum convictus rei evidentiâ, cum, primævis illis Ecclesiæ Christi temporibus, in ea viguisse incruentum altaris sacrificium, preces pro mortuis, Deiparæ cultum, sanctorum cum Christo in cælo regnantium invocationem, & alia complura, quæ hodieque in Ecclesia Romana perleverant, Christianæ pietatis officia, omnino negare non posset: ad hanc sibi molestam objectionem siccè admodum, & quasi dissimulanter, respondet: *Eam aetatem non sic ab omni vitio liberam fuisse, ut pro regula habendum sit, quidquid tunc factum est: veteres quoque in errorem abreptos, dum ad legis umbras Iudaica nimium deflectunt, aut publico mori, seu vulgi imperitia, plusculum concedunt, & similia.*

L. 4. Infr. c.  
13. §. 17 lb.  
c. 18. §. 11.  
L. 3. c. 5. §.  
10.

similia. Perinde atque si errores illi , non nisi ævi sint in egregio corpore , possintque aded, na quidem ætate , in Ecclesiæ vultu dissimulari. Et verò eisdem videas , navorum nomine expressos à Ministris Genevensibus , germanis Calvinii filiis , in quadam Epistola adversus recentiores Arianos , cuius ista verba sunt : *Sunt quidem , fateor , sui in Patribus navi ; Quis enim hoc neget ? sed tales , ut fundamentum istud (fidei scilicet ) salvum retineant.*

Ex quo rursus inferas , dogmata illis contraria , qui ipsi sunt Confessionis Calvinianæ articuli , ex ipsorum sensu salvâ fidei substantia , negari posse.

At ij ipsi porro errores , in hodierna Romana Ecclesia ( si ipsum Calvinum & eius sectarios audimus ) non jam navi sunt , aut tanquam rugæ in vultu senili ; sed carcinomata letifera , plagæ tabificæ atque putentes , sacrilega nempe impietas , manifesta , horrenda ac detestabilis Idololatria ; ea denique ipsius Ecclesiæ corruptio , ut ex Sponsa Christi , iam facta sit prostibulum Anti-Christi ; cur tam variè eadem in causâ ? illic tam molliter ; hîc tam acerbè , tam crudeliter , tamque iniquè ?

Hic jam enimverò , Lector optime , Sectarij huius astutiam , sed infelicem , & in autoris sui recidentem caput , mecum tantisper attende. Prospiciebat nimirum homo acutus , nec incallidus : Si prisce illi atque primævæ , & huic hodiernæ Romanæ Ecclesiæ , eandem formam & tanquam vultum , idem quasi nomen appellationemve , assignaret , aut affingeret ; inde

consequenter duorum alterum sibi necessariò admittendum esse. Vt nempe, vel illam primitivam Ecclesiam, etiamnum recenti & adhuc calenti Christi sanguine aspersam, & Apostolorum spiritus primitias habentem, fateri cogeretur, jam tum fuisse meretricem Babyloniam, & tot erroribus Evangelicæ fidei (ui contendunt) contrariis, conspurcatam atque corruptam. Quod equidem nec fidem inveniret apud cordatos; adversareturque causæ, ac scopo præsentis Reformationis; qui, ita non semel proficiente Calvino, alius non est, quam præsentem Ecclesiam, ipsâ temporum successione, à veræ fidei, morumque sanctorum, primigeniâ sinceritate, collapsam, in antiquum statum, formamque pristinam restituere.

Sin autem, (quæ est pars altera dilemmatis) veterem illam tanquam incorruptam & legitimam Christi sponsam haberet, consequens esset, & hodiernam quoque Romanam Ecclesiam, pro justâ & legitimâ Christi sponsâ habendam. Quippe quam ab illa nihil diversam; sed consimili formâ præditam, iisdemque coloribus ac lineamentis expressam agnosceret; eodemque modo ipse de utraque & loqueretur & sentiret.

Ergo, ut saltem minùs attentis fucû faceret, homini versuto & versabili, eâ visum est arte utendum; ut eadem dogmata ritusve, in veteri quidem Ecclesia, ut non magni momenti navos, eosque eiusmodi, qui salvo fidei salutisque fundamento teneri possent, dissimulandos censeret; eorundem autem hodieque retentorum gratiâ, Romanam

Ecclesiam, Anti-Christi sedem, meretricē Babyloniam, animarum pestem ac perniciem appellaret. Quā autem id, siue sinceritate mentis, siue doctrinæ consequentiā; vel me tacente, quivis cordatus intelligit.

Et simile quiddam in Luthero quoque ac Lutheranis videre est. Quando ipse Lutherus commentario 2. in epistolam ad Galatas c. 5. & alibi, non tantum veteres illos Patres Hilariū, Athanasium, Ambrosium, Augustinum pro sanctis agnoscit; sed etiam recentiores, Benedictum, Bernardum, Franciscum: quos tamen certum est, Romano Pontifici, Romanæque fidei adhæsisse, itēque sacrificij Missæ, votorum monasticorum, aliorūque rituum (quos isti in nobis damnant, oderūt, execrantur) observantes fuisse; & quod consequens est, observationes eiusmodi, ipsorum quidem æternæ salutis, impedimentum nullum præbuisse.

Eodemque passu procedit Melanchthon in Apologia Confessionis Augustanæ, Tit. *de votis monasticis*; ubi hæc & his similia adiaphora esse significat, iisque Bernardum, Franciscum, & alios sanctos, absque impietate usos esse; additque itidem viros sanctos, pariter iis uti, absque impietate. Quæ quidem quomodo cunctis, quæ iidē alibi, adversus hæc ipsa, tanto furore, tamque acerbè declamitant, conciliari aut cohærere possint, ego profectò non intelligo.

Sed nimirum, quod antè monuimus, jam olim sectariorum proprium est; ex eodem ore, prout res tulerit, nunc calidum, nunc frigidum efflare; & doctrinam suam variis occasionibus variè tēperare,



perare; atque ita, velut dicebamus, quid fixè sentiant, aut in quo sita sit fidei ipsorum forma propria, seu quasi substantia, ipsi legenti incertum relinquere. Quod ex his quæ postea subiungam, ampliùs declarabitur.

Verumtamen quod ad Calvinum speciatim attinet, aliud quiddam est majoris ponderis, in quo evidentius demonstraretur istorum hominum, pro usu præsentis, temporumque ratione, huc illuc vergens ac versabile ingenium.

Nam cum Lutheranos inter, ac Tigurinos seu Zuinglianos, ingès exorta esset de præsentia corporis Christi in Sacramento, controversia: Lutheranis, Christum sub sacris symbolis (saltem in usu) verè ac realiter præsentem; Zuinglianis autè non nisi in figurâ comparentem, agnoscentibus: Calvinus sub ipsa principia Zuinglij sui placitis obsecundans, nihil nisi figuram, in toto eo mysterio, & ipse agnoscere visus est. Sed postea tamè, quòd id ad res suas magis facere existimaret, mediâ, & eatenus in Ecclesiâ inauditam, cõmentus est sententiam; ut negatâ quidem sub sacris symbolis reali Christi præsentia, defenderet tamen Corpus Christi, quatenus in cœlo duntaxat residens, verè, realiter, substantialiter à nobis in cœna māducari, & vi illius participationis, Christum verè ac realiter nobiscum in unum coalescere. Quâ licet absurdâ nec satis secum consistente mixturâ, tamè (ut observat loco suprâ laudato doctissimus Turrianus) *mirus ille*, ut eum appellat, *artifex fallendi*, id se consequi posse sperabat, ut quando eorum dictorum altero cum Lutheranis, altero cum Zuinglianis facere videretur, utrosque sibi adiungeret.

Verum

Verùm enim cùm, eâ gratiâ, Tigurinos sibi admodùm infestos pateretur; quò eos placatos sibi redderet, veluti, palinodiam canens, librum scripsit, de suo cùm Tigurinīs, de cœnâ Domini, consensu.

At ecce postea, scenâ conversâ, anno Domini 1556. Beza cùm Farello, Calvinī Genevæ symysta, Vvormatiam profectus, quò sectæ suæ in Gallia laboranti, Lutherānorum Principum gratiam & præsidium demereretur; illis, non suorum duntaxat Gallorum, sed etiam fratrum Helveticorum nomine, confessionem quandam obtulit: quâ profitebantur, tanquam cum Lutherānis sentientes: Corpus Christi verè & realiter esse præsens in Cœna; & communicantibus verè ac realiter exhiberi.

Sed, cùm, eâ gratiâ, triumphantibus Lutherānis, Zuingliani ex adverso, quasi proditâ communi causâ, fremerent; iis rursum placandis, dissimulanter reposuit Theodorus: se vera scripsisse, sed quæ Lutherāni, non ex mente suâ acceperint. Se enim, non de cœnâ Domini, quatenus in terris exhibetur, sed quatenus in cœlo celebratur, esse locutum; cuius quidem facti, testis locuples est Claudius de Sainctes, in *Examine doctrinæ Calvinianæ & Bezana*: additque libri *de Calvinī causa desperatâ*, cap. 4. Cutsenius: Iacobum Andræ Lutherānum graviter de ista Bezæ nequitia (nec immeritò) conquestum esse.

Sed & ipsum Bezā in Conventu Poissiano habitato in Galliis anno 1601. suo suorumq; nomine, de præsentia Christi in Sacramento semel, iterūque exhibuisse



exhibuisse formulam quandam perplexam, prorsus & ancipitem, ut si fieri posset, verborum fuco, ipsis Catholicis imponeret; quæ, fraude comperta, reiecta fuerit à Catholicis Præsulibus; testatur supra laudatus autor, Claudius Sainctesius, qui præfens aderat.

In cuius hæresis vestigiis, annon agnoscis  
*In Psal. 80.* Lector optime, Augustinianam illam Vulpeculam, *in cavernosis anfractibus latentem, & ex unâ parte intrantem, & ex aliâ parte exeuntem.*

Verùm nos, porro pergentes, apud ipsos præsertim Calvinistas, in doctrinæ fidei negotio, incerta esse omnia; etiam altius repetitâ ratione, doceamus.



## C A P V T XXXXII.

*Calvini sectarios in constituenda fidei regulâ varios, instabiles, & inconstantes esse.*

**D**Vplici ratione, & utraque, ni fallor, efficaci, possumus id quod præfert huius capituli lemma, conficere. Quarum prior exinde petitur; quodd, cùm disertis verbis profiteantur Calvinistæ: se, præter verbum Dei scriptum, quod vetere & Novo Testamento continetur, nullam aliam fidei regulam agnoscere: in eam tamen non persistent, sed alia quædam ipsi Scripturæ, perplexè, inconstantérque superadant, quibus similiter innitatur eorum fides.

Posterior

Posterior , ex eo quod cùm principiò , verbum Dei expressum requirerent ; deinceps istud dictum suum , tam variis modis , restringere , modificare , interpolare caperint ; ut quid præcisè velint aut determinent , ne acutus quisquam capere aut divinare possit.

Cùm tamen nisi regula fidei , præcisè , fixè , & determinatè constituta sit , necesse sit fluctuare omnia ; sive , ipsam incertam esse , vacillare , quæ fidei , in quacunque religione , disciplinam.

Equidem , ad prius quod attinet ; ante omnia attendenda erit , fidei Calvinianæ Regi Christianissimo omnium eius sectæ nomine , oblata Confessio. In cuius articulo 4. & 5. profitentur isti sectarij : *se pro fidei regulâ certissimâ , nisi verbum Dei , quod Scripturis sacris , continetur , admittere : cui ( utique habenti autorem Spiritum Sanctum , & veritatem omnem , quæ ad salutem necessaria sit , complectenti ) nulli sive hominum sive Angelorum licitum sit quicquam sive demere , sive addere , aut in eo aliquid quocunque modo immutare.*

Contra quæ in-primis apertè facit ; quod , ut rectè observat Ioannes Gonterius in suo lapide lydio , ostendi possit , in eâ ipsâ quam offerunt fidei confessione , multa ab illis constitui , quæ non habeantur ex Scripturis sanctis : proindeque illos id quod in eâ , verbo adstruunt , ipso facto destruere : quâ de re nos aliquid suprâ diximus.

Quod etiam expressiùs apparet ; in hoc , quòd ipso articulo quinto , quo definiunt Scripturam  
sacram

sacram esse regulam omnis veritatis, cui nihil addi possit &c. confestim subiungant: *Consequenter ad hæc admittimus* ( utique ut certam fidem facientia; ita postulante ratione & unitate contextus!) *tria symbola, videlicet Apostolorum, Nicenum, & Athanasij.* Tamen hæc non sunt Scriptura sacra; sed tantum, ut ipsimet addunt: *quia cum verbo Dei coherent atque consentiunt.*

Et verò, quod ad symbolum Apostolorum attinet: illud sine scripto ab Apostolis Ecclesiæ traditum, testantur Hieronymus, Ambrosius, Augustinus &c. Quin etiam ( teste Gonterio ipsi Calvinistæ in Colloquio Parisiensi, negant illud ab Apostolis editum & traditum fuisse. Niceni autem autoritas, fundamentum habet in Concilij plenarij & legitimè approbati definitione. Et ipse Calvinus ita illud admittit, ut nonnulla in eo reprobet; ut v.g. particulas illas: *Deum de Deo* &c. Athanasij autem, certam autoritatem habet, non ut est Athanasij; sed quæ verba sunt Doctoris Angelici; *quia integram fidei veritatem eius doctrina breviter continebat, autoritate Summi Pontificis est recepta, ut quasi regula fidei habeatur.*

22. q. 1. a. 10.  
ad 3.

Quapropter itidem Calvinus, ne quid eâ in re videretur deferre Ecclesiæ sensui, aut Pontificiæ definitioni, in Synodo Lausanensi, teste Fevardentio, dixit; *illud Symbolum non habere autoritatem nisi in Primis, ( seu, His canonicis ) Sacerdotum.*

En quanta, in paucis Confessionis fidei Calvinianæ verbis, dictorum inconsequentia: &  
quanta

quanta nunc jam , in ipsa fidei certâ Regulâ assignandâ , instabilitas ac perplexitas !

Atqui expressiùs apertiùsque ab eâ quam primitus , ut solam fidei regulam agnoverunt , discessere passim in Batavia Calvinistæ. Quippe qui , ut testatur Tomo 4. opusculorum suorum Becanus , pro Regula fidei constituunt Scripturam sacram , Confessionem fidei Belgicam , & Catechismum Heildebergensem.

Eâque gratiâ Iacobus Arminius Leydenfis professor , in Apologia ad 31. articulos in vulgus sparsos , ait se apud rigidos Calvinistas suspectum fuisse de hæresi ; quod nempe dixisset , Catechismum Heildebergensem , & Confessionem Belgicam , in Synodo nationali , examini subjiçendam esse.

A quo item sensu non valdè se alienam ostendit Synodus Provinciæ Ultrajectinæ anno 1612. habita. In qua etsi principio testentur Patres congregati : sese obstrictos ad nullam aliam fidei regulam admittendam , quàm solum Dei verbum , scriptis veteris & Novi Testamenti expressum : addunt tamen velle se , ut omnes Prædicantes teneant ac servant capita Christianæ Religionis symbolo Apostolico comprehensa ; ac insuper libellum , cui titulus : *Confessio fidei Ecclesiarum Belgicarum.*

Quanquam ad extremum , eam Confessionem & similes , certam fidem non facere , aperte significant , dum dicunt , illas esse examinabiles ad sacram Scripturam.

Veruntamen intolerabilior est , quorundam aliorum in eadem Batavia eo in argumento , quod

quod modò tractamus audacia. Quorum , ut affirmat ab eodẽm Becano memoratus , Adolphus Venator , Minister Alcmariensis; isti inter alios , fuerunt fidei articuli.

*Vera , optima , certissima & perfectissima norma totius fidei Christiana , est Confessio Belgica; & Catechismus Heidelbergensis.*

Rursum : *Ex verbo Dei non potest pura doctrina clarè intelligi ; sed solum ex confessione, & Catechismo.*

Tandemque : *ubi Confessio & Catechismus est; non egemus verbo Dei.*

Quo loco stomachum tenere non potest, quin illuin, & meritò, erumpat in hos gregales suos, vir cæteroqui in multis & ipse impiè insolens, Conrardus Vvorstius; in quadam respõsione ad postremam admonitionem Ministrorum Levvardesium. Vbi: *Multi, inquit, ex nostris nullum planè discrimen, inter Catechismum, & ipsum Dei verbum amplius agnoscunt; & isto ferè præterito, in illo solo simpliciter acquiescunt.* Et mox: *Non desunt qui idolum ex catechismo faciant, dum purè divinum scriptum esse putant, aut pari cum sacris litteris fide dignum.*

Pari autem ! Immodò si quis relata à Venatore loquendi formam attendat; etiam ipsis sacris litteris anteferendum.

Quid si porro addamus , & illas eorundem Novatorum insanas sacrilegasque voces , & in nullo , qui se Christianum profiteatur; ferendas; ad extremum ita rem omnem cõcludentes:

*Autores Confessionis & Catechismi fuerunt prudentiores & fideliores pro Ecclesia, quàm Apostoli & Evangelista.*

Eni



## INEXTRICABILIS. 315

En quò denique prorumpit insanix , cœca & præceps istorum hominum audacia. Vt qui ex una parte Ecclesiæ Catholicæ sensum ac traditiones recusant admittere; ne, ut ipsi dictitant, nō jam verbo Dei , sed hominum sensui deferre videantur; ex aliâ modò, Ministrorum suorum privato studio confectos Cathechismos , aut fidei confessiones, ipsi Dei verbo etiam anteferant. Id nimirum illis attribuente licentiæ , privato illo cuiusque spiritu: ut sicut principiò per illum, arcano quodam internoque sapore , scripturas divinas à non divinis se discernere venditabant; simili modo, processu temporis, novitiæ illæ dogmatum fidei, & à particularibus Ecclesiis consarcinata collectiones , præ ipso puro Dei verbo, ipsorum palato magis sapiant , & Ecclesiæ Dei utiliores existimentur.

In quò vestigio, rursus antiquorum hæreticorum passus ac progressus agnoscas, quādo & ipsi Eunomiani, Eunomij libros, & Montanistæ Montani prophetiam, ipsi Evangelio ac Prophetis prætulisse noscuntur. Quā in rem audire placet B. Hieronymum, l. 1. contra Vigilantiū c. 3. sic proloquentem. *Rides de Reliquiis Martyrum, & cum autore huius hæresis Eunomio , Ecclesiæ Christi calumniam struis; nec tali societate terreris, ut eadē contra nos loquaris, quæ ille contra Ecclesiam loquitur. Omnes sectatores eius, Basilicas Apostolorum & Martyrum non ingrediuntur; ut scilicet mortuum adorent Eunomium; cuius libros maioris autoritatis arbitrantur, quàm Evangelia: sicut aliæ hæreses, Paracletum in Montanum venisse contendunt, & Manichæum ipsum dicunt Paracletum.*

Quid

Quid quod, non jam pauca, ut sic loquamur, ranæ in stagnis Batavicis coaxantes, sed alij complures è sectariis, eâ ipsâ blandâ persuasione decepti, quòd se interiùs agitari Dei Spiritu crederent, eoque docente, se de omnibus sufficienter instrui existimarent, ulteriùs progressi, dicere ausi sint; scripturam sacram sibi non esse necessariam, vel certè fidem, non esse accommodandam ad scripturam, sed scripturam ipsam, ad cuiusque fidem attemperandam. In hoc enim errore fuisse Anabaptistas, Libertinos, Svvencfeldianos, tradunt qui recentius hæreticorum Catalogum confecere.

Neque verò, ( ut per occasionem obiter istud admoneam. ) illis ad hoc deesse poterit, si eo quidem uti voluerint, speciosum etiam ab ipsa scripturâ præsidium; iis nempe locis, quibus Calvinistæ, pro suo illo arcano spiritu, uti, aut abuti consuevere.

Quippe cùm verba illa 1. Ioan. 2. versu 20. *Vos unctionem habetis à sancto, & nostis omnia;* & illa etiam expressiora, versu 27. *Non necesse habetis, ut aliquis doceat vos, sed sicut unctio docet vos de omnibus.* Cùm hæc, inquam, verba generalissima sibi, omnia nempe, & de omnibus; si per se quidem præcisè spectentur, non magis efficiunt, quod contendunt Calvinistæ, de suo privato spiritu, ad scripturas veras, earumve sensum legitimum discernendum, quàm quod ultra intendunt Libertini, nullo scilicet indigere se verbi externi ministerio, sed ad omnia sufficere sibi interiorem Spiritus Sancti disciplinam,

Hactenus.



Hactenus de priore Assertionis propositæ ratione.



## CAPVT XXXXIII.

*Declaratur altera Doctrina proposita ratio.*

**N**Eque difficilius est, quod secundo loco supra proponebamus, efficere.

Primum enim Novatores nostri, ut à se, inducendæ in Ecclesiam Dei Reformationis, temeritatem, specioso puri verbi Dei prætextu colorarent, eoque nomine apud simplicem populum doctrinam suam magis plausibilem redderent; ubique proclamare institerunt; nihil se nisi purum ac putum verbum Dei tradere; neque verò quidquam, nisi quod in scriptura divinâ expressis verbis contineretur, credendum esse. Imitati in eo majores suos, priscos scilicet hæresiarchas; qui, velut superiùs vidimus, eâ ipsâ escâ prolectabant sequaces suos; sed hoc interim discrimine: quod prisci, in eo dogmate, quantum apparet, constantes persisterent: recentiores autem, uti in omni fermè doctrinâ suâ instabiles, ita ab hoc ipso asserto suo, processu temporis variè ac fædè deflexerint.

Siquidem cum inter disputandum permolestè urgerentur à Catholicis, ut hos illosve Confessionis suæ articulos, verbis expressis in scriptura contineri ostenderent, idque se frustra

X

conari

conari sentirent: cogeantur denique non sine rubore, ab ea à se assignatâ fidei regulâ discedere: quemadmodum antea, de Turlacensibus Lutheranis, & Sedanensibus Calvinistis, magis ex professo ostensum.

Neque enim, quidquid perscrutentur, unquam ostensuri sunt, hunc ipsum articulum; quem ut cæterorum fundamentum præstituunt, expressè in scriptura contineri: nempe, *nihil esse credendum, nisi quod in verbo Dei scripto inveniat*ur expressum.

Igitur ut se ab eâ molestâ instantiâ & insultatione, siquâ viâ liceret, expedirent; compulsi sunt dictum illud suum prætere, seu ampliare, dicentes: *Nihil esse credendum, nisi quod in verbo Dei scripto expressum sit, aut certè ex illo deductum per evidentem consequentiam.*

Ita enim videas, Calvinianos Ministros Dieppenses, in scripto quodam prolusorio concertationi, quæ instituenda prætendebatur, inter ipsos, & suprà memoratum Ioannem Sonterium, virum ex ordine nostro, multis palmis eo in genere nobilem (qui rei seriem, libello edito: cui titulus est *Consequentia Religionis Reformata &c.* vulgavit) eos, inquam, videas, articulo 3. prædicti scripti sic proloquentes: *Deus loquens in scripturis, sive terminis expressis, sive per consequentias necessarias, erit Index controversiarum.* Idque addunt esse articulum fidei suæ.

Similiter in colloquio Ratisponensi anni 1601. apud Tannerum, qui ut aliàs dictum, eius colloquij pars erat: cum adversarij (Lutherani scilicet) articulo 1. Thesium suarum asseruissent: verbum

Dei

Dei scriptum, fidei Christianæ unicam certam atque infallibilem normam esse; ita se deinceps explicare debuerunt, ut dicerent: *Nullum ex articulis & dogmatibus esse credendum, quod non, vel expressè contineatur in scriptura, vel inde per bonam, seu evidentem, consequentiam deducatur.*

Non animadvertētes videlicet (quantum præsertim ad Calvinistas attinet) sese hac adjunctione, priorem illum suæ fidei articulum, non explicare, sed abnegare: quando rem ipsam attendenti manifestum est: id quod ex scriptura per quamcunque demum consequentiam deducitur, non esse purum putumque aut expressum Dei verbū, sed humanā additā ratiocinatione convestitum ac subornatum. Neque rursus posse à Calvinistis admitti, vel unicum suæ Confessionis Gallicanæ articulum, ex scriptura duntaxat haberi per consequentiam, quin falsitatis convincatur eius Cōfessionis ratificatio; in qua sic dicitur: *Omnes Gallicæ Ecclesiæ approbant & ratificant superscriptam Confessionem, in omnibus suis capitibus & articulis; ut qui integrè fundati sint in puro & expresso verbo Dei.* Quod quidem falsum est de articulo, qui solum ex illo habetur per consequentiam.

Verum neque in eo additamento permissi sunt denique consistere: Catholicis rursus nō minùs molestè urgentibus; ut varios fidei suæ articulos, ex ipsa scriptura per evidentem consequentiam deducerent; puta illum, de quo suprā actum est, videlicet Christum non contineri realiter & substantialiter in Eucharistia. Et ridiculum illum, quem certissimā fide tenendum putant Calvinistæ; Papam scilicet esse Antichristum; qui adeo,

nullâ veritatis specie ex scriptura divina potest inferri, at magnæ Britanniae Rex Iacobus, de eo adversus Puritanos ita scripserit: *quoad definitionem Antichristi, nolo rem tam obscuram & involutam, tanquam omnibus necessariam urgere.*

Ergo ad suarum consequentiarum subsidium accerendas putarunt Calvinistæ, nescio quas comparationes, proportiones, & in qua voce præsertim acquiescunt, analogiam fidei: dicentes denique credendorum regulam; esse verbum Dei scriptum, secundum fidei analogiam expositum. Quam loquendi formam, videntur ad extremum ad rem præsentem eò pronius adoptasse, quòd eius quadam obscuritate, aut perplexitate protecti, minùs paterent redargutionibus, ac velut sepiæ obfuscatâ aquâ, suo se atramento, ne capiantur, absconderent.

Atque eam vocem in-primis videas in hac materiâ insinuatam à Beza, quodam Opusculo adversus Iacobum Andream Lutheranum: ubi de Mariæ in partu integritate agens (quam teste Augustino, Enchiridij cap. 34. *tota constitetur Ecclesia*) protervè ait: *hoc miraculum, neque verbi autoritate, neque fidei analogia, neque alicuius Patrum probabili coniecturâ niti: denique ad fidem nihil facere.* Hieronymo Zanchio, Tractatu de scriptura sacra; dum de eius expositioribus ait: eatenus illorum interpretationes sibi amplectendas, quatenus eas analogiæ fidei, & aliis scripturis consentaneas esse viderit. Domino du Pleßis, præfatione ad Tractatum de Eucharistia &c. de quo expressius infra.

Sed

Sed præsertim placet attendere, expendereque quod eâ de re cætus integer Ministrorum Genevensium, ex hac quam subiungo occasione, magis ex professo tradidit.

Emerferant in Galliis, etiamnum vivente Beza, ex eâ scholâ nonnulli, qui quorundam dogmatum suæ sectæ pertæsi, & concordie cum Catholicis ineundæ studio, plusculum de suæ disciplinæ rigore remittentes, inter alia concederent: *Ita Scripturam sacram esse solam & certam fidei regulam, ut tamen ei adiungenda essent Conciliorum, Patrum, atque Doctorum testimonia, tanquam verus scriptura commentarius; & Ecclesia denique Catholica consensus, & sacra doctrina clausula, atque signaculum.* Quæ fermè verba sunt eruditi viri Ioannis Serrani, Arausici Ministri.

Adversus hunc confestim scriptis litteris insurrexere Beza, & alij Genevenses ministri: quibus, eius conatu velut impossibili reprobato, quodad fidei regulam attinet, rem omnem in hæc verba concludunt: *Censemus igitur tutius esse atque utilius, soli Dei verbo scripto, per se ipsum secundum fidei analogiam exposito adherere: quàm prædictos sumere, pro arbitris earum rerum, de quibus solius Dei est pronuntiare. Quod mature tibi significavimus, ne in cassum labores &c.* Ita illi ex vrbe Geneva, ex qua scaturit fons primævus, & defæcata veritas Calvinianæ doctrinæ.

Attamen illis extremis, quod, de excludendis omnibus arbitris constituunt; quàm inconsequenter adscriptum est: quando ipsi consequen-

pro *rationem*, legere est, *analogiam*.

Sed præterquam quod apud Apostolum, vovum ambiguitas satis explicatur ex contextu reliquo; juxta quod varij observant Interpretes non aliud velle Apostolum, quàm, ut qui à Deo, dono prophetiæ, sive gratiâ explicandi doctrinam & scripturam sacram, donati sunt, eâ utantur secundum proportionem & mensuram fidei, sive intelligentiæ & sapientiæ à Deo sibi concessæ, neque quidquam addant ex ingenio suo, multò autem minùs, extra regulam fidei quidquam loquantur aut sapiant: in quem itidem sensum antè dixerat v. 3. *non plus sapere, quàm oportet sapere, sed sapere ad sobrietatem, & unicuique sicut Deus divisit mensuram fidei*.

Insuper clarum est, non posse ad eundem sensum applicari voces prædictas in definitione seu enuntiatione, de qua loquimur. Quia hîc jam quæritur, quænam sit regula ex parte objecti, movens hominis mentem, ad hoc vel illud credendum, ut dictum à Deo. At iuxta prædictam expositionem solùm sensus esset, debere quemlibet Deo loquenti credere, secundum mensuram intelligentiæ sibi à Deo communicatæ: quod nihil facit ad rem præsentem.

Restat igitur tota difficultas: quo nimirum sensu in allata Calvinistarum definitione accipiantur hæ voces, *Analogia fidei*. Nam cum analogia omnis seu proportio, sit inter duo, quorum unum comparatur ad alterum: perplexum remanet, an per eas voces importetur comparatio, seu proportio verbi Dei ad fidem, an

X 4 comparatio



seu articulos qui credendi sunt, quod jam non  
esset, ipsum verbū Dei esse regulā seu mensuram  
fidei, sed è contra ipsam fidem, seu articulos cre-  
dendos, esse regulam sive mensuram expositio-  
nis verbi divini.

Posteriori autem, sensus erit: verbum Dei  
exponendum esse, secundum proportionem,  
quam fides, sive res credendæ, habent ad ipsum  
verbum Dei. Per quod nondum satis determina-  
tur, quā in re sita sit ea proportio; & videtur im-  
plicari circulus, sive vitium petitionis principij:  
cū iuxta hunc modū coniunctim dicatur, ver-  
bum Dei sic exponendum, quia res credenda sic  
intelligenda est; & vicissim hunc articulum sic  
intelligendum, quia verbum Dei, quod est regu-  
la fidei sic debet intelligi.

Veruntamen hīc audienda sunt, à nobis pro-  
missa Pleissæi verba, ex quibus, quamvis intricatis  
poterit fortassis, sub prædictis vocibus quoddā  
latens mysteriū crui. Ita enim ait: in re propo-  
ta requiritur interpretatio, quā verbo Dei  
aut recipimus, retineat semper analogi-  
portionata sit, aut corresponderet  
Christiana, quā veterū al-  
lavere. Per quā, quid ali-  
mus, nisi eo sensu di-  
servatā semper a-  
exponendā s-



corpus doctrinæ religionis Calvinianæ v.g. sive non per ordinem ad articulos credendos, sed ad jam constituta; ita ut nihil, scriptum intelligatur, quod aliquomodo repugnet corpori doctrinæ sive v.g. Confessioni fidei, Calvinianæ:

In quo tamen si videatur involvi absurdū illud, quòd hac ratione Corpus doctrinæ suæ, veluti mensuram expositionis verbi Dei constituent; id tamen non adedò alienum est ab istorum hominū mente, quin illud alibi etiam expressius agnoscāt.

Videatur Gallica versio Bibliorum Genevensis anni 1573. In cuius Præfatione profitentur versionis autores; se in ea adornandā, varia addidisse, imminuisse, detraxisse, aut plures hebraicos loquendi modo emollisse; *usos in eo sanctā aliquā libertate, secundum quod Deo placuit illis elargiri de suo discretionis spiritu.* Ac deinde addunt; pro suā scilicet autoritate; *relinquere se aliis libertatem scripturam sacram convertendi; sed eā adjectā conditione: Dummodo eorum versio conformis sit nostris articulis fidei.* Sic illi.

In quibus in-primis mirari subit, excidisse non incallidis hominibus, vocem illam *sanctæ libertatis*: cum apud solertem lectorem, adjunctis præsertim illis particulis, de articulis fidei sanctis rectis servandis, con-ferre non possit, inferre suspicionem, sed licentiùs, ad eos comparata & sub arcano discretioras dignoscendas, pollere se jactant, et nobis aliisque ipsorum

comparatio seu proportio fidei ad verbum Dei. Quorum neutrum videtur in re proposita satis convenienter intelligi.

Quippe priori modo, sensus erit, verbum Dei exponendum esse per respectum ad ipsam fidem seu articulos qui credendi sunt, quod jam non esset, ipsum verbū Dei esse regulā seu mensuram fidei, sed è contra ipsam fidem, seu articulos credendos, esse regulam sive mensuram expositionis verbi divini.

Posteriori autem, sensus erit: verbum Dei exponendum esse, secundum proportionem, quam fides, sive res credendæ, habent ad ipsum verbum Dei. Per quod nondum satis determinatur, qua in re sita sit ea proportio; & videtur implicari circulus, sive vitium petitionis principij: cum iuxta hunc modū coniunctim dicatur, verbum Dei sic exponendum, quia res credenda sic intelligenda est; & vicissim hunc articulum sic intelligendum, quia verbum Dei, quod est regula fidei sic debet intelligi.

Veruntamen hîc audienda sunt, à nobis promissa Plessæi verba, ex quibus, quamvis intricatis poterit fortassis, sub prædictis vocibus quoddā latens mysteriū erui. Ita enim ait: in re proposita requiri; *ut interpretatio, quā verbo 'Dei damus aut recipimus, retineat semper analogiā fidei, proportionata sit, aut correspondens corpori doctrina Christiana, quā veterū aliqui fidei regulā appellavere.* Per quæ, quid aliud nobis insinuari dicemus; nisi eo sensu dici scripturā exponendā esse servatā semper analogiā fidei, in quantum in eā exponendā semper habendus sit respectus ad  
corpus

corpus doctrinæ religionis Calvinianæ v.g. five non per ordinem ad articulos credendos, sed ad jam constituta; ita ut nihil, scriptum intelligatur, quod aliquomodo repugnet corpori doctrinæ five v.g. Confessioni fidei, Calvinianæ:

In quo tamen si videatur involvi absurdū illud, quòd hac ratione Corpus doctrinæ suæ, veluti mensuram expositionis verbi Dei constituent; id tamen non adedò alienum est ab istorum hominū mente, quin illud alibi etiam expressius agnoscāt.

Videatur Gallica versio Bibliorum Geneven-  
sius anni 1573. In cuius Præfatione profiten-  
tur versionis autores; se in ea adornandā, va-  
ria addidisse, imminuisse, detraxisse, aut plures  
hebraicos loquendi modo emollisse; *usos in eo  
sanctā aliquā libertate, secundum quod Deo placuit  
illis elargiri de suo discretionis spiritu.* Ac deinde  
addunt; pro suā scilicet autoritate; *relinquere se  
aliis libertatem scripturam sacram convertendi;* sed  
eā adjectā conditione: *Dummodo eorum versio con-  
formis sit nostris articulis fidei.* Sic illi.

In quibus in-primis mirari subit, excidisse non  
incallidis hominibus, vocem illam *sancta liber-  
tatis*: quæ apud solerem lectorem, adjunctis  
præsertim postremis illis particulis, de articu-  
lis reformatæ fidei fartis tectis servandis, con-  
tinuo nota sit, non vanam inferre suspicionem,  
quasi ea scripturæ versio, paulò licentius, ad eos  
ipsos articulos confirmandos comparata & su-  
bornata sit; pro eo nimirum arcano discretio-  
nis spiritu, quo circa scripturas dignoscendas,  
explicandas, interpretandas, pollere se jactant,  
Calvini discipuli. Quod tamen nobis aliisque  
ipsorum

sinceritas; ad suæ fidei articulos conformandam  
esse ac mensurandam.

In quo rursus apparet familiaris ille, ac sæpe  
inculcandus, disciplinæ Calvinianæ circulus,  
& consequenter fidei illorum instabilitas;  
dum, quis sit legitimus, adeoque in ver-  
sione deligendus, scripturæ sensus; ex con-  
formitate ad articulos fidei suæ colligunt; &  
simul, qui legitimi sint fidei suæ articuli, ex  
conformitate ad legitimum scripturæ sensum,  
accipiunt.



## CAPUT XXXIV.

*Quàm absurdos in sensus inducat Calvinii se-  
quaces, temerè usurpata in fidei rebus  
analogia ratio.*

**I**stud seorsum apponimus, ut appendicem su-  
sceptæ materiæ, utque hinc amplius in-  
telligatur, quàm perniciosa sit, ab eiusmodi  
Doctoribus, ad rem summi momenti  
(qualis est Baptismi & Eucharistiæ usus legi-  
timus) licenter traducta prædictæ analogiæ usur-  
patio.

Asseverat verbis disertissimis Salvator Ioan.  
3. *Nisi quis renatus fuerit ex aquâ & Spiritu  
Sancto, non potest introire in regnum Dei.* Atta-  
men Novatores nostri, contra ipsam verbi to-  
ties iterati proprietatem, & hætenus receptum  
sensem usumque universalis Ecclesiæ, verba il-  
la

la Christi, secundum quandam analogiam extendentes, contendunt in casu necessitatis, Baptismum *quovis alio liquore, non minus quam aqua* (uti terminis expressis loquitur Beza epist. 2. ad Thomam Tilium) *conferri posse.*

Qua in re videtur præeuntem secutus, Calvinus sui prodromum, Lutherum: qui in symposiacis cap. 17. docuit: *Quidquid balnei nomine venire potest, legitimam Christiani baptismi materiam esse.* Neque enim verba Salvatoris, restrictè & propriè de aqua naturali intelligenda; sed de quovis liquore, qui ad hunc effectum, aquæ propriè dictæ proportionem respondeat.

Itaque & vino, & lacte, & (sit honor auribus & pax naribus) etiam lotio, si ita res ferat, iuxta scita quinti Evangelij ritè Baptizabitur. Quo sanè postremo liquore (quem à lotionè dici, autor est Calepinus) ætate nostra, in Hollandiæ partibus, usum esse Ministrum Calvinistam, cum ad eum de nocte in lecto cum uxore jacentem, Baptismi gratiâ delatus esset infantulus, loci & facti circumstantiis, ut in re compertâ adscriptis, scripto publico vulgatum, ipsi vidimus.

Sed non ibi sistit propudiosa, & animarum saluti perniciosa, sed etiam ad Eucharistiæ materiam sese extendit, quidvis immutandi Novatorum nostrorum licentia. Ita enim rursus expressè Beza epistolâ eadem, etiam de Calvinis mente pronuntiat: Vbi panis aut vini, vel nullus est usus, vel nulla certo tempore copia; ritè celebrandam cœnam Domini, si quod panis aut vini vicem supplet, panis aut vini loco adhibea-

tur. Hanc enim fuisse Christi Eucharistiam instituentis mentem, ut per ea quibus corpus nostrum alitur, veram alimoniam spirituales repræsentaret. A quâ proinde non aberraturum, qui (ut ipse loquitur) *Nullo prorsus novandi studio, pro pane & vino substituat, quæ, et si non parem, similem tamen analogiam rationem habeant.*

Quocirca, per illam analogiæ fidei regulam, si deest panis triticeus, etiam in pane ex milio, fabis, castaneis, & aliis quibuscvis, seu leguminibus seu fructibus confecto, ubi eius vulgaris usus est, corpus Christi ritè consecrabitur; sanguis item Christi etiam in aqua, ubi vinum defuerit: tametsi hic error jam olim ab Ecclesia damnatus sit in hæreticis, quos Augustinus Aquarios, Græci Hydroparastatas appellant. Cum interim bonus Theodorus, quo, tametsi aperto impudentique mendacio, simplicioribus imponeret, eadem epistola non erubuerit scribere: *non aliter de his ipsis rebus, ipsos etiam supersticiosissimos scholasticos scriptores censuisse.*

Sed audiat, si placet, è Lutheri scholâ, Agidium Hunnium, de hoc commento suo, in libro de cœna Lutherana, in hæc ipsa verba pronuntiantem: *Beza scribit, plusquam hæreticè, licere in defectu panis & vini, adhibere res alias.*

Porro autem quid de hoc dicemus; quod hi, qui aquâ deficiente, alium liquorem in baptismo ritè adhiberi pronuntiant; iidem in altero extremo, etiam ubi cogit necessitas, illum à privato

vato ( & multo magis à fœmina ) validè conferri posse negent ; Ita enim expresse Calvinus Epist. 334. *Sì privatus baptizet, ait, manifestam esse baptismi profanationem, ipsumque baptismum adulterium esse censendum.*

At cùm ipse sibi obiecisset Augustinum de eo dubitanter loqui : *Atqui nobis* ( respondet ) *longè pluris esse debet inviolabile Christi mandatum &c.*

Quis non obstupescat istorum hominum in fidei rebus, non jam oscitantiam, imprudentiamve, sed quasi ludicram & desultoriam, quodvis pro libito affirmandi, negandive libertatem?

Vt qui videlicet in Evangelij tractatione ita versentur, ut ubi Christus disertis verbis aquam in baptismo necessariò adhibendam significat, ipsi voluntarià usi analogià, quemcunque liquorem, sufficientem esse intelligant: è diverso autem, ubi ille discipulis suis, & in his, Ecclesiæ suæ simpliciter indifferenterque committit ipsam baptismi administrationem, nullo addito verbo, quo illam restringat ad certas personas, neque accidente, de eà restrictione, ullâ communi Ecclesiæ traditione, ab eo tamen officio, etiam in necessitate, privatum hominem excludant.

Perinde atque si, pro spiritus sui privati genio, permissum sibi existiment, in casu isto posteriore, ubi nulla est in Christi verbis specialis determinatio *mandatum* ( quod contendit Calvinus ) *inviolabile* agnoscere: in priore autem, ubi aqua à Christo, velut baptismi materia, præscribitur,



præscribitur, nullum agnoscere mandatum, sed licentiam sibi, alium liquorem, ubi aqua desit, usurpandi, permissam esse. Atque ita demum, pro animi sui libidine in uno laxos, in altero adstrictos esse: utrobique autem, quod illis solenne & complacitum est, ab Ecclesiæ veteris communi sensu, usuque protervè discedere.

Ipso interim Calvino Epistola 87. è contra rectè enunciante: *in materia proposita, tantum respiciendam institutionem, & continuum usum, qui à Christi mandato, tanquam ex fonte fluxit.* Ideoque (ut addit, verbis insanè exaggeratis, neque cum superiore suâ doctrinâ coherentibus nihil suâ referre, siue homo Lucianus (hoc est Atheus aliquis &c.) qui baptizat, siue diabolus. Sic ille.

Sed neque verum est: Augustinum verbis illis, quæ (ex libro 2. contra Epistolam Parmeniani cap. 13.) refert Calvinus, eâ de re, quod ad privatum hominem attinet, dubium hæsisse. Quandoquidem ante verba proximè relata, hæc præmiserit: *Quamquam etsi laicus percuncti (baptisimum) dederit, necessitate compulsus, nescio an piè quisquam dixerit, esse repetendum.* Quâ loquendi formâ omninò significat, non aulurum se, repetendum præscribere; quod tamen Ministri Galliæ, in Synodo Vapincensi, decreverunt absolutè faciendum. Et verbis relatis statim subijciat S. Doctor: *Sed etsi nullâ necessitate cogente; usurpetur, & à quolibet cuilibet detur; quod datum fuerit, non potest dici non datum, quamvis rectè dici possit illicitè datum.*

*A quolibet*, inquit, saltem qui baptizatus fuerit. Quia in sequentibus addit, aliam esse quaestionem de his, qui nunquam baptizati fuerint: de qua dicit; nihil adhuc determinandum.

Postremò eundem Augustinum libro 2. contra Cresconium cap. 29. ita audias loquentem: *Qui ius baptizandi sibi usurpare non debuit, sibi nocet, qui bonum malè usurpavit; non ei, qui bonum bene percepit.*

Porro, ut hoc addam iis quæ diximus de ipsâ Baptismi materiâ, minùs jam fortassè mirabimur Novatorum nostrorum audaciam, negantium aquam naturalem ex Christi præcepto adhibendam; si attenderimus Calvinum maiore infantiâ, de ipso baptismo suscipiendo in illis verbis Ioan. 3. nullum Christi præceptum agnoscere. Quippe qui libro 4. Instit. cap. 15. §. 20. expressè pronuntiet: *multum damni invexisse illam opinionem, quod baptismus aquæ sit de necessitate salutis*: quod item videas negasse Anonymum quendam, adversus quem scribit Petavius in Diatriba *de potestate consecrandi* &c. Cuius etiam mentis fuisse fertur, è Lutheranis Lucas Sternbergerus, & Ioannes Alasco è Sacramentariis.

Addent alibi generaliùs eodem Calvino, *commune esse Sacramentis omnibus, superflua esse, quoties alioqui memores simus passionis Christi.*

Sed neque parvulos saltem fidelium filios egere baptismo, disertè tradit in Instit. loco citato, & alibi; diciturque id ipsum haberi in ipsorum

ipsorum formulâ administrandi Baptismum; cum tamen in eorum confessione fidei, articulo 35, sic è contrario expressè legam. *Dicimus, quod auctoritate Christi; parvuli fidelibus geniti debent Baptizari.*

Ita ubique Labyrinthus est, & apud istos vacillant omnia; etiam in capite summi momenti.

Ad extremum, quando de Novatorum circa baptismum erroribus mentio nobis est; tenere me non possum, quin Petri Vireti, Calvini Symmystæ in libro de clavibus Ecclesiæ, insulissimum, & sive risu, sive indignatione, sive etiam commiseratione, dignum commentum, tibi Lector, propinem. Ut qui videlicet odio Romanæ Sedis, quo flagrare solent sectarii omnes, excæcatus, vigilans somniavit, aususque est scripto prodere: Tamen si Baptismus quocunque alio idiomate valide possit conferri: attamen Latinâ linguâ collatum, inutilem vel nullum esse. Ad quod fortè potuit & ipse induci eâ analogiâ fidei, ut quando, secundum Reformatam fidem, ex ipso Dei verbo, certo certius constat; Pontificem Romanum esse Antichristum: ita proportionem quadam consequens crederet, ipsam quoque linguam Romanam esse Antichristianam. Consequenter exinde fortè dicturus, ipsum quoque scripturæ Latinum textum, veluti profanum & Antichristianum, esse rejiciendum.

Eodemque facit non minùs fatuum Calvinistarum in Synodo Vilnensi decretum: *illegitimos quoscunque esse aeterna damnationi obnoxios; nec ad baptismum admittendos: contra quàm generalissimè*

ralissimè à Salvatore pronuntiatum est: Qui *crediderit & baptizatus fuerit, salvus erit.* Additque qui id refert Becanus in *privilegiis Calvinistarum privil.* 8. idem traditum in quibusdam articulis in Palatinatu vulgatis, anno 1587.

Atque ecce rursus; attende, quæso, lector optime; quò denique recidit, speciosa illa, & simplicium sensibus fraudulenter alludens, illudensque ipso vocum sonitu, puritatis Evangelij, & meri patique verbi Dei consecrandi professio.

Vt enim, quæ pluribus dixi, in pauca contraham; qui primùm iactabant, plenisque buccis concrepabant; nihil sese nisi quod in verbo Dei scripto expressum haberetur, credendum proponere; cum id eis minùs procederet, eo declinarunt, ut dicerent, saltem credendum non esse nisi quod, vel expressum esset in scriptura, vel ex eà deductum per necessarias consequentias.

Per quod, etsi magnam latamque viam aperuissent, dogmata quævis sibi complacita veluti scripturæ consentanea, venditandi: cum primum sit cuilibet, pro affectu suo, eiusmodi claram consequentiam, etiam ubi alij ne probabilem quidem inveniant, sibi fingere: uti videre est, in articulo, quod Papa Romanus sit Antichristus: attamen eo præsidio, ut minùs firmo, nondum contenti, demum ad cæcam illam licentiosamque analogiam fidei, sibi confugiendum existimarunt: cuius accessu, nemo non vider, aperiri viam laxissimam, ut sub umbrâ & obtentu verbi Dei, adstrui possit error quilibet; ut partim hætenus ostensum est, possetque itidem pluribus aliis exemplis ostendi.

Quanto



Quanto simplicius, clarius, certius, & ad communem capum, doctrinaeque ac fidei unitatem accommodatius eo in negotio procedimus nos Catholici: cum Augustino & antiquitate, pro regula fidei, verbum Dei ( seu scripto expressum; seu, sine scripto traditum; à qua quaestione abstinere possumus in praesentia ) assignantes; eo sensu acceptum, quo illud intelligit, ac filiis suis Catholica proponit Ecclesia. Fida nimirum custos, ac legitima interpretes verbi Dei; eoque nomine ab Apostolo dicta, columna & firmamentum veritatis.

Sed nimirum veritas, simplex, nuda & aperta est: ubi mendacium, multiplici sese ambage involvit, ut lateat, & fucatâ veri specie fallat incautos.

Videat proinde hoc loco bonae mentis Lector, in utros verius, nosne an adversarios ipsos; verba illa Calvinii conveniant, libro primo Institutionum capite decimotertio §. tertio. *Ne aliqua subterfugia impiis relinquant, quibus verborum involucra, errorum erunt latebrae.*



## CAPVT XXXV.

*Proprium atque perpetuum; & olim fuisse; & modo existere sectariorum caciões; non sensum suum ad scripturas divinas, sed ipsas scripturas ad sensus suos anticipatos accommodare: Eamque primitivam omnium heresim originem esse.*

*Philip. 3.*

**I**stud quidem, opinor, non una occasione in superioribus insinuavimus: sed quia locus ita postulat, placet nunc id ipsum magis ex professo deducere: quo demum vel cæcis appareat, quod non sine causa sæpiùs urgemus, eos, qui præ cæteris sese verbi Dei sequaces cultores prætendunt, hos minimè omnium ipsi Dei verbo deferre. Ut proinde, si cui eâ in re nimius videbor; possim mihi iure Paulinum illud usurpare: *Eadem vobis scribere, mihi quidem non pigrum: vobis autem, necessarium.*

*De tr. scrip. c. 17.*

*Ibid. cap. 4.*

Quam in rem in-primis antiquissimum Tertullianum suprà vidimus; in sui ævi hæreticis id subnotantem; quod scripturas variè *ad dispositionem sui instituti* perverterent, & fidei doctrinam pro arbitrio suo modularentur, aut componerent.

Eodemque nomine Augustinum, culpantem Manichæos: quòd id denique viderentur agere, ut *suis cuique animus* (sive propria animi persuasio, autor sit, quid in quaque scriptura probet, quid improbet, &c.

Verum

Verum universè eum esse proprium hæreticorum genium rectè observavit commentarius Ambrosio adscriptus in caput 3. Epistolæ ad Titum ita scribens : *Hæretici sunt , qui per verba legis , legem impugnant . Proprium enim sensum ( id est , eum quem quisque sibi privatim præcomposuit ) verbis adstruunt legis ; ut perverstatem mentis suæ , legis auctoritate commendent .*

Eamque præsertim extitisse hæresum omnium originem nominatim admonet S. Hilarius : dum libro 7. de Trinitate , adversus Arianos disputans ; qui nescio quibus , circa Verbi divini eandem cum Patre substantiam , offuciis præpediti ; ad hæc Platoniceis disciplinis , sive ( Tertulliani verbo *Philosophatis doctrinis* *hominum* , ) præventi , ad divinas litteras interpretandas accesserant ; expressè tradit : *Ex vitio male intelligentiæ , fidei extitisse dissidium ; dum , quod legitur , sensui potius coaptatur , quàm lectioni sensus obtemperat .* Ex quo consequens fit ; ut ( quod subiungit lib. 8. ) *fidem ipsi sibi potius constituent , quàm accipiant ; dum nempe studio humanæ inanitatis inflati , quæ volunt , sapiunt ; & nolunt sapere , quæ vera sunt .*

Nimirum amat quisque libens conceptiones , & partus animi sui : & difficulter abstrahitur ab eo quod semel adamaverit . Quâ etiam in re alicubit agnoscit Augustinus , cæcum errorem sædamque labem humanæ vitæ : quoddum nempè , *Sic ametur veritas , ut quicunque aliud amant , hoc quod amant , velint esse veritatem : & quia falli nolunt , nolunt convinci , quod falsi sint .*



*Trin.*

Quapropter cuilibet ad verbi divini lectionem accedenti, ab omni affectu sensuque præsumpto, evacuandus est animus, servandaque illa præclara eiusdem Hilarij regula. *Optimus enim lector est, qui dictorum intelligentiam expectet ex dictis, potius quam imponat; & retulerit magis, quam attulerit: neque cogat id videri dictis contineri, quod ante lectionem præsumpserit intelligendum.* cui consonans B. Hier. in c. 10. Matthæi. *Prudens lector, inquit, cave superstitiosam intelligentiam, ut non tuo sensui attemperes scripturam, sed scriptura iungas sensum tuum.*

Et quoniam scriptura divina, tamen ad eam animum docilem, quis attulerit; non omnibus locis per se aperta & pervia est: adiungenda est Hilarij regulæ, illa altera S. Augustini, lib. 1. contra Cresconium Grammaticum cap. 33. sapienter admonentis: *Scripturarum à nobis tenetur veritas, dum hoc facimus, quod universe iam placuit Ecclesiæ; quam ipsarum scripturarum commendat auctoritas. Ut quoniam sancta scriptura fallere non potest; quisquis falli non vult obscuritate quæstionis, eandem Ecclesiam de illâ consulat, quam sine ulla ambiguitate sancta scriptura demonstrat.* Sic illi.

Quæ quam sapienter, quamque necessario præcipiantur, vel inde evadit manifestum: quod alioqui necesse sit in Ecclesiis, summam credendorum diversitatem, perplexitatem, confusionem existere; dum quisque nimirum sibi fidem pro arbitrio suo modulatur; & sunt quod dici solet, quot capita, tot sententiæ.

Qua item ex causâ, horrendum chaos, summamque fidei perturbationem, in Ecclesiâ suo ævo ab Arianis

Arianis inductam, his verbis deplorabat, antea non semel, sed nunquam satis, laudatus S. Hilarius; eo in libello, quem Constantio Augusto, pro fidei Orthodoxæ defensione suâ manu obtulit: *Periculosum*, inquiens, *vobis admodum atque etiam miserabile est, tot nunc fides existere, quot voluntates, & tot nobis doctrinas, quot mores: dum aut ita fides scribuntur ac volumus; aut ita, ut volumus, intelliguntur.*

Quod quidem de ipso novarum sectarum Principe Martino Luthero, multis sanè exemplis, sed, isto præsertim ostendi potest. Quod is secessionem ab Ecclesia Catholicâ meditans, cum iustitiam hominis per solam fidem, omnis licentiæ ac corruptelæ in vitâ instituendâ fontem, Religioni novæ à se condendæ, veluti basim præstitueret constituisse, dein animadvertens, B. Iacobi epistolam instituto suo apertè esse contrariâ, atque his præsertim illius verbis c. 2. *Ex operibus iustificatur homo, & non ex fide tantum*, errorem suum peremptoriè iugulari; ut hunc sibi scrupulum efficaciter eximeret; eam epistolam, Tertullianiverbo, non stylo, sed machærâ, usus, (ut & plura alia) ex ipso sacrarum scripturarum canone recidendam censuit, appellans eam stramineam, aridam, indignam Apostolico spiritu. Cuius ausûs, cum ipsos etiam illius sectarios puderet, nonnulli negarunt eum ita scripsisse (qui tamen ex antiquis bibliis, quæ adhuc supersunt, præfatione in novum testamentum, apertè convincuntur) alij correxisse affirmarunt: eandemque ipsi inter scripturas sacras retulerunt: sic tamen, ut (teste Gudsmio *in causâ Calvinî desperatâ*) in Bibliis

Tubingæ editis, ad caput 2. eius epistolæ in margine annotarint: *Hæc epistola nostro & veterum tempore suspecta fuit; quia Apostolus admodum periculose loquitur de hominis iustificatione.*

Quâ licentiâ pariter ijdem admonere possent, ad verba Christi Matth. 19. *Si vis ad vitam ingredi, serua mandata*; Christum admodum periculose loqui de iustitia operum: & ad illa; *Hoc est corpus meum*, Sacramentarij: eundem admodum periculose loqui, de suâ in Sacramento præsentia.

Verum mox ultra progressus Luther. quasi habere volens quod Iacobi verbis opponeret; verbis S. Pauli Rom. 3, v. 28. diabolico (ut in re simili loquentem audimus Augustinum) privilegio, vocem *solan* addidit; innumeras autem novi Testamenti sententiâs, quibus operum iustitia, & mandatorum observatio adstruitur, ut earum vim eluderet, non in sensu proprio, sed ironico, aut verbis ipsis directè contrario, pro sua scilicet autoritate, intelligendas esse constituit.

Quod quid aliud est, nisi aperto contemptu, scripturas divinas, ad sensum proprium animi sui, non jam accommodare dicam; sed invitas quasi repugnantes compellere; eundemque sensum aut arbitrium suum, ac denique seipsos divini verbi interpretandi regulam ac normam constituere.

Superbâ utique & arroganti, primitivæ illius ab Angelis primùm, deinde à primis generis nostri autoribus susceptæ defectionis à Deo seu adversus Deum, rebellionis, imitatione: quam

in eo positam , post Augustinum non uno loco scripsit Bernardus ; quod , *suâ potestate delectari* <sup>ep. II. ad Guidonem.</sup> *ipsi sibi lex esse voluerint, & legem sibi suam facere voluntatem.*

Porro ut ad Calvinum reveniam: an non illum plus anticipatis animi sui notionibus,quàm ingenuæ verbi divini simplicitati deferre illa eius palam ostendit; in deneganda Corporis Christi in Sacramento veritate , præfracta pertinacia? Quippe qui ingenio suo præfidens , & intelligentiæ suæ modulo divinæ virtutis immensitatem protervè dimetiens; cùm binas istas enuntiationes ; *Impossibile esse , etiam per Dei omnipotentiam, idem corpus simul esse in duobus locis.* Item: *per eandem Dei potentiam , non posse corpus omni externa dimensione privari* , profundè induxisset in animum : maluit proinde clarissimas illas Christi voces ( in quibus fateretur ipse Beza , non posse teneri τὸ ἐν τῷ , sive ipsam dicti proprietatem, nisi Catholica transubstantiatio statuatur ) contra receptam ab initio Ecclesiæ fidem , ad metaphoram deflectere , seu intorquere,quàm,uti par erat,divini verbi autoritati sensum suum ingenuè subjiciendo,de anticipatis illis principiis ullo modo dubitare.

Cùm interim,ut id obiter admoncam ; idem ipse Calvinus , alio in dogmate , etiam magis difficili , & ipsis scripturis Deique bonitati manifestè repugnante ; eo videlicet , quo statuebat Deum , præ solo suo arbitrio, homines aliquos iustitiæ suæ exercendæ gratiâ , ad interitum destinasse , eumque in finem ipsorum lapsum atque peccata decrevisse , eosque denique

ad



L. 3. Instit.  
c. 23. § 7.

ad ea perpetranda , suo tempore movere ; impellere , cogere ; propterea quod illud tueri è re suâ duceret , viâ prorsus oppositâ , processerit. Nam cùm istud decretum fateretur esse horribile , illudque reipsa exhorrescant plerique etiam ipsius sectarij ; in eo tamen defendendo perstitit ; ei quam sibi ipse objiciebat difficultati , contentus , affectatâ modestiâ in hæc ipsa verba respondere : *ubi non capimus quomodo fieri velit Deus , quod facere verat ; veniat nobis in memoriam nostra imbecillitas , & simul reputemus , lucem quam inhabitat , non frustra vocari inaccessam , quia caligine obducta est.* Ita ille libro primo institutionum , capite decimo octavo , §. tertio. Cui simile quiddam , si ei lubuisset , ad difficultates , quas ipse invenit in Eucharistiæ mysterio , nobiscum respondere : nihil opus fuisset tot eâ de causâ ab eo excitari tragœdias , & contra sentientes , etiam insanos appellari.

Verùm nihil mirum est , in pari causâ disparem esse sententiam ; quando in eâ ferendâ non tam causæ meritum , quam insitâ animi propensio , & cæcus consulitur affectus.

Et simile quiddam in alio casu , non minùs aperto , videre est. Nam cùm idem Calvinus , adversus Ecclesiæ Catholicæ sensum eam sibi adoptasset falsam sententiam : quæ negat Sacramenta novæ legis maiorem habere efficaciam , quàm Sacramenta veteris ; ipsumque adeò Ioannis baptismum contenderet paræ efficaciam cum Christi baptismo fuisse : animadvertens se vehementer impugnari ex eo , quod Actorum 19. cap.

cap. refert S. Lucas, quosdam fideles solo Ioannis baptismo tinctos, iussos à Paulo iterum baptizari *in nomine Domini Iesu*; ne capropter à sensu suo anticipato discederet: maluit contra sensum communem, & ipsius contextus consequentiam, verborumque genuinam proprietatem; dicere fideles illos, non fuisse iterum baptizatos, sed tantum per hæc significari accepisse illos dona Spiritus Sancti.

Cum tamen ex usu scripturæ constet baptizari in nomine Domini Iesu, idem esse ac suscipere baptismum Christi; & ipse contextus; apertè ut diversa referat; baptizatos fuisse, & per impositionem manuum Apostoli, Spiritum Sanctum venisse super eos, & Actorum octavo capite, manifestissimè ista opponantur inter se, nec negare possit ipse Calvinus, eo saltem loco baptizari in nomine Domini Iesu, intelligi de suscepto vero Baptismo Christi.

Verum, uti dixi, hæc omnia contemnit, contrario sensu præoccupatus animus, paratus potius, ut quod de Luthero dixit Zuinglius, etiam de Calvino usurpem, non sibi modo, sed etiam divini verbi o raculis contradicere, quàm à semel conceptra opinione discedere.

Et verò hoc ipsum cacoëthes, in suis fratribus agnoscit, & damnat ipse Calvinus, Præfatione in Psychopannychian: cuius loci primores versus aliâ occasione supra produximus. Ita enim deinde insistit, *Tandem (quod est caput mali) dum obstinatè tueri pergunt, quod semel temerè effutiverunt; tum Oracula Dei consulunt, ex quibus errorum suorum patrocinia quarant. Vbi, Deus bone,*

bone, quid non evertunt, quid non depravant atque corrumpunt, ut ad sensum suum, non dico inflectant, sed vi incurvant; hæcine est discendi, via; versare ac volutare scripturas, ut libidini nostra serviant, ut sensui nostro subiiciantur; Quo, inquit, nihil est stolidius.

Ad extremum affectatè subiungit sapiens monitum; cuius utiq̃am prior ipse rationem habuisset: Nos, Fratres, tot exemplis moniti, vel serò tandem sapiamus. Pendeamus semper ex ore Domini, & ne quid ad eius sapientiam admisceamus de nostro, ne velut fermentum totam massam corrumpat &c. Sic ibi.

Tandem, quod attinet ad affectatam proprietatis suprà memoratorum verborum Christi, *Hoc est corpus meum*; negligentiam, seu non curantiam; in eundem cum Calvino lapidem incurrunt plerique omnes Sacramentarii; quorum complurium à doctissimo Fevardentio locis adscriptis, relatas voces homine quidem Christiano indignas, ad ipsarum sectarum probrum operæ pretium est, etiam hoc loco, saltem ex parte audiri.

Zuinglius igitur, de augustissimo Eucharistiæ Sacramento agens, disertè fatetur, se in eo argumento, non niti verbis Institutionis quæ referunt Evangelistæ; sed hoc uno dicto, Ioannis 6. *Caro non prodest quidquam*. Quasi nempe diceret: sese verba quibus in Sacramento instituendo Christus usus est (eò quòd ad sensum suum minùs faciant, & aliquid proferant, quod ipse capere non possit) tamen clara & aperta, in hac controversiâ non attendere: sed unicè nisi ver-  
bis

*Theomach.*

*l. 16. al. c. 19.*

*1. Catech. f.*

*mi Calvin.*

*n. 41.*



bis illis Ioannis , quanquam minus apertis , & re ipsa sensum alium in se continentibus: propterea quod hæc potius ad sensum suum accommodare & inflectere possit,

Sed propius ad propositum nostrum: *Remove* inquit *Svvenkfeldius* ibidem citatus, *ista verba: Hoc est corpus meum, & considera, quam sit natura corporis humani.* Et *Vermilius*, sive *Petrus Martyr*; *non tam verbum divinum, quam etiam verba natura* asserit *sequenda esse in Theologia.* Quibus quidem quid aliud significant, quàm sese pro regula mysteriorum fidei, non tam quid ipsa scriptura dicat, quàm quid natura rerum permittere videatur, attendere?

Porro *Strigelius* nescio quis ibidem non est veritus, etiam impudentius scribere: *se in re tali dextrum oculum habere ad naturam, sinistrum autem ad verba Christi.*

Tandem aliis omissis; quod credere vix possem, nisi ad eò fide dignum haberem autorem; ipse *Beza* non exhorruit ( inquit expressis verbis *Fevardentius* ) *divinissima Christi verba, vocare umbram asini, auriculas asini, fatentes asini crepitus &c.*

Et non exhorrescitis ad hæc, Domini Reformati, & tam cæci estis, ut non perspiciatis continuò, ex eà vestrorum Doctorum philosophandi ratione, non tantum subverti sacræ Eucharistiæ dogma Catholicum; sed etiam divinæ Trinitatis & Incarnationis mysteria, quæ recipit vestræ fidei Confessio, consimiliter eludi posse: dicentibus illinc Sabelliano aut Ariano, hinc autem Nestoriano aliquo; in Theologiâ non tantum

tantum quid scriptura significet, sed etiam quid ferat natura rerum, attendendum esse: sibi autem esse persuasissimum: trium personarum in unam naturam, aut duarum naturarum in eandem hypostasim, convenientiam, ex suis terminis manifestè repugnare. Immodò generalius: ubicunque à Scripturâ sacrâ quidpiam traditur, quod consuetas naturæ vires, nostramque adeò intelligentiam exuperet; id non in genuino proprioque verborum sensu, sed in exotico; metaphorico; hyperbolico accipiendum esse. Quod equidem esset, & verbi Dei energiam pro animi cuiusque libidine, prorsus eludere; & quod præfert inscriptio capitis; cuius hæresi latissimum aditum aperire:

Et ubi jam erit, summa illa virtus ac potentia fidei divinæ; per quam gloriatur Apostolus sese, destruere omnia consilia (Græcè λογισμὸς, id est, 2. Cor. c. 10 omnes objectas naturalis Philosophiæ rationes) & omnem humanæ sapientiæ altitudinem, extolentem se, sive opponentem se scitis divinæ sapientiæ; atque ita sibi subjicere, & quasi in captivitatem ac servitutem redigere, omnem intellectum in obsequium.

Quam quidem humani sensus sub divina Christi autoritate subjectionem, adeò non curat ipse Calvinus ut prætextu rejiciendi fidem Catholicorum implicitam, omninò explicitam & perspicuam divinæ veritatis cognitionem requirens; audacter subdat: *Hac cognitione & non sensus nostri submissione ingressum in regnum calorum obtinemus.* Sic ille.



## CAPUT XXXVI.

*Ex dictis nominatim deducitur, quam falsò Calvinus, eiusque pulli, de accurato præ Catholicis, puri verbi Dei studio, usuque gloriantur.*

**M**Anifestum quidem id esse potest, ea quæ diximus paulò attentius consideranti: cum negari non possit, plus reverentiæ studique deferre verbo Dei, illos qui ei primas deferunt, secundas autem ratiunculis ex infirmâ nostrâ intelligentiâ, aut consueto rerum naturalium ordine, petitis; quod facimus nos Catholici; quàm qui ante omnia debilem sensum suum, naturæque leges attendunt, ut iis consultis pronuntient, quem denique in sensum verbum Dei accipiendum videatur; quod facere Calvinum eiusque discipulos, apparet ex dictis.

Verùm, cum ea res magni sit momenti ad scopum susceptæ à nobis exercitationis; visum est id ipsum, in suprâ prolato, de Corporis Christi in Sacramento Eucharistiæ exemplo, tam evidenter ostendere, ut etiam à rudioribus planè & plenè possit intelligi.

Siquidem in eius tractatione mysterij, ita procedit discurretque Calvinus: Fieri non potest, ut idem Corpus simul sit verè ac realiter in locis pluribus. Atqui corpus Christi verè est in cælo, donec ad iudicium veniat. ergo nequit simul verè

rè & realiter esse sub sub symbolo panis; & cōsequenter verba illa Christi : *Hoc est corpus meum* : non possunt in sensu vero seu proprio accipi.

Catholici verò ab hoc postremo exorsi, è diverso ita discurrunt. Corpus Christi est verè & realiter in Sacramento : quia ita postulet verborum Christi genuina proprietas, & perpetuus de eo verborum intellectu, Ecclesiæ sensus; & tamen simul est in cœlo. Ergo concedendum est, per absolutam saltem Dei potentiam, posse idem corpus simul esse verè ac realiter in pluribus locis.

In quibus argumentandi modis, uti fortè jam adverteris, Lector ingenue, magna est & notatu digna differentia: quod in Calviniana formula pro basi & fundamento argumenti assumatur principium, ex solâ naturali experientia, & humanâ ratione petitum; ex quo consequenter proceditur, ad determinandum, sitne verbum Dei, in sensu proprio, aut metaphorico, seu improprio interpretandum. Ex quo statim apparet, eos ex illa ipsorum phrasi, dextrum oculum habere ad naturam, sinistrum autem ad verba Christi; sive, naturale rationis lumen, esse sensus verbi divini regulam; cùm è contrario verbum Dei, qui certissima atque suprema veritas est, debeat naturalis luminis regula atque amussis esse.

*Apud Plu-  
tarchum.*

Nos autem, memores prisce verique proverbij: non amussim ad lapidem, sed lapidem ad amussim esse accommodandum, ante omnia attendimus; quis sit reipsâ scripturæ  
sensus

sensus; & tùm ex ipsa genuinâ verborum Christi proprietate, à qua nihil est quod compellat nos recedere; tùm ex orthodoxæ Ecclesiæ, quam ut legitimam habemus divinæ veritatis interpretem, definitione ac traditione comperitum habentes, corpus Christi simul verè, & in cœlo, & in Sacramento esse; consequenter procedimus ad corrigendum sive potius suppleendum ac modificandum, ( ne alioqui verbo Dei repugnet ) naturale illud principium, dicentes aliter fieri posse per absolutam Dei potentiam, quæ nempe immensè transcendit & exuperat, seu naturæ vim, seu naturalis luminis aut rationis humanæ sibi relictæ, infirmitatem.

Atque hoc modo dextrum oculum ad verbum Dei, & sinistrum ad naturam habentes, obsequimur B. Apostolo, cautissimè monenti: *ut fides nostra non sit in sapientia hominum, sed in virtute Dei.*

1. Cor. 2.

Quam sensus nostri, sub divinam, sive veritatem, sive virtutem subjectionem, quoties scriptura supra naturæ vim, & intelligentiæ humanæ captum, quidpiam videtur proponere, cùm in universum adferamus; ex hac quoque parte manifestum est nos nimio plus deferre verbo Dei; quàm ij faciant, qui ut sectam suam plausibiliorem reddant, puri verbi Dei Sectatores, sese jactitant: *habentes speciem pietatis, virtutem autem eius abnegantes.*

2. Tim. 3.

Quos nimirum sensus humani infirmitate, divina metiri contendentes, superbæ vanitatis, immò stultitiæ coarguit præclarus Doctor S. Hilarius; verbis utique commemorabilibus, & dignissimis;

dignissimis, quæ etiam à nostri ævi sectariis ponderentur. Ita autem ait, lib. 3. de Trinitate. *Omnis itaque infidelitas, stultitia est; quia imperfecti sensus sui usâ sapientiâ, dum omnia infirmitatis suæ opinione moderatur, putat effici, non posse, quod non sapit.* Et rursus: *Ergo quidquid pereuntibus stultitia est, hoc iis qui saluantur Dei virtus est: quia nihil naturalis sensus infirmitate moderantur, sed divina potestatis efficientiam, secundum infinitatem celestis virtutis, expendunt.* Ex quibus ad extremum infert: *Nihil igitur in divinis effectibus, humana mentis opinione tractandum est.*

L. 2. Metaph.  
physic. 2. 1.

Cap. 9.

Et sanè, si, ut sapienter agnovit ipse Philosophus; sicut oculi vespertilionis ad lumen diei se habent; ita intellectus animæ nostræ ad manifestissima naturæ: multò minùs erit sibi ipsi permissus ad ea quæ sunt supra naturam pervidenda sufficiens. Aut velut legimus in libro sapientiæ: *difficile estimamus, quæ in terra sunt; & quæ in prospectu sunt, invenimus cum labore: quæ autem in cælis sunt quis investigabit? sensum autem tuum quis sciet, nisi tu dederis sapientiâ &c.*

At ista non audit, sibi præfidens humanæ mentis proterva intelligentia; & quia non credit, nisi quod sapit; hinc non sensum suum subicere amat verbo Dei, sed illud potius ad sensum suum inflectere: quam etiam dixi; videri omnium hæresum primitivam originem esse. Quod hoc præclaro dicto, ad suprâ laudata Apostoli verba: *ut fides vestra non sit in sapientia hominum*, confirmans Beatus Ambrosius, & qua velut aureâ clausulâ, quæ hætenus scripsi obsignem

obsignem: *fides igitur non sit in hominum sapientia, & hæresis non erit.*



## CAPUT XXXVII.

*Fidem Calvinistarum specialem, Scripturâ divinâ ut propriâ regulâ, non nisi.*

**N**ON est nobis hoc loco disceptatio, de eo actu, quo juxta Calvinum, ipsius fideles ex sola Spiritu interioris persuasione, discernunt Scripturas canonicas à non canonicis; cuius veritatis constat apud ipsos, verbum Dei scriptum regulam non esse, sed eo posito, investigamus in præsentia, utrum si fortè non universè, at circa aliquas fidei suæ veritates, simile quiddam dicere habeant: contra id quod tradit ipsorum Confessio, *verbum Dei scriptum, omnis veritatis solam & unicam regulam esse.*

Qua in re, ut distinctè, ordinatèque procedatur; distinguenda nobis est, quod ad præsens attinet, duplex fides: quarum altera dicatur generalis, ex eo quod versetur circa omnes veritates, quæ nobis à Deo revelantur in Scripturis. Altera specialis; quâ juxta Calvinum unusquisque fidelis credere debet se justum esse, & ad vitam æternam propter Christum ex speciali Dei benevolentia præordinatum: in quo actu dicunt, fidem iustificantem consistere.

Atque ut ab hoc incipiam: fuit quidem &

Z 2. hic



hic Lutheri error : *Iustum* certò , etiam certitudi-  
 dine fidei , scire se esse in statu gratiæ , licet nullam  
 Error 23. eius habuerit revelationem specialem.  
 apud Gault.

Sed , ipsis vocibus , magis insolens & pro-  
 terva est , Calvini sententia : *unumquemque fi-*  
*delem posse ac debere indubitata fide credere , se in-*  
*ustum esse apud Deum , perseveraturumque in Dei*  
*gratiâ ; ac proinde regnum cælorum jam esse suum ,*  
*nec illud posse sibi excidere.* Quò maximè spe-  
 ctant hæc eius verba , ex libro 4. Instit. c. 17. §. 2 ,  
 præsertim , ut admonet Gaultérius , in editione  
 Gallica : *Nobis securè spondere audemus , vitam*  
*æternam nostram esse , cuius Christus est haeres : nec*  
*regnum cælorum posse magis nobis excidere , quàm*  
*ipsi.* Rursum ; peccatis nostris non posse nos magis  
 damnari , quàm ipsum.

Sed dissimulatâ in præsens temerarij hominis  
 exaggeratâ audaciâ : illud præsertim in rem  
 nostram assumimus ; quòd expressissimè tradit  
 lib. 3. cap. 2. §. 16. *Verè fidelem non esse , nisi qui*  
*divinæ erga se benevolentia promissionibus*  
*fretus , indubitatam salutis expectationem præ-*  
*sumit.*

Quâ doctrinâ positâ : faciamus Calvinistam  
 aliquem ( quem v. g. appellemus Gualterum  
 Guilielmum ) ex Calvini sensu , certâ fide cre-  
 dere , se esse iustum , & electum à Deo , & in-  
 fallibiliter perventurum ad vitam æternam.  
 Quæro , in quo verbo Dei scripto , ut proximâ  
 & sufficienti regulâ fundatur iste actus fidei ?  
 Nam si ( ut certum est ) in nulla scriptura ex-  
 pressè habeatur hæc absoluta propositio : Gual-  
 terus Guilielmus est iustus , & electus à Deo ,  
 adeoque

adeoque infallibiliter salvabitur : neque ea  
 rursum ex verbo Dei deducatur , per evidentem  
 saltem consequentiam : ea hoc ipso vel credi  
 no n! potest fide divinâ , vel pro eo actu alia  
 erit regula fidei quærenda.

Quod enim Calvinus eam in rem scribere  
 visus est , lib. 3. citato, cap. 2. §. 28. *fidei* (inquiens)  
*fundamentum facimus gratuitam promissionem,*  
*quod in ipsa propriè fides consistat.* Et §. 29. *fides*  
*propriè à promissione incipit , in ipsa constat , in*  
*ipsa desinit :* id , inquam , nihil ad rem facit ,  
 quandiu promissio ( prout in casu nostro ) dun-  
 taxat generalis est , neque applicatur ad perso-  
 nam, de qua est sermo, Alioqui in hac argumen-  
 ti formâ : Deus v.g. promisit salutem æternam  
 credentibus in se , & ( quod iuxta ipsos conne-  
 xum habetur ) in sua iusticiâ usque in finem per-  
 severantibus : nisi quid addatur, non magis evi-  
 denter inferes : ergo Gualterus. Guilielmus in-  
 fallibiliter salvabitur : quàm si quis olim inde  
 intulisset : ergo Iudas infallibiliter salvabitur ;  
 aut modò inferat : ergo Antichristus infallibi-  
 liter salvabitur.

Addendum igitur est in argumento : Atqui  
 Gualterus Guilielmus , fidelis & iustus est &c.

quo modo Beza dicebat, unumquemque ita ra- *In conf. sua*  
 tiocinari debere. *Ego sum in Christo*, id est in *punct. 4. a. 5.*  
 Dei gratia , & ideo perire non possum.

Verum cum hoc ipsum quod nempè Gualte-  
 rus fidelis & iustus sit , dicatur, ab ipso Gual-  
 tero fide certâ & indubitata credendum : recur-  
 ret quæstio : in quo loco scripturæ fundari pos-  
 sit hoc iudicium , in ipso Gualtero : *Ego fidelis*

*sum & iustus*, aut, *Ego in Christo sum*; ita ut ex illo deducatur, saltem per evidentem consequentiam.

Cumque nullus omninò proferri possit locus eiusmodi: manifestè infertur, regulam proximam & determinatam talis actus fidei, si quis dari fingatur: esse ipsam internam revelationem Spiritus: & consequenter verbum Dei scriptum, eà saltem ex parte non esse unicam & adæquatam regulam fidei; cùm hæc arcana revelatio, si detur, non sit utique verbum Dei scriptum.

Neque dicas eam certitudinem sufficienter fundari, in eo quod Rom. 8. v. 16. dicitur: *ipse Spiritus testimonium reddit spiritui nostro, quod sumus filij Dei*. Quo loco & ei similibus, ad hunc errorem suum stabiliendum abutuntur Sectarij.

Etenim, præterquam, quòd hic locus non possit accipi de certitudine fidei, sed tantùm de certitudine morali, ex signis & argumentis vehementer id suadentibus; ne alioqui is contradicat aliis locis Scripturæ, manifestè contrarium tradentibus; ut exempli causâ Prov. 20. *Quis potest dicere, mundum est cor meum; purus sum à peccato?* Eccl. 9. *sunt iusti atque sapientes, & opera eorum sunt in manu Dei; & tamen nescit homo, utrum amore, an odio dignus sit.* 1. Cor. 4. *Nihil mihi conscius sum; sed non in hoc justificatus sum.* Quæ omnia iugulant fidem illam specialem hæreticorum.

Attamen, ut id etiam concedamus adversariis, eum videlicet sensum quem intendunt, re-  
ipsa

ipsa cadere in locum prolatum : adhuc dico illum nihil conferre posse in rem præsentem.

Observandum quippe est , ut omnis tollatur æquivocatio ; aliud esse , ex eâ scripturâ quasi reflexè haberi ; unicuique justo , per interioris Spiritus persuasionem , aut revelationem , constare certò & infallibiliter de sua iustitiâ : aliud hanc ipsam Scripturam posse directè , & ut propriam regulam , ad hoc conducere , ut hic iustus , puta Gualterus , in se formet votum certæ fidei , de suâ iustitiâ. Quod clarum est fieri non posse ; cum ea scriptura nihil absolute dicter de cuiusque hominis iustitiâ : sed duntaxat quasi conditionatè affirmet , ei qui iustus sit , per internum quoddam Spiritus sancti testimonium , certò constare , quod sit filius Dei. Ex quo etiam apparet , eam certam fidem seu persuasionem , non haberi in ipsis iustis , à Spiritu sancto velut per scripturam publicè loquente ; sed ab interiori eiusdem Spiritus testimonio tanquam eius assensûs regulâ propriâ ac spirituali.

Ex quo discursu denique manifestum evadit, fidem specialem Calvinistarum , si qua detur in rerum naturâ , non in verbo Dei scripto fundari , tanquam directâ & propria regula fidei ; sed aliam , ut diximus , & specialem regulam habere ; & consequenter , quod probandum erat , verbum Dei scriptum non esse regulam omnis veritatis.

Quid autem si hoc quasi gradu factò , ulterius progressi , illud ex abundanti adiunxerimus

mus, quod insuper insinuabamus: etiam absolute, seu nullo in casu, verbum Dei scriptum esse fidei Calvinianæ regulam; Quod quidem evidentis erit consequentiæ; si illud, minùs expectatum, demonstraverimus, quod suscipimus præstandum proximo capite: in schola Calvini, extra fidem illam specialem, nullum alium veræ ac Christianæ fidei actum, agnoscendum esse.



## CAPVT XXX-XVIII.

*Deducitur ex Calvini dictis, prædictam fidem specialem, unicum & adequatum fidei Calvinianæ actum esse; & quod hinc sequitur, nullum Calvinianæ fidei assensum, verbum Dei scriptum, pro regulâ propriâ habere.*

**P**aradoxum istud continuò censebit Lector meus; nec crederet, etiam de Calvini scholâ, quisquis paulò leviùs eius doctrinâ tinctus, suæ ipsius sectæ arcana minùs penetraverit.

Cùm & alioqui parte ex una nimis clarum sit, unicuique fideli, verâ atque divinâ fide, credendum esse v. g. Deum omnia creasse ex nihilo; Christum natum esse ex Virgine, & quæcunque alia divinis scriptis continentur, extra proprium objectum fidei istius specialis.

Ex



Ex alterâ autem ipse Calvinus, id olim sibi ab adversariis objectum, velut calumniam repulerit; libro 3. Instit. c. 2. §. 30. ita proloquens: *Nos immeritò gravant calumniatores, ac si negaremus, fidem habere respectum ad omnes verbi Dei partes.* Et antea ibidem §. 7. *non negamus, inquit, quin fidei officium sit veritati Dei subscribere, quoties, & quidquid, & quocunque modo, loquitur.*

Verum, quod ad hoc postremum attinet; nō est quidquā insolens, imò familiare est Calvino; ubi odiosius quidquam ex ipsius dictis objectum sit, id quod reipsa docet, verbo negare; aut certe (quod istis Exercitationibus passim demonstramus) etiam in primariis doctrinæ suæ capitibus; fluctuantem, varium, atque perplexum esse.

Nostrum igitur erit hoc loco, ex ipsâ Calvini doctrina, id quod propositum est, deducere: siquid autem alibi, aut eodem loco contraxerit; quatenus ad scopum nostrum attinet, non attendere.

Atque ut hinc ordiar: non difficile erit ex Calvini sensu, superiori capite exposito, aliisque eiusdem affinis locis, quos Errore Calvini 6. nobis suggerit Iacobus Gaulterus, destinatum nostrum efficere.

Quid enim aliud sibi volunt illæ Calvini voces: *fundamentum fidei esse gratuitam Dei promissionem?* Ab hac fidem insipere, in hac constare, in hac desinere; ac demum, quod infra adjungit: *fidei unicum scopum, esse Dei misericordiam; proprium fidei objectum, esse Dei bonitatem, quâ peccata remittuntur?* Nam si hic unicus fidei scopus,

verbo Dei, aut Evangelio continentur, puta quod suprà dicebamus; Deum omnia creasse ex nihilo; Christum natum esse ex virgine, & reliqua Evangelij dogmata, non pertinere ad objectum fidei Christianæ, neque adeò posse verā & Christianā fidei credi; cū nulla facultas, seu virtus, ferri possit extra objectum suum adæquatum. Et hinc ulteriùs, si hæc ut vera acceptentur, si non; immò (ut pòst inferam) etiam si expressè negentur, nihil id ad salutem pertinere; sed rem omnino adiaphoram, siue indifferentem esse.

Quæ, quanquam, sūnt dictū atque auditu horribilia, & piis auribus prorsus intoleranda: tamen, ut dixi, negari non potest, quin ad eam, quam proposuimus, Calvinī doctrinam, sint consecraria: immò, ut jam ostendam, ab ipso Calvino, loco citato §. 9. & sequentibus expressè admissa.

Eo quippe loco, postquam Catholicos Theologos, qui fidei objectum docent esse, Deum, & exinde scilicet, quidquid est à Deo revelatum, superbo fastidio rejecisset, consequenter addit: *Credere certè quàm plurimos, Deum esse, Evangelicam historiam, ac reliquas scripturæ partes veras esse, arbitrari: esse etiam, qui ultra procedentes, & Dei sermonem pro tutissimo habent oraculo, nec eius præcepta prorsus negligunt, & minis & promissionibus utcunque commoventur.*

Talibus quidem fidei testimonium tribuitur, sed per catachresin (siue abusum) quoniam Dei verbum non impugnant manifestā impietate, vel reiciunt, vel contemnunt; sed quandam potiùs obedientia speciem præ se ferunt. Verum hac fidei, seu um-  
bra,



credas, siue non credas (dummodo Calvinianam specialem fidem habeas) peris de tuâ salute securus es.

Quod & dictu monstrosum, & longè plurimis refertum absurdis, comperietur. Si enim ita est; atque, ut vidimus, Philosophatur Calvinus; frustra igitur de tot dogmatibus mundo persuadendis adeò laborarunt Apostoli; frustra symbolum condiderunt, & illud ut credendi regulam, & Christianæ fidei summam Ecclesiis commendaverunt.

Frustra vos ipsi, Domini Calvinistæ; Confessionem vestræ fidei, compluribus articulis (extra illum de fide speciali) constantem; fidelibus vestris contraditis.

Frustra adeò nobiscum, de tot aliis articulis, inter nos & vos controversis, tam atrociter digladiamini. Frustra etiam nos, quòd in horum plerisque à vobis dissentiamus, quin etiam iniuste atque indignè inter hæreticos censetis: cum manifestum sit; hæreticum non esse, nisi qui veritatem aliquam ad fidem Christianam pertinentem, pertinaciter reiicit; ad quam jam non pertinebunt controversiæ illæ, de reali corporis Christi in Sacramento præsentia, invocatione sanctorum, imaginum cultu, aliæque similes, ex suprâ prolatâ Magistri vestri doctrina atque definitione.

Frustra denique, idque potissimum, fratres vestros Lutheranos, adeò insectamini; quando & hi quoque (si ipsos audimus) fide illâ speciali præditi sunt, quâ sibi vobiscum certò persuadent, se per Christi merita iustificatos, quid-

quid

quid agant aut sentiant , in æternum perire non posse.

Neque obstare possit,quòd ( uti creditis ) in certis dogmatis exerrent:quia, ut antè nos rectè animadvertit Becanus noster in 2.parte Theologiæ,ubi de iustificatione ex sententiâ Calvinistarum : Si adulteria,furta,homicidia ,ceteraque id generis flagitia non obstant,quo minùs saluus sit, is qui credit sibi omnia remitti per Christum:nec error circa predestinationem,Eucharistiam , & ubiquitatem obstare potest,quo minùs saluus sit Lutheranus,qui credat sibi omnia remitti per Christum.



## CAPUT XXXIX.

*De eo, quod Calvinì sequaces, in fidei inter se controversiis , ad Principes aut Magistratùs sacculares, tanquam ad ultimos atque supremos , in Religionis materia , Iudices recurrunt atque confugiunt.*

**P**ertinet id quoque ad Labyrinthum Religionis reformatæ ; & exinde : in eâ nullam inveniri certam fidei regulam , evidentius ostenditur. Atque id quidem quod proponitur permirum , uti existimo , immò incredibile videbitur , candido Lectori : Eos videlicet , qui alioqui , se non aliam fidei regulam , quàm verbum Dei scriptum , neque alium controversiarum Iudicem ; quàm Spiritum sanctum per Scripturas loquentem , habere ja-  
stent,

Etent; eoque nomine Romani Pontificis iudicium (quem veluti Christi in terris Vicarium Catholica hætenus agnoscit ac veneratur Ecclesia) tanquam humanum atque profanum, contumaciter repudient; neque adedò ad Patrum consensum, aut Ecclesiæ definitionem, à nobis recurri sustineant, *ne* (ut postea loquentem audiemus Calvinum) *videatur veritas Dei minùs firma futura, nisi hominum humeris fulciatur*: eos ipsos, inquam, in Ecclesiæ suæ causis ad Magistratus laicos atque profanos, non tantùm quoad externum regimen, sed etiam quoad doctrinam, hoc est, ipsorum phrasi; quoad dogmata, fidemque ipsam, ad extremum recurrere, atque hos pro legitimis atque supremis controversiarum Iudicibus habere.

Igitur duo intelligo, impræsentiarum nobis esse præstanda. Primùm: ut doceamus, istud quod prætendit huius Capituli inscriptio, non tantùm usu apud illos esse receptum, varùm etiam, ut ita fiat, expressis decretis constitutum.

Alterum ut manifestum faciamus, quàm id per se absurdum, atque à reliquâ ipsorum doctrina alienum, atque abhorrens sit.

Atque ad primum quod attinet: in-primis lego apud Gualterium sæculo 16. Errore Calvini 14. in fine: *In Statutis Ecclesiæ Genevensis editis anno 1562. quo adhuc superstes erat ipse Calvinus, eam de doctrina controversiam, quam neque coeuntes Ministri, neque cõvocati seniores & delegati Dominatus Genevensis dirimere potuerint, ultimò tandem remitti ad Magistratum*

*in temporalem* : Eique ( si id sine risu , aut indignatione , proferri possit ) tanquam ad supremum & sacrosanctum Ecclesiæ Calvinii Patriarchalis , etiam in fidei dogmatumque controversiis , tribunal.

Nec dissimiliter , ut apud Sandæum , Becanum , aliosque expressum legimus : *Domini Status Hollandiæ mandaverunt , ut omnes controversiæ , quæ à Prædicantibus dirimi non possunt ad ipsos tanquam supremos , Iudices referantur*. Quanquam , ut vidimus , in eo decreto non perstiterint , Contra-Reformantium ( ut appellabant ) sive rigidorum Calvinistarum , impunitate compulsi.

Et in manibus sunt , ut supra monuimus statuta Synodi Calvinianæ Ultrajectinæ , anno 1612. ut habet inscriptio , à *Nobilibus & Potentibus illius Provincia Statibus* condita. In quibus varia , circa doctrinæ fideique regulas , pro suâ autoritate constituunt ; quorum aliqua inferius , aliâ occasione , tangemus.

Extatque itidem Confessio fidei Ecclesiarum Scotiæ , hoc titulo insignita : *Brevis , & generalis Confessio Christiana Religionis , secundum verbum Dei & Acta Parliamentorum ad Dei gloriam , & bonum exemplum omnium , subscripta à Regia maiestate* ( scilicet Iacobo VI ) *eiusque familia , Edemburgi 28. Ian. 1580. & regni eius 14.*

Vt & hinc appareat , quod dicebamus ; eos , qui ex Calvinii scitis , purum & putum verbum Dei , ut unicam fidei regulam , & controversiarum omnium arbitram se profitentur agnoscere

hòscere; illud non aliter quàm ut à Parlamen-  
to, aliisve læcularibus Iudicibus, propositum;  
expositum & ad sensum ipsis placentem, deter-  
minatum, pro fidei suæ norma admittere; iisque  
ampliùs quam quibusvis Ecclesiasticis Synodis  
re ipsa deferre.

Tandem vulgò notum est magnæ Britannia  
Regem à suis agnolci, ut absolutum Ecclesiæ An-  
glicanæ Caput; & quod hinc consequens est, su-  
premmum Iudicem omnium fidei controversia-  
rum. Quam in partem dignum memoratu vide-  
tur, dictum quod iam Ioannis Ogilbæi; Socie-  
tate nostra, qui anno 1615. Glasceæ in Scotia  
pro Catholica fide generosè occubuit. Quippe  
qui in carcere positus, cum à Calvini sectæ Mi-  
nistris, variis quæstionibus urgeretur; sese, inter  
cætera, id illis objecisse, refert: ipsorum fidem, seu  
Religionem, adhuc non esse decem annorum. Si-  
quidem nondum fluxisse decennium, ex quo ar-  
ticulum illum, quod Rex Angliæ sit caput Ec-  
clesiæ, in suam confessionem admiserint; cum  
antea, aiebat, contrarium iurassent, & sub-  
scripissent. Et antea quidem, dixisse hoc  
esse verbum Dei; cum nunc oppositum, ver-  
bum Dei esse dicerent. sic ille.

Tandem, ut etiam de Lutheranis ali-  
quid addam: citatur à variis ex eà scho-  
lâ Ioannes Brentius; ut qui in Prolego-  
menis adversus Petrum à Soto, Principes  
Sæculares faciat Rectores & Iudices re-  
rum Ecclesiasticarum. Idque passim in Ger-  
mania usurpare Principes A catholicos, etiam  
patebit ex dicendis.



Ex quibus sat liquet, quod dicebamus, Calviniani sequaces etiam ex suis ipsorum decretis ad Principes aut Magistratus temporales, tanquam ad ultimos controversiarum suarum Iudices recurrere. Quod quàm præposterè, & inconsequenter ad sectæ suæ fundamenta constituerint, vel ipsius Calvinii auctoritate, doceri potest. Quippe qui hunc ipsum 'recursum; velut Ecclesiæ perniciosum, esse cavendum, jam antea gravissimis verbis præmonuerit; epistolâ anno 1542. (hoc est annis 20. ante decretum illud Genevense Genevæ data 23. Augusti, ita præscribens. *De ratione agendi, hoc expendere oportet: quale exemplum adituri sint fratres, si doctrinâ Iudicem habeant Principem; ut quidquid sanxerit, amplectendum sit, & habendum protinus pro oraculo: Quale & quantum sit hoc præiudicium ud posteros. Certè si ita patimur, nobis iugum imponi, prodimus nostrâ dissimulatione, sacrum ministerium.* Et epistola sequenti 3. Septembris scripta. *Nam hoc exemplo (inquit) posthac-necesse erit, doctrinam non modò potestati, sed nutui, unius hominis, & quidem imperiti, subiectam esse.*

Quæ & plura, eandem in rem, profert supra citatus Cudsemius in Appendice ad Synodum Ultrajectinam.

Et quamvis his locis videatur Calvinus reprobare, præsertim usurpatum à Principe in causis Religionis iudicium; attamen ex verbis ipsis satis apparet, quid de voluntario quoque ad illos recursum, dicendum putet; cum etiam per illum, non leve accedat

cedat ipsi sacro ( ut appellat ) Ministerio,  
præiudicium & non mediocriter periclite-  
tur fidei veritas ; & sinceritas Religio-  
nis.

Et sanè intelligi non potest , quâ ra-  
tione eiusmodi recursus consistat , cum eâ  
doctrinâ , quâ tradunt : omnes fideles  
suos , & nempe præsertim Calviniani ver-  
bi Ministros , pollere arcano spiritu , quo  
vera fidei dogmata à falsis valeant discer-  
nere.

Vt non vanè Becanus noster , *de Titulis  
Calvinistarum* , Titulo tertio , quæstione quar-  
ta , ex occasione decreti ordinum Hollandiæ  
suprà memorati , ipsos prædicantes premat  
hoc dilemmate : *Vel enim habent spiritum  
privatum , quem sibi Calvinistæ vindicant ,  
vel non habent si habent Cur ? ipsi non di-  
rimunt controversias : Quid opus ad DD.  
Statuum tribunal confugere ? si non habent :  
Cur asserunt se habere ? Non capio ( subdit )  
hac mysteria.*

Equidem in-primis intelligi nequit , quâ  
ratione ; si eiusmodi privato spiritu omnes  
polleant , possit inter illos de dogmatis exi-  
stere dissensio , quam suo spiritu componere  
non valeant ; cum idem spiritus Dei nequeat  
ipsis dictare contraria , sed omnes faciat in  
unam eandemque veritatem conspirare.

Item , quâ ratione , ij qui se tali spiritu  
donatos sentiant , & certam ab illo sibi  
veritatem inspirari ; consentire possint , in tali  
ad Principem Magistratumve appellatione quod



re ipsa iam esset ( quod vanè nobis obijciunt ) & divino Spiritu ad iudicium humanum provocare ; & veritatem Dei discrimini falsæ atque profanæ definitionis , exponere.

Non enim apparet , ex quo principio , possint hi Iudices de fidei rebus certam proferre sententiã : quando , ex ipsa rei naturâ , supponuntur ipsi ex parte suâ instructiores non esse ; ipsius sectæ Ministris atque Doctoribus ; neque dici possit ad eum finem speciali iuvandos divini Spiritus , ut appellamus , assilentiã ; cum iuxta Apostolum Eph. 4. non Principes aut Magistratus temporales , sed Pastores & Doctores Ecclesiæ , constituerit Christus , *in opus facti ministerij , & edificationem corporis sui mysticij* & nominatim *in unitatem fidei* in nobis tuendam ; *ut jam non simus parvuli fluctuantes , & circumferamur omni vento doctrine &c.*

Ex quo ad extremum istud sequitur : quod cum talium Iudicium sententiã , ex nullo capite certitudinem ac firmitatem habeat , non teneantur diversa sentientes , ei iudicio , saltem in conscientia ( uti loquimur ) obtemperare ; sed ; ut summum , externâ specie , & politicâ quadam ratione ( prout statim magis intelligitur ) silentium pacemque servare. Alioqui enim perinde ac prius , incerta manere omniã ; & non nisi cutem ; ut ita loquar , obduci crudo vulnere , quod suppressum , urat acerbius , & dato tempore erumpat in sanientem , partemque inhalet funestioem.

Quanto certius , planius , constantius , etiam ex complurium A catholicorum confessione , in fidei salutisque

salutisque negotio, procedimus nos Catholici; qui, ubi in aliquâ fidei veritate perplexitas occurrit, aut controversia, non eâ gratiâ ad spiritus privati cæcas latebras, neque ad potestatis sæcularis impar iudicium confugimus; sed ipsius Ecclesiæ Catholicæ, (adversus quàm, ut in Petrà fundatam, & velut columnam & firmamentum veritatis, à Sponso suo stabilitam, nullam unquam hæresim prævalituram certi sumus) ea super re sensum, traditionem, definitionem exquirentes; ubi de eâ constiterit, simpliciter, promptè, immobiles, unanimes acquiescimus, & adhærescimus: certi ipsam esse, indubitatam Spiritus Sancti interpretem, & quidquid illa tradiderit definieritve, infallibilem, atque immotam, æternamque esse veritatem.

Dixi autem expressè; immobiles nos & unanimes Ecclesiæ sensui ac definitioni acquiescere: quò significarem, per eum ad Principes recursum, neutrum horum obtineri posse. Quando idem Princeps, aut eius successor, liberrimè possit, ab eo quod priùs constitutum sit, recedere: neque unquam omnes, qui eandem sectam profiteantur, in eadem dogmata consensuri sint. Ex quo necesse est fluctuare omnia, neque quidquam certi, etiam in eadem sectâ consistere. Quam in rem poterunt quæ exempli causâ subijcio, considerari.

In-primis siquidem Iacobus VI. Scotiæ Rex, ut antea vidimus, iuratus subscripsit Cõfessionem Puritanorum Scotiæ, protestans se omnibus illius

A a ; articulis

Quod, obsecro mi lector, quid, per fidem tuam, aliud esse dixeris: quàm divinæ formam Religionis, velut amictum mutare, sive pro libitu, modò sumere, modò ponere; aut, quod Arianis, suæ fidei modulum identidem variantibus, olim exprobrabat S. Hilarius, fides annuas, aut etiam menstruas, habere?

Quâ item ratione Lutheri aut Lutheranorum inconstantiam accusans, apud Claudium de Saintes, Dux Saxoniae Georgius, aiebat scire se quid eo anno, seu mense docuerit Lutherus, aut crediderint Lutherani; sed quid insequenti, seu anno, seu mense credituri sint, sibi prorsus incertum esse.



## CAPUT L.

*Adduntur nonnulla ad maiorem dictorum explicationem.*

Cæterùm cum non desint, etiam viri eruditi, qui eam, de qua agimus, potestatem auctoritatemve Magistratibus competere contendunt: è quorum numero, Hugo Grotius, libro speciali quem inscripsit, *De pietate Ordinum Hollandiae*, ab iis editum eâ de re decretum, allegato etiam magnæ Britanniae Regis exemplo, studiosè defendit: placet ad extremum ex eo Tractatu pauca decerpere, eorumque inanitate ostensâ, contrarium sensum, usumque Ecclesiae Catholicae confirmare.

Apud San-  
ctum P. 2.

Hydr. Hol-  
land. 1. 2. c. 4.

Is igitur autor, adversus Contra-Remonstran-  
tēs, argumento quodam ( ut aiunt ) *ad hominem*  
utitur, sed quod æquè valeat, adversus ipsummet  
Calvinum, sectæ autorem. Ita enim ait: *Vos mi-  
nimò de plebe Quiriti*, ( sic etenim loquitur vir  
litteratus, hemistichio mutato ex libro 1. Amo-  
rum Ovidij, quod clarius diceret; vos minimo  
cuique de cætu vestro ) *de Synodi placitis iudi-  
cium aliquod conceditis. Neque enim credere te-  
netur quisquam ( ut dicitis ) quod Synodus præcipit,  
sed de cuius veritate persuasus est. Hoc ipsum sal-  
tem Regi conceatue. Id ubi concessum sit; cogitate,  
an aliam Rex fidem, propugnare fovere, ornare de-  
beat, quam eam cuius ipse πληροφορίαν habeat; id est,  
certam persuasionem.*

Quam vocem is autor, jam magis Theolo-  
gum agens, desumpsisse videtur è textu Græco  
Epistolæ Pauli ad Hebræos cap. 10. v. 22. ubi com-  
mendatur. *πληροφορίαν πιστεως*; quam vulgatus ver-  
tit, *plenitudinem fidei*; alij autem *plenam persua-  
sionem fidei*.

Igitur iuxta hunc Calvinistam, liberum est  
cuiilibet Principi, eam quam ipse sibi fidem ut  
veram persuaserit, subditis suis tenendam præ-  
scribere; & ita ( quod supra vidimus, per absurdum  
censere Calvinum ) necesse erit, doctrinam, non  
modò potestati, sed nutui unius hominis, & qui-  
dem imperiti, subjectam esse.

Quam quidem in doctrinam fidei, ambitiosam  
usurpationem, ad eam adamavit prædictus Rex, ut  
eam sibi arrogasse non contentus, eandem aliis  
quoque Principibus persuadere conatus sit.  
Quippe quem audias, Epistolâ quadam monito-

riâ,



xiâ, Principibus Europæ missâ ( apud Sandæum  
epistolâ ad amicum Italum de dissidio Protestan-  
tium Hollandorum n.64. ) ita loquentem : *Cum*  
*Paulo, opto omnes fieri tales , hac una in re, qualis*  
*ego sum. In-primis, ut velitis scripturas pervolu-*  
*tare : ex his credendi normam petere ; neque alio-*  
*rum incertis opinionibus, sed vestrâ ipsorum certâ*  
*scientiâ* ( quæ nempe est illa jam memorata  
ἐλθορορία ) *vestrâ fidei fundamenta collocare : quan-*  
*do iustus ex fide suâ vivit , & unusquisque sit fi-*  
*de propriâ salvus.* Sic ille. Parum quidem scitè,  
aut ad scripturæ mentem accommodatè.

Etenim quod Habacuc 2. dicitur iustus in fi-  
de sua vivere; suâ, inquam ; id est, quam quisque  
subjectivè ( ut aiunt ) habeat in semetipso ; non  
rectè ita accipitur , quasi etiam ex parte creden-  
dorum, debeat unusquisque fabricare sibi fidem  
specialem & propriam; &, non potius, si securus  
esse velit, attendere quæ sit fides communis Ec-  
clesiæ Christi ; cui nempe credita sunt eloquia  
Dei, & simul commissa clavis, ea interpretandi, &  
legitimum eorum sensum aperiendi.

Et contrariâ animi inductio ( ut evidens erit,  
apertos habenti mentis oculos ) fuit, eritque sem-  
per, origo & fons omnium hæresum, & pestife-  
ra radix , supremæ in Ecclesia perturbationis.  
Hoc enim illud est, quod in Arianis , aliisque  
hæreticis graviter accusat magnus ille S. Hila-  
rius; quem utique suprâ jam audivimus , & hîc  
rursus audire liceat, in hæc verba egregiè disse-  
tentem. *Multi sunt qui simulantes fidem, non sub-* l. 8 de Triq.  
*diti sunt fidei ; sibi que fidem potius constituunt,*  
*quàm accipiunt* ( ab Ecclesia videlicet ) *sensu hu-*  
*mano*

*mana inanitatis inflati, dum qua volunt sapient, & nolunt sapere qua vera sunt: cum sapientia hac veritas sit, interdum sapere, qua nolis.*

Addimus (quod rectè observat è Calvinì scholâ antea memoratus à nobis Ioannes Serranus) iuxta mentem, B. Petri scripturam non esse *ιδίως*, id est, propriæ sive privatæ explicationis. Tandem, quod addebatur, hac ratione persuasum Principem, iustè ac rectè posse, illam fidem suam, elut ab omnibus unicè tenendam promulgare, nescio quomodo, cum Calvinì supra laudatis verbis conciliari possit.

*Epist. 2. c. 2.  
v. 10.*

Nisi fortè quis dicat, quod in modò dictis tacitè insinuaturn est; non sic accipiendum edictum Principis, ut id quod sanxerit, ita habendum sit pro oraculo, quias constringat conscientias, & non fas sit, ei qui aliter persuasus sit, intus in animo dissentire. Sed eò duntaxat, eam valere Principis providentiam, ut sic consulatur, tranquillitati publicæ, & (quâ propriè vocè usum invenio Iacobum Regem epistolâ quadam ad ordines Hollandiæ) ita *sopiantur*

*Hydri Holl.  
P. 2. c. 3. n.  
10.*

*autoritate publicâ lites Religionis*, ut ne erumpant in publicum, & tumultûs quiddam eâ gratiâ conticetur.

Veruntamen hæc ipsa etiam agendi ratio in eâ specie, quâ proponitur, adedò apparet deformis & inconveniens; ut (quidquid sit de doctrinæ ipsius consequentiâ) ne ipsum quidem Calvinum existimem, eam terminis propositis, apertè & clarè comprobaturum aut admissurum esse.

Quid enim hoc esset aliud, per fidem vestram, nisi

nisi in negotio religionis, & salutis æternæ lūdere; & figuram quandam Religionis, seu quasi mimicam & theatralem Religionis ideam, quæ politicæ paci præsertim subserviat; Macchiavelistico artificio assumere: cæterum quid sincerus Dei cultus, quid fidei veritas, quid animarum salus, conscientiarum quies postulet, nihil pensi habere. Ex quo etiam fiat, quod aliàs paucis indicavimus; ut, dum servatâ tantum externâ specie præscriptæ Religionis, unicuique privatim credendi, quod complacitum sit, libertas relinquatur, paulatim surrepat etiam nihil credendi licentia; & hinc in Atheismum Epicureismumve, hoc est in extremæ cæcitatæ ac nequitie, tandemque perditionis, barathrum, præcipitet, infelix anima: quod utinam non esset ipsâ experientiâ compertum.

Quò quidem pertinet, quod ex Guilielmo Barloo Anglo supra retulimus. *Religio in Anglia à multis annis conversa in Statismum, brevi transibit in Atheismum.*

Clausulæ gratiâ placet addere, in improvidos istos Sectarios, rectè convenire, quod Iob 6. capite scriptum est: *Qui timeat pruina, irruet super eos niv.* Nam falsò prætextu libertatis Evangelicæ, à Vicarij Christi obedientia, quam tyrannidem appellabant, se subdlexerant; Principibus modò in rebus fidei & Religionis, iurisdictionem, ut sic appellem, usurpantibus, deterioris jam conditionis se factos esse inveniunt; ita ut potiori iure, eam usurpationem censere possint tyrannicam, tum aliis de causis, tum ex eo quod exerceatur in eos, qui ex suæ sectæ placitis, sese Dei spiritui, ad id quod quisque privatim sibi credendum patet, instructos esse intelligant,



Quod fanè jam olim sensisse & deplorasse Magdeburgenos, apparet ex iis quæ scribunt in Præfatione ad centuriam septimam : Vbi *Magistratus politici*, inquirunt, aut etiam *eorum Ministri*, censorio quodam supercilio, novam *Religionis formam præscribunt*, & non minùs *imperiose*, quàm Romanus Pontifex, obtrudunt.



## CAPVT LI.

*In Synodi Calviniana processu, pronuper Dondraci habita, velut in illustri speculo, quàm nusquam consistat eius Sæcte disciplina, manifestò conspici posse.*

**P**Ræmittenda nobis est hoc capite aliqua eius Synodi notitia ; ut ex illà deinceps, id quod contendimus, efficiamus.

Præsciendum est igitur, sub sæculi currentis exordia, subortas esse in Batavis, inter Leyden-  
ses Theologiæ Calvinianæ Professores Iacobum Arminium, & Franciscum Gommarum; eorumque Assèclas ( quorum illi, propter libellum Ordinibus Hollandiæ exhibitum, *Remonstrantes*; hi, propter responsum ei libello oppositum, *Contra-Remonstrantes*, deinceps appellati sunt ) circa divinam Providentiam, hominumque seu prædestinationem, seu reprobationem, aliaque annexa decreta, gravissimas fanè turbulentissimasque controversias; non sine scandalo offensionemve totius Religionis reformatæ.

Et

Et Principio quidem cum se Arminiani, qui molliorem viam, & Catholicis propiorem sectabantur, à Gommaristis rigidis Calvinistis, & quorum illi assertiones, horridas, & in Deum contumeliosas, esse dicebant, eâ gratiâ vehementer vexari, & tantum non opprimi sentirent; opportunum factum censuerunt, ad politicum Magistratum; ipsos, inquam, Hollandiæ ordines tanquam legitimum controversiarum fidei Iudicem, protectionis causâ recurrere. Susceperunt illi non illibenter Remonstrantium patrocinium, & pro auctoritate, quam & ipsi sibi eâ in parte competere censerent; huiusmodi decretum, à Sandæo nostro relatum; pro pace (ut inquit) Ecclesiarum anno 1614. edidere.

Parte 1. H.

*Quando multum dissidij ac contentionis, per hanc regionem Ecclesiæ subortum est, ex diversis interpretationibus locorum S. Scripturæ: idcirco rebus diu multumque perpensis, usi eâ auctoritate, quæ nobis, ut summis legitimis potestatibus; iuxta Dei verbum, eorumque Regum, Principum ac civitatum, quæ reformationem Religionis amplexæ sunt exempla, competuit; imperavimus, atque etiamnum imperamus; ut in memoratis interpretationibus diligenter quisque attendat; mandantque proinde Ecclesiæ pastoribus, ne aliud; quam quod ipsi definiunt; insigant populo; quasdam verò propositiones (Contra-Remonstrantium videlicet mox referendas) nullo modo doceant.*

dris Holland.

l. 2. c. 3.

Eademque in causâ, et simili usi auctoritate Provinciæ Ultrajectinæ Ordines, in supra citatâ Synodo anni 1612. cap. 2. num. 4. præceperant

rant: *Ut in tractandis hisce materiis ea adhibeatur moderatio; ut ne cui detur occasio iure suspicandi, aliquid in Ecclesiis nostris doceri, ex quo sequi possit: Hominem ullum à Deo creatum ad condemnationem. aut: Hominem ad peccandum necessitate aliqua extrinsecus à alligari. aut incitari quengquam ad salutem à Deo petendam, cui tamen ipse absoluit eam non dare decreverit; aut facere aliquid Deum, quod ullam habeat speciem iniustitiae.*

*Hæc enim (subdunt) ad Dei infamiam, & blasphemiam Christiana nostra Reformationis, spectarent, gignerentque in aliis quidem securitatem, in aliis verò desperationem.*

*Hæc tum hi, tum illi; Remonstrantibus expressè tum quidem faventes.*

*Tumultuantur hinc Contra-Remonstrantes; & quia in eo rerum articulo, causæ suæ sic expediebat; negant; fidei controversiarum cognitionem Magistratui politico competere: & vehementi scripto ipsos ordines aggressi, demonstrant quantæ, ex eo Remonstrantium conatu, corruptelæ suboriri natæ sint: Quarum, inquiunt, quis fructus nisi; ut alterâ alteram ducentes, veritas tandem exulet, Ecclesiisque pessumdantis, merus Atheismus, aut Epicureismus obtineat; & gravem in vos vobisque subditos iram Dei concitet &c. Sic illi.*

*Quapropter exinde in dies magis ægrescentibus animis, & intendentibus se, non finetum multu, studiis partium; cum aliud nihil succurreret remedij: placuit denique ipsis Hollandiæ Ordinibus, ex Contra-Remonstran-*

tium voto, quò res efficacius, & maiori pondere autoritatis perageretur, eâ gratiâ ex omnibus Regnis Provinciisve, in quibus vigeret. Reformatæ Religionis exercitium, viris eruditis; suâ curâ ac sumptu evocatis, quasi generalem Synodum indicare: quæ denique anno 1618. mense Novembri, Dordraci urbe Hollandiæ Metropoli (ubi & alia nationalis Synodus anno 1578. habita fuerat) coacta, permultis habitis sessionibus, & sententiâ denique pro Contra-Remonstrantibus pronuntiata, anno 1619. mense Maio, conclusa & terminata est.

Quo autem eventu, successu, fructu, rei nostræ interest, inspicere.



## CAPUT LII.

*In quo; quid tandem emolumenti detrimentive, ex ea Synodo captum fuerit, expenditur.*

**E**Rgo quis Synodi tam generalis tamque Operosæ, successus aut fructus demum fuerit, studiosè Lector, attende.

Primum enim exinde, ipsi Remonstrantes ex parte suâ, magis se in suis assertionibus adversus Synodi decreta, obstinarunt: non iisduntaxat cavillationibus, quibus & olim Ariani v. g. Nicenæ Synodo, & receptius Novatores nostri Tridentinæ parère detrectarunt; puta quod Synodus libera non fuerit, quòd ipsi non fuerint auditi, quòd Synodi Patres, partim

partim propria animi inductione, partim Principum voluntate præoccupati, anticipatas iam & deliberatas sententias ad eam attulerint; quæ & his similia, potiori iure in re præsentī poterant ipsi opponere; quippe prædure ac præter æquum à Synodo habitis; ut manifestum est ex ipsis Actis.

Verum insuper ac potissimum, ex propriis Sectæ Calvinianæ principiis, Synodi iudicio obluetabantur: quod nempe secundum sectæ suæ placita, non alium Iudicem controversiarum, quam verbum Dei scriptum agnoscerent: ipsi autem iurare parati essent, sese in propugnandis suis dogmatibus, solo Dei verbo, eoque evidenti, niti.

Ad hæc inculcabant, quam recentes sectæ profitentur & iactant libertatem Evangelicam; secundum quam par non sit coarctari fidelium conscientias: sed (quod ipsi quoque Contra-Remonstrantes in scripto suo agnoscere vident) relinqui debeat unicuique facultas, id in Domino credendi, quod credendum esse, iuxta verbum Dei, interior spiritus demonstravit ac persuaserit: Sic illi; & si principiorum istius Sectæ consequentia tenenda sit, meo quidem sensu, non nimis absurdè.

Sed quid ad hos questus Remonstrantium, Domini Contra-Remonstrantes, ex parte sua reposuerint, nunc attendite.

Etenim auditis fratrum sententiis, Synodi nomine edixerunt, illis Synodi præsidēs: *Quandoquidem res, autoritate summi magistratus agitur, acquiescere debetis.*

*Vestris*

*Vestris conscientiis non imperamus : relinquatur vobis liberum iudicium privatum ; non verò publicum verbo aut calamo expressum.*

Atque has ipsas voces, ex ipsis Synodi Actis sessione 30. desumptas, apud Maximilianum Sandæum, libro de Synodo Dordrectana, consideratione 10. reperies.

At hîc fidem tuam, quæso, quisquis es, sive Catholice, sive Acatholice Lector. Potuitne quicquam ab illo Doctorem Reformatorem flore delibato absurdius decerni, aut aliâ ullâ ratione, quàm eo diserto expressoque responso (tamen si à Calvinî sensu nihil abhorrente) ipsi Calvinianæ sectæ luculentior plaga imponi : ut enim non abs re, quasdam Isaïæ Prophetæ voces huc transferam : *Stulti Principes Taneos, Sapientes Consiliarij Pharaonis, dederunt consilium insipiens. Dominus miscuit in medio eius Spiritum vertiginis, & errare fecerunt Ægyptum &c.*

Quod ut perspicias, reflecte huc paulisper animum, & rei seriem, quod ad præsens attinet, mentis tuæ oculis subjice.

Ad componendas controversias fidei gravissimas, easque veluti utraque pars confitetur, circa veritates Religionis fundamentales, inter Remonstrantes & Contra-Remonstrantes, magnâ Ecclesiæ perturbatione, & fidelium offensione exortas. atque, agitas ; conveniunt ex Britannia, Gallia, Germania, Belgio Religionis Reformatæ primaria capita : fitque Synodus appellata ab ipsis Nationalis. Longa instituitur de articulis controversis disceptatio ; examina-

tur diligenter, quid de iis ex verbo Dei sentientur sit; attenditur etiam quis de iis sit Doctoris Calvini sensus; id est, juxta Bezam, consulitur *os Domini*, & magni Prophetæ sensus exquiratur.

Omnibus discussis, atque perpensis, damnantur assertiones Remonstrantium; & iis oppositæ cum nonnulla tamen modificatione, tanquam veritates Evangelicæ definiuntur à Synodo; & ut ab omnibus tenendæ, sub pœnis gravissimis proponuntur ac promulgantur.

Quid verò postea? Nimirum post ista omnia, declarat ipsa Synodus; non esse intentionis suæ, per sua decreta, cuiusquam conscientiam constringere; sive, ad ea quæ definita sunt, tanquam fidei veritates, acceptanda obligare; sed, dummodo quis nec verbo, nec scripto, contrarium quidquam publicè doceat, liberum illi esse, id quod illi sua conscientia dicter, privatim tenere; & consequenter in animo suo, ab his quæ Synodus definierit, tutâ conscientiâ, & salvâ fide Calvinianâ, dissentire.

Ergo eâ duntaxat gratiâ, tanto molimine cogebatur ille nationalis, tot Religionis Reformatæ procerum atque mystarum, unâ cum non paucis è potestate civili deputatis, conventus; ut soli nimirum externæ paci, politicæque rationi, non autem fidei sinceritati, tranquillitati conscientiarum, animarum saluti consuleretur; neque, ut denique constaret fidelibus, quid in re præsentî, juxta verbum Dei, necessariò credendum sit: sed tantum, ut scirent, quænam eis in foro externo, ita nunc postulante rerum statu,

at



atque ob bonum pacis, quasi politica Religio-  
nis forma tenenda: ceteroqui videri, eas res ad  
salutem esse indifferentes, dum teneat quisque  
privato iudicio, quod sua sibi conscientia, ma-  
gis consentaneum veritati, consulto Dei verbo  
dictaverit.

Ex quo proinde, id consequens sit; ut si, tem-  
poris lapsu, easdem contingat recrudescere con-  
troversias, & ut versabiles sunt affectus sensus-  
que mortalium, & (quod factu pronum est) Prin-  
cipibus ipsis, seu Magistratibus aliter animo cõ-  
paratis, prævaleat factio cõtraria; possint, inquam  
alio coacto conventu, ita jam postulante tran-  
quillitate publica, definiri assertiones ante defi-  
nitis oppositæ, velut verbo Dei consentaneæ; ad-  
dito, duntaxat nullam vim inferri conscientiis.  
Atque ita etiam quoad veritates existimatas  
fundamentales, in contrarium mutari possit  
Confessio fidei Calvinianæ; non sine scandalo  
totius Ecclesiæ Reformatæ, & perturbatione  
conscientiarum.

Atqui ex vobis libens audiam, o boni: an cum  
magna illa venerandæ antiquitatis Concilia,  
puta Nicenum, Ephesinum, &c. Controversas fi-  
dei veritates, sub anathemate definiebant; exi-  
stimetis Patres illos Sanctissimos juxta ac Do-  
ctissimos, id tantum habuisse propositum, ut  
quid de illis fidei mysteriis exterius tenendum  
ac profitendum esset, decernerent; si quis autem  
in animo suo, de filio Dei v.g. indignè & contu-  
meliosè sentiret, ad salutem æternam nihil ad-  
modum interesset, censerent?

Perinde atque si Spiritus veritatis, quem

B b 2 Christus

Christus promisit Ecclesiæ suæ , non ut asserat ipse Salvator , docturus sit eam omnem veritatem; sed tantum suggesturus , quænam externa Religionis forma, aut publicæ doctrinæ ratio, in hac vel illa conditione rerum politicæ paci tranquillitatisque conservandæ magis opportuna; si-ve interim vera sit seu falsa, eadem ad salutem conducens, aut saluti contraria. Quod vel cogitare insanum sit, & asserere, sacrilegum.

Hic porro jam vide , quisquis Calvino studes, lector ingenue , quanta hic insuper rerum catastrophe, fluctuatio sententiarum, & in re omnino summi momenti, ubi de fidei sinceritate , & animæ salute agitur, quanta in totius negotij processu, inconstantia, atque perturbatio.

Primum enim ipsi Magistratus Politici , qui prius, impulsæ à Remonstrantibus, iuxta verbum Dei , & aliorum Principum eiusdem factionis exemplum, earum controversiarum iudicium sibi competere pronuntiantes, assertiones Gommaristarum, tanquam Deo ipsi iniuriosas , & in Reformatam religionem contumeliosas, publicè vetuerant ; mutatâ jam velificatione , eâdem supremâ autoritate, assertiones easdem , tanquam verbo Dei consentaneas , ab animarum Pastoribus publicè docendas defendendasque definiunt; ipsosque Remonstrantes damnant , persequuntur , & nisi conditionibus durissimis sibi propositis subscribant, proscribunt atque relegant. Ipsi, inquam , Magistratus politici. Neque enim tantum , ut habet Synodi præfatio , eadem iussu & autoritate ordinum Hollandiæ, seu fœderatarum Belgij Provinciarum , convocata & congregata est,

est, sed etiam nutu mandatoque directâ. Vnde illud est assiduum in Actis; *Sic mandarunt ordines &c.*

Quid verò hîc contra-Remonstrantes, Nimirum jam Magistratus Politici, cui antea scripto peracerbo, ullam hac in parte auctoritatem competere negaverant, eiusdem, inquam, modò decreta, Synodi nomine vestita atque subornata, ut Evangelicas veritates, suscipiunt atque exosculantur, deque adversariis hac ratione supplantatis, exultant.

Tandem, è diverso miseri Remonstrantes, qui principio, quò se ab adversariorum infestatione liberarent, Magistratum Politicum, pro legitimo atque supremo causarum fidei iudice acceptaverant, sese jam ab illo, Synodi operâ, damnatos animadvertentes, ipsius Synodi iudicium tanquam incompetens declinant atque rejiciunt: testati se nullum controversiarum Iudicem admittere, præter verbum Dei &c. Quemadmodum antea ipsi Synodo, quam meritò suspectam habebant, in hæc verba denuntiabant, apud Sandæum, libro de Synodo, consideratione 5. Vbi: *Expectabimus, inquit, quid de tota hac re Synodus indicatura sit, ut si illud comperiamus divino verbo consentaneum, suffragio nostro lati, & cum gratiarum actione comprobemus. Sin minus; patienter &c.*

In eo denique consentientes ipsis contra-Remonstrantibus; quorum in scripto contra illos edito, ea est professio, apud eundem Sandæum.

*verbum Dei solum in sacris litteris expressum, cum sit ἀποκρίσιον* (sive per seipsum, & absque

*P. 2. hydroi  
Holl. l. 2. c. 4.  
n. 14.*

B b 3 cuiuscunque

cuiuscunque Iudicis determinatione , fidem faciens ) *regula est & norma fidei. Spiritus Sanctus illuminans corda electorum, testificatur de veritate, obsignans eam in animis ipsorum, Sic illi. Pulchra quidem verba, sed quid rei subsit, attendendum est.*

Duo allagantur: scriptura , ut regula fidei , & Spiritus interior , veritatem in cordibus obsignans. Sed cum altera pars, eadem ipsa pro se alleget; quippe quæ & scripturâ profiteatur sequi ut regulam, & habere pro se internum testimonium Spiritus Sancti ; quamdiu ad hæc nullus accedit Iudex legitimus , qui vel de legitimo scripturæ sensu, vel de spiritus interni sinceritate , in alterutram partem authenticè pronuntiet , perinde incerta restant, omnia; neque est modus ullus efficax, quo finis imponatur controversiæ, & Ecclesiæ sincera pax, conscientijsque vera tranquillitas reddatur.

Atqui ex Calvini Calvinistarumque confessione, talis Iudex non est ipsa Synodus, negante Calvino, uti vidimus , eo ipso veram & certam Scripturæ interpretationem , quod Concilij suffragiis fuerit recepta; & universè affirmante cuiusvis Concilij definitionem , adhuc examinari posse ad divini verbi regulam: idque videlicet à quovis fideli, perito, imperito, lanione, cædone, puella rudi, anu delira: quam quidem si, per privatum Spiritum , minùs consētire cum ipso Dei verbo iudicet, possit, salvâ fide, à Concilio diversa sentire.

Ergo , ut dicebamus , etiam post Synodum perinde incerta pendent omnia; & ulteriori examini

mini seu inquisitioni obnoxia. Ut jam mihi liceat in novatores nostros opportunè jacere, quod olim in suos præclarè intorquebat Tertullianus in aureo libro de præscriptionibus Hæreticorum, Vbi cum illud cap. 11. præmisset: *Nemo quarit, nisi qui aut non habuit, aut perdidit*; postea subiungit cap. 14. *cum enim quarunt adhuc, nondum tenent, cum autem nondum tenent, nondum crediderunt; cum autem nondum crediderunt, non sunt Christiani.* Sic ille.

Atque ad extremum manifestum est in toto eo negotio recurrere puerilem illum, & Calvini sectæ familiarem circulum, dum pro fidei veritate dignoscenda, à Spiritu singulorum privato quasi provocatur ad Synodum nationalem, & ab hac singuli remittuntur ad suum privatum Spiritum; ut patebit rem consideranti.


Tandem quod ad talis processus formam ut, cunque sustinendam, acutè sibi effari visus est libro suprà relato Hugo Grotius, dicens: *De suâ Religione Index est unusquisque: de Ecclesia fide ipsa Ecclesia statuit*; mirum sanè hoc est, homini erudito, & in sacris litteris multum versato, tam incautum dictum excidisse. Perinde nimirum, ac si alia esse posset membrorum fides, alia corporis: aut, quasi divinus Apostolus ad Ephesios cap. 4. quod suprà monuimus, non apertè denuntiet: Christum posuisse in Ecclesiâ suâ Apostolos, Pastores, Doctores &c. qui ita Corpus Christi (quod est Ecclesia) ædificent, ut tandem *occurramus omnes* (id est universè singuli) *in unitatem fidei*, & non cir-

B b 4. cumferamur

*cumferamur omni vento doctrina &c.*

Adde : vel fidem quam ipsa sibi statuit Ecclesia , esse certam & infallibilem, vel dubiam atque fallacem. Si posterius : ergo eo ipso non erit Ecclesia Dei vivi , quæ esse debet columna & firmamentum veritatis.

Si prius: igitur permittendi non erunt singuli suam sibi fidem ex proprio Spiritu modulari: cum manifestum sit , eam falsam fore : si fuerit fidei ipsius Ecclesiæ contraria. Sed de his satis : Iam enim abundè de suscepto à nobis argumento disputatum est, & finem respectat prima hæc nostra exercitatio.



### CAPVT LIII.

*Ex decursu operis inferitur , Sectis Reformatis nihil solidi aut certi inesse : sed eas , sub speciosis prætexitibus , inanem duntaxat ideam, & fallax simulacrum Evangelicæ veritatis exhibere.*

**E**X his ergo, quæ toto Tractatu, quâ cum Dei gratiâ , potuimus fide ac diligentia pro rei momento deduximus , manifestum opinor, evadit studioso & attento Lectori, contrariis saltem præiudiciis non nimium occupato; apud adversarios nostros , nihil solidum, atque subsistens, in quo quis pedem tutò figere possit, haberi; nullam inveniri certam regulam, quâ se, in negotio æternitatis, dirigat ac firmet salutis suæ cupiens  
anima;

anima : sed potius vacillare omnia, & ob singulorum firmamentorum infirmitatem ab uno recurri ad aliud; atque ad extremum aut nihil dici; aut ad id quod primò assumptum, nec sufficiēter stabilitum fuerit, repetito labore, sed semper supervacuo; rediri. Omnem denique Sectarum novarum disciplinam, prout prætendebat scopus operis, in probroso circuitu, cæcisque & in semet recurrentibus anfractibus, & verbo uno, in Labyrintho inextricabili, versari. *Semper enim* (uti principio, cum S. Hieronymo dicebamus) *errantium fluctuant pedes &c.*

Quam equidem mentis, in vitæ suæ rationibus constituendis fluctuationem, *jactationem animi, non invenientis exitum*, & rursus, *nusquam residentis animi volutationem*, verbis ad rem nostram perappositis, indigitat, damnatque Seneca libro de animi tranquillitate, cap. 2.

At verò Lirinensis Vincentius c. 25. in fidei rebus fluctuantes animo describens, ait illos, seu tempestate jactatos, in semetipsos recurrentes, tanquam contrarios fluctus collidi : quippe *incertos quò eant, quò redeant; quid appetant, quid fugiant; quid teneant, quid dimittant.*

*Qua*, ut ipse appellat, *dubij & malè penduli cordis afflictio*, ingens quidem malum, si in eà sistatur (quandoquidem fides incerta & fluctuans nulla fides est) attamen subdit, *divina erga se miserationis medicina est, si sapiant* : id est, si diversis agitati cogitationum procellis, intelligant denique nullum se istius jactationis finem inventuros, nisi sese *intra fidissimam stationem placida ac bona maris; Ecclesiæ, inquam, Catholicæ,*  
velut



velut postliminio, *reducatur*. Sic ille. Cuius præfectoris sensus ac voces, eò libentiùs refero: quòd is quoque sit scopus proprius, ac finis unicus, exercitationis præsentis.

Porro quod addicimus: Religionem Reformatam, falsis transfiguratam, prætextibus, nihil nisi umbram, simulacrumve fallax Evangelicæ veritatis habere; id quoque certis argumentis toto tractatu evictum est: quæ placeat hoc loco in pauca velut recolligere; ut tota res sub unum, tanquam aspectum subijciatur.

In-primis siquidem illa in Titulo Confessionis Calvinianæ, jactantiæ plena protestatio: eos se esse, qui secundum puritatem Evangelij, vitam instituere percupiant, &, quod assidue crepant sectarij, sese unicè pro fidei regulâ, purum verbum Dei scriptum habere; mera verba sunt, & larva quædam, dogmatum ipsorum dedecori obregendo, obducta.

Vt enim hoc loco non exaggerem, eodem prætextu olim usos esse, quicumque ab Ecclesiâ Catholica secessionem facerent: quo facit quod apud Augustinum l. 2. contra Petilianum Donatistarum c. 1. mentio fiat cujusdam epistolæ, ab ipso in hunc modum inscriptæ: *Petilianus Episcopus, dilectissimis fratribus, compresbyteris, & Diaconibus, ministris per diocesim, nobiscum constitutis in sancto Evangelio*: manifestissimè, velut opinor, demonstravimus; eos qui præsertim sese eo nomine venditent, minimè omnium Evangelicos esse.

Quis enim cordatus, eos vel leviter puri verbi Dei studiosos cultores existimet, quos in hoc

Tractatu

Fractu animadvertat; ipsum scripturæ textum,  
 ubi id ex usu suo esse videant, corrumpere, per-  
 vertere, adulterare? eius auctoritatem variis mo-  
 dis detorere; ipsum Christum, illius autorem,  
 indignis modis deprimere, & vel vilissimo cui-  
 que de suâ sectâ parem facere; eiusdem divina  
 & sacrosancta verba ad suam censuram evoca-  
 re; tandemque manifestissimas ipsius Scripturæ  
 sententias, in sensum contrarium torquere; om-  
 nemque adeò Evangelij harmoniam perversâ  
 interpretatione dissolvere, atque eo pacto, illud  
 infidelium contemptui atque irrisioni exponere?  
 Vno verbo, quoties id eis est collibitum, non  
 sensus suos ad sacram Scripturam, sed hanc ad  
 suos sensus, per fas & nefas adducere: quod jam  
 in re ipsa non est aliud, quam seipsum, aut spiri-  
 tum suum interpretationis verbi Dei regulam,  
 contra quam oporteret, constituere. Quibus  
 denique nominibus meritò inferre liceat, Ter-  
 tulliani verbis, Sectariorum istorum discipli-  
 nam, aliud nihil, quam *adulteria Scripturarum,*  
*& expositionum mendacia* continere; atque ad  
 extremum, eosdem non puri verbi Dei studio-  
 sos cultores; sed quo nomine Marcionem com-  
 pellat idem antiquissimus scriptor, *interfectores*

*De præscrip.*  
*c. 18.*

*L. de carne*  
*veritatis* Evangelicæ appellare. Adde illos ip-  
*Christi c. 5.*  
 sos in fidei suæ propriâ regulâ assignanda, nec  
 satis constanter, nec satis exploratè procedere.

Principio siquidem profitebantur nihil reci-  
 piendum, nisi quod in verbo Dei scripto disertè,  
 & uti loquimur, in propriis terminis expressum  
 esset: quo modo videas Puritanos Anglos apud

*Britannom.*  
*l. 1. cap. 5.*

Henricum Fitzsimon tradentes: *nihil esse creden-*  
*dum,*

*dum, nisi quod in scriptura totidem verbis expreſſum ſit.* Atqui, ut ostendimus, deflexerūt primum ab ea verbipuritate ad conſequentias; ab his ad implexā & Labyrinthæam analogiam fidei, ipsā vocabuli obſcuritate rem involventes, & nihil ſatis certi aut fixi determinantes. Atqui vacillante regulā fidei, ipsam quoque fidem claudicare neceſſe eſt, neque in hac veram certamque, ſed umbraticam tantum, & imaginariam Religionem fundari poſſe.

Rurſum: cū duo ſint tanquam fundamenta, ſeu (ut Calvino loqui viſum) velut cardines Eccleſiæ Reformatæ. Quorum alter habet ſe, ut dogma fidei primarium, & ex quo reliqua apta & quaſi religata pendeant: nimirum articulus ille: *Hominem iuſtificari per ſolam fidem*: quem uti vidimus, ipſi Reformati, tanquam Eccleſiæ ſuæ animam habent, ſolum primum ſalutis fontem, omnium denique articulorum primum & ſummum; prout apud Brerleium, loquitur etiam

*Tract. 2 c. 2.  
ſect. 11. §. 3.*

Confefſio Bohemica.

At cardinum alter, ex ipſorum ſenſu, habet ſe ut norma proxima, applicans rebus credendis, ipſam regulam credendi, ſive ſcripturam ſacram; eſtque ille quem nos appellamus ſpiritum privatum, & ſecundum illos eſt arcana quædam Spiritus Sancti perſuaſio, quā quiſque fidelis certiffimè diſcernat verum ſcripturæ ſenſum à non vero, & conſequenter credenda à non credendis.

Verum cū utrumque fundamentum iſtud, inſtabile, fallax, & inſtabile eſſe aperte ibidem & multifariam oſtenderimus; neceſſe eſt rurſum, iis ſubverſis, totam religionis reformatæ machinam  
funditus

funditus ruere; neque adeò hanc esse veram Salvatoris Ecclesiam, quam utique constet ex eius verbo, supra firmam petram & immobilem, fundatam atque extructam esse.

In quem locum proinde apprimè quadret illa Ioannis Gonterij cogitatio : Religionem reformatam, statuz illi quam in somnis vidit Nabuchodonosor, videri per similem; ut quæ dici possit, habere quidem caput aureum; puta speciosum prætextum reformationis Ecclesiæ, puritatem Evangelij &c. pedes autem fictiles, hoc est, sensa & inventa humana, pro divini Spiritus persuasione, falsò obtrusa.

Atque illud dictis addere liceat: stante gemino illo Religionis Reformatæ tanquam cardine; non modò funditus subverti, universam Sancti Evangelij & scriptorum Apostoli, uti suprà vidimus, harmoniam : sed in iis quoque fundari, speciosum item, sed perniciosissimum, *libertatis* ( quam vocant ) *Evangelica* nomen : quæ aliud non est, quàm, omni sublato cuiuscunque legis obstaculo, laxata licentia, vivendi ut velis, & credendi quod velis: Quando, si rectè attenderimus, spiritus quidem privatus, omnis erroris & hæresis, cæca latebra est; iustitia autem solius fidei, omnis nequitie prostibulum, & spurciæ volutabrum. Idque ex istius religionis fructibus apertè constare suo loco à nobis ostensum.

Demum, ut susceptæ, toto isto Tractatu traditorum à nobis, probatorumque recensio, terminum aliquem constituam: erit ad extremum in rem presentem, sive ipsius reformatæ doctrinæ qualitas, sive eorum qui primi eam Reformatio-

nem

*Epist. præfixa  
ad libellum  
de cōsequen-  
tiis.*

nem subinducere aggressi sunt, conditio, facultas; animique præstantia, paulò diligentius recognoscenda.

Et doctrinam quidem ipsam vidimus, plerisque suis in capitibus, non novam duntaxat & insolentem, venerandæque antiquitatis præiudicio damnatam, neque absurdam tantum, ac paralogam, secumque ipsam non satis consistentem; sed insuper oppidò nefariam, & in Deum ipsum; ac Christum Dominum, blasphemis dictis contumeliosam. Vt vel inde; eam non de cælo haustam; aut à Dei spiritu esse profectam appareat, sed ex orco potius, atque aërialis alicuius spiritus inspiratione suggestam. Et, quod consequens est; non in eam veram ac genuinam Christi Ecclesiam, sed atram aliquam atque funestam, Anti-Christi synagogam, esse fundatam.

lib. 1 c. 7.

Quales autem fuerint primi Reformatæ, sive disciplinæ auctores, sive Ecclesiæ conditores, pudor est dicere, & non paucos ipsorum discipulos, pudet audire. Siquidem; ut de Anglis testatur autor Britannomachiæ; *quotidie doctiores omnes modestioresque, Calvino, nec immerito, ut impostori exploratissimo, renuntiant.* Et audio alibi nonnullos Lutheranismi professores, nolle se Lutheranos; sed Evangelicos appellari, quòd ipsum Lutherum pro homine perditò & æternum damnato habeant.

Et sanè, si quis attenderit suis locis memoratas à nobis, ipsorum in Deum benedictum, & in Christum Dominum horrendas blaphemias, audaces divini verbi corruptiones, & sub titulo libertatis Evangelicæ, inductam in orbem Chri-

stianum

stianum impunè quidlibet audendi committendi-  
 que licentiam; ut ipsos ex iis esse appareat,  
 quos vel S. Petrus memorat; *velamen habentes* 1. Petr. 2:  
*malitia, libertatem*; vel S. Iudas: *Dei nostri gra-*  
*tiam, in luxuriam transferentes*: Ad hæc arrogan-
Iudas v. 4:

tiam & fastum intolerabilem, quo se vel Apo-  
 stolis Christi præferunt, vel etiam Angelorum  
 Iudices esse pronuntiant; neque se esse, qui lo-  
 quantur, sed ipsum Deum per os suum loqui in-  
 solenter iactitant; Postremò ipsorum ( ut iam  
 primi ducis & auspiciis eorum, intimam cum orci  
 spiritibus familiaritatem, non inculcem) ipso-  
 rum, inquam, qui spiritu Dei perinde se præditos  
 existiment, scædam inter sese, & acerbis odiis, di-  
 risque invicem contumeliis exercitam, in fidei  
 dogmatis dissensionem. Hæc, uti dicebam, &  
 his affinia, si quis attenderit, manifestè cognoscet,  
 ipsos profectò ex eorum esse numero, *qui* ( ut  
 inquit scriptura) *se dicunt esse Apostolos, & non*  
*sunt*; & quod consequens est, fundatam ab eis Apoc. cap. 2.  
 Ecclesiam, non Apostolicam, sed Apostaticam,  
 esse censendam.

Et verò liceat in ipsum Lutherum eiusque  
 consortes, iure retorquere; quod ipse in libro in-  
 scripto, *D fensio verborum cæna* &c. Cùm Car-  
 lostadij, Zuinglij, Æcolāpadij, verba Christi, ut  
 ait, variè excarnificantium, diversas expositio-  
 nes commemorasset, in eos intorquet; ita pro-  
 loquens: *Verumtamen Spiritus Sanctus est in*  
*his singulis; & nullus vult erroris argui in tam*  
*diversis & contrariis probationibus, & textus or-*  
*dinationibus: cùm tamen unam tantum textus col-*  
*locationem veram esse oporteat. Adcò crassè &*  
*manifestè,*

*manifestè diabolus hos naso suspendit. Ita Lutherus.*

*Coloss. 2.*

Et tamen quod miserandum est, ab his Doctoribus, cæteroqui (quod item vidimus) in ipsâ fidei doctrinâ instabilibus, variis nec semper sincerè, ut eis fidi possit, illam tradentibus, sed potiùs tempori, quàm veritati servientibus, animas suas committunt infelices populi: neque animadvertunt, qui scopus est præsentis Operis, eos omni verâ certaque regulâ destitui; utique non tenentes caput, hoc est, Christum per Scripturas loquentem, & per Spiritum veritatis, quem adfuturum suæ promisit Ecclesiæ, & non per Spiritum cuiusque privatum (quo nihil est fallacius) easdem fidelibus interpretantem.

Cui argumento illustrando confirmandoque, cum quiddam occurrat adjectu dignum; placet illud in materiæ complementum subicere. & istâ tanquam coronide, exercitationem cumulare.



## CAPUT LIV.

*In quo expenditur Tertulliani locus egregius, ex quo ad extremum elucescat, simplex ac prudens Ecclesia Catholica, præ tortuosa, ac fallaci adversariorum in fidei causa procedendi ratio.*

**S**erviet hoc Caput ad id declarandum, quod contra Calvinum suprâ non semel intulimus;



ritus: quanto nempe simpliciùs, certiùs, & ad fidei unitatem accommodatiùs, procedamus nos Catholici, in quæstionibus fidei, ad Ecclesiæ sensum ac traditionem recurrendo.

Tertullianus igitur libro contra Valentinianos c. 3. tortuosis implexisque viis hæreticorum columbinam Ecclesiæ Catholicæ simplicitatem opponens: his præclaris verbis describit hæresû & Ecclesiæ Christi ingenium. *Abcondat, inquit, se serpens, quantum potest, totamque prudentiam in latebrarum ambagibus torqueat, altè ( id est profundè) habitet, in caca detrudatur, per anfractus seriem suam evolvat, torridè procedat, & nec semel totus Lucifuga bestia.*

In quibus jam duplicem agnoscis, etiam hodiernarum hæresum, & præsertim Calvinianæ, calliditatem. Alteram in eo, quòd & ipsa, serpentis instar latebrarum ambages amet, & ubi se peti intelligit, ad cæcos illos spiritus privati recessus, velut ad antrum Trophonij, aut Sybillæ specum, receptet sese. Alteram; quòd in semet implexa, & (Plautino verbo) contortuplicata, in rebus arduis vix unquam se totam semel explicet; Quod in Calvino videre est, præsertim in mysteriis, divinæ Trinitatis & Eucharistiæ.

E diverso autem nostra columba id est Ecclesiæ Catholicæ (dicente alicubi S. Augustino: *Ecclesia est columba, inter multorum corvorum improbitatem gemens*) nostra, inquam, columba (inquit Tertullianus) etiam domus simplex est, non habens anfractus tortuosos, & cæcos exitus; in editis semper & apertis ad lucem. Etenim, ut ibidem subdit: *nihil veritas erubescit, nisi solummodo abscondi.*

*L. 5. de bapt. contra Donatistas c. 16. & Tract. 6. in Ioan.*

*minibus certitudinem, quasi precario, mutuetur.*

Sic equidem proloquens, perinde atque si sectarij sui, quibus potestatem Scripturas divinas interpretandi attribuit, minùs homines essent, quàm Catholica Ecclesia, aut Pastores eius in Concilio aliquo Oecumenico, illam repræsentantes: aut quasi Ecclesiæ Dei, quam ipse Deus constituit columnam ac firmamentum veritatis, non certius, justius securiusque diceremus, ad eum effectum assistere divinum Spiritum, quam ipse Calvinus suis sectariis, tot modis suspectum spiritum illum privatum. Aut quasi denique, quod invidiosè insinuat, fateremur, verbi Dei auctoritatem fulciri humano subsidio. Quando uti dicebam, illud nobis, prorsus persuasum atque ratum est: ubi evidēs est verbi Dei sensus, illi nullā morā interpositā, subjici omnem humanam intelligentiam. Vbi autem incertus & perplexus est, cum nondum perfectè nobis loquatur Deus, recurrendum ad eos, quos verbi sui constituit interpretes: qualis nobis est, ipsa Catholica Ecclesia. Cuius utique declaratione accedente, pari obedientiā subijcimus nos verbo Dei, in sensu ab Ecclesiā proposito. Qua proinde ratione eadem Ecclesia, non fulcit verbum Dei, quasi ei auctoritatem tribuens, sed tantum efficit ut nobis jam constet, Deum isto sensu nobis loqui; quo posito ei, ut à Deo profecto fidem habemus, non propter humanam auctoritatem Ecclesiæ per se præcisè sumptam, sed propter divinam revelationem, nobis Ecclesiæ ministerio manifestatam.

Et simile, si quis attenderit, invenitur in eo

C c z casus

casu quo Deus loquitur, aut mentem suam interpretatur, per Prophetas.

Atque istud semel paulò exactiùs declarari oportuit, ad discutiendas, illas seu offucias, seu nebulas, quas eiusmodi paralogismis simpliciorum oculis offundunt, aut inscitè, aut malignè nostri Novatores.

Quo in genere, brevius me expediàm eo pronuntiato quod adversus nostrū, in rebus controversis, ad Patrum traditionem, aut etiam Ecclesiæ definitionem recursum; in Tractatu de cælibatu & voto, in hæc verba, quasi pro autoritate suâ, edicit Petrus Martyr Calvinista: *Pronuntio, inquit, mihi non videri hominis Christiani; ad hominum iudicia provocare à sacris scripturis Dei.* Sic illè.

*L de cal'iba.*

*in G. vovis.*

Neque nobis sanè, mi homo; aliter videtur: quia id quidem tunc solum verum esset, si ubi de scripturæ sensu constaret, eo neglecto contrasentire vellemus, propter contrariam Patrum aut Ecclesiæ autoritatem: quod insulsè supponis Catholicos facere.

At verò, ubi scripturæ sensus dubius est aut controversus, ad Patrum aut Ecclesiæ sensum recurrentes, non provocamus ad iudicia hominum à scripturis sacris, sed à vobis, seu à vestrà perversâ scripturæ interpretatione; supponentes non sine causâ à quovis cordato & contrariis præjudiciis non occupato, sanctorum Patrum & Ecclesiæ Catholicæ iudicium, vestris hominum nudiustertius natorum, voluntariis, & ad anticipatos sensus vestros, detortis interpretationibus, immensè prævalere debere.

Quod

Quod totum per sese quàm rectæ rationi sit congruens; confirmabit statim audiendus, complurium etiam Reformatorum, hac in parte nobis accedentium, communissimus sensus.



## CAPUT LV.

*Ex ipsorum adversariorum ingenua confessione, absque recurſu ad traditionem sensumque Ecclesiæ Catholice, præſentes fidei controversias, nullum unquam finem habituras.*

**M**agna utique vis est veritatis, quæ vel ab invitis cuiusmodi confessionem extorqueat: sed altera ex parte, magna quoque vis est pertinaciæ; quæ eos non sinat ei sed reddere Ecclesiæ, quam ex eo possint pro verâ Christi sponsâ agnoscere, quòd ea sola sic instituta sit, ut (quod prorsus erat ad eius pacem tranquillitatemque necessarium) sola queat, ubi id opus est, exortas in eâ controversias, pacifico exitu, ac fine debito, componere.

Audiat igitur primo loco, primus controversiarum, quæ hodièque vigent, motor excitorque Lutherus. Qui contra Zuinglium de veritate corporis Christi in Eucharistia disputans, & exosus tam diversas inter se eiusdem scripturæ recens excogitatas interpretationes: *Si diutius steterit mundus, inquit, iterum erit necessarium, ut propter diversas scripturæ interpretationes, ad conservandam fidei unitatem, conciliorum decreta recipiamus, atque ad ea confugiamus.* Verissimè

*si non indicem propriè dictum, normam tamen & regulam, secundum quam controversias circa fidem dijudicare debet Ecclesia, omnibus proposuit.*

At præ cæteris accuratè sapienterque eadem ex gente Fieldus, in quadam Epistola; apud eundem Brerleium: ubi ita præfatus: *Cum funestas Christiani orbis discordias, & infinitas propè de Religione dissidentium, & nescientium quid certi statuunt; aut cui parti adhæreant, dissensiones perpendo &c.* Subdit, omnibus consideratis, ad hoc unicè esse necessarium, ut ante omnia vera Christi Ecclesia cognoscatur. *Quid enim aliud, inquit, veritatis studiosis superest, quàm sedulò indagare; quanam tandem sit illa in terris Sanctorum hominum societas, illa Sponsa Christi, illa Dei viventis Ecclesia, qua est columna & firmamentum veritatis; ut illà semel inventà, communionem eius amplectantur, consilium sequantur, eius denique iudicio acquiescant.*

In idem conspirant Reformati plures, dum expressè fatentur, nullum fore in Ecclesia Dei finem controversiarum, nisi detur supremus aliquis administrator, ad quem summa rerum deferatur: Pro qua sententia citatur Hockerus ab autore Britannomachia 1.1. c.6. & apud Brerleium, Iacobus Andrea, Melanchthon, & alij, eà quidem in parte Romanam Ecclesiam melius esse constitutam agnoscentes.

*Tract. 1. sect. 3. §. 10.*

Quod ipsum ingenuè fatetur, deploratque apud Hénricum Fitzsimon, Eduvinus Sandes Eques Proteſtans: *Romani, inquit, pro communi parente, admonitore & Duce, habent Pontificem, ad lites dirimendas, controversias sopiendas,*  
ad




Quāobrem in istos Novatores (ut quod sentio, liberè proloquar) iustissimè videtur produci posse, illa Salvatoris Luc. 11. in Scribas & Phariseos intenta cominatio. *Va vobis legisperitis : quia tulistis clavem scientiæ ; eius videlicet quæ conducit ad regnum cælorum : ipsi non introistis , & eos qui introibant , prohibuistis.* Quæ verba etiam S. Ambrosius , ad eam locum S. Lucæ, ad hæreticos transfert, ita proloquens. *Arguuntur sub nomine Iudaorum, & futuro iudicio statuuntur obnoxii : qui , cum doctrinam sibi divinæ cognitionis usurpent, & alios impediunt, nec ipsi quod profitentur agnoscunt.* Proprium namque hæreticorum est, doctrinam sibi divinæ cognitionis, atque eo sensu, clavem scientiæ (qua nimirum voce Tertullianus, interpretationem legis intelligit) quasi sibi propriam usurpare ; nihil pensi habentes, quid in rebus fidei controversis ferat communis sensus Ecclesiæ, sed ex sensu proprio, seu privato spiritu, cuncta definientes, atque seipsos, & alios quos ad se pertrahunt , miserè fallentes , atque perdescentes.

*L. 4. contra  
Marc. c. 2.*

Hunc igitur in modum censebam, eum Lucæ locum perappositè in rem præsentem exponi posse. Cum vera clavis, seu via certa, assequendi eam scientiam , quæ conducat ad regnum cælorum, sit recursus ad sensum, traditionem, definitionem Ecclesiæ , quam ( uti fatentes vidimus complures ex adversariis ) constituit Christus verbi sui, seu divinæ veritatis , non tantum fidelem custodem, sed etiam legitimam interpretem; eos qui ab Ecclesia Catholica separantes se, eaque proinde certissimâ viâ neglectâ , ad sensus privatos,

ut ait, *traditionem*, sed falsam atque adulterinam, per quam furtivè & clandestinè subingredi tentantes, aut perfractâ etiam Ecclesiæ autoritate, vim inferentes; divinam non inveniunt, nec ingrediuntur, sed transgrediuntur, ve ritatem: Eundemque & tunc, & modò, & semper (quod, ubi se offert occasio, libenter, admonui lectorem meum) extitisse hæreticorum genium, atque calliditatem.



## CAPUT LVI.

*Extrema mea, atque amica, ad Novator es, si qui hac legerint, de repetendo Veteris Ecclesiæ gremio, ex Sanctorum præsertim Augustini & Vincentij Lirinensis dictis, concepta communitio.*

**E**Nimverò istis, quæ in causam nostram tam multa produximus, atque, ni valdè fallor, efficaciter approbavimus, à vobis, amici, ritè perpenſis, atque in æternitatis staterâ, perinde atque si divino adstaretis iudicio, iusto pondere examinatis, quid denique vobis subest consilij, aut quemadmodum animo vos affectos esse sentitis? Eos quippe de vobis alloquor, quibus aliqua iudicij subtilitas, & non nimium adsit pertinaciæ: nam & hi qui nimis pertinaces sint, ne ad aures quidem, ea quæ commentamur, admiserint; quibus autem sit obtusior acies animi, hi, quæ audierint, non pro eo fortassis ac res postulât, assequuntur.

Sed annon vos, inquam, expergiscimini, & ad tantam lucem, quæ sensus vestros everberat, aperit



*De Agone  
Christiano  
cap. 31.*

aperitis oculos; iamque deprehensâ sectarum  
vestrarum vanitate, mendaciis, perversitate, at-  
tenditis denique, quàm lubrico in loco pericu-  
losoque vestra verteretur æterna salus; ac secluso  
tantisper cæco illo & hostili Romanæ sedis  
odio, quod ex ipsa temporum infelicitate, falla-  
cibus inducti fabulis jam à teneris forsan imbi-  
bistis, Augustini verbo, *in Petro Petram intelli-*  
*gentes;* eidem ad extremum ausculteris Doctori  
sapientissimo iuxta ac sanctissimo: Qui perinde,  
ac vos Lutheri modò, Calvini, aut Zuinglij  
( quos quidem sectarum Reformatarum velut  
quosdam Triumviros nomino ) fallaciis detine-  
mini; sic ipse ab adolescentiâ per annos complu-  
res Manichæorum obvolutus & jactatus errori-  
bus, neque usquam alibi, stationem quietam, aut  
salutis portum reperiens, Romanæ gremio sese  
reddidit, Ecclesiæ, illiusque quâ tunc securus  
frueretur, felicitatis consortes fieri percupiens,  
omnes errantes, illos eodem provocabat verbis  
amplissimis; quæ ante hac aliâ occasione posi-  
ta, rursus ad hoc loci audientur opportunissimè

*Cum igitur ( ait magnus Doctor libro de  
utilitate credendi c. 17. ) tantum auxilium Dei,  
tantum profectum, fructumque videamus; dubita-  
bimus nos eius Ecclesiæ condere gremio, quæ usque  
ad confessionem generis humani, per successiones  
Episcoporum, frustra hæreticis (uti modo facitis)  
circumlaistantibus, & partim plebis ipsius iudicio,  
partim Conciliorum gravitate, partim etiam mi-  
raculorum maiestate, damnatis; culmen autoritatis  
obtinuit. Cui nolle primas tradere; vel summa pro-  
fectò impietatis est, vel precipitis arrogantia. Sic  
ille,*

ille, non de aliquâ opinor, Lutheranâ aut Calvinianâ Ecclesia, sed de Romanâ & Catholicâ agens:

Verumtamen potius forsan attendetis, Galli Reformati; è Gallia vestra Vincentium Lirinensem, jam ab annis mille ducentis, adversus *profanas vocum novitates*, quales hodieque apud vos Ca. 14. vigent, declamantem, iisque utentem vocibus, quæ in hæc tempora apprimè, & propriâ quadam ratione, convenient. Nam cùm verba Apostoli Pauli ad Galatas 1. v. 8. protulisset: *Clamat*, inquit, *ille vas electionis*, *ille Magister Gentium*, *ille Apostolorum tuba* &c. *Ut si quis novum dogma annuntiaverit, anathema sit. Et contrà reclamant rana quadam, & ciniphes, & musca morientes; quales sunt Pelagiani. Et hoc Catholicis: Nobis, inquiunt autoribus* &c. Quæ dixi apprimè & propriâ quadam ratione, in hæc ipsa tempora convenire: quibus videlicet, isti Apostolico verbo reclamant & obstrepunt, *rana quadam* in lacu Lemano, id est Calviniani; *& ciniphes*, è silvis Tigurinis, id est Zuingliani; *& musca morientes*, in popinis Vviterbergensibus, id est Lutherani. Quid autem dicunt Catholicis? *Nobis inquiunt autoribus, nobis principibus, nobis expositoribus, damna te tenebatis, tenete qua damnabatis; reiicite antiquam fidem, paterna instituta, maiorum deposita; & recipite: quam illa tandem? Horreo dicere: sunt enim tam superba, ut mihi non affirmari, sed ne refelli quidem, sine aliquo piaculo posse videantur. Ista Vincentius:*

Qui rursus postea, & istas refert quorundam ex ipsius voces, easque & sensu & formâ loquen Ca. 16.  
di-

di adeò fortes ad vestrum genium, ut hodie à vobis ortæ crederentur, si pro iis non proferrent antiquum autorem. Ita enim ævi sui sectarios inducit loquentes: *Venite, ô insipientes & miseri, qui vulgo Catholici vocitamini; & discite fidem veram, quam præter nos nullus intelligit, qua multis ante sæculis latuit, nuper verò revelata & ostensa est.*

*Tract. 2. c. 2.  
sect. 10 §. 3.*

Nec verò absimili modo Lutherani varij apud Brerleium loquuntur de eo dogmate, quod animam esse Reformationis vestræ asseritis, nimirum de iustitia solius fidei: nominatim autem quidam Foxius; dicens, Lutherum, fundamentum fidei Catholicæ diruisse; *aperiendo*; ut ait, *venam quādam diu absconditam; nempe gratuitam nostram; per solam in Christum fidem, iustificationem.* Ut hinc colligi possit; eorundem vos animati spiritu, quorum idioma etiam nescientes usurpatis, & phrasim ipsam imitamini.

Finiam; si, clausulæ vice, huc revocavero præclaram summi Doctoris Augustini sententiam; idcirco opportunè extremo hoc loco, repetendam, ut altius animo legentium infigatur. Is quippe vir tantus, & quem vos subinde summis celebratis laudibus, recensere volens *charissima*; ut appellat, *vincula*, quibus obstrictus teneatur Ecclesiæ Catholicæ, & pariter eidem obstringi oporteat, quicumque percipiant animæ suæ salutis consultum esse: Tractatu contra Epistolam Manichæi c. 4: ita Philosophatur. *In Ecclesia Catholica*, inquit, *multa sunt, qua in eius gremio me iustissimè teneant. Tenet consensus populorum. Tenet autoritas, miraculis inchoata, spe nutrita, charitate aucta, vetustate firmata. Tenet ab ipsa sede*

# INEXTRICABILIS. 415

*fede Petri Apostoli , cui pascendas oves suas , post resurrectionem Dominus commendavit usque ad presentem Episcopatum, successio sacerdotum. Tenet postremò ipsum Catholica nomen , quod non sine causâ , inter tam multas hareses , ista sola Ecclesia obtinuit &c. Sic Augustinus.*

In cuius præclaro sermone, quot apices attendo, tot pæne videor damnationis vestræ , ô amici, argumenta videre: nisi tanti viri exemplo sapientes, attendatis, ut cum Isaia loquar, *ad Pe. Cap. 51. stram unde excisistis ; & depositis tandem erroribus, demum manûs detis , tot documentis innuata, ac demonstrata veritati.*



FINIS.













